

КОМИ НЭМ



О.Е.БОНДАРЕНКО, Т.М.ХОРУНЖАЯ, Е.А.ЦЫПАНОВ



**КОМИ
НЭМ**


ЧУЖАН МУЛӨН ДА ВОЙТЫРЛӨН
ИСТОРИЯ ВАЖ КАДСЯНЬ
ӨНІЯ ЛУНГЪАСӨДЗ

Шөр школалы велөдчан отсөг

Лэдзёма Коми Республикаса йөзөс велөдан
да вылыс төдөмлунгъяс министерство
индөд серти



Сыктывкар
Коми небөг лэдзанін
2000



Велодчан небогсо гижома филология кандидат
Е.А. Цыпановлөн научной веськодлом да отувья
кипод улын
Донъяланкывийыс история кандидат А.Ф. Сметанинлөн

*Тайо уджсё дасьтыны водзмөстчис Финляндияыс
М.А. Кастрен котыр, сійо тиөтш отсаліс съёмөн
небөгсё лөсьөдігөн да йөзөдігөн*

Бондаренко О.Е., Хорунжая Т.М., Цыпанов Е.А.

Б 81 Коми нэм: чужан мулөн да войтырлөн история важ кад-
сянь онія лунъясөдз.— Сыктывкар: Коми небөг лэдзанін,
2000.— 272 л.б.

ISBN 5-7555-0674-4

Шор школаын велодчысь челядлы урчитомон дасьтом велодчан
небогыс висьтало коми йозлон да чужан мулон историяын туй йылысь
важ кадсянь онія лунъясөдз. Коми войтыр оло войвылын мато сюрс во
нин, тайо коми нэмнас сійо адзывлома унатор, совмома-воома мянодз,
видзома асьсыс кывсо, оласногсо да культурасо. История небог дасьтгөн
тод выло босьтома волі боръя кадо петавлом уна полос выль удж, сідзжо
коми кыв, фольклор да литература материал. Комион йозодом небогыс
пукто асьсыс пай коми школа совмодан уджо.

63.3 (2 Рос.Ком)

Б $\frac{4306020500 - 001}{M 128 (03) - 00}$ 1-00

ISBN 5-7555-0674-4

© Бондаренко О.Е., 2000
© Хорунжая Т.М., 2000
© Цыпанов Е.А., 2000
© Ульянов А.В., перевод, 2000
© Коми книжное издательство, 2000



*Медся кокни мортлы чужан муас:
Век нин гортас, мый көть сійөс суас.
Но и медся сьөкыд чужанінас:
Ставсө колө босьтны сьөлөм дінас.*

Геннадий Юшков

В о д з к ы в п ы д д и

Челядь, ті, дерт, казялінныд нин тайё небөг нимысь нэм кыв. Коми кывйын нэм кывлөн кык шөр вежөртас: сійё пасйö сё во кадколаст да дзоньнас олөм кадколаст, шуам, шулоны нэм чөж ог вунөд «олөм чөжөн ог вунөд», нэм помөдзыс радейтіс. Быдөн төдө коми йөзлысь бурсиөм — кузь нэм да бур шуд. Тані нэмыс вежөртө олөм, мортлысь олан кадколаст, ми сиам мортлы кузь олөм. Быд ловъяторлөн эм аслас нэм: кодлөн кузь, кодлөн дженьыдджык. Аслас нэм эм войтыръяслөн тшөтш, өд коми войтыр ловъятор. Сөмын морт нэм дорысь войтырлөн нэмыс зэв кузь, помтөм нөшта на. Коми йөз аски, аскомысь, дас во, сё во мысти, сюрс во мысти коляс ловъя. Чужөмсө сылысь позьё урчитны сөмын ылөсас — коркө кольөм сюрсво помын, VIII–IX-өд нэмъясө, кор коми ордпуяс вочасөн торйөдчөмаөсь удмурт ордпуясысь көнкө Кама ю ковтысын. Тайё небөггыс сетас медся колана юөръяс да төдөмлунъяс коми йөзлөн нэм йылысь, сьөкөд йитчөм лоөмторъяс да нэмөвөйся оласног йылысь. Коми йөзлөн история — тайё тшөтш Коми му йылысь висът, көть мулөн историяыс ёна ваджык да кыссьө войдөръя кадъясянь. Коми муын ёна водзынджык овлөмаөсь нин йөз, мукөд, төдтөм кывъясөн сёрнитысь ордпуяс. Комияслөн войвылө тшук овмөдчытөдзыс тані овлөмаөсь яранъяс, йөграяс да вепсъяс, насянь кольөмаөсь иннимъяс да коми кывйө пырөм кывворыс.

Татшом небогыс абу на вöвлöма, коми школа сöвмöдöмö сийö лоö аслыспöлöс пайöн, öд история велöдан небöггяс комиöн ёна важöн нин эз петавлыны, 50-öд воясынь. Небөгö 2, 7 юрпасгяс гижис О.Е. Бондаренко; 1, 4–6, 8–9 юрпасгяс гижисны О.Е. Бондаренко да Е.А. Цыпанов öтвылысь; 12–16, 18–21, 23 юрпасгяс гижисны Т.М. Хорунжая да Е.А. Цыпанов öтвылысь; водзкыв, 3, 10–11, 17, 22 юрпасгяс, бöркыв гижис Е.А. Цыпанов. Небөгас сетöм висгтгяссö позяс пыртны коми кыв велöдигöн, лыддыны содтöд урокгяс дырйи.

Коми йöз да му история йылысь тайö небөгсö дасгтöм йылысь мöвпыс петöма финггясынь, стöчджыка кө, Хельсинкиын уджалысь М.А.Кастрен котырысь, буретш сэнi чужöма проект лöсьöдны татшом небөггяссö фин-угор республикагасын вужвойтыр кывгяс вылын — мари, мордва (эргя да мокша), удмурт да коми кывгясöн гижöмөн. Öти сайын пöся атгöалам Кастрен котырсагсöс небөг йöзöдöм-дасгтöмын ыджыд отсöгысь, та вылö сгöм сетöмысь сэтчöс юралысь **Ильдико Лэктинэн** да секретар **Маргя Лаппалайнэн** öксангыслы, проектгяс координируйтгысь **Тармо Хаккарайнэн** öксайлы.

Атгöалам нöшта став отсасысьсö, кодгяс дорö ковмис шыöдчыны небөгсö йöзöдигкежлö дасгтганым. Небөг гижысыя зiлисны лöсьöдны эз кос, уна лыдпасгяса да таблицаа небөг, а вöчисны сэтшöм висгтасгöм, кытысь эскö тыдалiс вужвойтырлөн öбичагс, буряс, торгялана аслыспöлöслунгясыс, сылөн авгя, енбиа, пыдди пуктана ныв-пияныс. Öд ыджыд исторгясö вöчöны торгя йöз, нимавтöмгяс да нималанаяс, тыдавтöмгяс да тыдаланаяс. Тыдаланаясысь вöли бöрйöма коми йöзöс ёна да ылö нимöдысыгсöс: Перымса Степанöс, Иван Куратовöс, Питирим Сорокинöс, Дмитрий Батиевöс, Нёбдинса Витторöс, Геннадий Юшковöс да уна мукöдöс.

Бöргя шыöдчöмыс мян челядь дорö со — *posce te ipsum* «тöдмав асгтö», ас войтыртö, сылысь нэмсö, олöмсö важгя кадгянь öнигöдз.



1 ю р п а с

ФИН-УГОР ВОЙТЫРЪЯС

Коми йӧз, миян Коми Республикаса вужвойтыр, пырӧны фин-угор войтыръяс лыдӧ. Эмӧсь нӧшта перым-комияс, кодъясӧс 1917-ӧд воӧдз быдлаын шулісны пермякъясӧн, ӧні найӧс нимтӧны перым-комиасӧн (коми-пермякъясӧн). Комияс да перым-комияс сёрнитӧны асланыс кывйӧн, но кывъясыс ӧта-мӧд дорас зэв матынӧсь, та вӧсна йӧз бура гӧгӧрвоӧны ӧрта-ӧртсӧ.

Фин-угор войтыр лыдӧ сідзжӧ пырӧны удмуртыяс, мариечыяс, мордвинчыяс, финчыяс, карелчыяс, ижора, вепчыяс, вӧдь, саамчыяс, эстонечыяс, ливчыяс, венгрчыяс, йӧгра (хант да манси).

Ӧнія кадӧ фин-угор войтыръяс олӧны-вылӧны вель паськыда — Балтика да Еджыд саридзчыяс бокин, Скандинавия кӧджын, Асыввыв Европаса *тшӧтшкӧсінын**, Шӧр Волга ковтысын, Из (Урал) бокин, Дунай юлӧн тшӧтшкӧсінын Карпат гӧраяс дорын. Фин-угор йӧз пӧвстысь сӧмын йӧгра (хант да манси) вужчыясӧмаӧсь Азияӧ — олӧны рытиввыв-сибирса тшӧтшкӧсінын. Медся войвылынӧсь саамчыяс, рытиввылын — венгрчыяс, асыввылын — йӧгра, лунвылын мари да мордва.

Дерт, лыд сертиныс фин-угор войтыръяс вель ӧна торъялӧны ӧта-мӧдсынын. Медся унаӧнӧсь венгрчыяс (14

* Пӧлӧн печатайтӧм кывъяслысь вежӧртассӧ видзӧдӧй небӧгпомса кывкудйысь.

миллион 500 сюрс морт), сэсса финъяс (5 миллион 340 сюрс морт), мордва (1 миллионысь унджык морт). Ичөт лыдаяс пöвстö пырöны водь (сöмын 30 морт) да ливъяс (150 морт). Фин-угор войтыр пöвстын зыряна-комияс, лыд серти кö босьтны, сизимöдөнöсь (330 сюрс морт). Перым-комияслөн лыдыс 1989-öd воын вöли 152 сюрс морт.

Фин-угор чукөрö пырысь, Россия Федерацияын олысь унджык войтырыслөн эм асланыс *канму* сяма котыръяс — республикаяс либö автономияа кытшъяс. Республикаыс некымын. Тайö Коми (юркарыс Сыктывкар), Карелия (юркарыс Петрозаводск), Марий Эл (юркарыс Йошкар-Ола), Мордвия (юркарыс Саранск), Удмурт Республика (юркарыс Ижкар). Фин-угор республика нимъяс топыда йитчöмаось сэтчöс вужвойтыр йöзкөд. Россияысь Коми-Пермяцкöй Автономияа кытшын (юркарыс Кудымкар) олöны перым-комияс, йöграяслөн (хант да манси) эм асланыс кытш — Ханты-Мансийскöйөн шусьö. Россия Федерацияысь ортсыын эм 3 ашөр канму — Венгрия (юркарыс Будапешт), Финляндия (юркарыс Хельсинки) да Эстония (юркарыс Таллин).

Дыр кадөн фин-угор котырса уна войтырöс олöмыс разöдöма став му шар пасьтала. Сидз, коми йöз олöны тшöтш Сибырын, Кола көджын, финъяс — Швецияын да Россия Федерацияын. Венгръяс — Румынияын да весиг Канадаын.

Мукöд фин-угор войтырлөн аслас канму (*каналан* котыр), мөд ногөн кö, ас автономия, абу. На лыдын ижора, вепсъяс, водь, ливъяс да саамъяс.

Ижора олöны Фин курья дорын, Нева юö усьысь Ижора ю вылын.

Вепсъяс овмөдчöмаось Вөлөгда да Ленинградса обласьтъясö, Карелияö.

Водьлөн Эстония да Ленинградса обласьт костын эм сöмын некымын грезд.

Ливъяс абу жö унаöнöсь, найö олöны Балтика саридз дорын чери кыйысьяслөн некымын грездын, Латвия войвылын.

Саамгъяс — фин-угор войтыргъяс пѳвстысь медся войвыв-са олысьясысь ѳти. Найѳ разалѳмаѳсь да олѳны Норвегия-ын, Швецияын, Финляндияын да Россияса Кола кѳджын. Но, тѳдчѳдам, тайѳ муяслѳн войвыв пельѳсьясын.

Фин-угор войтыр пѳвстын сѳмын водьлѳн абу аслас гижѳд. Сийѳ чужис-пестысис быд войтырлѳн эз ѳти кадѳ. Шуам, венгръяслѳн XII-ѳд нѳмѳ, карелгъяслѳн XIII-ѳд нѳмѳ, комилѳн XIV-ѳд нѳмѳ лоѳмны асланыс шыпасгъяс, гижан-ногыс чужѳма мукѳдгъяс серти водзджык. Медся сѳрѳн, 30-ѳд воясѳ, гижѳд кыв воис йѳграѳдз.

Вѳчны кѳ дженъыдик кывкѳртѳд, позьѳ тѳдчѳдны — фин-угор войтыргъяс вель ѳна торгъялѳны ѳта-мѳдсьыныс лыд серти, сѳрни серти, культураѳн. ѳткымын котырлѳн абу на весиг гижѳд кыв, налѳн абу канмукодъыс, торгъя автономияыс.

Бѳргъя кадѳ фин-угор войтыр мѳдисны лѳсьѳдавны ѳта-мѳд костас топыдджык йитѳдгъяс. Волысьѳны политикгъяс, *туялысьяс* да гижысьяс. 1992-ѳд воын Сыктывкарын мунѳ Фин-угор войтыргъяслѳн ставмирса чукѳртчылѳм (конгресс). Миян республикаын ѳни СКУ-са студентгъяс велѳдѳны фин, удмурт да венгр кывгъяс. Сыктывкарын жѳ лѳсьѳдѳма «Коми—Финляндия», «Коми—Эстония», «Коми—Венгрия» ѳртасян котыргъяс. Тайѳ котыргъясас велѳдѳны ѳрта-ѳртлысь кыв, тѳдмасьѳны культураѳн, нуѳдѳны серпаса уджгъяслысь уна пѳлѳс петкѳдлѳм, аддзысьлѳны гижысьяскѳд да с.в. Сыктывкарѳ тшѳкыда воливлѳны Финляндияысь, Эстонияысь да Венгрияысь гѳсьтгъяс, на лыдын канмуясѳн веськѳдлысьяс. Эм миян юркарын тшѳтш фин-угор войтырлѳн республикаса культура *шѳрин*, кодѳ ѳна ѳт-салѳ фин-угор войтырлы лѳсьѳдны ѳта-мѳд костын топыдджык йитѳдгъяс.

ѳнѳя фин-угор войтыргъяс коркѳ зѳв важѳн сѳвмѳмны-разалѳмны ѳти вужсянь, фин-угор *вужвойтырсянь*, кодѳ ачыс сѳрнитлѳма ѳти ѳтувгъя *вужкывѳн*. Индѳм фин-угор войтыргъяс рѳдвужаѳсь самодий войтыргъяс дорѳ (ярангъяс, энецгъяс, нганасангъяс, селькупгъяс), фин-угор да самодий кывгъяслѳн кык вож коркѳ нѳшта на важѳнджык артмѳд-

лөма уралса вужкыв. Туялысьяс чайтöны тайö вужкывсö збыльторйөн öнiя урал кывъяслөн öткодълунъяс подув вылын. Шуам, **син** кыв мукöд кывъясын юргö тадзи: удмурт **син**, мари кывйын **пинча**, мордва кывйын **сельме**, фин кывйын **silmä**, венгр кывйын **szem**, мансиын **sam**, яран кывйын **sew**, селькуп кывйын **sai**. Öтувъя уралса вужкыв вөлöма миян кадöдз көнкö 4 сюрс воöдз, сэсся юксьöма самодий да фин-угор вужкывъяс вылö.

Фин-угор вужкывйөн сёрнитысь важ войтыр овлöма Урал öтар-мöдарас, войвывса парма-вөр да паськыд коръя вөръяс öтлаасянинын. Важ гортас вужвойтырыс овлöма миян кадöдз 3 сюрс воöдз, сы бöрын сийö торъялöма кык пельö: öти боксянь кö, угръяс вылö (венгръяслөн да йöгралөн важ пöль-пöчъяс), мöд боксянь, фин-пермяна вылö (финъяслөн, мордва, мари, коми, удмуртъяслөн важ пöль-пöчъяс). Кутшöм оласног вөлöма фин-угръясслөн сэки? Медводз, йöзыс овлöмаöсь торъя ордъясын, чери кыйöмаöсь, вöравлöмаöсь да вотчылöмаöсь, вöрса ма чукöртлöмаöсь. Öтувъя важ кыввор туялöмыс петкöдлö, мый важ фин-угръяс абу на тöдлöмаöсь му вöдитöм да скöт видзöм, но кужлöмаöсь нин кутшöмакö вöдитчыны кöртөн, овлöмаöсь горсъясын да *мукуаясын*. Тайö кадколаст помас важ фин-угръяс заводитöмаöсь волысьны важ индо-иранечьяскöд, лунвыв степьясын олысь войтыръяскöд.

Фин-перым вужкыв да вужвойтыр вөлöма миян нэмöдз 2 сюрс волөн джынвийöдзыс кымын, абу ёна дыр кыссьöма тайö кадколостыс. Сэсся тайö öтувъялуныс ачыс юксьöма **пермяна** вылö (коми да удмуртъяслөн пöль-пöчъяс) да **фин-волга** вужвойтыр вылö (финъяслөн, эстонечьяслөн, мордва да марилөн пöль-пöчъяс). Фин-перым вужкывйөн сёрнитысь вужвойтырлөн олöмыс сöвмöма водзö, лунвылынджык олысь иранечьяслысь найö велöдчöмаöсь скöт видзны да тыла ректыны, нянь вöдитны, сöвмöма водзö тшöтш йöзкотырса оланногыс. Фин-перым вужвойтыр овлöма Урал да Волга йыв костын, öнiя миян оланiнысь ёна лунвылынджык.

Ю а л ö м ъ я с да у д ж ъ я с.

1. Корсьöй мусерпас вылысь фин-угор войтыръясöс.
2. Висьталöй, фин-угор войтыръяс пöвстысь лыд сертиыс кодъяс медся унаöсь да кодъяс медся этшаöсь?
3. Кутшöм фин-угор йöз олöны Россияын?
4. Зильöй тöдмавны, кутшöм нима съöмыс венгръяслөн, финъяслөн да эстонечъяслөн.
5. Кор да кöни овлöма фин-угор вужвойтыр, кутшöм олас-ног налөн вöлöма?
6. Кор вöлöма фин-перым вужкыв да вужвойтыр, кöни найö овлöмаöсь? Кодъяссянь найö велалöмаöсь му вöдитны да скöт видзны?





2 ю р н а с

КОМИ МУ ВАЖ КАДӢ

1 ю к ӧ н

Из нэм

Ёна важ кадӢ му вылын олысьяс быдтор вӧчлӧмаӧсь изйысь: чер да пурт, гӧр да зыр. Сійӧ ылі кадсӧ туялысьяс шуисны «из нэмӧн». Важ йӧзлӧн олӧмын из нэм босьтӧ медся кузь кад. Сійӧ заводитчӧма кык миллион во сайын да помасьӧма кӧнкӧ вит сюрс во сайын. Важ йӧзлӧн олӧм-вылӧм йылысь ми медсясӧ тӧдам археологъяслӧн корсьысьӧмъяс, наӧн аддзӧмторъяс серти.

Палеолит (зэв важ из нэм).

Медводдза йӧз овмӧдчӧмаӧсь Коми муӧ буретш палеолит кадӧ. Мӧд кывйӧн кӧ, тайӧ зэв важ из нэм. Йӧз локтӧмаӧсь войвылӧ зъвер-пӧтка корсьӧм могысь, бурджык оланінъяс бӧрйигӧн. Овмӧдчӧмаӧсь найӧ изъя горсьясӧ, важ йӧз медсясӧ сувтлывлӧмны юяс да тыяс бокӧ. Тані позис чери кыйны дай вӧравны. Коми му пасьталаысь археологъяс аддзисны важ йӧзлысь вит оланін. Дерт, сійӧ кадас овны вӧлі зэв сьӧкыд. Войвылыд век войвыв. Ёна кӧдзыдаліс. Гӧгӧр шылькнитчӧма сьӧд вӧр, тундра. Кынӧмпӧтсӧ важ йӧз перйылӧмаӧсь ёнджыкасӧ ӧтвылысь, сы вӧсна мый пармаын оліс гырысь зъвер-пӧтка. Ӧтнадтӧ на вылӧ он мун: асьтӧ сёясны либӧ дойдасны. Шуам, археологъяс тӧдма-

лісны, мый Ош (Медвежьей) пешшера са важ йӧз кыйлӧмаӧсь войвывса кӧрӧс, а Бызӧвӧй изъя горсйын олысьяс — мамонтӧс. Зъвер куясысь вурлӧмаӧсь кӧм-паськӧм.

Кыйсьӧм да олӧм-вылӧм могысь став коланторсӧ вӧчавлӧмаӧсь изйысь да биа изйысь (кременьысь). Биа из сэтшӧм жӧ чорыд из, но бура потласьӧ. Важ йӧзлӧн вӧліны нӧшта изйысь вӧчӧм ӧти дорыша пуртьяс. На отсӧгӧн позис виавны зъвер-пӧткаӧс, вундавны яй, дорйысьны. Кутшӧмкӧ кад мысти важ йӧз велӧдчисны вӧчавны изъясысь мукӧдтор на. Шуам, жугӧдлісны-торйӧдлісны изйысь векныдик юкӧн да лӧсьӧдалісны гортын вӧдитчан кӧлуй. На отсӧгӧн позис гурскыны-весавны зъвер куяс, кор коліс, ёсь изторъясӧн розьӧдлісны кӧр куяс, лыяс, пуяс. Биа изйысь вӧчалісны шы йывъяс.

Муніс кад. Сьӧкыд олӧм водзӧ велӧдіс важ йӧзӧс. Найӧ велалісны лы отсӧгӧн шыльӧдны уджалан да кыйсян кӧлуйсӧ. Изйысь вӧчӧм пуртьяс, черъяс лоины тӧдчымӧн бурджыкӧсь, ёсьджыкӧсь. Лоины тшӧтш пуысь да лыысь вӧчӧмторъяс. Сэки артавис нин сӧ пӧлӧс ӧрудие.

Медводдзаысь морт воӧма Войвылӧ 300 сюрс во сайын. А Коми муӧ, туялысьяслӧн висьталӧм серти, 40 сюрс во сайын, а гашкӧ, ёна водзджык на. Важ йӧз ӧти местаас овлӧмны-сулавлӧмны дыр. Печора ю бокысь археологъяс адзисны кыйсьысь-вӧралысьяслысь Бызовая нима оланін. Сэтчӧ важ йӧз волӧмаӧсь 30 сюрс во сайын нин. Медсясӧ вӧралӧмаӧсь. Чукӧртчывлӧны вӧлӧм ыджыд бипур дорӧ. Сэтысь археологъяс адзисны мамонтлысь, кузь гӧна *сюранырлысь* (носороглысь), вӧвлысь, войвывса кӧрлысь, кӧинлысь да ошлысь лыяс. Унджык лыысь вӧлӧм мамонтлӧн. Гашкӧ, тані найӧ сійӧ кадас кулалісны да? Сюри важ йӧзлӧн гортгӧгӧрса кӧлуй да с.в.

Сэкся вӧралысь-кыйсьысьяс овмӧдчылӧмаӧсь Ош (Медвежья) изъя горсйӧ (сійӧ Печора ю дорын жӧ). Арталӧм серти, 20 сюрс во сайын. Сэтысь сюри зэв уна лы: мамонтлӧн, кузь гӧна сюранырлӧн, пешшераын олысь ошлӧн, тигролевлӧн, вӧрса ошлӧн, зубрлӧн. Но татчӧс важ йӧз медсясӧ кыйлӧмаӧсь войвывса кӧрӧс. Налысь сюръяссӧ пеш-

шераын олысьяс тэчöмаось ыджыд чукöръясö. Туялысьяс чайтöны, тадзисö вöчöмаось сы могысь, медым бöрын-джык сюръясьсыс вöчавны лымйысь да зэрысь видзан лэбувьяс. А, гашкö, кöръяссö важ йöз начкывлісны сы могысь, медым ас ногыс бурмöдны ентъяслысь сьölöмгьяссö да?

Нöшта öтитор. Сійö ылі кадас важ йöз абу вунöдöмаось миян йылысь да кольöмаось мамонтлөн кузь водзир (бивень) вылö аслыспölös гижöд, вöчалöмаось пасьяс. Зэв аслысногөн, быд пас аслас местаын, сулалö öта-мöд бöрсяыс. Мый йылысь зілісны-кöсьісны юөртны миянлы важ йöз? Талун на туялысьяс жуглöны та вöсна юрнысö. Тайö ыджыд лысö аддзöмаось важ йöзлөн Мамонт Курья нима оланінысь, öнія Инта районö пырысь инысь.

Мезолит кадö, шөр из нэмö, Му вылын шондöдöма. Мөдпөлөсджык лои зьвер-пöтка. Бырöмаось зубрьяс, сюранырьяс, мамонтгьяс да мукөд гырысь пемös. Посниджык зьвергьяссö öні вермисны нин кыйны ичөтик котырьясөн, весиг öтка йöз. Сійö кадас олысьяс медясö вöравлісны да чери кыйисны. Сэсся медым корсьны зьвер-пöткатö, налы ёна ковмис ветлөдлыны öтарö-мөдарö. Буретш шөр из нэм кадö важ йöз лөсьöдісны ньөввуж, коді ёна отсаліс налөн олөм-вылөмын. Төдчымөн кокниджык лои вöравны. Мезолит кадö жö вежсьöны горт гөгöрын уджалан öрудиеяс. На подулын лоö медясö пу либö лы. Наысь вöчалöны бур пуртгьяс, мукөдтор. Жугласьлісны кө, позис дзоньтавны, лөсьöдны выль вороп. Лыысь ли, пуысь ли. Көртыс эз на вöv да биа изйысь поткөдлывлісны ёсь изторгьяс, да найös йитлісны лы либö пу вороп дорö. Пес керавны сійö кадö нин лөсьöдавлөмны изйысь вöчөм чергьяс.

Шөр из нэм кадся важ йöзлысь оланінгьяс төдмалöма Печора да Эжва юяс бокусь. Коми му пасьтала талун аддзöма 100 татшөм оланін. Медся төдчанаыс, тыдалö, Княжпогост районö пырысь Синдор грезд дорын вөлöма. Археологгьяс сэтысь аддзисны важ йöзлысь көлуй: пыж пелыс, вöралан лампа торгьяс, кыйсьыслысь ньөввуж, ботан колясьяс, чергьяс. Сійö кадö нин йöз вöчлөмаось лызь-лям-

паяс, додьяс, пыжъяс, вѳдитчылѳмаѳсь наѳн. Вѳлѳмаѳсь, дерт, кужысь киа войтыр, лѳсьѳдавлѳмаѳсь пуысь да сюмѳдысь вѳчѳмторъяс. Мезолит кадѳ важ йѳз ассыныс оланінъяссѳ дасьтылѳмаѳсь уна ног. Тѳвся кадѳ медсясѳ йѳршитчывлѳмаѳсь мукуаясѳ, найѳс вевтъявлѳмаѳсь керъясѳн да гырысь изъясѳн. А гожѳмнас петавлѳмаѳсь муверкѳсѳ, пу вожъясысь вѳчѳм кобувъясѳ.

Неолит кадѳ, выль из нѳмѳ, важ йѳз вѳчѳны водзѳ воськов. Дерт, бара на вѳралѳны да чери кыйѳны. Медсясѳ йѳра бѳрся вѳтлысьѳны, войыв кѳрѳс корсьѳны, мойѳс кыйѳдѳны. Сяммѳны нин печкыны да дѳра кыны. Пурт дорыщъяс да ньѳв йывъяс лѳчтѳны кыкнанладорсянныс.

Дыр кад чѳж важ йѳзлѳн эз вѳв некутшѳм дозмук. Кодкѳ медводдзаысь небыдик сѳйысь вѳчѳма-тѳчѳма гѳгрѳс доз, сѳсся би вылын видзыштѳма. А кор кодзалѳма аслысикас дозмукыд, кисьтѳма сѳтчѳ ва. Орчѳн сулалысьяс шемѳсмѳмаѳсь. Ва войт абу киссьѳма бокѳ. Тадзи чужѳма неолит кадѳ сѳйысь вѳчѳм дозмук. Дерт, первойсѳ дозмукъяссѳ вѳчалісны дзик ки помысь. Изйысь бергѳдлан кытшыс лои ѳна сѳрѳнджык. Но сѳй дозмук лѳсьѳдѳмыс сѳки нин вайис важ йѳзлы уна буртор. Татшѳм дозмукас позис видзны сѳян-юан, тшѳтш пусыны. Тайѳ бара на отсаліс мортлы водзѳ сѳвмыны, коркѳя дорысь бурджыка сѳйныюны, сылѳн олѳмыс нюжаліс.

Сѳйысь вѳчѳм быд дозмуклѳн аслас олѳм, аслас туйвизь. Вермис кѳ, шуам, татшѳм дозмукыс сѳрнитны, сйѳ зськѳ унатор йылысь висьталіс. Кыдзи сйѳ чужис, кѳнѳ овліс, код ордын... Дозмукъяссѳ сотавлісны би вылын, мичмѳдлісны быдсяма серпасъясѳн. На серти позьѳ тѳдмавны, кор вѳчлѳмаѳсь дозмуксѳ, кѳнѳ, кутшѳм кадѳ, кутшѳм йѳз. Быдтор йылысь сйѳ тѳдѳ. Сѳйысь вѳчѳм дозмук, позьѳ шуны, важ йѳзлѳн пашпорт сяма.

Уна миллион во ковмис сы могысь, медым из торъясысь морт вѳчис-лѳсьѳдіс медводдза пурт, чер, гѳр. Из нѳмѳ Коми муѳ воисны медводдза йѳз, чужисны татчѳс юяс да тыяс бокин налѳн оланінъяс.

1. Корсьой мусерпасысь важ йӧзлысь оланінъяс. Висьтыштӧй, мый найӧ шедӧдлісны сійӧ кадӧ.
2. Мый выльыс чужис йӧз олӧмын мезолит да неолит кадӧ?
3. Мый вӧчлісны Бызовая оланінса да Ош (Медвежья) пещераса важ йӧз?
4. Висьтыштӧй важ йӧзлӧн уджалан да гортса кӧлуй йылысь. Кызди найӧ вочасӧн вежсьӧмаӧсь?
5. Лӧсьӧдӧй ичӧтик мойд либӧ серпас важ кадся кыйсьысь йылысь.

2 ю к ӧ н

Ыргӧн-бронза нэм

Из нэмӧс вежӧ ыргӧн-бронза нэм. Тайӧ лоӧ миян кадӧдз мӧд сюрсӧд воын. Важ йӧз олӧмын мунӧны гырысь вежсьӧмъяс. А вежсьӧмъясыс йитчӧмаӧсь кӧрт кӧлуйӧн вӧдитчӧмкӧд. Сійӧ кадӧ йӧзыс эновтчӧма вӧчасьны изйысь да быдтор (гортгӧгӧрса эмбур, уджалан кӧлуй, пурт да чер) кутӧмны вӧчавны ыргӧнысь да бронзаысь. Бронзаыс артмыліс ыргӧн да эзысь кисьтіг-ӧтлаалігӧн. Тайӧ кадсӧ сэсся кутісны шуны «ыргӧн-бронза» нэмӧн. Дерт, ыргӧнысь вӧчӧм пурт-черыд изсьыд бурджык да лэчыдджык вӧлі, но бара ӧдйӧ жугласис-чегъясис. Сэки важ йӧз думыштӧмны бронзатӧ. Кӧрт кӧлуй ӧна отсаліс войвылын олысьяслы, кокньӧдіс налысь уджсӧ. Шуам, ыргӧн черӧн морт вермис нин пӧрӧдны неыджыд пожӧм пу вит минутӧн. Из черӧн эськӧ ковмис мырсьыны 3 пӧв дырджык. Жугалӧм кӧрт кӧлуйсӧ важ йӧз эз шыблавлыны, чукӧрталісны сійӧс да мӧд пӧв сывдылісны, вӧчавлісны выль чер-пурт. Дерт, кӧрт кӧлуй вылӧ вуджисны вочасӧн, эз ӧти здукӧн. Дыр кад чӧж йӧз вӧдитчисны изйысь вӧчӧмторьясӧн да кӧрт ӧрудиеясӧн ӧтвыв. Археологъяслы сюрины, шуам, бронзаысь

вөчөм шы йыв, ыргөн-бронзаысь мукөд эмбур. Медся уна бронза көлуй археологияс аддзисны Канинской пешшера-ысь: сәні вөліны пуртыяс, кинжалтыяс, ичөтик пила, чери кыян вугыр да мукөдтор. Тані жө куйлісны сөйысь вөчөм-өжигайтөм тасьтыяс, көні ылі нәмса олысыяс сывдылөмаөсь көрттортыяс, вөліны весиг сөйысь вөчөм пантыяс. На отсөгөн, тыдалө, киставлөмны пачтыяс вылын сывдөм көртсө. Аддзөма сідзжө чери кыян көлуй. Тайө гөгөрвоана: важ йөз сийө кадө медсясө кыйлөмаөсь чери, вөрөвлөмны, вөчөвлөмны горт гөгөрын вөдитчөм могысь көрт көлуй, мукөдтор. Сэк жө ыргөн-бронза нэмын олысыяс бергөдісны тшөтш мукөд удж: вөчөвлісны колана өрудиеяс пуысь да лыысь, сөйысь өжигайтлісны чашка-тасьті, кыисны паськөм вурөм могысь дөра. Тайө кадө важ йөз дырдзык кутісны овны өти местаын, кыпөдалісны аслыныс оланінтыяс. Кутшөмөсь найө вөліны? Джынвийө мукуа кодьөсь. Паныдасьлісны лэбув сяма стрөйбаяс. Пытшкас быть вөлөма бипур места, кык либө өти петанін. Йөз зілісны нин овны ас чукөртыясөн, рөдвуж котырөн. Быд котыр кыпөдліс аслыс некымын дас оланін.

Ю а л ө м ь я с.

1. Кутшөм төдчанлун босьтө важ йөз олөмын көрт восьтөм?
2. Мөвпыштлөй, мыйла дыр кад чөж өттшөтш йөзыс вөдитчисны ыргөнысь, бронзаысь, изйысь, биа изйысь вөчөм көлуйөн.

З ю к ө н

Көрт нэм

Көрт аддзөм-восьтөм, позьө шуны, бергөдіс Му вылын мортлысь став олөм-вылөмсө. Европалөн войыв-асыввылын көрт нэм заводитчө миян кадлөн медводдза сюрс воас. Көртысь вөчөм уджалан көлуй, чер-пурт, уна мукөдтор ло-

ины төдчымөн ёнджыкось. Найо геждо жугласисны, эз чегъясны. Важ йоз дыр кад чо́ж на водитчисны тшотш биа изйысь да бронзайсь вочом колуйон. Но вочасон корт дзескоддо из да бронзаос. Изйысь вочомторъяс пыр геждоджыка паныдасьлоны йоз оломын. Наысь ньов йывъяс омоля нин вочалоны. Бронзайсь, шуам, пыр ёнджыка кутоны дасьтыны быдсяма мичмодчанторъяс — пражаяс, пуртъяс, *пелькытшъяс* (исергаяс). Печора бокса Новый Бор дорысь, шуам, археологъяслы сюрёма бронзайсь вочом айморт, юр вельтас кодлон пукало лэбач. Кортыд корт и волома. Сийо одйо пырис важ йоз оломо. Кортысь одйо кутисны дасьтавны пуртъяс, шыяс, ньов йывъяс. Тайо сето важ йозлы позянлун бурджыка кыйсыны, одйоджык керавны-вундавны яй, мукодтор.

Оласногыс важ йозлон волома дзык бронза нэмын кодь. О́ни вай висътыштам, мый вочломны бронза нэмас важ йозыс? Сэки ылі кадся олысьяслон содо кортон водитчан сямыс. Кортсё сывдоны торъя бипур вылын. Сэсса кисталоны дозмукъясё. Та бо́рын нин босътоны кортторсё да гордодз донодоны. Дороны доран ступа вылын, дорчысь камоддо мый колло — пурт либо чер. Вочалисны тшотш сийо каддо сейысь дозмук. Но сейсё кутисны гудравны посни дагырысь лыа сорон, сидз шусяна дзимбыр сорон. Та бо́рын дозмукъяслон нэмыс ёна нюжаліс, найо эджык кутны би вылын жугласьны да потласьны.

Корт нэм помын важ йоз пыр тшо́кыджыка олоны отилаын. Эз нин вешъявны отаро-модаро. Вочасон быроны мукуаяс. Позьо шуны, важ йоз кыподчо́ны му веркосо, кыподоны-лосьодоны аслысполос оланінъяс. Найо во́лины нель пельосаосъ, мукоддырйи кузьмососъ. Татшом оланін пытшкас,гырысь изъяс кытшын, пыр во́лі ломало бипур. Изъяссё тэчлісны сы могысь, медым найо дырджык кутисны ас пытшкас шоныдсё. Татшом «пачьяссё» важ йоз лосьодавлисны уна ног, керка шоро, стен бокко. Оланінас волома йозлы петан-пыранін, мукоддырйи кык на. Первойсё быд татшом керкаын узыліс-овліс кык котыр, кык семъя, 10–14 мортодз. Бо́рынджык серпасыс вежсьо. Ку-

тісны овмөдчавны өти котырөн. Овмөдчыліс кө, шуам, кык семъя өтилаө, оланінсө юклісны кык пельө — өти жыр-йын вөліны айловъяс, мөдын — энъяловъяс. Татшөм ичө-тик грездас овліс 20–30 морт. Гожөмнас тэчлісны-вөчлісны понөлысь чомъяс. Зэр-слөт веськалөмсьыс татшөм лэбувсө вевттывлісны сямөдөн.

Көнкө миян кадся IV–V-өд нэмъясын Эжва ю бокө воөны тышкасьны радейтысь ветлысь-мунысьяс (кочуйтысьяс). Найө медсясө скөт видзисны, комияс моз эз вөравны да чери кыйны. Выль йөз воөм йылысь бура висьталөны археологъяслөн аддзөмторъяс. Емва ю вылын, Весляна грезд дорысь налы сюрисны пуртөса шыпуртъяс да кинжалъяс, көртысь вөчөм вөвъяс да өшъяс, *көрт дөрөм*. Аддзисны археологъяс тшөтш мукөд эмбур, на серти позис стөча шуны — став сюрөмторйыс абу татчөс, локтөм йөзлөн. Найө воөмаөсь ылі Войвылө да вочасөн овмөдчөмаөсь Коми муө, сэсся вужъясьөмаөсь татчө. Найө велөдөмны коми йөзөс медсясө скөт видзны-дөзбөритны.

Археологъяс сідзжө аддзисны му пытшкысь уна көрт көлуй. Уна сикас амулетыс, важ йөз чайтөм серти, видзліс мортөс быдсяма лекторсьыс. Тайө амулетъяс вылас серпасалөма уна пөлөс зъвер-пөтка. Вөчөма найөс медсясө бронзаысь, гежөдджыка пуысь либө лыысь. Аддзөмторъясыс вөчанног сертиыс мунөны перымса зъвер-пөтка стиль вылө. Сюрөмторъясас серпасалөма ошкөс, йөраөс, лёкгагйөс, морт чужөма лэбачөс да с.в. Тадзи важ йөз петкөдлісны ассьыныс му вылын олөм-вылөм гөгөрвоөмсө, висьтавлісны, кытысь мортыс лоөма-чужөма. Найө мөвпалісны, мый енколалөн (став муыслөн) эм куим юкөн: вылысса, шөр да улысса. Вылысса юкөныс йитчөма лэбачьяскөд, йөраяскөд, өшъяскөд, көръяскөд. Шөр юкөныс — морткөд либө морт сяма олысьяскөд (морт-йөра, морт-көр да с.в.). Улысса юкөнас вөлөма лёкгаг. Сійө петкөдліс кулөмаяслысь мир.

Сійө ылі кадас чужө-ловзьө нин өта-мөд костын вузасьөм. Дона куяс ньөбөм-вежөм могысь купечьяс вайлывлісны войвылө зарниысь вөчөм мичмөдчанторъяс, крусталысь да княничаысь сикөтшъяс. Вермас лоны, сьөм пьд-

ди татчӧс олысьяс мынтысьлісны бронза торъясӧн. Тайӧ жӧ ылі кадыскӧд йитӧны археологъясӧн аддзӧм кладъяс. Торъялӧны нин гӧль да озыр йӧз. Коми муын сӧкся войтыр йылысь стӧчасӧ абу тӧдса, миянлы ӧні абу ясыд, кутшӧм кывйӧн найӧ сёрнитлісны, кутшӧм енъяслы эскылісны. Насянь кольӧма миялы сӧмын гырнич торъяс да с.в. Да нӧшта тӧдмавтӧм-гӧгӧрвотӧм *иннимъяс* (топонимъяс).

Ю а л ӧ м ь я с да у д ж ь я с.

1. Мыйла тадзи шуӧны: из нэм, ыргӧн-бронза нэм, кӧрт нэм?
2. Мый вӧсна кӧрт нэм шуӧны важ йӧз олӧмын медся тӧдчанаӧн?
3. Висьталӧй бронзаысь вӧчӧм сюрӧмторъяс йылысь.
4. Юксыштӧй аслад мӧвпъясӧн сы йылысь, мый вӧчлісны важ йӧз.
5. Лӧсьӧдӧй ичӧтик висьт важ йӧз оланін йылысь.





З ю р н а с
КОМИ ВУЖЪЯС

1 ю к ö н
Öтувъя перым кадö

Тi, челядь, тöдöмысь, кывлiнныд нин, мый коми йöзлы медматыс рöдвуж войтырыс — удмуртъяс, öд коми кыв удмурт кыв дорö зэв матыс. Миянлысь кывъяснымöс оз весьшöрö пыртны öти **перымса** вожö. Вайö öткодялам некымын кыв: коми — **ай**, удм. — **айы**, коми — **пожöм**, удм. — **пужым**, коми — **нöк**, удм. — **нöкы**, коми — **дорны**, удм. — **дурыны** да с.в. Коми да удмуртъяслөн пöльпöчъясыс, сiдзкö, ёна важöн овлöмаöсь öтилаян, сёрнитлöмаöсь öти öтувъя кывйөн. Тайö важ вужвойтырсö шулöмаöсь пермянаөн, öтув олан кадколастыс налөн вöлöма зэв кузь — миян кадöдзса 2 сюрс во шöрсянь миян нэмын VIII-öд нэмöдз, матö 1500–2000 во чöж. Сэки нин тайö вöлöма öтувъя, öти кывъя ыджыд войтыр, овлöма сийö кöнкö Кама кывтыдын. Йöзыс кынöмпöтсö перйылöмаöсь вöралöм, чери кыйöм да му вöдитöм, скöт видзöм помысь, налөн ёна сöвмöма кöрт сывдöм, кучик вöчöм. Тайö кадколастыс пырö водз кöрт нэмö.

Важ олöм туялысьяслөн чайтöм серти, миян кадöдз V-öд нэмын нималана историограф Геродот гижöма **будинъяс** йылысь да индöма тайö ним отсöгөн буретш пермяна вылö. Геродот висьталöма на йылысь тадзи: «Будинъ-

яс — ыджыд да уна лыда йӧзсикас, быдӧнлӧн югыдлӧз рӧма синъяс да пемыдгӧрд юрси. На муын сулалӧ Гелон нима пу кар. Карсӧ кытшалысь *бердыс* джуджыд, пуысь вӧчӧма. Пуысь тшӧтш керкаяс да вежакеркаяс. Ӧд сәні эмӧсь сёртӧм ен мыгӧръяса, эллинса енъяслӧн вежаинъяс, пуысь вӧчӧм вӧлтаръяса, эллинса ногӧн вӧчӧм пу вичкояс. Быд кык воӧ будинъяс пасйӧны Дионислы сиӧм гаж да ставсӧ вунӧдчытӧдз гажӧдчӧны. Гелонын олысьяс важысянь вӧлӧмны эллинъяс. Вузасян оланінъясысь найӧс вӧтлӧм бӧрын овмӧдчӧмаӧсь будинъяс пӧвстӧ. Сёрнитӧны скифъяслӧн кывйӧн, ӧттшӧтш эллинса кывйӧн. Сӧмын будинъяслӧн эм асланыс кыв, кывйыс да оласногыс налӧн торъялӧ гелонъясысь. Тайӧ дзик ӧти войтырсикас, кодӧ сийӧ муас сейӧ пожӧм кольяс. Мӧдарӧ, гелонъяс му вӧдитӧны, быдтӧны фруктъяс, нянь сейӧны. Мыгӧр сертиныс да кучик рӧмнас найӧ абу будинъяс кодӧсь. Став му пасьталаас налӧн быдмӧ уна сикас пуяса сук вӧр. Тшем вӧр пытшкас эм зэв ыджыд ты, сийӧс кытшалӧны нюръяс да бадьяс. Тайӧ тысьыс кыйӧны вурдъясӧс, мойясӧс да мукӧд паськыд юра пемӧсьясӧс. Тайӧ пемӧс куясысь будинъяс пась вурӧны».

Венгрияысь академик Петер Хайду гӧгӧрвоӧдӧма Геродотлысь висьтасьӧмсӧ таdzi: пермяна (будинъяс) овлӧмны лунвывса, кутшӧмкӧ иранскӧй войтыркӧд орччӧн, велӧдчӧмаӧсь насянь му вӧдитан культураӧ да вочасӧн вуджӧмны вужъясян олӧмӧ, ӧтилаӧ пондӧны кыпӧдны керкаяс. Тайӧ ставыс кольӧма кывворӧ. Сӧдз, ӧткодь кывъяс пасйӧны му вӧдитӧм да скӧт видзӧм (коми — **ид**, удм. — **йыды**, коми — **туь**, удм. — **тысь**, коми — **амысь**, удм. — **амезь**), кӧрт сывдӧм (коми — **емдон**, удм. — **андан**, коми — **зарни**, удм. — **зарни**), культура да йӧзкотырса олӧм петкӧдланторъяс (коми — **небӧг**, коми — **мывкыд**, удм. — **мылкыд**, коми — **кан «сар»**, удм. — **кун «канму»**). Ӧтувъя перым кадколаст помлань пермяна заводитӧмны волысьны булгаракӧд, тюрк кывъя йӧзкӧд, ӧния чувашъяслӧн пӧльпӧчкӧд. Найӧ миян кадӧ VII–VIII-ӧд нәмъясӧ лӧсьӧдлӧмаӧсь Волга-Камаса Булгария ен канму, пермяна пыр-

лісны сэтчө либө зависитлісны сысысь. Удмурт да коми кывйö пырöма важ чувашъясысь вель уна кыв, му-вöдитöм, ремеслöөн йитчöм кыввор: **карта, кольта, кушман, сёркни, öныр «седлö», чарла, чумали, чипан, кан «сар», зеп, куд, чуман.** Таысь нин тыдалö, мый коми да удмуртъяслөн пöль-пöчъясыс унаторйö велалöмны важ булгарасынь.

VIII-öд нэм помö тотара-монголъяс жугöдісны булгаръяслысь канмусö, пермяна сійö кадсянныс вочасөн сэсса торъялісны кык матысса войтыр вылö, көть налөн аснимъясыс юргöны весиг öнöдз öткодя — комияс асысö нимтöны **коми морт, удмуртъяс удмурт, морт/мурт** кывйыс öти иранскöй кывйысь петлöма, вежöртöма «морт, айморт».

Ю а л ö м ь а с.

1. Кутшöм войтыр рöдвуж войтыръяс пиысь комияс дорö медматын? Кутшöм кыв коми кыв дорö медся матыс?

2. Кутшöм кадколастö комилөн да удмуртъяслөн пöль-пöчъясыс овлöмаöсь öтлаын да көні?

3. Мыйö важ пермяна велöдчылöмаöсь лунвылынджык олысь войтыръяслысь? Кутшöм кывъяс пырöмаöсь комиö важ булгаръясысь?

2 юкөн

Коми войтырлөн ашшөр туйяс

Миян кадö VIII-öд нэмсянь кымын öтувъя перым йöз (пермяна) юксöмаöсь кык матысса войтыр вылö, лунвылын олысь удмуртъяс да войвылынджык олысь комияс вылö. Коми йöз вöлöма öти ловъя öтувъя войтырсикас, сійö овмöдлöма öнйя Перым обласътлысь инъяс, кызвынсö Кама да сыö усысысь юяс пöлөн. Лунвылынджык олысь удмуртъяс веськалöмаöсь тотара-монголъяс улö, войвылынджык олысь комияс дыр кад чöж овлöмны на ашшөр олöмөн. Дерт, лунвывсянь тöдчöмыс вöлöма вель ыджыд жö. Комияслөн

(зыряналон да пермякъяслон) весиг они некутшом гырысь торъяланлун кывъясын да культураын абу, коть уна нам чож кык войтыр-вок олони дзик торйон, зумыд йитодьястог.

Корко Х-од намсянь важ коми войтырысь войвывса-джыкинъясын олысь ордъяс (родъяс) пондомаось водзо овмодны рытив-войвывса инъяс, вуджомоось вочасон овны Сыктив, Луза, Юг, Эжва да Емва вожъясо. Йитодьясыс коми войтырлон торъя юконъяс костын воломны енось, найо торксюмаось лунвывсянь рочьяслон локтом борын, кор найо овмодомны да рочмодомны Вятка бердса инъяс. Тадзи вочасон торъялума коми йозлон этнография боксянь кык медтодчана юкон — лунвылынджык олысь перым-комияс да ыло войвыло паськалом зыряна-комияс. Коми йозлон коркоя отувлун йылысь висьтало ношта сийо, мый медваж гижод-пасйодьясын коми йозос нимтыломны оти *Пермь* нимон, сомын торйодлисны овмодоминъяс сертигис — перым-комияслысь поль-почьясо с нимтылисны **Ыджид Перым**, зыряна-комияслысь поль-почьясо шулисны **Ичот Перым**. Ыджид Перымлон юркарнас волума Чердин, сани волума ен оксыувлон шорин, бура енмодом изкар, сани пукавломны коми оксыяс. Войвывлань овмодчом комияслон, кодъясо рочьяс шулывлисны **зыряне** нимон, шориныс волума **Емдин**. Вайдор комияс овломаось паськыда, рытив-вылынджык, Юг да улыс Эжва (ония Котлас кародз, сылон коми нимыс волума Пырас), Вилядь ю полон сулавломны коми сиктъяс. Ония кадэ сани кыло роч серни.

Коми йозлон лунвывса вужъясыс бура тыдалоны оласногыс да кывйысь, культураысь. Медводз, зыряна-комияс, ония оланинъяс овмодиг, вайисны аскодыс му водитан да скот видзан сям, мыйо найо велавлисны ена важысянь нин лунвывса войтыръяслысь (иранской йозлысь да чувашъяслысь, важ булгаралысь). Му водитысь войтырлон важысянь нин воли отлао йитчума кресьяна да воралан, чери кыян оласногыс. Тайо век мездывлис коми йозос тшыг куломысь. Йозкостса поэзияын зэв тодчана ин босытоны му водитигон сылан сыланкывъяс. Кыввор серти поэо сточа

висьтавны, мый миян важ айяс овлёмаось войдөр лунвы-
 лынджык, Кама ковтысын, өд сёрниным видзё уна важ
 торъякыв. Коть йёзос кытшалысь вөр-ваыс важон нин веж-
 сис, уна «лунвывса» кыв кольёма миян сёрниө, шуам, тупу
 «дуб», сирпу «вяз», нинпу «липа», кый «змей», XIX-өд нэм-
 са кывкудъясө пасйёма улмө «яблök» кыв. Войдөр Коми
 му пасьтала век новлісны кучикысь вурөм көм, но кыв-
 йын, мойдъясын паськыда төдса нинкөм кыв. Уна кыв
 миян вунөма, найө кольөмны перым-коми сёрниө, шуам,
 катшальөм «вишня», сьовбөр «свиристель», дзулимкай
 «иволга», өмидзкай «малиновка», ниндуль «валуй», лым-
 дорчача «подснежник».

Өнія комияс торйөдöны асьсө öта-мөдсьыныс, перым-
 комияс зыряна-комиясысь да мөдарө. Но ставныслөн эм
 асьсө нимтан öти *энтоним**, ним — **коми морт, коми вой-**
тыр, отир, комияс, комизэ. Тайö бара на висьталө сы йы-
 лысь, мый войдөр, миян кадö IX–XIII-өд нэмъясö, коми
 йёз овлёмаось öтвылысь на.

Перым-комияслөн историяын туй йылысь неыджыд
 юрпас сетöма тайö велөдчан небөг помын. Сюсь лыдды-
 сьысь сэтысь вермас төдмавны вок-войтырным йылысь ёна
 унджык.

Ю а л ö м ь я с.

1. Көні сөвмис да овліс öтувъя коми войтыр, кутшөм овмөс
 вөлі налөн?

2. Кутшөм кывъяс висьталöны, мый зыряна-комияс воём-
 ны войвылө лунвывсаджык муясысь?

3. Көні войдөр овлёмаось зыряна-комияс? (Өні сәні кылö нин
 роч сёрни.)



* *Энтоним* — войтырлөн ним.



4 ю р н а с

ЭЖВА ПЕРЫМ (XI–XIV-өд НЭМЪЯС)

1 ю к ö н

Перымса йöзлөн овмöс

Коми йöзлысь пöль-пöчьяссö важ роч гижöдъясын пас-йывлісны *Пермь* нимөн. Кывйыс тайö, вуджöдны кө регäтаа фин кывйысь, лоö «му пом, ылі му». XI–XIV-өд нэмъясын важ коми войтыр (перымса йöз) овлöма Эжва ю кузя (дзик Пырасöдз), Сыктыв, Луза, Вашка да Емва юяс бокын. Накöд орччөн овлöмны рочьяс, вепсьяс, яранъяс, йöгра войтыр.

Оланінъяссö сійö кадö важ йöз кыпöдлісны медсясö ю бокъясö. Вөр-ва найöс вердіс да юкталіс. Сэссия ю кузя позис воодчыны öти грездянь мöдöдз. Быд татшöм ичöтик грезд миян пöль-пöч видзлісны лёк йöзысь, топыда потшлісны кер-пöвъясөн. Комияслысь сэкся олöм туялысьяс аддзисны важ йöзлысь сикт-грезд колясьяс Эжва, Сыктыв да Емва юяс бокысь. Быд сикт-грезд гөгөр кодйывлісны рövъяс, мед некод эз вермы уськöдчыны татчöс олысьяс вылö. Керка öшиньяс видзöдöны вöлі векджык юлань. Öд юыс вöлі коми йöзлы медбур ветлан туй.

Оланінъясыс вöлöмаöсь öнія вөр керка сямäсь. Керка шöрас лöсьöдлісны изъясысь тэчöм пывсян гор кодь пач. Сэні дасьтылісны сёян-юан, шонтысьлісны ар-тöвся кадö. Бипурсö ломзöдлісны бива көрт да бива из отсöгөн. Көртсö вачкылісны-гирснитлісны бива изйö да чепöсйöм бива киньөн

өзтывлісны сямод. Быд керка дорын жө коми йоз кыпöд-
лывлісны вöчаснінгяс (мастерскöйяс), сёян колясторгяс,
өг шыблалан гуяс.

Коми му сійö кадö, позьö шуны, сулалöма сьод вөр
шöрын, гөгөр дзирдалöмны тыяс да юяс. Дерт, важ коми
йоз весь эз овны. Медясö вöралісны, кыйисны чери. Öти
кывйöн кө, перйисны аслыныс кынöмпöt. Звер куысь в-
равлісны новлан көлуй. Вöралан сямыс йöзлөн вöчасөн со-
дöма. Кыйлісны ош да йöра. Медясö шыясөн, ёсь көрт
йыла дротикгясөн. Сэки нин важ комияс велалöмны
торйöдны гырысь звер-пötкаöс посниысь, казавны дона куа
вөрпаöс. Шуам, лöсьöдавліны найöс кыйöм могысь лöся-
лана шыяс да ньöвгяс. Торйöн ёна күтісны төвся кадö руч,
ур, низь, сьодбöж да тулан кыйны. Та йылысь висьталö
нöшта важ коми йöзлысь аддзöм кыйсян календар. Көрт
кольча-кытш вылö серпасалöма öкмыс вөрпалысь — ош-
лысь, войвыв көрлысь, сьодбöжлысь, йöралысь, вурдлысь,
ручлысь, урлысь, туланлысь, санлысь — мыгöрсö. Весиг
индöма-пасйöма, кор на вылö позьö кыйсьыны. Татшöм
календарсö лöсьöдны коми вöралысьяслы отсалöма уна во-
ясөн чöжöм тöдöмлуныс. Тайö тöдöмлунгяссö найö в-
уджöдісны нэмгяс пыр, ылі пöль-пöчгяссиянь мянöдз, Коми
муын öнйя олысьясöдз. Чери кыйöм могысь важ йöзлөн
вöліны вугыргяс, азьласгяс, воста шыяс (гарпунгяс), бо-
тан вöйтан сьökыд изгяс.

Коми йоз сэки эз сöмын вöравны да чери кыйны. Найö
видзисны тшötш пода (скöt). Рöдмöдісны вöвгясöс,
мöсгясöс, ыжгясöс, порсгясöс. Вурунысь велалісны кыны
көм-паськөм, мукöдтор.

Көрт чер лöсьöдöм бöрын лои кокниджык му вöдит-
ны. X—XI-öд нэмгясö муяссö гөрлісны ю бокгясысь либö
сьод вөр шöрысь, керавлісны-сотлісны пуяссö да сэтчö вöча-
лісны град йöргяс. Муяссö небзьöдöм могысь керыштліс-
ны уна вожгяса коз пу да сы отсөгөн гөрлісны. Быдтіс-
ны-вöдитісны коми йоз сэки анькытш, ид, зөр, рудзөг. Быд-
танторгяссö дöзьöритны перымса войтырлөн вöлі нин пу
пиня агас, бöрынджык пу пинь местаö пунктісны-лöсьöдісны

корт пиньяс. Арнас сэсся пуктассо идравлісны. Ытшкисны муяссо коса-гөрбушён да чарлаён. Му вөдитомыс важ комияс олөмын век вөлөма зэв төдчанатор. Чери кыйөм, вөралөм да му вөдитөм кындзи найө тшөтш вөчалісны сөйысь гортсаяслы чашка-тасьтi, сөян-юан видзөм могысь гырничьяс, мукөдтор. Пода да вөрпа куяс пелісны, сэсся вурлісны наысь көм-паськөм. Лыысь вөчавлісны-вундавлісны быдсяма мичмөдчанторьяс.

Корт көлуй зумыда пырө коми войтыр олөмө. Киподтуя йөз, кужысь дорччысьяс, удж кокньөдөм могысь, вөчалісны выль көрта көлуй, ёнджыкасө му вөдитысьяслы: быд пөлөс коса, чарлаяс, мудйысянторьяс. Бронзаысь сывдалісны нывбабаяслы мичмөдчанторьяс — чунькытшьяс, сикөтшьяс.

Корт төдмалөм төдчымөн кокньөдіс коми йөзлысь олөм-вылөмсө. Онi позис унджык чери кыйны, бурджыка вөранны да гөрны-көдзны. Сөвмө вочасөн вузасьөм. Сьөмсө перымса олысьяс сәки шуисны шайтөн, урөн. Тайө, тыдалө, йитчөма коми йөзлөн вөралөмкөд. Перым муясө воысьяс, медсясө Волга вывса Булгарияысь, Кама дорысь, Балтика бердысь, Фин да Роч муясысь, Ичөт Азияысь, Войвыв Европаысь, вайывлісны аскөдныс эзысь медальоньяс, мича чунькытшьяс, *сойпосьяс*, ылі муын вөчөм көрт сьөм. Аньяслы вузавлісны быдсяма сикөтшсө — кляничаысь, бронзаысь, эзысьысь, сөйысь, лыысь, кристалысь да весиг *изсирысь*. Но медся ёна сәки новлісны татчөс аньяс кляничаысь вөчөм сикөтш. Тайө сикөтшьясыс вөліны уна пөлөс рөмаөсь, синмад шыбитчанаөсь. А сикөтш мольясыс нөшта оз тусь кодь гөгрөсөсь, кузьмөсөсь, нель пельөсаөсь.

Корта көлуй вөчөм, кузнечаясын дорччана удж, дона куа зьверөс кыйөм — ставыс тайө кутшөмакө озырмөдіс сьөд вөр шөрын олысь йөзөс. Чукөрмисны, дерт, лишаланаторьяс. Өта-мөдкөд вузасьөм отсаліс коми войтырлы зумыдджыка сувтны кок йылө. Тайө кадө жө өткымынтяс пондөны овны мукөд серти лышкыдджыка, налөн чукөрмөсодө озырлун. Чина-озыр йөзлы сетөны сійө кадө нимьяс: сотник, айка (юралысь), ыджыд мывкыда пөрысь

морт. XI–XII-өд нэмтјясө важ комияслөн киссьоны-разалөны коркө тэчсьылөм чужанвуж племеннаяскостса йитөдтјяс. Тайө йитөдтјясыс вежсьоны, вьльмөны. Пыр ыджыд-джык төдчанлун босьтө йөз олөмын семтјя.

Тайө интерес чужтө

ВАЖ КОМИЯСЛӨН ПАСЬКӨМ

Төлыд войвылад пыр көдзыд. Сөмың пермяна сыысь эз повны. Уна нэм чөжнад велалисны көдзыдтјяс дөрө, шоньда пасьтасьлисны. Шуам, новлисны төв чөж ыж ку пась. Вылыс паськөмсө вурлисны ас кыөм нойысь, улыссасө — шабді дөраысь. Аньяс пасьтавлисны кузь нывбаба дөрөм, вөнясьлисны, сы вылө нөшта пасьтавлисны-плавгылисны мукөд паськөм. Пасьсө да дөрөмсө быть вөнявлисны.

Аймортјяс новлисны кузь дөрөм. Тайө дөрөмыслысь веськыдладорсө вөлі вожөдыштөма, а голя боксө позис



Важ комияслөн паськөм

кӱртыштны. Вылыс паськӱм пыдди вурлисны кузь дӱрӱм сямаӱс жӱ. Вӱравны мунӱгӱн мужичӱйяс пасьтавлисны сӱстӱм дӱрӱм сямаӱс, шулисны сийӱс лузанӱн. Лузанӱ вӱчлисны-дасьтылисны нӱль пельӱса ной дӱраысь. Юр суйӱм могысь вӱчлисны розь, пельпомьяс вылӱ вурлисны-пуктылисны куим пельӱса ной дӱраторьяс. Сӱсся вӱралысь тасмаасьлис кӱртысь вӱчӱм пражаа тасмаӱн, сийӱ кутӱ вӱлӱм лузанӱ кос вылас. Колӱ шуны, сӱки важ коми войтыр ӱна радейтлӱма новлыны быд пӱлӱс тасма. Вурлисны сийӱс кучикысь, кылисны. Аньяс да аймортьяс новлисны кучик кӱмкот. Ӳжва йывса пермяна шулисны татшӱм кӱмкотсӱ «чуткемӱн» либӱ «чаркиӱн». Вурлисны найӱс кучик торьясысь, кӱртавлисны кӱмкотсӱ кок шег дортыс кӱвӱӱн.

Аньяс юр выланыс кышавлисны асык сяма новланторьяс, медсясӱ сямӱдысь вӱчӱмаясӱс. Либӱ векныдик дӱраӱн юр гӱгӱрсӱ гартыштлисны.

Быд паськӱм сийӱ кадӱ кутшӱмакӱ мичмӱдлисны. Ас ногныс, дерт. Мичмӱдчанторьясӱс пуктылисны юрас, ӱшӱдлисны голяӱ, морӱс вылӱ, коскӱ, киясӱ.

Ю а л ӱ м ъ а с.

1. Мый вӱсна чери кыйӱм да вӱралӱм вӱлины пермяналӱн медшӱр уджӱн?
2. Нӱшта мый вӱчлисны сӱки важ коми войтыр?
3. Кодьяскӱд вuzасисны пермяна? Мыйӱн?
4. Кутшӱм паськӱм вӱлӱма важ комияслӱн?

2 ю к ӱ н

Кристос ӱскӱм пырттӱдз кодлы ӱскылӱмны важ коми йӱз?

Ӳзв аслыспӱлӱс вӱлӱма важ коми йӱзлӱн енъяслы ӱскӱмыс. Важ пермяна сийӱ кадӱ юрбитлӱмны сӱдз шусяна язы-

ческõй, ас енъяслы. Найõ, важ коми йõзлõн чайтõм серти, дорйылисны вõралысьясõс да чери кыйысьясõс. Енъяссõ комияс сёртлывлõмаõсь идольясõ. Найõс вõчавлисны пуысь, изйысь, корсюрõ кõртысь. Видзлисны гортаныс либõ вõрын. А кор колõ вõли, юрбитлисны на водзын, ошкылисны найõс, вайлисны козин пыдди низь, тулан, ур куяс, сидзжõ зарни, эзысь, ыргõн да кõрт торъяс. Татшõм идольясыслы эскылисны-юрбитлисны быдса семьяясõн, сикт-грездъясõн. Посни челядь да гырысь войтыр пермяна-язычникъяслõн вõлõмаõсь медся пыдди пуктанаõн, медся радейтанаõн лыддывлõмаõсь Зарни ань енмõс.

Сэкся коми войтыр мõвпавлисны ас ногныс жõ. Найõ эскылисны, мый вõрын, тыын, быд сиктын да быд керкаын, õти кывйõн кõ, йõз гõгõрын, олõны быдсяма олысьяс: вõрсаяс да васаяс, мутияс, моръяс, лешакъяс да уна мукõд. Бурмõдан кõ налысь сьõлõмсõ, сәки чериыд гырысь да уна шедас, кынтьõ кыян, дзоньвидзалуныд лõõ бур, мортыд дыр олас, оз кут висьны дай.

Вõрын, комияслõн чайтõм серти, овлõма вõрса — пермяналõн *месай* (кõзьяин). Быд сиктгõгõрса вõрын вõлõма аслас вõрса. Олõма сийõ вõр керкаын, медся лёкинас, кытчõ некод да некор эз вермыв веськавны. Вõрса ортсысянныс, мыгõрнас мунõ вõлõм морт вылõ либõ кутшõмкõ зъвер вылõ, ёнджыкасõ вõлõма ош сяма. Пельыс сълõн гõнсялõма, паныдасян кõ, дерт, повзян. Пармаын кõ тõв омлялõ, бушков кыптõ, камгõ-зымгõ — позис стõча шуны: тайõ вõрса ветлõдлõ-мунõ. Корсюрõ вõрса пõртчывлис гартчан тõв нырõ, нетшкылис керка вевтъяс, нулис аскõдыс йõзõс. Медым мездысьны вõрсаысь, вõтлыны сийõс, колõ вõли шыбитны кõрт тор. Сыысь вõрса полис. Вõрсаõс лыддывлисны зъвер-пõтка кыйысьяслы отсасысьсõн.

Важ коми йõз ёна эскылисны, мый быд керкаын эм аслас «олысь». Кутшõм сийõ? Тайõ юалõм вылас вочавидзлисны уна ног. õтияс шулисны, мый «олысьыс» ичõтик тушаа, кузь да дзор тошка пõрысь морт. Мõдъяс висьтавлисны, мый «олысь» — тайõ ёма-баба кодъ мисьтõм ань. Коймõдъяс — пашкыр гõна кутшõмкõ вõрпа. Овмõдчыв-

лёма «олысь» медсясö гөбөчө. Сійö радейтлёма уджач да зіль войтырөс. Дыш да мудер йөзөс, казтылөмъяс серти, «олысь» зильёма вөтлыны керкаысь, вермылөма кувтөдзыс джагөдны. Выль керкаө вуджигөн йөз корлісны «олысьөс» мунны накөд тшөтш, выльлаө овмөдчыны. Важ висьтавлөмъяс серти, «олысьөс» позис казавны эз сөмын йөз гөбөчысь, вөр керкаысь тшөтш. Сэтчө пыригөн вөралысьлы колө вөлі юавны: позьö-ө сәні сылы войсö коллявныузыны.

Ю-тыкөд топыд йитөд кутліс «васа». Тайö омөльыс-мутиыс вайліс коми йөзлы медсясö лектор, вермис вины мортөс либө гортса пемөсьяс. Ваын олысь мутияс, омөльяс зыксисны вөрсяяскөд. Öта-мөдныскөд найö венласьлісны өнджыкасö лун шөр кадө. Важ комияс весиг төдлісны, мый буретш тайö кадас морткөд вермас лоны лектор. Та понда коми йөз весиг XIX-өд нэмын на повлісны купайтчыны лун шөр кадө. Бур козинъясөн, шань кывъясөн йөз зільлісны бурмөдны «васалысь» сьөлөмсö. Найö корлісны ваын олысьөс, мед сетас йөзлы унджык чери. Важ комияс висьтавлывлісны, мый «васалөн» эм гөтыр, эмось челядь. Овлөма сійö ты либө ю пыдөсын, бур да ыджыд керкаын, ас овмөсөн.

Важ комияслы вөт, быд пөлөс висьөм, лов, мортлөн кулөм вөліны төдмавны позьтөмторъяс. Сідз, найö мөвпалісны, мый висьөмъяс вайö шева (кутшөмкө пөж лов), сійö гусьөн пырө морт пытшкө бобулө либө гагйө пөртчөмөн. Шева сетысьяснас вөліны торъя йөз — тунъяс, еретникъяс, тшыкөдчысьяс.

Эскылісны пермяна (важ комияс) нөшта тотемъяслы. Тотемъяснас вөліны сэтшөм пемөсьяс да быдмөгъяс, кодъясөс оз позь вөлі виавны, сөйны. Важ комияс вермисны шуны: морт вермө пөртчыны ошкө, лоны көинөн, понйөн, лягушаөн да мөдарө. Комияс медся пыдди пуктылісны да радейтлісны ошкөс. Öткымын рөдын оз позь вөлі ошлысь ловсö босьтны, вины сюзьөс, мукөд зьвер-пөткаөс. Комияс лыддылісны, мый найö да йөз, весиг кутшөмсьурө быдмөгъяс, — рөдвуж войтыр. Пермяна шулісны: виан кө

найӧс, шудыд некор оз ло. Вӧрзӧдны позьтӧм лӧбачыс комияс пӧвстын вӧлӧма юсь.


Зьвер-пӧтка, кодӧс пыдди пуктылісны важ комияс да кодъяслы юрбитлісны, ыджыд тӧдчанлун босьтис тшӧтш му вылын олӧм пуксьӧм-лӧсьӧдӧмын. Важ йӧзлӧн висьталӧм серти, буретш чӧжлӧн (уткалӧн) колькыйсь петӧма став олӧм кутысьыс — Ен (бур) да Омӧль (лӧк). Му вылын олӧм пуксигас найӧ пыр вермасьлӧмаӧсь ӧта-мӧдыскӧд. Ен лӧсьӧдӧма-вӧчӧма пуяс, вӧр-ва, гӧраяс, вӧрса пемӧсьясӧс, лӧбачьясӧс, чери. Омӧль мӧдарӧ. Сы борд улысь петӧмаӧсь нюръяс, джуджыд да мисьтӧм сӧнъяс, горш зьверъяс, пӧткаяс, лӧкгагъяс, лӧдз-ном. Ен лӧсьӧдӧма шондӧ да йӧзлы бур вайысь вӧрсаясӧс, Омӧль, мӧдарӧ, вӧчӧма тӧлысь да быдсяма лӧк мутисӧ.

Юрбитлӧмаӧсь важ коми войтыр нӧшта пуяслы. Емдінса комияс, шуам, кыз да коз пулы. Коз пуӧс пыдди пуктӧм вӧлі топыда йитчӧма ур кыйӧмкӧд. Ӧд кымын унджык чужтас-быдтас коз пу кольсӧ, сымын унджык урӧс позьӧ кыйны. Важ комияс ӧна эскӧны вӧлі: бура кӧ сӧрнитан коз пуыскӧд, пыдди кӧ пуктан сійӧс, сӧки пуыс унджык коль чужтас. Сідзкӧ, озыр прӧмысӧн локтасны гортаныс ур кыйысьяс. Татшӧм пуяс вылас комияс ӧшлывлісны вӧрпаяслысь куяс, мукӧдтор.

Пермяна эскисны, мый эм кӧнкӧ мӧдар югыд, эм сӧні аслас олӧм. Морт, дерт, кулӧ, но тайӧ аслыспӧлӧс кулӧм. Мӧд кывйӧн кӧ, мӧд олӧмӧ вуджӧм. Та вӧсна кулӧм мортӧс дзебигӧн сы гуӧ пуктывлісны кӧлуй, мичмӧдчанторъяс, черпурт, ӧружие, тасьтӧ-пань да мукӧдтор. Тайӧ, комияслӧн чайтӧм серти, отсалас мортыслы пырны мӧдар югыдас, овмӧдчыны сӧні. Оз ӧд весьшӧрӧ комияслӧн горт кыв кут ас пытшкас кык вежӧртас. Горт — тайӧ ловъяяслӧн керка, и кулӧмаяслы керка жӧ. Мӧдар югыдас мортыс вуджӧма-мунлӧма, важ олӧм туялысьяслӧн висьтъяс серти, ва кузя. Та вӧсна шойнаяссӧ комияс векджык лӧсьӧдлывлӧмны юяс да тыяс бокӧ.

Важ комияс, либӧ пермяна, кызди аддзам, вӧлі топыда йитчӧмаӧсь вӧр-вакӧд.

Тоданныд-ö ті, посни войтыр?



Комияслөн важ вöралан календар

Тöлысьяслөн важ нимъяс:

Январ — төв шөр.

Февраль — урасьом (ур кыян кад).

Март — рака (лунвылысь вооны съод ракаяс).

Апрель — кос му (лунвывбокса муяс вылын сылө лым, косьмө му).

Май — ода-кора (пуяс вылын мыччысьöны коръяс, веждö му).

Июнь — лөддза-номья (лөдз-ном петö).

Июль — сора (быдмөгъяс босьтöны вын-эбöс).

Август — моз (урожай идралан кад).

Сентябр — көч (рөдмө уна көч, ёна кыйёны сійёс).

Октябр — йирым (медводдза көдзыхъаса кад, кын-мавлө).

Ноябр — вольгым (усьё лым, тупкө му-васө).

Декабр — өшым (ёна көдзыд кад).

Ю а л ө м ь а с д а у д ж.

1. Көдхъас найө — «вөрса», «васа», «олысь»?
2. Серпасалөй найөс.
3. Мый сэтшөм тотемхъасыс?
4. Көдхъаслы эскывлісны важ коми йөз, кутшөм йитөд налөн вөлі вөр-вакөд?





5 ю р а с

МӨСКУАСА ӨКСЫУВ ДОРӨ КОМИ МУӨС ӨТЛАӨДӨМ

1 ю к ө н

Эжва Перым да Роч му

Кыдзи ті тōданныд, Киевса Русь пазалōм бōрын роч муясын артмōма уна *өксыув*. На пиысь быдōн зилис паськōдчыны-ёнмыны. Коми му кыскис рочьясōс аслас дона зьвер куясōн. Куыс вōлі лыдтōм-тшōттōм. Важ комияс роч өксыувьяслы мынтысьлісны буретш дона куясōн, сетлісны сідз шусяна дань. А өксыувса йōз нулісны тайō куяссō водзō, роч муяс сайō,— рытиввыв Европаō, тотараяслы, Шōр Азияō. Медводз пермяна муясō писькōдчōмаōсь новгородса войтыр. Тайō лои XI–XII-ōд нэмьясō. Даньсō чукōртлісны новгородсаяс кадысь кадō, та могысь мōдōдлывлісны ассыныс йōзōс, дружинаяс.

«Повесть временных лет» нима важ гижōдын XII-ōд нэм заводитчигōн Перым муөс бур боксянь пасйōма, татчōс войтыр пō ас кадō мынтысьōны дона куясōн. Но Коми му кыскō вōлі ас дорас роч йōзōс оз сōмын зьвер куясōн, миян му вомōн позис кокниа веськавны Сибирō.

Пермяна муяс вōсна ёсь тыш пансис Новгородса Федеральной республика да Владимир-Суздальса (Ростов-Суздальса) өксыувьяс костын. Суздальсаяс войвывлань мунігōн мыджсисны Югдін (Устюг) кар вылō. Тайō карыс падмōдліс

новгородсалысь Эжва Перымлань Сухона ю кузя зырт-чөмсö.

XII-öd нэм помын Коми муö вужъясьöны медводдза, этша лыда роч йöз. Кыштöны налөн оланінъяс, посни сикт-грездъяс. Найöс шулісны *карвывъясöн*. На пиысь öти öні миянлы тöдса, Пожögса карвыв. Сійö сулалöма Емва ю бокын. Татчöс олысьяс, коми да роч йöз, унатор кужлöмны: сывдылöмаöсь көрт, дасьтылöмаöсь сыысь гортса да уджалан көрта көлуй, дорччылöмаöсь, вöчалöмаöсь аньяслы мич-мöдчанторъяс. Бöрынджык нин, важ комияслысь олөм туялысьлы татысь сюрины сикöтшъяс, чунькытшъяс, кристиана нога пернаяс, көрт дөрөм торъяс, ньöвъяслөн да шыяслөн көртысь сывдөм ёсь йывъяс. Пожögса *карвыв* сулалöма-олöма XIV-öd нэмöдз. Сійö некымынысь сотчылöма, но зіль йöз бөр кыпöдлöмаöсь оланінъяс, дорччанінъяс да мукöд стрöйба. Татчö чукöртлывлöмаöсь Коми му пасьталаысь дань, тасянь жö дружинаяс мöдöдчывлöмаöсь вот перйыны.

Дерт жö, дружинаяс бöрся пыр ветлöдлöмаöсь вузасьсыяс, мыйкö асьныс вайлöмаöсь Коми муö, унатор татчöс коми войтырлысь ньöбалöмаöсь-нулöмаöсь. Перымса юяс бокö, татчöс паськыд да озыр парма-вөръясö кольччывлöмаöсь тшöтш рочьяс, медясö му вöдитысьяс, тотаралөн чорыд кабырысь пышъялысьяс (тотара-монголъяслөн Русьын ыджыдалан кадö).

XIV-öd нэмын ёнмö-сöвмö Мöскуаса öксыув. Пансьö-паськалö войвывса муяс босьтөм, ас улас пыртөм вöсна выль тыш. 1333-öd воын Мöскуаса öксы Иван Калита босьтчö чукöртны тотараяслөн Зарни Ордалы даньсö тшöтш перымса войтырлысь. А тайö даньыс, шусьыліс коді рочөн «черный бор», «черный выход», эз вöв ичöt. Тотараяслы быд мортлысь, ичöt көть ыджыд сійö, быть босьтлісны вонас некымын дона ку: ошлысь, низлысь, мойлысь, сьöд ручлысь. Кодкö кө мынтысьнысö эз вермыв, нуöдлісны пыр кежлö пленö.

Тайö кадö юрсö кыпöдö Новгородса öксыув. Сійö зільö кутны ас киас зьвер-пöткаөн озыр Коми му. Артмö сідзи,

мый коми йӧзлы лоӧ мынтысьны ӧттшӧтш Мӧскуалы да Новгородлы. Мӧскуасаяс вӧліны сюсьджыкӧсь, найӧ пуктӧны вӧлі став вынсӧ, медым ёнмӧдны Перымса муясын асьыныс тӧдчӧмсӧ вичко отсӧгӧн, паськӧдны коми войтыр пӧвстӧ крестос эскӧм.

Ю а л ӧ м да у д ж ь а с.

1. Мыйла роч ӧксыувъяс да Новгородса республика костын пансӧ важ коми йӧзлӧн муяс вӧсна тыш?
2. Висьталӧй Пожӧгса карыв йылысь.
3. Корсӧй да индӧй мусерпасысь важ комияслысь тайӧ оланінсӧ.

2 ю к ӧ н

Перымса Степан да комиясӧс крестос эскӧмӧ пыртӧм

Кыдзи тӧдса, пермяна, важ коми войтыр, вӧліны язычникъяс. Найӧ юрбитлісны пуысь вӧчӧм идолъяслы, вайлывлісны енъяслы козинъяс: сӧян-юан да мукӧдтор. Таысь кындзи, важ коми йӧз эскылісны, мый эм кӧнкӧ мӧдар югыз, мый накӧд орччӧн олӧны-вылӧны мутияс да омӧльяс, тунъяс да пез ловъяс. Комияс пыдди пуктылісны гортса да вӧрса пемӧсьясӧс.

Роч йӧз вӧліны кристиана войтыр. Медводдзаысь пермяна тӧдмасисны крестос эскӧмӧн XI–XII-ӧд нэмъясын. Буретш сэки Коми муӧ кутісны писькӧдчыны-локтавны роч йӧз. Водзын казътыштлӧм нин Пожӧгса карыв кодйгӧн сюри куим перна. Пермяна аддзывлісны, кыдзи юрбитӧны роч йӧз, копыртлӧны юрнысӧ енпӧвъяс водзын.

Коми муӧ крестос эскӧм пыртӧмӧ зӧв ыджыд пай пуктіс Перымса Степан. Чужліс-быдмыліс сійӧ *Югдін* карын, айыс служитлӧма вичкоын. Ӑні на стӧчасӧ морт оз вермы висътавны, кутшӧм воӧ да тӧлысьӧ Степаныс чуж-



Вежа Степан

лөма. Мам-батыс, Симъен да Маръя, вөлөмаоьс карын пыдди пуктана кристиана. Важ йөзлөн казтылөмъяс серти, Степанлөн мамыс, Маръя, петавлөма комияс чужан-вужйысь. Коркө отчид йөй нисьö прөсуж карса олысь Прокопей паныдалөма вичко дорын куим арөса Маръяоьс да шуөма сылы:

— Видза олан, Маръя, вежа мортлөн аския мам. Кузь нэм да бур шуд тэныд!

Уна-уна во мысти збыльмисны өд Прокопейлөн кывъясыс.

Степан челядырсянныс бура төдлөма коми кыв. Водз босьтчөма лыддысьны-гижны. Ветліс вичкоө, эскис Енлы, лыддис кевмөмъяс. Томдырсянныс нин Степан аслыс шуөма: став олөмөс сета Енлы кесъялөмлы. Мукөд челядь пув

вотны вөрө кайёны, ю дорө чери кыйны лэччөны, а сійө вичко небөг сайын зунясьө. Коркө отчюд копыртчыліс ай-мамыслы да висьталіс: бурсийө пө меным, муна Ростов карө Григорий Богослов манастырө манакө. Тайө манастырас сійө кадө вөлөма зэв уна небөг. Степан кутіс ёна лыддысьны, велөдіс манастырас важславянскөй да грек кывъяс, бура төдіс найөс.

Челядьөн на Степан юасьлөма айыслысь:

— Мыйла нө пермяна оз төдны Исус Крестослысь велөдөмсө? Мыйла войвылын олысьяслөн абуось асланыс шыпасъяс, небөгъяс?

1372-өд воын Степан ачыс лөсьөдөма медводдза коми анбур (шыпас чукөр). Подулас пунктөма грек да славяна ногса шыпасъяс. Анбур кывыйс артмөма кык медводдза шыпас нимсянь: а (ан) да б (бур). Анбурыс артмө 24 шыпасысь. Вермас лоны, анбур лөсьөдігөн Степан вөдитчөма тшөтш коми пасъясөн. Быд коми семъялөн войдөр вөлөма аслас пас, лөсас, рөдвуж пас. Тайө анбур отсөгнас коми кыв вылө вуджөдісны Ен йылысь гижөдъяс: литургия, Важкөйысьөмысь юкөнъяс, кевмөмъяс.

Степан пунктіс ас водзас зэв ыджыд мог — пыртны пермянаөс аслас эскөмас. Сійө ветліс Мөскуаө, аддзысьліс да сёрнитіс Донса Дмитрийкөд. Мөскуаса өксы гөгөрвоис Степанлысь мөвпсө да ошкис сійөс, сетіс сылы *видзана кабалаяс*. 1379-өд восянь Степан босьтчө пыртны Коми муын крестос эскөм, Мөскуа сетіс Степанлы та могысь став коланасө: енпөвъяс, крестъяс, пернаяс, жынняяс да мукөдтор. Таысь кындзи, пермяна муө сійө вайис уна вичко небөг. Степан медводз воис Улыс Эжва вылө, сэсянь босьтчис паськөдны-вуджөдны крестос эскөмсө Коми му пасьтала. Медводз пыртіс выль вераө Пырас кар (Котлас), Вилядь юдорса муяс. 1380-өд воын, Коми му шөрын, ёнмисбыдмис Емдін сикт. Сэтчө буретш Степан овмөдчө. Регыд мысти Емдіно лэптисны некымын вичко.

Выль эскөм эз кокниа вужъясь Коми муө. Унаөн сувтісны Степанлы да сылөн отсасысьяслы паныд. Весиг босьтчылісны вины Степанөс. Перымса Пама сотник, мөд

кывйөн кө, войвылын став вылын ыджыд туныс, 1389-өд воын йögраяс (манси) отсөгөн көсйис вынөн босьтны Емдін да вöтлыны Степанöс Коми муысь. Но сылөн көсйöмыс эз збыльмы. Мöскуаысь воöмаяс яра тышкасисны-водзсасисны. Тайö тыш бöрас уна коми, кодъяс сувтисны выль эскöм пыртöмлы паныд, пышйисны Вашка да Пинега юяс бокö, Из сайö да сэтчö овмöдчисны. Кростос эскöмö татчöс йöз вуджисны бöрынджык, сöмын XV–XVI-өд нэмъясö. Степан кадö выль эскöмас унаөн вуджлисны сöмын мода вылас, важ öбрэдъяс уна нэм на вöліны ловъясь.

Кростос эскöм пыртигөн зэв тöдчана вöлі сийö, мый ачыс Степан бура тöдлöма коми кыв, татчöс йöзлысь оласногсö. Выль кевмöмъяс кутисны лыддыны коми кыв вылын. Коми йöз пöвстысь мöдисны дасьтыны попъясöс, вичкоын уджалысьясöс. Татчöс йöзöс босьтчисны велöдны грамотаö Степанөн лöсьöдöм анбур серти, тадзи коми йöзлөн чужис ас гижöд, позьö шуны, лои культураа аслас кыв.

Выль эскöм вочасөн паськаліс Коми му пасьтала. Му вöдитысьясöс да вöралысьясöс, чери кыйысьясöс пыртисны выль эскöмö Эжва, Емва да Сыктив вылын. Öдйö кыпалісны вичкояс да манастыръяс.

Оз позь шуны, мый комиясöс кростос войтырö пыртигөн ставыс вöлі лючки-бур. Бокысь воöm йöз мукöд кадö вын отсөгөн зілісны шедöдны на водзö пунктöм могсö. Весиг соталісны пуысь вöчöм идольяс. «Скөрмис Степан пермяналөн мисьтöм чужöма енъяс вылö, пуысь лöсалöм идольяс вылö, ставсö пасьвартіс, биөн сотіс, черөн кераліс, тышкас жугліс, а налысь колясьяссö парма пасьтала разöдіс, чурк доръясö шыблаліс, бор бокъясö коляліс». Тадзи висьтавьсьö öти важ гижöдын.

1383-өд воö Степан мöдöдчис Мöскуаö. Сэні вылö донъялісны сылысь уджсö. Коми муын вöлі шуöма котыртны-лöсьöдны Перымса *аркирейув*. Сылөн юркарнас лои Емдін. Велькöдлысь-юралысьö, аркирейö индісны Вежа Степанöс, кодöс кутисны сэсся шуны Перымса Степанөн. Колö шуны, мый аркирейулыс пунктіс ыджыд пай Перымса муясын Мöскуаса öксылысь тöдчанлун паськöдан уджö.

Вежа Степан уна вöчис, медым бергöдны комиясöс выль эскöмланы, Сус Кростосланы. Нöшта сийö котыртис тыш пермяна-язычникъяскöд, кодъяс тшöкыда усъласьлисны Вашка вывсыань да Пинеган ю дорсыань, тшыг воясö вайлис коми йöзлы сёян-юан.

1396-öд вося кос му тöлысь 26-öд лунö Перымса Степан кувсьöма Мöскуаын. Дзевöмны сийöс Кремльын, Спасскна-Бору вичкоын, кытчö гуалöма медся пыдди пуктана йöзсö. Кор тайö шог юöрыс воöма Коми муöдз, сэки уна синва кисьтöма татчöс войтырыс. Став Перым муса йöз ёна шогалисны Степан вöсна, сэсся XIV-öд нэмын, 1549-öд воын (Вежа Степан сэки эз нин вöv ловъя) сийöс пуктисны Вежа йöз кытшö, кос му тöлысь 26-öд лунсянь кутисны пасйыны сылысь кулан кадсö.

Перым муясса йöзöс кростос войтырö пыртöм отсалис Коми мулы водзö сöвмыны, чужтис ас гижöд кыв, ёнмöдистані мöскуаса öксыяслысь тöдчанлунсö. Тыш-зыртчытöг тадзи Коми му пырис Мöскуаса öксыув борд улö.

Миянöс шензьöдö Степанлөн мывкыдыс, кывъяс тöдöмыс. Сийö вöлöма бур сылысь, енпövъяс серпасалысь. Чайтöны, мый «Куима» нималана öбразсö ачыс Степан гижлöма. Сэкся важ кадö веськыда эскан роч вичкоса ыджыдалысьяс пысь сийö дзык öтнас лöсьöдöма неыджыд языческой войтырлы выль гижöд. Öд тайö вöлі сылы ас чужан войтыр.

Л	Ф	Т	Л	Р	Ш	П	Л	Г
Б	Г	Д	Е	Ж	З	И	Й	И
КОКЕ	ЛЕЙ	МЕМО	НЕНА	О	ПЕЙ	РЕЙ	СИ	ТАЙ
А	У	А	У	Н	С	У	С	У
К	Л	М	Н	О	П	Р	С	Т
ЦЮ	ЧАРЫ	ШОЙ	Ю	Я				
Н	С	З	Л	У	В	К	Е	У
У	Ц	Ч	Ш	Ю	Я	ЫРЫ	ЭМА	ВЕДЬ

Важ коми шыпасъяс

Степан вёлёма повтём морт, кужысь дипломат. Сідз, XIII–XIV-өд нэмъясö Коми му вылö вель тшöкыда усьласьлісны роч öксыяслөн дружинаяс. 1392-өд воын вятка-саяс пырисны Сыктив вожö да кутісны рözöритны-грабитны коми сиктъяс. Степан муніс налы паныд да кывйөн, кужана велöдöмөн сувтöдіс найöс. Вятка-саяс бергöдчисны бөр. Степан дырйи, комиясöс кристос войтырö пыртём бöрын, Новгородса, Угличса дружинаяс, вятка-саяс тышкасьысь йöз вочасөн дугдісны рözöритны, жуглыны да сотны коми муысь сиктъяс. Татшöм ногөн, öтиладорсянь лои ури («мир»), но мöдарладорсянь йöгра дыр на усьласьлісны комияс вылö. Эз-ö татшöм мог кутлы Степан: миритны лыдтём-тшöттём роч йöзöс комияскöд. Кызди пасйö öткымын туялысь, Степан дырйи да сы бöрын Перымса аркирейяслөн ыджыдалігөн (180 кымын во чöж), Коми муын вёлёма аслыссяма автономия, коми гижöд кыв вёлём ветлö каналан кыв туйын, власьт бердын пукалісны коми кыв тöдысь аркирейяс. Сэк нин вöлі сöвмöма коми грамота, манастыръясын уджалісны коми кывъя школаяс. Панассö талы пунктöма Вежа Степан. Öти кывйөн кө, Перымса Степан XIV-өд нэмын нин лöсьöдöма коми гижöд, коми школа, öтувтöма öти администрация юкöдö (аркирейулö) став коми йöзсö, дорйöма рочьясысь да йöграысь. Татшöм ногөн мездылöма чужан войтырсö уна шогысь, медводз *ожманъясысь* да тшыгъялöмысь.

Тайöс колö тöдны

Талунöдз кольöма уна көлуй, найö, важ гижöдъяс серти, вёлёмаöсь Перымса Степанлөн. Шуам, бедь да енпöв. Сэтчö серпасалöма Вежа Куима (рочөн кө, Зырянскöй Троица). Степанлөн важ беддыс быттö казтылö кузь туй да кристос эскöмö пыртігөн сьöкыдлунъяс.

Енпöлыс висьталö зэв сöстём аддзылём йылысь — Енэжса Куима йылысь. Гашкö, Степанлысь бедьсö видзисны Мöскуаын, горт дорас. Но 1612-өд воын, кор полякъяс

уस्कөдчөмны Россия вылө да пыралөмаоьсь Мөскуаө, найө аскөдныс нуөмны уна донатор. Гетман Хоткевич босьтөма Степанлысь тайө бедьсө. Сэсся сетөма сийөс Литваса өти ма-настырө. Сийөс сэни видзөмаоьсь XIX-өд нэм шөрөдз. Сөмын 1849-өд воын Степанлысь бедьсө сетөмаоьсь Перымса кафед-раа крамө. Öни бедьсө видзөны Перым карса музейын.

Степанлөн нималана беддьыс кык аршин кузьта. Вөч-лөмаоьсь сийөс ниа пуысь. Вежа Степан кулөм бөрын нин сылысь бедьсө ёна мичмөдөмны, лыысь вөчөмаоьсь бедь ку-танінсө. Сэни, бедь кутанінас, өтар-мөдар бокас, вундөмөн серпасалөма коми шыпасъяс. Беддьысь бура тыдалө Сте-панлөн вөчөмторйыс, олан туйыс сылөн. Кыдзи сийө пыртис аслас эскөмө коми войтырөс, кызди воис Коми муө, кызди кутис велөдны татчөс йөзөс.

Вежа Степанлөн бедь вылын ставнас дас квайт серпас. На пиысь быдөн петкөдлө, кызди сийө воис Коми муө, кы-дзи босьтчис пыртны татчөс йөз пөвстын кристос эскөм. Öти серпасын петкөдлөма тошка йөзөс, найө кывтөны ю кузя. А пыж нырныс зьвер юра, видзөдан да, өтиысь быттөо мыччысьö куим пöрысь морт.

Степанлөн беддьыс кыскө ас дорас Коми му туялысь-ясөс, висьталө сы йылысь, мый беддьыс збыль вөвлөма Перымса Степанлөн. Нöшта өтитор. Сийөс зэв вылө донъя-лөны туялысьяс. Öд бедь помсө вөчлөмаоьсь лыысь XV- XVI-өд нэмъясын.

Зыряналысь Вежа Куима öбраз донъялөны зэв вылө. Висьталөны, мый сийөс серпасавлөма ачыс Вежа Степаныс. Быттө пö тайө енпөвйыс вайө коми йөзлы уна буртор. Öни сийөс видзөны Вөлөгда карын.

Коми мулань мунігөн, Пырас сиктсаянь Гамөдз, Вежа Степан кыпөдаліс-лэптыліс часовняяс да крестъяс. Уна казьтылөм коліс ас бөрас Коми муө воём нималана морт. Сідз, Туглим грездса өти нывбаба, кор аддзөма Степанөс да нöшта сылысь киссьөм көмкотсө, шуөма: «Со, босьт, менам дзик выль эм». Сылы воча Вежа Степан шуөма: «Тані, муса ань, сиктас кутасны ёна вузасьны». Збыль, ре-

гыд мысти сәні босытчисны вузасыны. Либө мөдтор. Гам сикт йылысь. Воома сәтчө Степан, пыртөма аслас эскөмө коми йөзөс, та бөрын водзө мунөма. А сы бөрын йөзыд бара важас сетчөмаось, босытчөмаось пуысь вөчөм идольяслы эскыны. Сәсся Вежа Степан бөр кутөма ләччыны-мунны, воома сиктас да скөрысь шуөма: синтөм йөз пө ті. Вежа Степанлөн кывйыс тунлөн кыв моз мөрччөма. Гам сиктса войтыр, важ йөз висьталөм серти, быттьөкө пө омөля аддзöны.

Коми йөз казтылöны, Вежа Степан пө вайөма Коми муö уна буртор. Сійö отсалөма йөзлы корсьны вошөмторъяс, удж да сьөм аддзыны, верөс-гөтыр костын лөсьöдны бур йитөд да с.в.

Коми му историяын Вежа Степан дырся кадыс вөлі эз сөмын зэв төдчана, но вуж выйөдз олөмсö вежана, өттшөтш зэв вир кысьтана. Öд коми йөз веськалісны сәки кык би костö — рочьяс да йөграяс костö. Роч, Мөскуаса өксыулö пырөмыс вөлі кутшөмакө мездана воськов, Вежа Степан кужис дорйыны коми йөзөс. Сәк жö асьныс комияс юксисны сәки кык пельö — өтияс кутчысисны важ эскөмө, мукөдъяс пыртчисны кристос эскөмө. Пестысьліс коми йөз костын аскост тыш, киссис вир. Челядь, коді унджык көсийö төдмавны тайö кад йывсьыс, вөзъям тиянлы лыддьыны Геннадий Юшковлысь «Бива» роман да Владимир Тиминлысь «Эжва Перымса зонка» повесыт. Тайö история йылысь выль гижөдъяс, гижысьяс выль ногөн восьтöны мианлы коркөя лоөмторъяссö.

Пама вөлөма историяын збыль морт, важ комияслөн юралысь, шаман да велөдысь, Вежа Степанлы паныд мунысь. Сы йылысь кольөмаось юөръяс история гижөдъясын да легендаясын. Пама важысянь жö лои коми литератураын историяса геройөн. Индылөм «Бива» роман дорö содтөд пыдди вөзъям лыддьыны Иван Куратовлысь 1859–1860-өд воясö на гижлөм «Пама» поэма. Пама да Туглимса шаман öні сёрнитöны Коми мулөн водзö воан лун йылысь. Вайөдам лыддьөм вылө сәтысь тор:

Пама

...Ог ме шуны вермы, бурджык *кин**:
Мöскуаса князь-ö, тотарин
Сарайса? Ог төд! Медбөръя бурнас
Весьшөрö тай коми войтыр урнас
Көсйö рочöс бурмөдны! Сидз тэч
Унджык биö песьяс: мывкыда йөз,
Оз-ö өзъявныджык кут? Выль лэч
Локтысь Степан коми йөзлы вайис!
Гөгөрвоин-ö тэ вöлись тайöс?

2 тун

Гөгөрвои ме...

3 тун

Ми раммөдам
Степанöс кор...

2 тун

Лыям, талялам
Степанöс кор...

Ю а л ö м ъ я с да у д ж ъ я с.

1. Висьталыштöй Вежа Степан йылысь.
2. Мый сйö анбурыс? Кымын шыпаса сйö вөлöма?
3. Кыдзи коми йөз вуджисны-пыртчисны выль эскөмö?
4. Кутшöм вöли Коми муын кристос эскөмö пыртöмыс?
5. Корсьöй да петкөдлöй мусерпасысь Емдін сикт.

* *К и н* — кодi.

Вир кисьтана XV-öd нэм. Емваса öксыяс

Вежа Степан кувсьём бöрын Коми муын лөнъ олём эз пуксьы, мөдарö на, XV-öd нэм вöлöма дзоньнас вир кисьтана кадколаст. Перымса аркирейув сулаліс Мöскуа öксыув дор, а сэки Роч муын быд öксыув тышкасьліс öтамöдыскöд, роч йöз виавлісны мөда-мөднысö, öттшöтш роч öксыувъяс вылö усьласисны Волга вывсянь сэнi олысь тoтара. Вир киссьылöма шорөн. Медшөр паныд сулалысьясыс нэм заводитчиг вöлөмны Мöскуа да Новгород öксыувъяс. Югдін (Устюг) карын веськөдлысьяс чукөртлісны вын да 1418-öd да 1425-öd воясö тышкасьлісны новгородсаяскöд (югдінсаяс дор тышкасьлöмаöсь тшöтш комияс). Новгородсаяс вермисны, ковмис налы мынтысьны сэсся дона куясөн.

Нэм шöрас Комиын олысьяс веськалөмны кык би костö. Медводз, асыв-войвывсянь усьласьлісны йöграяс, лунвывсянь кадысь кадö тышö пыравлісны вяткаса рочьяс. Сэки Роч муын мунлöма тыш Мöскуаса öксыулын веськөдлөм вöсна, Василий II паныд нырөмны Ростовын пукалысь Юрий Галицкий, Василий да Дмитрий Шемяка. Найö усьöдлісны Коми вылö (Мöскуаса öксыув дор сулалысьлы паныд) вяткасаöс, шыödчывлісны тшöтш йöгра дорö бырөдны комиясöс. 1450-öd воын Дмитрий Шемяка новгородсаяскöд öтвыв рөзөритöма Югдін кар, коми тышка вынсö жугөдöма вöлі тышас. Шемяка тшöктөм серти вяткасаяс сійö вoнас уськөдчөмны лунвывсянь Коми му вылö. Тышка йöз вуджөмаöсь Сыктыв, Эжва, Емва вожъяс, сөмын Емдін изкар абу вермөмаöсь босьтнысö, бергөдчөмны бөр Вяткалань. Тадзи вяткасаяс пыравлөмны сэсся Комиö унаысь на. Документын гижöма, мый вяткасаяс «Дмитрий Шемяка öксыкөд унаысь воывлісны Сыктыв, Емва, Эжва вожö, уна йöзöс мучитісны, виалісны, кодöс ваö шыблалісны, кодöс керкаясö йөрталісны, айловъясöс, пöрысьясöс, ичөтъясöс тшöттөг соталісны, кодлысь синсö перъялісны, мукöд кагаяссö майөг вылö сатшкалісны, начкалісны».

Мöскуаса Василий II öксы мөдөдiс 1451-өд воын Комиö ассыы эскöдана йöзöс, Вереийский öксыясöс веськöдлыны вотчинанас, котыртны вяткасалы паныд водзасян тыш.

Тöдсаöсь налөн нимъясыс: медводдзаөн вөлöма Василей, сэссия сылөн Василей пиыс, пияныс сылөн Петыр да Педя. Пияныслы сетiсны öксы нимъяс. Налөн стöч оланiныс абу тöдса. Гашкö, олисны вокъясыс Княжпогостын. Кык вок служитiсны Мöскуаса öксылы, налы вöли сетöма та могысь торъя кабала (грамота). Тайö öксыясыс видзöдiсны, медым коми йöз мынтiсны-вештiсны Мöскуалы ас кадö дань, видзисны-дорйисны Коми му уськöдчылöмъясысь да с.в. Та могысь жö ёнмöдалiсны изкар сяма сиктъяс. Татшöмъяс-нас вөлöмаöсь Абъячой, Лойма, Спаспуруб да Кебра сиктъяс. Сэкса кадö тайö сиктъясас йöз абу овлöмаöсь, ёнджыкасö сэнi видзлöмны öружие.

1478-өд воын новгородсаясöс пасьвартiсны Мöскуаса тышка войтыр, Новгород воштiс ассыы ашшөрлунсö. Регыд мысти сылөн муясыс пырисны Мöскуаса öксыулö. Новгород та бöрти эз кут тышкасьны-венласьны Коми му вöсна.

Дерт, эз öдйö да виччысьтöг Коми му пыр Мöскуа борд улö. Пырöмыс лои тэрмасьтöг да ньöжйöник. Но XV-өд нэм кeжлö Коми му дзикöдз нин йитчис Мöскуакöд. 1481-өд воын Коми муын нуöдiсны сiдз шусяна йöзöс лыддялöм. Арталiсны-лыддисны, тöдмалiсны, тыдалö, кымын морт олö войвыв муясын. Буретш сийö кадас Коми му официальнойя пырис Мöскуа öксыулö. Тайö лои 1481-өд воын. Дерт, Мöскуа дорö тайö öтлаасьöмыс вайис комияслы буртор да лёктор. Бур вöли сийö, мый коми войтыр вылö эз кутны усьласьны ортсы йöз. Лои-чужис миян асланым гижöд кыв. Коми йöз кутiсны ёртасьны рочьяскöд. Найö мөдiсны эскыны Крiстослы. Сöвмисны-ёнмисны водзö феодальной йитöдъяс. Видз-му вöдитысьяс медясö олисны сiдз шусяна съод муяс вылын, найöс кутiс ас киас öксы. Видз-му вöдитысьясöс шуисны съод му вылын олысьясөн, сёрöнджык найö лоины канмулөн йöзөн. Чина мортөн, гырысь феодалөн вөлöма Вежа Степан. 1490-өд воын сы кыин вöли 49 видз-му вöдитысь овмöс.

Нэм помланьö коми йöз вочасөн мынтöдчисны асыв-войвывса лёк вöчысьясысь — мянн вылö усьласысь йöгра-ысь. 1465-öд да 1483-öд воясö Мöскуаысь ыджыд öксы Иван III ыстис Печора вылö да водзö Из сайö тышка вын, сэтчö öтувтчисны тшöтш коми тышкасьяс (эжваса, ем-васа, сыктывсае), комияс индалисны тшöтш туйяс. Найö пасьвартöмны йöграöс, босьтöмаöсь пленö налысь Чолдан öксысö. Тадзи вочасөн Коми муын дугдöма киссьыны вир, тышъяс помасьны кутöмны.

XV-öд нэм чöж зэв зiля уджалöма Перымса аркирей-ув, коми гижöд кыв бергалöма вичкоын, велöдчанiнъясын, гижасьöмын, монастырьясын. Филарет аркирей пыртöма кристиана эскöмö тшöтш Кама вожын олысь перым-коми-ясöс. Кристиана йöз содис вель öдйö, Перымса аркирейув дорö сэсся йитисны вяткаса да двинаса вичкояс, вочасөн сэсся аркирейувлысь шöринсö 1564-öд воö вуджöдöмаöсь Вөлöгдаö. Сэни уджалысь аркирейяс, коми кыв тöдтöг, эз нин сэсся кутны тöждысьны коми гижöд, небöгъяс понда. Тадзи вочасөн вичкоын коми кывйөн вöдитчöмыс пондис чинны, но дыр на эз быр. Сидз, XVIII-öд нэм помын роч академик И.И. Лепёхин суöма на важ коми сыланъяс сьылöмсö Волсяса монастырьяс.

1499-öд воö Иван öксы тшöктöм серти Семён Курбский да Петр Ушатый öксыяс юрнуöдöм улын ыджыд роч тышка вын (коми тышкасьясскöд тшöтш) пасьвартöма яранъясöс да йöграясöс, пленö босьтöмны налысь öксыяссö, унаöс виалöмны-бырöдöмны. Сийö кадсянныс Печора вож пырö тшöтш Мöскуаса öксыув улö. Вир кисьтана нэм помасис.

Ю а л ö м ъ я с.

1. Кыдзи мөрччис коми йöз вылö роч öксыувъяслөн аскост-са тышыс?
2. Мый вöчлисны емваса öксыяс?
3. 1481 во. Кутшöм лöмторъяс вөлöмаöсь сийö кадö?
4. Мый бурсö да лёксö вайис Мöскуа дорö Коми муöс öтүв-тöмыс?
5. Кыдзи вежсис коми гижöд кывйөн вöдитчöмыс XV-öд нэмö?



6 юрас

КОМИ МУ XVI-өд НЭМСЯНЬ XIX-өд НЭМӨДЗ

1 юкөн

Коми мулөн вежсьом: важ оланінъяслөн рочмём, вьельлаё овмөдчём

XVI-өд нэмө коми йөз некодкөд эз нин тышкасьны, на вылө эз усъласьны шыён да шыпуртён вяткасяс да йөгра. Лои позялун сөвмыны-овны лөня, повтөг. Но та вылө видзөдтөг, коми войтырлы тайё нэмыс коли бара на сьöкыда. Медводз, комиясөн овмөдём муясö, сиктъясö-грездъясö пондiсны помтөг овмөдчавны кресъяна Роч муысь, найö пышъялөны вöли крепостной нартитöмысь, вöли корсьöны вьель муяс, өд уналаын гöран муыс вöли этша нин. Тадзи XVI-өд нэмө вочасөн рочмөмаөсь комияслөн важ овмөдөминъяс — улыс Эжва (Пырас—Котлассянь), улыс Луза, Пинега да Вашка, сёрөнджык рочмөма тшөтш Вилядь вож. Рочьяс, дерт, овмөдчалiсны тшөтш мукөдлаё, Сыктыв, Емва, Эжва вожъясö, но сәнъясын, коми йөз пөвстын оліг, найö комисьявлiсны, өдйö вуджлісны коми кывйö.

XVI-өд нэм мөд джынйö серпасыс өдйö вежсьөма: роч йөзлөн ыльөбтöмыс другмоз чинөма. Öтувъя Роч канму пыртөдiс ас улас Казаньса да Астраханьса ханствояс, а сэсся нöшта Сибирса ханство, роч овмөдчысьяслы тотараяс эз нин лоны повзьөдчанторйөн. Лөнъмөдём муясö буретш ылькнитiсны вьель олысьяс, Коми му аслас гөльджык му-

яснас эз нин кут кыскыны роч кресьянаос, налы воссисны выль туйяс. Та бõрын тшõтш комияс пондисны овмõдчавны няня муяс корсьом могысь лунвывса муясõ да Сибирõ.


Õттшõтш Коми му пондис õдйõ пасьякавны. Коми йõз пондисны овмõдавны тыртõминьяс, шõр нырвизыс выль олысьяслõн лои войвыв, асыв-войвыв да асыввыв. Коми войтыр медсясõ овлисны сәки Емва да Эжва юяс бокин. Но сикт-грездяс кыпалисны нõшта Сыктыв, Луза да Вашка юяс пõлõн. Сийõ кадõ ёнджыкасõ коми йõз олисны ичõтик грездясын. Найõ вõдитисны видз-му, вõралисны, чери кыйисны. Быд грезд кытшалисны пасьякыд муяс. XVI-õд да XVII-õд нәмьясын унджык коми грездас вõлõма сõмын некымын овмõс. Сәсся овмõс лыдыс пондис вочасõн содны. Õткымын грездын кыпõдисны вичкояс.

XVI—XVII-õд нәмьясын погостõн (вичкодорса сиктõн) шулисны коми йõзлысь вичкоа да шойнаа оланін. Сәни жõ вõлины сәян-юанõн вузасяниньяс, амбарьяс, корысьяслõн оланіньяс. Погостсõ кытшалис некымын грезд. А сәсся, бõрынджык нин, тайõ погостьяссыс быдмисны гырысьджык да йõзаджык сикт-грездяс.

Коми йõз, медсясõ видз-му вõдитысьяс, бурджык гõран муяс да видзяс корсьом могысь, дона зьвер кыйõм помысь кутисны овмõдчавны Войвывлõн ылі пельõсьясõ. Шуам, XVI-õд нәмõ коми войтыр ёна сетчисны асыв-войвылõ, õд яраньяслõн да йõгралõн муяс сідзжõ веськалисны Мõскуаса õксы борд улõ. Кыптисны медводдза оланіньяс Печора ю пõлõн. Вильторйõн сийõ кадõ лои коми йõзлы слõбõда. Слõбõда ёнасõ нинõмõн эз торьяв сәкся сикт-грездясысь. Но татчõс олысьясõс кутшõмкõ кад кежлõ мездылисны вот мынтõмысь. Слõбõдасõ кыпõдлисны дзик выльлаõ, татшõм аслыспõлõс грездсõ подулалысьяслы сарõн сетлõм грамота серти. Тадзи, буракõ, Мõскуаса веськõдлысьяс зильлисны ышõдны выль муясõ мунысьясõс, выль оланіньяс кыпõдысьясõс, Роч му пасьякõдысьясõс. 1542-õд воын вõли лõсьõдõма Изьваса да Удораын Глõtõвоса слõбõдаяс.

XVII-õд нәмõ Коми муын олысьяс пасьякõдчисны Эжва

йывлань, чужисны Кӧрткерӧс, Немдін, Нӧбдін. 1674-ӧд воын кыптӧ медводдза оланін тшӧтш Печора йывланьын, ӧнія Мылдін сәки шусьылӧма Кузьминской пӧчинӧк.



Тані овлӧмабсь комияс XIV–XVII-ӧд нәмъясӧ

XVII-öd нэмын Коми муын ылöсас вöлöма куимсё сайö грезд-сикт. А XVI-öd нэм помын сэни олöма 20–20,5 сюрс морт. XVII-öd нэм помын йöз лыдыс содöма 31 сюрсöдз.

Öни бурджыка тöдмасям, кызди чужöма да сöвмöма Коми муын öткымын сикт-грезд. Со босьтам **Айкина** сикт. Сулалö сийö Эжва юлөн шуйга вадорас. XVII-öd нэмын (1646-öd во) тайö вöлöма Эжва ю вылын «Айкинскöй грезд». Грездас сöмын кык овмöс. Öтнас олöма Степан Федорович Исаков аслас пиянкöд. Важ гижöдъясын пасйöма быдтасъяссö — Васькаöс, Еремейкаöс, Петрушкаöс, Мишкаöс, Макарёс да Матюшкаöс. Сэки, важ гижöдъясас, вöлөм пасъялöны сöмын зонъясöс. А нöшта быдмöмаöсь нывъяс тшöтш. Айкина грездын йöзыс вочасөн содöма, кыпалöмаöсь выль керкаяс. Уна аймортöс босьтлöмаöсь салдатавны. Мукöд коми йöз грездсыс асьныс мунлöмаöсь, медсясö тшыг олөм понда, кор няныс кынмавлöма муяс вылын. Öти важ гижöдын тöдчöдöма: «Нянь эз во, эз во сы понда, мый... моз тöлысь (август) заводитчигөн кыкысь ёна кынмавліс». Медсясö вöлі паськалöмаöсь Исаков, Турьев, Попов овъяс. 1873-öd воын грездас артавсьö вöлөм 51 овмöс, 316 олысь, вöлöма нöшта вöлөсьтөн веськöдланін, часовня, пошта, велöдчанін.

Грездса олысьяс вöдитлöмаöсь видз-му овмöс, быдтылöмаöсь картопель, капуста, сёркни, ид, рудзöг, шабді, пыш. Видзöмаöсь скöт — мөсьяс, вöвъяс, ыжъяс. Вöралісны, чери кыйисны. Айкинскöй грезд лои сиктөн XX-öd нэмын нин, кызьöд воясö.

Öксы(княж)погост. XVII-öd нэм пуксигөн (1608-öd воö) Княжпогостын сулавлöма кык пу вичко. «А вичкоясас öбразъяс да небöгъяс, сисьяс да жынн्यानъяс»... Погост пытшкас — шойна, орччөн — вичкоса уджалысьяслөн олан керкаяс. Бокынджык сулалісны ичöтик грездъяс. Быд грездын öти-кык-куим овмöс. Öкмысöдз овлöма весиг. Медсясö паськалöмаöсь вöлі татшöм овъяс: Манов, Мартюшев, Люсов, Габов да мукöд. Погостсö да грездъяссö кытшаліс му-видз. Татчöс олысьяс быдтісны ид да рудзöг. Пуктылісны град йөрö капуста. Гöран муыс вöлі этша, сы вöсна грездъ-

ясын олысь коми войтыр вöралісны да чери кыйисны. Öткымынön, медся востерыс, ветлісны съом шедöдöм могось Сереговö, татчöс сов пуан заводö, весиг воöдчывлісны Сибирöдз. Öд Княжпогост сулаліс буретш Сибирö мунан туй вылын да вузасьысьяслы вöлі зэв кивыв. XVII-öд нэм шöрын Княжпогостысь лои вöлöсьт шöрин. А XVIII-öд нэм мöд джынйын погост öтлаасис-йитчис матысса грездьяскöд, тадзи чужис Коми муын Княжпогост сикт.

«Вологодские губернские ведомости» газет (1853-öд во) гижö сійö кад йывсьыс, татчöс олысьяс да налön оласног йылысь тадзи: «Керкаяс кыпöдигön-лэптигön некод эз видзöд налön мичлун вылö. Кыдзи мövпыштас *месайыс*, сідзи и стрöйтчö. Вонас уна пыдди кык тöлысь кымын сöмын овлöны гортаныс княжпогостсаяс; лöддза-номъя тöлысьын чери кыйöны, сора тöлысьын — турун ытшкöны-заптöны, моз тöлысьö вундан кад пуксьö. Арнас коми войтыр пöтка кыйöны, тöвнас — ур да көр... Емва ю сетö налы уна гöрд чери, ком, сиг да сир. Татчöс вөр-ваыс зьвер-пöткаөн озыр. Тшöкыда паныдасьлöны дона куа вөрпаяс — руч, сан, сьöдбöж, тулан да мукöд, дерт, ошъяс, көръяс, йöраяс да уръяс серти гежöдджыка».

Визин — öні Сыктыв районса шöрин, юрсикт. 1586-öд вося важ кабалаын гижöма — «Визинга погост». Сэні вöлöма кык пу вичко да тайö вичкоас уджалысьяслön куим овмös. Погостыскöд орччөн сулалöмны грездьяс. Тайö грездьясас вöлöма 65 овмös, нельыс на пövстысь тыртöм. Коми войтыр сійö кадас вöдитісны му-видз, скöt видзисны, вöралісны, кыйисны чери. Медсясö паныдасьлöмаöсь Тебеньков, Попов, Беляев овъяс. На пövстысь унаөн мунлöмны Вятка да Кама вожъясö, Сибирö. Кутшöмкö кад мысти унджык грездыс öтлаасьöма погостыскöд. Бöрынджык погостысь лöма ыджыд сикт.

XVIII-öд нэмö роч академик И.И. Лепёхин воліс Коми муö. Сійö со кызди гижö тайö сикт йывсьыс: «Визин сикт зыряналön медся ыджыд сикт, кодös ми аддзылім. Сэні артавьö 201 овмös да кык грезд... вичкояс; олысьыс, ги-

жалом серти, 641 морт». Сиктыс сэсса водзё кутіс сөвмыны-паськавны, öні сійö Сыктыв районса шöрин.

1780-öд воын Комиын вöлöма зэв тöдчанатор. Усть-Сысола погостысь лои кар, Усть-Сысольск нима. Кар, дерт, ёна торъяліс сикт-грездысь. Сэні кыптисны изйысь тэчöм медводдза керкаяс, сійö вочасөн лои культура шöрин, карас вöлісны Коми муөн веськöдланінъяс. XVIII-öд нэм помын, XIX-öд нэм пуксигөн вöвлöм погостъяс, грездъяс, слöбöдаяс подув вылын чужисны-сöвмисны сиктъяс. Сикт, дерт, торъялö вöлі карысь, вочасөн сикт лои коми йöзлөн шöр оланінөн, көні найö ёнджыкасö вöдитісны видз-му овмös. Быд сиктын вöлі вичко, школа, сиктөн веськöдланін. Юрсиктсö тшöкыда кутісны шуны вичкодорөн. Сиктъясөн лонины Изьва, Глотова. Тайö жö кадö йöз овмöдчалöны Коми му войвылö, Печора да Изьва юяс пöлөн, топыда вужъясьöны сэтчö. Кыптöны выль грездъяс. Изьватас комияс лöсьöдісны Сизяб (Ыб) да Мокчой сиктъяс. Вылыс Печора бокин чужöны Пидздін, Саваяг да мукöд грездъяс.

Печора ю бокö, сарлөн власьтысь пышйöм бöрын, овмöдчöны роч йöз, Сус Кристослы ас ногыс эскысьяс, сідз шусяна торйöдчöмаяс (раскольникъяс), важ ног пернапас чöвтывьяс. XIX-öд нэм шöрын нин Коми му вöлі бура тöдмалöма, йöз овмöдчалісны медся ылі пельöсьясö. Но сэк жö Печора ю бокин, сылөн вожъясын, Уса да Колва юяс пöлөн вöліны на тыртöм муяс.

Öти кывйөн кө, выль сикт-грездъяс XIX-öд нэмын öдйö быдмисны-паськалісны. XIX-öд нэм шöрын сэтшöмыс вöлöма нин 600. На пöвстысь унджыкыс сулаліс ыджыд юяс да налөн вожъяс пöлөн. Водзын кө коми йöз керкаяссö кыпöдалісны сідз-тадз, водзö некутшöм видзöдтöг, мичлун артышттöг, XVIII–XIX-öд нэмъясын тайö серпасыс тöдчымөн вежсьö. Керкаяс лэптöны визьөн-визьөн нин, юяс либö туйяс пöлөн.

Содö тшöтш йöз лыд. XIX-öд нэм шöрын Коми муын овлöма нин 83 сюрс морт, на пöвстысь 75 сюрсыс комияс, 8 сюрсыс — роч йöз. Комиö воём рочьяс медсясö овлісны Емдінын, Лоймаын, Сереговса сов пуан заводын, Сыктыв вылын, Кажимса көрт сывдан заводъясын.

Коми войтыр уна помка вöсна тшöтш мунавліс мукöд муясö. Шуам, XVIII-öд нэмсянь йöзыс кутісны овмöдчавны Алтайö, сэні коми войтыр тшöтш вöдитіс видз-му овмöс. Нöшта уджалісны көрт сывдан заводъясын. XIX-öд нэм шöрсянь изъватас кутісны овмöдчавны Из сайö, Об да Ляпин юяс бокö. Медводдза коми йöз воöмаöсь сэтчö 1842-öд воын. Кутшöмкö кад мысти чужис Саранпауль нима ыджыд сикт. Йöгра (манси) кыв вылын тайö — «зыряналөн грезд».

Ю а л ö м да у д ж ъ а с.

1. Висьталöй коми йöзлөн тайö кадся оланінъяс йылысь.
2. Кутшöм выль муясö овмöдчалісны сэки коми войтыр?
3. Висьтыштöй Визин, Айкина либö Княжпогост йылысь.
4. Мусерпасысь индöй, кытчö медсясö овмöдчалісны воом роч йöз.

2 ю к ö н

Коми йöз — Сибир восьтысьяс

История туялігөн векджык гижлöны вöлі, мый комияс вöлöмны пö роч дружинаясöс да Ермаклысь *урмасö* Сибирö нуöдысьясөн, бöрыннас сэсся пö тшöтш унаөн овмöдчавлöмаöсь Комиысь Сибир пасьтала. Збыль вылассö коми йöз паськөдчылöмны сэтчö рочьяс дорысь ёна важөнджык на, Роч канму дорö Сибир йиттöдз некымын сё воөн водзджык, XII-öд нэмсянь нин. Коми да йöгра (манси да хант) уна нэм чöж овлісны орччөн, эз сöмын корсюрö тышкасьлывлыны, но тшöкыдджыка овлісны бурөн-ладөн, вольысисны öта-мөд костын да зэв ёна вежласисны, вузасисны. XII–XIV-öд нэмъясö Европа войвылын климатыс ёнакодь кöдздöдöма, няньсö зэв тшöкыда кынтавлöма. Öттшöтш няня муяс коми йöзлы эз кут тырмыны, да вöралöмлөн (дона куяслөн) тöдчанлуныс зэв ёна содöма. Важ комияс та вöсна ёнджыка пондісны вöравны, кыйны

тулан, низь, ур, съдбѡж, куяссѡ вузалісны Волгавывса Булгаріяѡ, Рочѡ, весиг Суомиѡ, водзѡ Европаѡ. Коми муын вѡръяс ѡдйѡ гѡльмисны вѡрпаѡн, вочасѡн писькѡс коми вѡралысьяс да вузасысьяс вуджисны Из да паськѡдчисны паськыд ота Сибирѡ, Об юѡдз да сы сайѡ, шѡр да войвыв Сибирѡ.

Йѡгра йѡзкѡд волысигъясѡн озырмис комилѡн оласногыс, содісны тѡдѡмлунъяс, бара коми йѡз нуисны да вуджѡдісны йѡгра пѡвстѡ европаса культура. Манси кывйѡ комиысь вуджѡма 350 гѡгѡр торъякыв, комияссянь найѡ тѡдмалѡмны **нянь** йылысь, **лузан** йылысь, **кола** «тшупѡм керка» йылысь; сѡтчѡ пырѡмаѡсь **мис** «мѡс», **пос** «пас», **шайт**, **ярмак** «ермѡг» (шѡлк) кывъяс.

Сибирѡ ветлысьяс пиысь унаѡн сѡтчѡ кольчывлісны, унаѡн тѡвйывлісны. Вѡрѡгъясысь водзсасыѡм могысь, прѡмыс да сѡян-юан видзѡм, узьлѡм-олѡм могысь комияс кыпѡдлісны каръяс, ѡнмѡдѡм стеньяса изкаръяс. Летописьясѡ кольѡма кык коми кар ним — Уркар да Войкар. Дерт, татшѡм карыс вѡлі унджык, ѡд улыс Об вылын ѡні на эм уна коми инним — Изкар, Сускар, Шурышкар. Тасысь кындзи, комияс нимтѡмны ас ногѡныс юяс (Лѡзва, Сосьва, Язва), Урал гѡраясысь медждуджыдъясылѡн бара коми нимъяс — Сьѡлѡм-Из, Сюра-Из, Перна-Из, Сабля-Из, Тѡлпоз-Из, Ыджыд Парма да мукѡдъяс. Ѳти кывйѡн, коми йѡз эз вѡвны Из сайѡ ветлысь-мунысьяс, найѡ XII-ѡд нѡмсянь нин овмѡдлісны Рытыв Сибир. Тайѡ Емваысь, Лузаысь 1000 верстысь ылынджык.

XIV-ѡд нѡм помѡ Из сайѡ овмѡдчѡма-пышйѡма уна коми язычник, Памалѡн ордпуыс. Найѡ эз кѡсыны мырдѡн вежны енъяссѡ, вуджны кристиана эскѡмѡ. XVII-ѡд нѡмѡдз коми йѡз вочасѡн овмѡдчавлісны Из сайѡ, ѡткѡн, котыръясѡн да урмаясѡн. Кодсюрѡ дона куясѡн воліс бѡр, кодсюрѡ кольччыліс, мукѡд усыліс усыласысь йѡгра шыысь либѡ нѡвйысь, кодсюрѡ вочасѡн вуджліс манси да хант кывйѡ. Татшѡм ногѡн, Ермакысь ѡна водзджык комияс тѡдмавлісны Сибирлысь ѡгъяссѡ, ва туйяс да уна пѡлѡс войтырѡс, налысь ѡбичасѡ да оласногѡ.

Коми йөзлөн Сибирё выль ыджыд овмөдчөм-вуджөм лоас сэссия XIX-өд нэм помлань, сэки сәни чужасны нин дзонь коми сиктъяс улыс Об дорын (Мыжы, Казым, Сойва, Саранпауль, Березово, Няксимволь) да шөр и лунвыв Сибирын (Ивановка, Каменка, Старо-Александровка).


Ю а л ө м ъ я с да уд ж.

1. Мыйла коми йөз муналісны Сибирё?
2. Кыдзи коми войтыр овмөдчалісны Сибирё?
3. Лөсьөдөй ичөтик висьттор, быттьокө ті сійө ылі кадас ветлінныд Сибирё.

З ю к ө н

Вөралысьяс да чери кыйысьяс

Коми йөзлөн олөм-вылөмын ыджыд төдчанлун пыр босьтлісны вөралөм да чери кыйөм. Нинөм шензьөданаыс тані абу. Коми му пасьтала сулаліс тшем вөр, югъялісны шонді водзын юяс да тыяс. Пармаын олісны кыньяс, низьяс, съөдбөжъяс, ручьяс, уръяс, көчьяс, ошъяс да мукөд вөрпа (звер). Вөравлісны медсясө арнас, сентяб-нояб төлысьясө. Сійө кадө кыйлісны пөтка, ёнджыкасө матысса вөръясысь. Төвнас вуджлісны пыді пармаө, кыйлісны дона куа зверөс. Коми йөз, вөралысьяс, лөсьөдавлісны кыйсян-вөралан котыръяс. Тайө котыръясыс вель ылө мунлісны сикт-грездъясысь. Котырас, рочөн кө, артеляс, вөлі морт 5–7. Медся нималана да сяма кыйсьысьөс пуктылісны котырнас веськөдлысьө. Вөралысьяслөн юралысь индивліс, кытчө колө мунны кыйсьөм могысь, көні шойччыны, көні корсьны вөрпаөс. Котырысь сійө өтнас нинөм аскөдыс эз ну, муніс кокниа, сьөкыд ноптөг, норт (вөралан дадь) ас бөрсяыс эз кыскы. Кыйдөссө вөралысьяс юклісны шөрипельö, но котырөн юралысьлы вичмөдлісны унджык. Төвнас ылі вөръясын узьлөм могысь вөчлісны чом, сійөс сямөдөн



Вөралан көлүй (лэчъяс да везъяс)

вевттылісны. Сюмөдсө вөралысьяс пыр новлөдлісны ас-көдныс, тубрасын. Сідзи жө, кызди пуля-порок да сёян-юан. Чомсө вөчлісны тадзи. Лымсө весавлісны ставнас, дзик муөдзыс. Сэссия кын муас тэчлісны-вольсавлісны пашкыр коз пу вожъяс. Чомйө пыранінас, ывла вылын, пестылісны бипур. Сійө ломавліс войбыд. Тадзикөн бипурыс шонтыліс чомсө да сәні узьмөдчөм вөралысьясөс.

Мөд ног коми йөз кыйсьывлісны арнас. Медясө чөс туй кузя. Чөс туйыс вөлі быд сёмъялөн ас, торъя. Вөравлісны сы кузя уна дас во. Батьсянь чөс туйыс вуджліс пиыслы, писяньыс — пиыслөн пиыслы да с.в. Чөс туй пөлөныс коми вөралысь пуктавліс зъвер-пөткалы быдсяма кыантор. Тарлы, дозмөрлы, сёлалы. Чөс туй пөлөныс жө шойччөм да кыйдөс видзөм могысь кыпөдлісны вөр керкаяс, тшамъяяс либө турышъяяс (амбаръяяс сяма), вөліны тшөтш пывсянъяс. Вөралысь петавліс чөс туй вылө өтнас, геждө пиыскөд либө воыскөд. Вөр керкаыс чөс туй вылас паныдасьліс некымын. Векджык вөралысьлы ковмис ёна ветлыны пармаөд. Лунтырөн сылөн вуджан туйыс шу-

ссыліс чомкост вуджём. Сідзкё, мортыс мунліс өти вөр кер-касянь мөдөдз некымын дас верст. Кыйссылісны сэки чөс туй пөлөн ёнджыкасё лэчкөн, но вөчавлісны пөткалы тшөтш быдсяма виччысьтөмторсё. Көрт капкан паныдасьліс зэв гежөда. А пицаль босьтлісны сөмын дона куа зверөс кыйём могысь. Арнас кыйсьыны коми морт мөдөдчыліс ю кузя, ас вөчөм кокныдик пипу пыжөн. Төвнас лызьөн кайліс вөрө. Нопсё, пуля-порок да сёян-юан кыскыліс ас бөрсяыс векныдик даддын. Корсюрө даддьө домавліс понъясөс — отсөг вөсна. Сэки вөралысьяс сюся видзөдісны асланыс понъяс бөрся, рөдмөдісны медся бурьяссө. Весиг вөлі кыйсян понъяслөн торъя сикас — зырянскөй лайка.

Кыйсян лызьыс комияслөн, мукөд войвыв олысьяслөн моз, вөлөма кык пөлөс. Өтиыс паськыд пу лызь, лампа. Мөдыс — сэтшөм кымын жө, сөмын эжөма звер кокысь кульём куөн, кысөн. Вөравліс коми морт лызь вылын өти беддьөн. Сыён вөралысь йөткасьө вөлі пармаын собаліг-ветліг, пекля либө лэч пукталігөн лымсө весаліс. Та вөсна өти бедь помыс сылөн вөлі ёсь, мөдыс — ичөтик зыр сяма.

Вөралөм кындзи комияс ёна кыйісны чери. Чериыс татчөс юясын да тыясын вөлөма уна. Коми муө волөм академик И.И. Лепёхин гижліс, сиг... пө ёна шедө Сыктыв юысь. Эм уна налим, ком, ёкыш, сир, гыч, ёді, кельчи, сын, мык, пескыш... Мукөд юясын чериыс вөлі эз этшаджык. Черисө кыйлісны өткөн, семъясөн, артельён. Посниджык юясын да висьясын вөдитчөны вөлі гымгаён. Сэтчө чериыс кокниа пырліс, петнысө сөмын эз вермыв. Сэк жө дыр кад чөж кольліс ловъя, сы вөсна мый гымгасө ваө вөйтлісны. Гырысьджык юяс да тыяс вылын ботайтчылісны, кыйсьывлісны куломөн, ботанъясөн, тывйөн. Ботансө вөйтлывлісны кутшөмкө кад кежлө, тывсө кыскывлісны ю либө ты кузя. Таысь кындзи, чери кыйлывлісны вугырөн да азыласөн. Азыласнас вөдитчывлісны арнас, пемыд войясө. Пыж нырас, көртысь вөчөм подув вылын, өзтывлісны ичөтик бипур. Сійө югзьөдліс васө пыж гөгөр, кыйсьысь бура вөлі аддзө узысь чериөс да сатшкывлө сійөс азыласөн.

Чери кыян тывъяссö да ботан-кулöмъяссö коми йöз кылiсны асьныс, посни синмаöс да гырысь синмаöс. Кузь да дженьыдик тывъяс, ботан-кулöмаяс. Ичöтик ботанöн ю вылö коми морт петавлiс öтнас, ыджыд тывйöн кыйсьывлiсны артельöн.

Емва ю вылын артельöн кыйсьысьяс юкльвлiсны черисö со кызди. Быд морт вылö торйöдлiсны ю бокрын торъя чери чукöр. Зильлiсны, медым найö öткодъöсь вöлины. Но эз пыр тадзи артмыв: öд чериыс шедлi уна пöлöс, гырысь да посни. Та вöсна ковмывлiс пудъясьны. Пудъясьöм могъсь бöрйывлiсны кык мортöс. Öтиыс сувтлiс чери чукöръяслы мышкөн, мöдыс юасьлiс сылысь, кодлы вичмöдны индöм чери чукöрсö. Тадзи юклiгад некод нин эз дузъяв öта-мöд вылас. Быд кыйсьысьлы вичмылiс ёртөн индöм чери чукöрыс. Торъя ыджыд тöдчанлун сетлiсны коми йöз дона чери, шуам, чими кыйöмлы.

Чери да зъвер-пöтка яйсö сёйлiсны, лишаланасö — вузавлiсны. Торйöн нин дона чери, вөрпа куяс. Нулiсны Югдiн да мукöд каръясö, коми войтырлысь кыйдöссö сэнi окотапырысь ньöбавлiсны купечьяс. Чимисö, важ йöзлөн висьталöм серти, нулiсны весиг мукöд муясö, мудор сайö.

Комиö вужъясьöм роч йöз велöдчисны комияслысь на ног жö вöравны да кыйны чери: тывъясисны, ботайтчисны, пукталiсны пöткалы лэчъяс да с.в.

XVIII-öд нэмö да медся нин XIX-öд нэмö вöралöмлөн да чери кыйöмлөн тöдчанлуныс коми йöз пöвстын вочасөн чинö. XIX-öд нэмын коми йöз пöвстын ёнджыкасö сөвмö видз-му овмöс. Татшöмторйыс лои сы вöсна, мый зъвер-пöтка лыдыс вөръясын тöдчымөн чинö, сэсся ёна содö сикт-грездъяс гөгөр видз-му. Сöмын Коми мулөн войвылын вöралöм да чери кыйöм кольö комияслөн олöмын медся тöдчана уджөн.

Ю а л ö м я с .

1. Кутшöм зъверъясöс кыйлiсны коми йöз?
2. Мыйöн найö кыйсьывлiсны?

3. Мый вöсна кыйсьывлісны-вöравлісны котыръясөн?
4. Кутшöм көлуйöн чери кыйлісны?
5. Кутшöм боксянь тöдчывліс чери кыйöмыс, вöралöмыс коми морт вылö?

4 ю к ö н

Коми йöзлөн удж-ноксьöм

Видз-му овмöс. Коми му лунвылын йöзыс медсясö быдтылісны-вöдитлісны нянь сетан быдтасъяс: шобді, ид, рудзöг, зөр, шабді, пыш. Водзын кө быд пуктан му вöчöм-лöсьöдöм могысь сотлісны вөр, лöсьöдавлісны тылаяс, öні öдйö паськалöны-содöны гöран муяс. Пырö сідз шусяна трөхпольеöн му вöдитанног, код серти көдзлісны öти вонас сю, мöднас ид, коймöднас коськөмтлісны. Асланыс град йöрын коми йöз быдтылісны сёркни, кушман, капуста, гөрдувуж. Тшöкыда кынтавліс, мунліс шер либö дыр, кузя зэрліс. Та вöсна бур урожай босьтлісны гежöда.

Войвылынджык, Печора да Мозын вожын, му вöдитöмсö ёна падмöдліс көдзыд поводдя. Сэні ёнджыкасö көдзлісны-быдтылісны ид да рудзöг, медсясö скöт видзлісны. Та могысь позянлуныс татчöс олысьясёлн вöлі: видзьясыс войвыв юяс да тыяс бокын тырмис, турун чукөрмыліс уна. Видзлісны сэки войвылын мöсьясöс, вöвъясöс, ыжъясöс да көзаясöс.

Коми йöз — му вöдитан вылын культураа войтыр, му-видз вöдитны да скöт видзны пöль-пöчьясным велавлöмаöсь ёна важöн нин, фин-перым кадколастö на, иранскöй войтыръясянь. Войвылö овмöдчöммысьт коми йöз эз эновтны важ оласногсö, няньысь кындзи быдтывлісны уна град выв пуктас — кузь төв төвъян сёянтор. Няньысь вöчлісны тшöтш сур — гажъяс дырйи бур юантор. Колö шуны, важысянь коми йöз эз юлывлыны чорыд винаяс, юлісны сöмын коддзöдтöм сур либö тагъя сур, неуна градусатор. Став чорыд вина ним, кызди тшöтш табак кыв,

пырöма мян сёрниö сёрöнджык рочысь либö роч кыв пыр:
вина, водка, самöкур (аскур).

Му вöдитан культура пыдiа вужъясьöма коми йöзкост-
са поэзияö, шуам, тувсов кадö, гөрны петiгөн, Сыктыв во-
жын сывывлывлiсны тадзи:

Петiм кö, петiм гөрнысö,
Гöрам кö, гöрам пу гөрөн.
Гöрам кö, гöрам вөрöна вөлөн,
Кöдзам кö, кöдзам веськыд кырымөн.
Агсалам кö, агсалам пу агасөн.
Быдтам кö, быдтам шобдi няньсö.
Вундам кö, вундам эзысь чарлаөн.
Сусланитам, сусланитам сусланö.
Тэчам кö, тэчам сёрöмö.
Шöтам кö, шöтам рынышö.
Лэдзам кö, лэдзам гумна вылö...

Нянь, няня пötöса олöм коми йöзлы век вöли ыджыд
кöсйöмтор, тшыглы кулöмысь мездантор. Эз öд сiдз-тадз
шулывлыны йöзыс: **няньöн-солөн овны** «озыра овны, судз-
сянаа», **нянь моз ловзыны**, **нянь сёян мудерлуныд вөлöма**
на, **нянь-сов рöдня** «ылысса рöдвуж», **нянь-сов величайт-**
ны «паччөр вылö водлыны, шойччыштны сэнi».

XVII–XVIII-öд нэмъясö комияс водзö овмöдчалiсны вой-
вылö да асыв-войвылö, петiсны тундраö. Вөр-ваыс да по-
воддяыс сэнi ёна зумышджык да кöдзыдджык. Коми муын
войвывса олысьяс, изьватас комияс, вочасөн босьтчисны-
кутчысисны көр видзны. Тайö выль уджсö найö кутiсны
вöчны XVII-öд нэм шöрсянь, көръяссö видзны велöдчис-
ны яранъяслысь, кодъяс олісны Печора ю вожын, тундра-
ын. Изьватас öдйö велалiсны тайö уджö. Сьölöм выланыс
воöма яранъяслөн чум, көр видзысьяслөн нэмөвöйся оланiн.
Сійöс позьö вöли кокниа чукöртны-разьны, нуны тундра быд
пельсö. Чумсö вöчлісны кузь потшъясысь, тэчлісны куим
пельсöсаöс, вевтгылісны көр куясөн. Чум пытшкас позис
бипур пестыны, дасьтыны сёян-юан. Чумсö разьöм бöрас

новлөдлөм могысь вөлі лөсьөдөма торъя додь. Яранъяслөн көлуйысь изьватас ёна кутісны новлыны малича да пими. Таысь кындзи велалісны яран моз жө заптыны да видзны көр яй да чери.

Коми йөз, изьватас пуктісны тшөтш ассыныс пай көр видзан овмөс сөвмөдөмө. Шуам, найө стөча индісны көр начкан кад — арся лунъяс, тундраса пемөсьяслысь кусө кор позис бура песны. Көр куясысь изьватас босьтчисны вөчны няр. Найө мөдісны дөзьөритны көръясөс лун да вой. Тайө кадсяньыс көр яй, куяс да мукөдтор паськыда вузалөны вөлі ярмангаяс вылын. Коми кыв вочасөн паськалө влі тундраын, весиг яран да йөгра пөвстө.

Коми йөзлөн удж-олөм. Коми муын сөвмө уна пөлөс ремеслө, татчөс олысьяс кынөмпөт перйөм могысь ёна прөмышляйтөны. Коми войтырлы колө вөлі унатор кужны вөчны: керка тшупны-лэптыны, көмкот да көлуй вурны. Оз сөмын аслыс, нөшта вузөс вылө, сьөм перйөм могысь. Коми йөз пөвстын вөліны вурсьысьяс да сөйысь дозмук вөчысьяс, пась дасьтысьяс да краситчысьяс, көмкот лөсьөдысьяс да тшупсьысьяс. Паныдасьлісны весиг енпөв серпасалысьяс да зарни-эзысьысь донаторъяс вөчалысьяс. Сереговса заводын зэв вылө донъявлісны дорччысьяслысь удж, найөс весиг мөдөдливлісны Мөскуаө. Ёна коми йөз тшупсьывлісны. Печора вылын XVII-өд нэмө сөвмө төчила вөчөм. Эжва йывса войтыр сідзжө вөчалісны бур төчилаяс. На киён вөчөмторъяссө нулісны вузавны Коми муысь бокө — Югдіно, Совдорө, Кама вылө, Волга дорө.

Коми му лунвылын вочасөн босьтчөны карабъяс вөчны-стрөитны. Медясө Ношуль сиктын. Яренск уездын ва вывті ветлан ыджыд пыжъяссө, медясө Сереговса совнуөм могысь, вөчаліс Гам, Зьөвсьөрт да мукөд сикт-грездьясса коми войтыр. Койгортын, Визинын да Волсяын гырысь пу пыжъяссө вөчлісны сы могысь, медым нуны Кардорө Кама вылысь пызь, шыдөс да мукөд сөян-юан. Вылыс Печораын карабъяс вөчлісны төчилаяс нуөм могысь, найөс медясө мөдөдлісны Сыктывдінкарө да Югдіно. Коми йөз кыпөдалісны-стрөитісны ва вывті ветлысь ыджыд

пыжъяс, позьö шуны, кималасөн, некутшөм *гжтас* (чертёж) эз вöвлы. Дерт, пöль-пöчлысь тöдöмлунъяс юрас кутöмөн. Ыджыд пыжъяссö вöчавлывлісны сöмын черөн. Тадзитö, дерт, мунліс та вылö уна вөр. XVIII-öд нэмын петлісны сарлөн индöдъяс, сэні вöлі чорыда шуöма пилитавны вöрсö пилаөн, кыпöдны карабъяссö пилитöм пöвъясысь. Индöма вöлі сідзжö, черөн вöчөм ыджыд пыжъяс кутысьясöс колö быть пö штрапуйтны. Коми муын вөр пилитан делö писькөдчис-вужъясис зэв сьöкыда. Коми войтыр мөвпалісны со кызди: пилатö ньöбөм вылö колö уна сьöм, а черыд ас овмöсад пыр эм. Карабъяссö ёна ньöбавлісны миян суседъяс, Вятка муын олысьяс. Найö окотапырысь вузавлісны ас быдтöм шобдi мукöдлаö, нулісны уна тöвар Кардор пыр саридз сайö.

Тайö кадö жö сөвмö вөр пöрöдөм. Россия буретш сэки лöсьöдіс ассьыс карабъяс, дасьтіс флот. А та могысь колö вöлі уна да бур вөр. Коми муын флотлы отсөг сетöм могысь торйöдісны мича пожöма ягъяс. Вöрсö сэки пöрöдісны сöмын канмулы. Торъя купечьяслы вöрсö керавны оз вöлі позь. Коми войтыр вөр пöрöдны медасьлісны буретш канмулы. А тулыснас пуръясөн кылöдлісны дась керьяссö Кардорöдз. Сöмын 1890-öд воын роч сар сетіс позянлун заптыны вöрсö тшöтш торъя йöзлы, прöмышленникъяслы.

Коми войтыр вывтi озырасö некор эз овлыны. Медым чуктöдны сьöм, перйыны кынöмпöt, вердны челядьöс, найö ветлісны мукöд сикт-грездö, вöчисны-бергöдісны быдсяма удж. Сьöм перйöмыс вöлі матысса да ыліса. Матыссаыс ас муын, ылісаыс — бокын, роч кар — сиктъясын. Комиын татчöс войтыр медсясö сьöм шедöдліс сов пуан да көрт сывдан заводъясын, Ношуль сиктса öзынын. Медым мунны Коми муысь кынöмпöt перйыны, колö вöлі босьтны сідз шусяна вося пашпорт либö кутшöмкö кад кежлö торъя билет. Коми йöз ылі муясын пач тэчисны, кыпöдісны кирпич керкаяс, мукöдтор вöчисны, весиг скöt пельшөрөн уджавлісны. Медсясö Мöскуаын, Питерын, Кардорын, Сибырын. Эньловъяс быдтісны-лелькуйтісны озыр йöзлысь ныв-пиянсö. Коми му войвылын сійö кадö ёна нуавлісны-

ваявлісны сёян-юан да эмбур-кёлуй доддя вёлаяс. Изьвас новлісны вузёссё быдсяма ярмангаяс вылө, сысянь сэсся Мёскуаө, Питерө да Канкарө.

Вузасьём. Ота-мөд костын вузасьёмсө сөвмөдіс Коми му пыр мунысь кык вузасян туй. Отиыс — Из вомөн, мөдыс — Луза да Летка юяс пыр, йитліс Вятка му Кардор бердса öзынкөд. Тайö туйяс пөлөн кыпалісны-сөвмисны сёян-юан, товарөн, дона куясөн вузасян шөрингъяс: Эжва увланьын Туглим, Емва вылын Турья, Луза ю дорын Ношуль. Ёна ньобасисны-вузасисны тшөтш Абъячойын да Изьваын.

Коми йөз пөвстын сійö кадас вузасьём отсөгөн озырмөны торья йөз. Медясö нималөны Суханов купечьяс. Найö ньобалөны коми вöралысьяслысь дона куяс да нуалөны гырысь карьясö, Югдінö, Мёскуаө, сэсся сәні вузалөны коми пармалысь озырлунсö. Сибирö, паськыда нималысь Ирбит карса ярманга вылө, коми купечьяс ваялөны роч карьясысь ньөбөм ной, уна пөлөс дөра, ермөг (шөвк), дона куяс, кужөмөн вузасьөны сәні. Эжва увланьын олысь купечьяс С.И. Шаньгин да Г.Л. Осколков тшөкыда ветлывлөны Китайö, ваялөны вузөс вылө тшай, зарни чунькытшгъяс, *пелькытшгъяс* да с.в.

Комиö, татчөс ярмангаяс вылө, дона куяс ньөбөм могысь тшөкыда кежавлісны югдінса, совдорса, соликамскса, вяткаса, карса (холмогорыса), кардорса да мёскуаса купечьяс. Öти кывйөн кө, XVII-өд нәмын кутіс тэчсыны-артмыны ставроссияса рынок (вузасьём), ассьыс пай сәтчö пунктіс коми войтыр, купечьяс, нуисны кодгъяс войвыв муысь дона куяс, төчилаяс, зудгъяс да с.в. Печора юысь кыйөм гөрд чери (чими) веськавліс весиг Кардор пыр саридз сайö, мукөд муясö. А комияс ньөбалісны сёян-юан, көм-паськөм, горт гөгөрын вөдитчан эмбур да медясö, дерт, нянь.

Мый йылысь висьталöны йöзлөн овъяс

Овъяс вермöны унатор висьтавны, уна гусятор восьтыны. Шуам, кытысь волісны уездса, вöлöсьтса, сиктса либö грездса медводдза олысьяс. Кöні вöвліны Коми муысь петöм йöз, кутшöм уджъяс найö вöчлісны, кутшöм выль муяс восьтöмö-лöсьöдöмö пуктылісны пай. Весиг мортлөн овыс вермö висьтавны-петкöдлыны, кытысь сійö, Коми мулөн кутшöм пельöсын чужлöма-быдмылöма.

Коми муын овъяс пондöмаöсь артмавны XVI-öд нэмö. Морт нимъяслы, вичъяслы да прöзвищяслы подувсö пуктіс ачыс кадыс, найö чужисны-сöвмисны вочасөн, выль муяс кыпöдан-восьтан кадö. Важ гижöдъясысь оз ёна тыдавны коми нимъяс. Но унатор йылысь висьталöны тшöтш коми овъяс.

Ракин ов артмöма, тыдалö, рака кывйысь. Дозмор ов — дозмöрысь. Важ коми овъяс ёнджыкасö артмылісны миян муын кристос эскöм пыртöдз. А кор Вежа Степан вайис Комиö выль эскöм, серпасыс сэки тöдчымөн вежсис. Ва-коми нимъяссö дзескöдны кутісны рочысь вайöм-босьтöм нимъяс. Но медсясö вичко нимъяс — Иван, Дмитрий да с.в. На пöвстын паныдасълöмны вöлі мукöд нимъяс — Некрас, Ждан. Тайö кыссис XVIII-öд нэм заводитчытöдз. Вичкоын сетöм нимъяс канмуөн индöм-вынсьöдöм кабалаясын öткодя бергавлісны сідз шусяна мирскöй либö йöз костын ветлысь нимъяскöд орччөн. Сідз, 1620-öд воö öти важ гижöдын гижöма-пасйöма абу вичкоын сетöм-индöм нимъяс — Беляйко, Богдашко. 1701-öд воын сарлөн Торъя индöдын вöлі шуöма, мый оз позь казътивны кабала-документъясын йöзлысь вичкоын сеттöм нимъяс. Водзö нин, медым кызкö торйöдны öткодь нима йöзöс, öтамöдлы кутісны сетаवны прöзвищяс либö вичъяс, сэсся нин чужöмаöсь морт овъяс.

Медся важ прöзвищяс Коми муын артмöмаöсь XV-öд нэм помын. Найöс вöлі сетöмаöсь ёнджыкасö морт донъялöм да сідзжö йöз оланін серти. Шуам, 1490-öд вося гра-

мотаын ас нимнас да прözвищенас казътыштöма Игнатка Бөръя кокöс (рочөн кө, Игнатка Задняя нога), Важ Помас да Кос Петырöс. Сэкса летописсын пасйöмаöсь тшöтш перымса сотникъясöс — Емелька Лузьковöс да Ефимий Эжвинöс.

Мортлөн *айнимъяс* (вичьяс) паныдасьлöны XV-öд нэм помсянь. Индöма Кироска Устиновöс, Сидорка Онкудиновöс. Сэсса овъяссö кутисны сетапны семьяса быд мортлы, овыс вуджис öти чужанвужсянь мöдö.

Коми йöзлөн овъясыс чужисны-артмисны уна ног. Öтияс воисны роч овъясянь, шуам, Некрасов, Филиппов да с.в. Мöдъяс петисны-артмисны иннимъясысь (Удоратин). Коймöдъяс — войтыр нимъясысь (Пермяков). Нельöдъяс артмöмаöсь роч кывъясысь (Кузнецов, Попов). Витöдъяс чужöмны дзик коми кывъясысь — Кочев, Панев, Рочев. Дерт, роч йöзлөн Коми муö воом-пырöдчöм ёна тöдчöма татчöс, коми овъяс да нимъяс вылö. Сэсса мöдарö, Коми муысь бокын тшöкыда паныдасьлöны ва-коми овъяс. Сидз, Кардорса да Вöлöгда обласътъясса, Сибирса сикт-каръясын олöны Пуртовъяс (пурт), Куимовъяс (куим). Шуам, Сибырын эм весиг Ошкоков грезд (ош кок кывтэчасысь). Öни Коми муысь тшöкыда кывлан Рочев, Латышев, Русанов овъяс. Тайö висьталö сы йылысь, мый важ кадö нин татчöс олысьяс пöвстын вöлöма уна пöлöс кывйөн сёрнитысь войтыр. Луза ю бокын (öни Лузберд район) овлöмаöсь Горбуновъяс, Ефимовъяс, Макаровъяс да с.в.

XVII-öд да XVIII-öд нэмъясса гижöдъясысь бура тыдалö: сэки нин Коми муса сикт-грездъясын паныдасьлöны йöзлөн öнiя, талунъя кодъ овъяс.

Ю а л ö м ъ я с д а у д ж.


1. Кыдзи чужöмаöсь Коми муын овъяс?
2. Кутшöм овъяс паныдасьлöны Луза ю бокын олысь йöзлөн?
3. Зильöй тöдмапны, кыдзи артмисны, дона челядь, тiян овъясныд.
4. Кутшöм овъяса йöз олöны тiян сиктын (посёлокын, карын)?

**XVII-öд нэмын коми йöзлөн олөм-вылөм
(көм-паськөм, сёян-юан, тасьтi-пань)**

Коми да роч йöз костын волысьöм вежис, дерт, бур-ланьö вужвойтырлысь олөм-вылөмсö. Озырджык комияс ас öшиньясас пукталiсны *миса* (слюда). Тыдалö, сийö вöлөма дона да векджык мисанас тупкывлiсны сöмын öти öшинь. Керка көлуй медясö вöчалiсны Коми муын, бокысьсö сэки вайлывлiсны зэв гежöда. Ас пуысь вöлины улöсьяс, пызантьяс да с. в. Сийö кадö йöз ёна вöдитчывлiсны пуысь ас вöчөм сундукъясөн. Вöчалiсны уна пөлöсöс, ичötöс, гырысьöс, мичмöдавлисны быд ногыс, тшöкыда эжлывлiсны көртөн, пуктывлiсны иганьяс. Сундукъясас видзлiсны донаторьяс, сьöм да кабалаяс.

Коми йöзлөн сёян көлуйыс вöли медясö пуысь да сёйысь. Пуысь вöчөм тасьтi-пань, мукöдтор вайлывлiсны Югдiнысь да Вятка муысь. Сёян көлуй, дерт, паныдасьлö сийö кадас уна пөлöс. Быдсяма тасьтi-пань, көшъяс да с.в. Коми йöз окотапырысь ньöбавлисны бокысь вайöм паньяс. Кодсюрö вöдитчöны вöли эзысь да ыргөн тасьтi-паньөн, чашка-самöварөн. Но татшöм көлуйыс вöли вель дона, сийöс вермисны ньöбны сöмын озыра олысь йöз. Гежöда, но Комиö вайöны вöли көртысь вöчөм чугуньяс да мукöдтор.

Коми йöз паськөмсö вурлисны ас кыöм дöраысь. Код-



сюрö ньöбавліс шабді дөра да ермөг (шөвк). Дась паськөм сійö кадö вузавлісны зэв гежөда да этша. Шуам, дась вурөм дөрөм-гач, мукөдтор ньöблісны Сереговса сов пуан заводьсь чина йөз, медым сетавны найөс заводса уджалысь-яслы.

Коми кресьяна XVII-өд нэмын медьясö новлісны кучик көмкот-көті, ботинки да сапөг. Россия пасьтала новлан нинкөмсö мянын эз пасьтавлыны, Луза-Сыктив вожын кындзи. Век жö йөз корсисны ньöбны вайөм көмкот.

Коми йөз окотапырысь новлөны вөлі чувкияс да кепысьяс. Кепысьяссö векджык босьтлісны бокысь воöмаяслысь, чувкияссö — Сыктив вож сиктъясса кресьяналысь. Татчөс чувкияссö весиг нулісны вузавны орчча уездьясö.

Вайлывлісны Коми муö нөшта аньяслы мичмөдчанторьяс. Найö окотапырысь новлісны пелькытшьяс, сикөтшьяс, чунькытшьяс. Гежөдджыка вузавны вайлывлісны мукөд мичмөдчантор. Шуам, слөн лыысь вөчөм сынаньяс.

Коми войтырлөн сёян-юан медьясö вөлі ас вөчөм, ас град йөрын, ас гидын быдтөм. Пызь да шьдөс излісны идйысь да рудзөгысь. Ёна вөравлісны, юясысь да тыясысь кыйлісны чери. Видзлісны пода (скөт). Но лунвывса да войвывса комияслөн сёян-юаные, дерт, кутшөмакө торьявліс. Сідз, Яренск уездса вөлөсьтъясын да Луза бердса сикт-грездьясын ёнджыкасö сөйлісны нянь да пызысь пөжас. Тшөтш көлач-преник. Радейтлісны пуөм да солалөм капуста, сёркни, анькытш. Ньöблісны тшөтш лук да чеснок. Яя сёян вылө лунвыв сиктъясын видзлісны мөс-кукань, ыжьяс, порсьяс. Емва вожын сәки нин чипан видзлісны. Дерт жö, юлісны йөв, пуктывлісны пызан вылө мукөд йөла сёян — вый, рысь, выльвөв.

Унатор босьтлісны вөр-ваысь, сійö ёна отсавліс коми йөзлы. Вөралігөн кыйлісны дозмөр-тар, уткаяс, сьöлаяс, йөраяс, көчьяс. Ёна вотчывлісны. Черитö солавлісны, косьтивлісны, сыысь юква пулісны.

Коми му лунвылын кө ёнджыкасö овлісны му вөдитөм да скөт видзөм помысь, то войвылын медьясö чери кыйлывлісны, сәсся вөралісны, вотчисны.

Коми да роч йӧзлӧн сійӧ кадся му вӧдитан кӧлуй нинӧмӧн оз торъяв вӧлі ӧта-мӧдсьяс. Мусӧ гӧрлісны гӧрйӧн, пинӧвтісны пу агасӧн, ид либӧ рудзӧг му вундывлісны чарлаӧн, видзьяс — коса-гӧрбушӧн. Видз-му вӧдитан кӧлуйсӧ медсясӧ ковмывліс ньӧбавны. Найӧс вайлісны Югдінысь, Совдорысь, Вятка муысь да мукӧдлаысь. Медсясӧ сы понда, мый Комиын вӧчӧм видз-му вӧдитан кӧлуйыс эз тырмыв.

XVII-ӧд нэм помланьӧ вузавны мӧдісны гырысь тывъяс, найӧс медсясӧ ньӧбавлісны Печора ю бокын олысь йӧз. XVII-ӧд нэмын коми вӧралысьяс ӧнджыкасӧ петавлісны паськыд пармаӧ ньӧввужъясӧн, лэчыяс пуктавлісны. Озысь (свинеч) да порок йылысь сӧрнийыс эз вӧвлы. Сӧмын ӧткымын йӧзлӧн вӧліны пищальяс. Найӧ вочасӧн сэсся пырӧны жӧ коми вӧралысьлӧн кыйсян олӧмӧ.

Ю а л ӧ м да у д ж ь я с.

1. Кутшӧм олан-вылан кӧлуй ньӧбавлісны коми йӧз?
2. Висьтыштӧй сэкса сӧян-юан йылысь. Тӧдмалӧй пӧльпӧчныдлысь, кыдзи колӧ пуны-пӧжавны коми сӧян-юан.
3. Лӧсьӧдӧй ичӧтик висът сэкса керкаын олӧм йылысь, серпасалӧй керка пытшӧ.

7 ю к ӧ н

Коми мулӧн юркар

Уездса юркарӧн лои Усть-Сысольск (ӧнія нимыс Сыктывкар). Медводдзаысь Усть-Сысола погост йылысь пасйӧма 1586-ӧд воын. Сійӧ кадӧ Сыктыв ю бокын сулалӧма вичко, сы гӧгӧр — некымын дас овмӧс. Коми йӧз медсясӧ вӧдитлӧмны видз-му овмӧс, кыйлӧмаӧсь чери да вӧралӧмны. Медсясӧ вӧлӧм паныдасьлӧ Вежев ов. Погостас пырисны тшӧтш посни грездъяс да пӧчинӧкъяс. Усть-Сысольск вочасӧн быдмис-паськаліс. Татчӧ локталісны Коми му уна

пельöсысь петöм йöз, вужъясисны тшöтш роч муясысь воöм войтыр. Вылыс Эжваса да Печора юбокса муяс овмöдöм бöрын коркöя ичöтик погост вочасöн быдмö Коми мулöн ыджыд шöринöдз. Сы пыр мунöны Комиысь вузасысьяс Кардорö, Вөлöгдаö, Югдінö, нуöны көрта көлуй Нювчимса, Кажимса да Нючпасса заводъясысь, ветлöны таті тшöтш Вятка муысь купечьяс. Из сайö нуисны нянь, көрта көлуй, дöра да уна мукöдтор. Сибириысь вайисны дона куяс, найöс сэсся вузавлісны Комиö воывлысь роч купечьяслы либö асьныс нулісны мукöд каръясö.

1720-öд воын йöзöс лыддьöдлöм серти кө артавны, Усть-Сысольск бура ыджыд сикт нин вөлöма — 80 керкаа, 834 олыся. Коми муö 1771-öд воын волöм И.И. Лепёхин гижліс, тайö сиктсö пö коми йöз пыдди пунктöны. Лепёхин тöдчöдліс сэки: Усть-Сысольск — коми йöзлөн нима-лана сикт.

1780-öд вося төв шöр 25-öд лунö (кадсö важ ног лыддьöмөн кө), выль ногөн кө урасьöм 5-öд лунö *сарань* Екатерина II аслас индöдөн сетіс Усть-Сысольсклы кар ним. Но коми йöз карсö век нимтылісны-шулісны ас ногныс — Сыктивдінкар.

Усть-Сысольсклы кар ним сетöмсö паськыда пасйисны көч төлысь (сентябр) 10-öд лунö купеч Суханов керкаын, волісны весиг Вөлöгдасянь чина йöз. Трёица вичкоын мунöма служба. Сэсся вөлöма тайö лоöмторйыслы сиöм пажын.

Сійö кадас, 1917-öд воöдз на, Россияса быд карлөн вөлöма аслас пас (герб). Лои сійö тшöтш Усть-Сысольсклөн. Пасыс вөлöма кык юкöнысь. Вылыс юкöнас вöлі серпасалöма Вөлöгдались герб — сэки Усть-Сысольск вöлі пырö Вөлöгда борд улö, сэтчöс губерняö — гöрд му весьтын, кымөр пытшкын, тыдаліс морт ки, сійö кутіс креста зарни сяр да эзысь шыпурт. Паслөн улі юкöнас вöлі серпасалöма кельыдлöз му вылын гуын куйлысь ошкöс. Висьталöма-тöдчöдöма вöлі, мыйла ош лоöма карлөн медшöр пасөн. Тайö пемöсыс пö кар гөгöрын зэв уна. Со тадзи Россияын чужис нöшта öти кар. Сёрöнджык йöз пöвстын сійöс кутісны шуны-нимтыны Коми мулөн юркарөн.

Усть-Сысольскын сійö кадö олысьыс эз на уна вöв. Шуам, 1784-öд воö овлöма сöмын 1727 морт. Карö овны воалисны медясö Сыктыв юбокса сикт-грездъясысь. Тадзи Усть-Сысольскын лоины Лыткин, Нечаев, Мальцев да мукöд овъяс. Усть-Сысольск карса войтырлөн олöм-вылöмыс сиктсаясысь нинöмөн эз торъяв. Кар торъяліс сöмын сьён, мый сійö чужис да сöвмис кызди коми йöзлөн важ оланін.

Карса олысьяс юксьöны вöлі кык пельö — öтияс вöліны мешана (тайö ас киён көрта көлуй, мукöдтор вöчысьяс, көмпаськөм вурысьяс да с.в.). Мөдъяс — купечьяс. Найö этшаджыкөн вөлöма. Öд медым лоны купечөн, колö вöлі чöжны озырлун 500 шайт дон. Карын медясö оліс мешана. А видз-му вөдитысьяс вöліны медся гольöсь. Көркө сәсся карса олысьяс пöвстын лоины дворяна. Найö ёнджыкасö вöліны воөм йöз, рочьяс.

Карса олöм-вылөмөн веськөдліс дума. Сійöс бөрйылісны куим воөн öтчид. Думаөн веськөдлö вöлі карса губернатор. Сәні вöліны тшöтш карса юралысь (сідз шусяна голова) да кык отсасысь, гласнöйяс. Карса юралысьö векджык бөрйывлісны купечьясöс. Дума бергөдліс-вөчис уна пөлөс удж: веськөдліс карса овмөсөн, видлаліс, кытчö да мый вылö веськөдны сьом, уна-ö вот перйыны йöзлысь да с.в. Чукөртөм сьöмысь унджыкыс муніс полиция видзөм да карса учреждениеяс кутөм вылö. Зэв этша сьом вичмыліс, медым бурмөдны-лөсьөдны карса уличаяс, велөдны челядьöс. Ёрд йылысь кө висьтавны, колö пасйыштны, мый судитчан шөр учреждениеыс карын вөлöма карса магистрат.

Петербургын лөсьөдісны-дасьтісны Усть-Сысольск стрöйтөм-кыпөдөм вылö торъя уджтас. Сы серти вöлі индöма лөсьөдны 12 улич. Налы сетавлöмаöсь вичкоын вежа йöзлысь нимъяс, пыдди пуктана йöзлысь овъяс, иннимъяс да с.в. Тадзи карын чужöмаöсь Южно-Загороднöй, Пөкрөвскöй, Набережнöй, Трöицкöй, Георгиевскöй да мукöд уличьяс. Кыптисны öти да кык судтаа пу керкаяс. Кирпичысь тэчөм-лэптөм керкаяс пöвстысь медводдзаяс лыдын

кыптіс купеч Сухановлөн коромина. Өні тайö керкаыс эм на. А карсö мичмöдлöма Трöицкöй вичко, сулавлöма сійö Сыктыв ю бокин.

Медсясö, дерт, сійö кадö карса олысьяс вöдитісны видз-му. Вочасөн сыктывдінкарсае мöдісны кутчысьны мукöд-торійö, сьом перійом могысь кодкö вурсис, кодкö кучик песіс, кодкö майтöг вöчис-пуис, мавтчис да с.в.

Челядьöс да том йöзöс карса юралысьяс зілісны кыс-кыны велöдчöмö, сетны налы тöдöмлунъяс. Тадзи 1822-öд воын воссис вичкоувса ичöt школа, 1840-öд воын зонъяс-лы уездса велöдчанін, 1858-öд воын нывъяс-лы мöд разря-да велöдчанін. Тöдчана лоөмторійөн кар олöмын лоис 1837-öд воын медводдза *небöгкуд* (библиотека) восьтöм.

Ю а л ö м ъ я с да у д ж ъ я с.

1. Кор Усть-Сысольск лоис карөн?
2. Висьтыштöй Усть-Сысольсклөн карпас йылысь.
3. Мый вöчлісны карса олысьяс?
4. Казьтыштöй, кызди шусылісны сыктывкарса уличаяс войдөр, XIX-öд нэмö.

8 ю к ö н

Коми муын заводъяс

Коми му важысянь нимавліс эз сöмын озыр вөрөн, дона куясөн, чöскыд черіөн. Войвывса му дзебö вöлі ас пытш-кас нöшта мукöд озырлунъяс: из шом, биару, мусир, көртшом. Бөръяыс ёна коліс чугун сывдан заводъясö. Найö кыптісны Россия пасьтала. Югдінысь купечьяс-лы сар сетіс жö позянлун лэптыны көрт да чугун сывдан заводъяс. Та-дзи 1755–1757-öд воясö Сыктыв йылын быдмисны Кажим-са да Нючпасса заводъяс. Нючпасса заводысь Кажимö нуö-ны вöлі чугун, сэсса сыысь сывдöны-вöчöны көрта көлуй. Сёрнджык, 1756–1761-öд воясö, кыптö нöшта öти завод — Сыктыв ю бокин жö, Нювчимын.

Заводъясын вöчлісны медсясö кöрт да чугуи. Бöрын-джык кутісны вöчавны пушкаяслы снарядъяс, *сюра кöртъяс*, карабьяслы кöрта кöлуй. Ставсö тайöс вöчисны медсясö Нювчимын.

Унджыкыс сэні вöлі кипом удж. Уна пöсь лои кысьтны татчöс уджалысьяслы. Комиын кыптöм-лэптöм заводъясын зілісны Вяткаысь да Югдінысь воөм бур киподтуя йöз. Найö коркö вöвлöмаөсь крепостной кресьяна, сэсся велалöмны заводын уджавны — сывдыны кöрт да чугуи, дорччыны да с.в. Уджалысьяс овлісны завод бердын кыпöдöм керкаясын. Мукöд уджьяссö вöчисны-бергöдісны татчöс войтыр. Найö перйісны кöртшом, сотісны пушом, заптісны пес, ваявлісны сійöс завод дорöдз.

Век жö кöрт да чугуи сывдан заводъяс уна сьöм эз вайлыны. Наöн веськöдлысьясöс тшöкыда вежлалісны. Сьöкыд кипом удж тöдчис татчöс войтырлөн дзоньвидзалун вылö. Сэсся мынтылісны этша сьöм. Буретш та вöсна да мукöд помка понда ХІХ-öд нэм шöрын кымын кöрт да чугуи сывдан заводъяс век этшаджык вöлі вöчöны-лэдзöны кöрта кöлуй. Заводса кантора син улас кутö вöлі татчöс уджалысьяслысь став олөм-вылөмсö. Вöлі весиг аслас полиция. Мыжмөм йöзöс чорыда мыждывлісны, нöйтлісны орсөн (плетьөн), ньöръявлісны, сетлісны салдатавны.

Комиын кöрт сывдан делö чужöм-пасьякалөм бур пас колис йöз олөмö. Сикт-грездса войтырлөн лои позянлун ветлывлыны заводъясö содтöд сьöм чуктöдöм могысь, уджавны сэні, ас кадö вот мынтыны. Тöрыгья видз-му вöдитысьяс, коми йöз, лоины бур киподтуя йöзөн.

Ю а л ö м ъ а с д а у д ж.

1. Кор кыптісны Комиын кöрт кöлуй вöчан медводдза заводъяс?
2. Мый найö лэдзисны?
3. Кутшöм тöдчанлуныс вöлі тайö заводъясылөн?
4. Индöй мусерпасысь сійö местаяссö, кöні сулавлісны кöрт сывдан заводъясыс.

Сереговса сов пуан завод

Коми му пыр вöлі солөн озыр. XVI-öd нэм помын Емва вылын, Сереговын, лоины медводдза сов пуанінгъяс. Котыр-тісны-лөсьöдісны найöс Строганов купечьяс. Ачыс жаль тöдтөм Иван (Грозной) сар налы воча муніс, сетіс позян-лун сөвмөдны сов пуан делө.

Кадысь кадö сов пуанінгъясөн веськөдлысьяс вежлась-лісны. Строгановгъяс бöрын лоины сереговса кресьятана, Опарингъяс. Сэсся сов пуанінгъяссö ньöбис Галичысь воём вузасьысь Данило Григорьевич Панкратьев. Сійö буретш лөсьöдіс-кыпөдіс Сереговын сов пуан завод.

Вөлөгдаысь ньöбисны став коланасö, медым завод лючки-бура уджаліс: көрт, кыз гезьяс, ведраяс, зырьяс да мукөдтор. Пессö заптісны Емва боқысь. Кыпөдісны-стрөитісны тшөтш гырысь баржа-пыжгъяс, медым дась совсö нуны бокö да вузавны.

Совсö перйöны вөлөм сійö кадö со кызди. Сола васö трубаяс пыр перйывлісны му веркөсö, сэсся сійöс пактөд-лісны ыджыд-паськыд көрт листгъяс вылын, та бöрын кось-тісны пу кудгъясын. Заводын уджалөм могысь колöны вöлі бур киподтуя, кужысь йöз. Панкратьев найöс корис Галичысь, Совдорысь, Тотьмаысь. Уджыс кутіс артмыны. Бöрынджык сов перйыны да сійöс пактөдны велалісны тшөтш коми войтыр, сэтчöс олысьяс.

Кресьятана медасьлісны заводын уджавны кутшөмкө кад кежлө. Таысь сарлөн 1700-öd вося индөд серти куим вөлөсьтса кресьятанаос вöлі гижөдöма Панкратьевлөн заводö. Купеч накөд вермис вöчны мый көсйис. XVIII-öd нэм помын сы заводын уджалöма 200 сайö морт.

Ва туйөд совсö кылөдлісны Вөлөгдаö. Быд во тайö карас нулісны 5–7 сов баржа. Кык сов баржа вузавлісны Туглимын, сулаліс сійö Эжва бокин.

Ю а л ö м ъ я с да у д ж ъ я с.

1. Корсьöй да петкөдлөй мусерпасысь Серегов сикт.

2. Висьталой, кодъяс веськӧдлывлісны Сереговса сов пуан заводӧн.

3. Мыйла Серегово корлісны киподтуя роч йӧзӧс?

4. Висьталой, кызди перйылісны войдӧр совсӧ.

9 ю к ӧ н

Кресьяналӧн кыпӧдчылӧмъяс

Комиын олысь видз-му вӧдитысьяс (кресьяна) мынтывлісны канмулы вот. Съӧм вот босьтлісны быд айловлысь, кымын арӧс кӧть сылы эз вӧв. Оброк вот кресьяна мынтылісны муысь. XIX-ӧд нэм шӧрын канму лӧсьӧдіс выль вот — вӧрӧн вӧдитчӧмысь. Нӧшта перйисны-пычкисны кресьяналысь уна мукӧд вот: пошта туй кутӧм да лӧсьӧдӧм вылӧ, ю вуджанінъяс да посъяс кутӧм могысь. Эз этша съӧм ковмывлы видзны сідз шусяна мирскӧй чукӧртӧмъяс вылӧ. Бара вотсӧ перйисны медясӧ кресьяналысь. Тайӧ съӧм вылас кутлісны пӧжар сарайяс, ньӧбавлісны вӧлӧсьтса да сиктса веськӧдлысьяслы кабала, перӧ-ручка да с.в. Тшӧкыда тайӧ веськӧдлысьясыс гусявлісны чукӧртӧм съӧмсӧ, ӧд некод эз артавлы, уна-ӧ сійӧ чӧжсьӧ вӧлі сиктын либӧ вӧлӧсьтын.

Збыль, кресьяна пельпом вылӧ уси уна съӧкыд ноп. Налы быдтор коліс вӧчны: видзны курыд зелляӧн вузасян лавкаяс, кусӧдчыны, сотчис-ыпъяліс кӧ парма, кыпӧдны вичкояс да мӧдӧдны ас пӧвстсьыныс армияӧ зонъясӧс, нуны-вайны ас вӧвъясӧн сӧвтас, дзоньтавны туйяс. Тадзитӧ топӧдіг-дзескӧдігад кресьяна, дерт, ёна ропкылісны, пинялісны чина йӧзӧс, купечьясӧс, вичкоын служитысьясӧс. Норасьлісны быдлаӧ, гижлісны шыӧдчӧмъяс, элясисны. Сы вылӧ, мый олӧны зӧв съӧкыда, оз тырмы му-видз, мый найӧс топӧдӧны-ӧтдортӧны чина войтыр.

Коми кресьяна пӧвстын нимавліс Шежам сиктысь петлӧм морт, Дмитрий Иванович Балин (овлӧма 1796–1865 воясӧ). Сійӧ вӧлӧма грамотаа морт, уджавлӧма писарӧн.

Аддзёма, кутшом сьёкыда овсьо кресьяналы, налөн норасьомъяс вылө од некод оз вөлі вочавидз. Балин бура төдис *оланпасьяс*, пыр отсавліс йөзлы гижны норасьомъяс, мөдөдавны найос, дорйыны асьнысө. Таысь, дерт, мортто топөдісны жө. Сійос дасысь мыждылісны кресьяналы отсасьомысь. Чина йөз быд ногыс дзескөдлісны Балинос, эз лэдзны сылы отсасьны му вөдитысьяслы. Но повтом мортыд муніс ас туйөдыс, водзө гижаліс норасьомъяс, сылы ковмис весиг ассьыс гижанногсө вежны.

Заводьясын да прөмыселъяс вылын уджалысь кресьяна сідзжө тышкасисны бурджык олөм вөсна. 1814-өд вося тулысын зыксисны ношульса кресьяна. Найө корисны, медым унджык мынтысисны Кардорөдз ва туй кузя сөвтас нуөм-вайөмысь. Корөмьяссө налысь ковмис збыльмөдны.

Кресьяна тышкасисны тшөтш му вөсна. Найө ас көсйөм сертиныс ытшкалісны канмулысь видзьяс, лөсьөдалісны аслыныс выль гөран муяс. Тадзи вөчисны унджык коми сиктын да грездын.

Медся гырысь да төдчана кыпөдчылөмъясыс вөлөмаөсь Кулөмдін да Изьва вөлөсьтъясын. Изьватас кресьяна зыксисны сар власьткөд бура дыр — 1833-өд восянь 1838-өд воөдз. Веныс кыптөма сыысь, мый сарлөн чина йөз шуөмаөсь кыпөдны-вөчны Пинега-Мозын туй. Изьва вөлөсьтъянь тайө туйөдзыс вөлі уна сө верст. Но кресьяналы шуисны-индісны: туй кыпөдом могысь колө вичмөдны йөзөс да вөвьяс. Изьватас шогө усины — өд сы ылнаөдз мунөм-локтөмыс дзыкөдз кисьтас эськө йөзлысь овмөсьяссө. Найө эз кутны пөртны олөмө сар чиновникъяслысь тшөктөмсө. Мөдарө на, кутісны быдлаө элясьны, весиг сарлы гижисны та йылысь. Мөдөдісны ассьыныс йөзөс Изьвасянь Петербургөдз, медым мездысьны туй стрөйтөмсьыс. Но ставыс весьшөрө. Некод изьватасөс эз кыв. 1838-өд воын Изьваө сарлөн чиновникъяс мөдөдісны кывзысьтөм коми войтырөс чирыштөм могысь *тышка вын*. Салдатъясысь муртса водзжык Изьваө воөма Николай I сарлөн чиновник П.И. Крузенштерн. Сійө ачыс сөрнитіс коми войтыркөд, төдмаліс, кутшөм помка вөсна кыптис зыкыс. И

сувтöма кресьтяна дор. Найöс лои мездöма ылі туй стрöитöмысь.

Кулöмдін вөлöсьтса олысьяс 1836-öd — 1841-öd воясö 24-ысь норасьлöмаöсь быдсяма чиновникъяслы, тшöтш сарлы, асланыс лёк олөм-вылөм кузя. Гижлісны, мый уна вот лоö мынтыны, найöс мый дзескөдöны-өтдортоны сиктъясса да вөлöсьтса веськөдлысьяс, чукөртöны оланпасөн индытөм сьом да с.в. Но воча кыв некодсянь эз волы. Кресьтяна ёна дözмысны. 1842-öd воö найö эз кывзыны сар чиновникъяслысь индödъяссö. Кулөмдінса бунт, кызди кресьтяналысь дözмылөмсö сёрөнджык нимтісны, дözмөдöма весиг Николай I сарөс. Эжва йылö, Кулөмдінö, воисны салдатъяс, быдса отрад. Сарлы паныд сулалысьясөс чорыда нөйтісны ньөръясөн. Зыксö кыпөдысь-пестысьясөс, Гаврил да Родион Поповъясөс, мөдөдісны овны чужан мусьыс бокö, ылі Сибирö.

Кулөмдінын кресьтяналөн кыпөдчөмыс лои төдса Коми му пасьтала. Та йылысь унаөн дыр кад чөж легендаяс висьтавлісны. Историяын тайö төдчана лоөмтор йылысь 1928-öd воын Нёбдінса Виттор (Виктор Савин) гижліс «Кулөмдінса бунт» драма, сәні вөлі висьталöма коми йөзлөн вежөрсялөм йылысь, увтыртысьяслы паныд тыш панөм йылысь. Ельöсь, Габö, Даръя да мукөдъяс мунöны Кулөмдінса «гөлөва» Öнись Гриш, жандармъяслы паныд. Драмаын петкөдлөма тшöтш историяын збыльысь вөвлөм нималана коми мортөс — Дмитрий Балинөс. Челядь, лыддьöй Нёбдінса Витторлысь драмасö, унатор содтөд төдмалад.

Сиктса олысьяслөн кыпөдчылөмъяс вөліны тшöтш коми мулөн мукөд пельöсын. Кресьтяналөн сар власьтлы паныд сувтöмыс висьталö сы йылысь, мый коми йөз некор абу вөлөмаöсь рам кукань кодьöсь, кужлөмны дорйыны асьнысö, пыр тышкасьлөмаöсь бурджык олөм-вылөм вöсна. Тайö тыш дырйиыс петкөдчисны водзмөстчысь йөз, сиктса войтыр найöс пыдди пуктісны, налы эскисны. Кресьтяналөн кыпөдчылөмъясыс шымыртісны эз сөмын сиктгрездъяс, но быдса вөлөсьтъяс. Тышыс мунöма ёнджыкасö сиктса йөзлысь олөмсö бурмөдөм вöсна.

Ю а л ө м ь я с д а у д ж ь я с .

1. Кутшөм вотъяс чукөртисны сиктса йөзлысь, мый коліс вöчны налы сар власьтлөн тшөктөм серти?
2. Висьтыштöй Дмитрий Балин йылысь.
3. Кодлы паньд да мый вöсна тышкасисны кресьяна?
4. Висьтыштöй кресьяналөн Кулөмдін да Изьва вөлөсьть-ясын вöвлөм кыпөдчылөмъяс йылысь.
5. Коми литератураын кутшөм драма гижöма Кулөмдінын 1836–1846-өд воясса лоөмторъяс йылысь? Коді сійöс гижис?





7 ю р н а с

КОМИ МУ XIX-өд нэмлөн мөд джынйын

1 ю к ö н

Земствоса пошта

1864-өд восянь Россия пасьтала мунöны вежсьöмъяс. Уездьясын да губернясын лöсьöдiсны-котырталiсны земство-яс. Земство — тайö меставывса, йöзөн бöрйöм веськöдлан орган. Найö видзöдiсны гуйяс бöрся, дзоньталiсны найöс, восьталiсны сиктъясын да грездъясын школаяс, стрöитiсны бурдöдчанiнъяс да с.в. Таысь кындзи, найö отсавлiсны сьöмөн Комиысь петлöм том йöзлы, кодъяс велöдчисны Вöлöгдаын, Мöскуаын, Тотьмаын, Югдiнын. Тадз чужисны-быдмисны школаясса велöдысьяс, бурдöдысьяс, пельшеръяс, велöдчöм бöрас том йöз бөр локталiсны ас муö, босьгчалiсны уджö.

XIX-өд нэмын нин Россия пасьтала вöли канму кийн кутана пошта. Усть-Сысоьльск карын тшöтш воссис пошта нуан-новлöдланiн. Но сьöкыдлуныс сэки вöлöма юр выв тыр. Медся ыджыд падмöгыс лои пошта нуöм-вайöмын. Ас кадö да вель öдийö поштасö вайлiсны сöмын уездса каръясöдз — Усть-Сысоьльскö да Яренскö. Сысянь мөдöдлiсны водзö, сиктъясö, кор кызди. Некод та вöсна кыв эз кутлы. Шуам, медым сьöм либö пöсылка босьтны, уездса олысьяслы ковмис воливны аслыныс Усть-Сысоьльскöдз да Яренскöдз. Мунöм-локтöм вылö мунлiс вежонъяс да весиг тöлысьяс. Йöз, дерт, ропкисны.

Медым бурмөдны уджсө, 1872-өд воын Усть-Сысолиськын вөлі котыртөма уездса пошта. Сы водзө пунктисны мог — ас кадө нуны-вайны *серакуяс*, пöсылкаяс, вуджөдөм сьөм да газет-журналгяс. Медся ветлана туйяс бокө кыпөдисны земствольсы пошта станцияяс. Поштасө новлісны вөвгясөн, пошта новлысь да коллысысь (ямщик). Пошта станцияяс пыр нулісны нөшта мукөдтор (сөян-юан, төвар). Но медводз, дерт, пошта. Удж вөсна да вөвгясөс ас кадө дасьтөм понда вөлі торгья кывкутысь — станция видзөдысь. Ветлысь-мунысыяслы шойччыштөм могысь станцияын вөвлөма жыр. Пызан вылын пыр сулавліс пөсь самөвар. Позис сьөлөмтө шонтыштны-небзьөдыштны чөскыд тшайөн.

Земствояслы вөлі сетөма позянлун лөсьөдны ассыныс пошта маркаяс. Но налөн серпасыс мед эськө торгьяліс канмуөн лэдзөм пошта марка серпасысь. 1872-өд воын Усть-Сысолиськса земство лэдзө медводдза пошта марка. Кольк-виж кабала вылө сьөдөн вөлі серпасалөма Усть-Сысолиськысь пас: ош петө аслас гуысь. Дерт, сөкся пошта марка өна торгьявліс өніясысь. Доныс сьлөн вөлөма 3 ур. Усть-Сысолиськса земство лэдзлөма 18 пөлөс пошта марка. На пөвстысь кодсюрөөс весиг лэдзлөмаөсь Мөскуаса типографиясын. Кык да куим ура пошта маркаессө сійө кадө ляскылісны прөстөй серакуяс вылө, вит ураөс — заказа вылө. Шуам, серакуыс кө воліс мөд уездысь, сы вылө тшөтш ляскылісны Усть-Сысолиськ земствольсы пошта марка. А маркалысь донсө мынтыліс сійө мортыс, кодлы воліс серакуыс. Пошта маркаессө ляскылісны конверт шөрас, но мөдар бокас. Восьтігас, дерт, маркаясыс пырджык косясьлісны. Та понда өнія марка чукөртысьяс пөвстысь этшаөн вермасны ошйысьны Коми му уездгясса пошта маркасөн.

Поштасө нуисны-вайисны индөм-лөсьөдөм кадө. Карсянь сійө мунліс быд середаө 8 час асылын. Ношульө, шуам, воліс пекничаө 2 час 15 минутын. Пөсылкаяссө сійө кадө мөдөдлісны ичөтик бөчкаясын, кудьясын, кучикө, дөраө да клеёнкаө гартыштөмөн. Дон босьттөг мөдөдлісны газет-журналгяс. Найөс судзөдлісны сәки этша на. Письмөяс

гижлісны медсясö грамота тöдысь йöз — школаын велöдысьяс, вичкоса уджалысьяс, кресьяна гижасьлісны геждöда.

Ю а л ö м ь я с д а у д ж .

1. Висьталöй, мый вöчисны земствояс.
2. Мыйла чужис земскöй пошта?
3. Видлöй серпасавны Усть-Сысольск уездса земстволысь пошта марка. Ас ногыд, кызди артмас.

2 ю к ö н

1897-öд вося йöзöс гижалöм

1897-öд воын Россия пасьтала медводдзаысь гижалисны олысьясöс. Коми му сэки пырліс Вөлöгда губернялөн Усть-Сысольск да Яренск уездьясö, Кардор губернялөн Печора уездö. Вөр-ваыс, муыс, тундраыс вöлі вель паськыд, олысьыс бара вöлі этша, муртса 170 сюрс морт. Гөгөрвоана, кöдзыд войвыв пельбөсыд эз ёна кыскы йöзöс. Нöшта видз-му сөвмөдöм могысь гöран мунад дзескыд вöлі.

Сэки олісны медсясö сиктясын да грездьясын. Индам медся гырысьясö. Тайö Мокчой (2241 морт), Вильгорт (2023 морт), Зьövсьöрт (1086 морт), Усть-Сысольск карын овлöма 5457 морт, унджыкыс мещана да кресьяна. Купечыс вөлöма ёна этшаджык. Кар олөмөн медсясö веськөдлöны вөлөм дворяна да вичкоын служитысь йöз, попьяс, вузасьысьяс.

Юöрьясö Коми муын олысьяс йылысь чукöртісны школаса велöдысьяс, попьяс, уездьясса чина йöз. Найö петавлісны сиктясö да грездьясö. Вöлі лөсьöдöма вочавидзöм могысь торья кабала, индöма 14 юалöм. На лыдын колö индыны вöлі, коді мортыс — айлов либö эньлов, кутшöм арлыда, эм-ö гöтыр либö верöс, кутшöм сословиеö пырö (кресьянин, мещанин, дворянин да с.в.), кутшöм эскöмö кутчысьö да мукöд.

Коми муын унджык олысьыс сэки вөдитөмаось видз-му овмөс, вөралөмаось да чери кыйөмаось. Но бергөдлө-маось тшөтш мукөд удж. Кужысь йөз сяммылөмаось вөчны пыж, кыз гезъяс, гортса эмбур (улөс-пызан), кысылөмаось, пелсөмаось гортса пемөсьяслысь да вөрпаяслысь куяс. 360 морт уджалөма Кажимса көрт сывдан заводын, 32 морт зильөма пошта вылын да телеграфын.

Унджык олысьыс сийө кадас бура төдөма коми кыв. Медясө чужан кывйөн сёрнитлөмаось. Йөзөс лыддьом сер-ти, коми войтыр сідзжө олөмаось Сибирын, Кардорса да Вөлөгда губерняслөн мукөд уездъясын. Роч йөз ёнджы-касө овмөдчылөмаось Сереговө да Кажымса заводъясө. Пе-чора уездса өткымын олысь сёрнитөма яран кыв вылын. Коми муын сэки олөма 40 поляк.

XIX-өд нэм помын йөзысь 15 прөчент төдөма грамота. Медясө айловъяс. Эньловъяс та серти кольччылөмаось. Тыдалө, гортгөгөрсä быд лунъя уджыс падмөдлөма налысь грамотаө сюртчөмсө. Татшөм серпасыс сиктса да карса олысьяс пөвстын. Карсаяс, дерт, вөлөмаось сиктса войтыр дорысь грамотааджыкось.

Кресъяналөн олөм-вылөмын ыджыд пай босьтлөма семья. Овмөснысө өткодя нулісны ас выланыс гозъя, верөс да гөтыр. Аньяс ноксисны горт гөгөрын, дөзьөритісны мөс-куканьөс, ыжъясөс, быдтісны челядьөс. Айловъяс тшупсис-ны, керкаяс лэптисны, сьом перйыны ылі муясө ветлісны. Сикт-грездса челядьөс ичөтсынь велөдісны уджавны. Та йылысь нималана коми гижысь Нёбдінса Виттор казтылө со тадзи:

Муртса сувті ас кок йылө,
Удж пыр меным вичмис;
Зыбка дорын өввө сьывны,
Ичөт кага видзны.

Квайт арөссянь зонпосниөс мам-бать велөдісны ветлы-ны вөв вылын, лэччөдлыны скөтөс вадорө. 10–12 арөссянь босьтлісны турун пуктыны, найө куртісны, турун юръяс вөчалісны. Зонпосниөс айяс водз велөдлісны вөравны да

чери кыйны. Лэч пуктавыны, петляасыны, ботайтчыны, тывъясыны, бурскыны. Йёзёс гижёдан кабалаясын эм зонпосни йылысь татшөм пасйөдъяс: «кыё носки да кепысь», «кага видзё», «отсалё айыслы вöчны гортгөгöрса удж» да с.в.

Семъяын юралысьён лыддысис ай, көть эськё сыкөд öти борд улын вермисны овны арлыда нин пиян. Ань семъяын вöли юралысьнас сöмын верöс кувсьöм бöрас.

Ю а л ö м ъ я с да уд ж.

1. Мый могысь нуөдiсны 1897-өд воö йёзёс лыддялөм?
2. Мый йылысь юасисны Коми муын олысьяслысь?
3. Кутшөм кывъя йёз олісны сэки Комиын, мый вöчисны татчöс олысьяс?
4. Кутшөм тöдчанлун вöли морт олöмын сэкса семъялөн? Мыйла?
5. Петкөдлöй мусерпасысь сэкса медгырысь сикт-каръяс.

З ю к ö н

Вөр лэдзöм-пөрөдөм

Коми му пыр вöли вөрөн озыр. Помтöм-дортöм парма шлывкнитчöма лунвывсянь Печора ю сайөдз. Комиын быдмөм вöрысь кыпөдлісны олан керкаяс, вöчлісны көрт туй шпалъяс, истөг да мукөдтор. XIX-өд нэмлөн мөд жынйын да XX-өд нэм пуксигөн Комиын вöрсö босьтчисны лэдзны-пөрөдны пыр содысь өдөн, дугдывтөг. 1862-өд воын на М.К. Сидоров вöрсö нуліс Лондонö, ставмира выставка вылө, Печора ю бокин быдмысь ниа пу. Сійö ёна воöма англичаналы сьөлөм вылас. Зэв бур пö, ён да мича. Англияса саридз министерство ньöбö Коми муысь ниа керьяссö да кыпөдö-стрөйтö наысь «Каледония» нима фрегат. Тайö жö фрегатнас ниа пуяссö 1867-өд воын Печора вылысь вайöны Кронштадтö. Воысь-во содö вөр лэдзöм-

пөрөдөм. Торйөн нин уна сійос нуны кутісны Печора бокыс XIX-өд нэмлөн 90-өд воясө. Швеция тшөтш сёрнитчө Россиякөд вөр петкөдөм-нуом йылысь. 1903-өд воын Печора ю вомын кыптө медводдза вөр пилитан завод.

Комиын пөрөдөм вөрсө нуисны сәки Кардорса, Мезеньса, Пинегаса вөр пилитан заводьясө. Этшаника — Волга вылө. Медсясө кылөдлісны ва туйөд — Эжва да Вынва (Войвыв Двина) кузя Кардорлань, сысянь нин петкөдлісны Англияө, Голландияө, Францияө да весиг Лунвыв Африкаө.

Коми муын вөрыс вөлі канму кийн. Вөр лэдзысь-пөрөдысьяс сёрнитчылісны канмукод, гижлісны торъя сёрнитчөм, контракт. Уна-ө заптыны вөрсө, донысь-ө, кызди петкөдны да с.в. Коліс та вылө, дерт, уна сьом. Чужины вөр лэдзысь выль котыръяс — «Володин вокъяс», «Ружников вокъяс», «Сөкөл» да мукөд. Татчөс купечьяс, гөгөрвоана, эз вермыны накөд венласьны. Вөр лэдзысь выль котыръясын вөліны тшөтш саридз сайысь воом йөз — англичана, прансузьяс, норвежечьяс, шведьяс. Но медся төдчана пайыс, дерт, вөлі Россияса купечьяслөн.

Вөрсө пөрөдісны Эжва, Сыктыв, Печора ю бокъясысь, мукөдлаысь. Керьяссө заптыны да кылөдны отсалісны коми кресьяна. Найө кутшөмкө кад кежлө медасьлісны пөрөдчыны, медсясө ар да төв кежлө, мездмылісны кор видз-му овмөс уджъясысь. Вөр пөрөдны отсасьлісны эз сөмын гөль йөз, но шөркодя олысь да весиг озыр коми войтыр.

Вөр пөрөдан удж пычкис йөзлысь уна вын. Ёнджыкасө, дерт, вөр заптісны мужичөйяс. Но пөрөдчылісны тшөтш аньяс. Гырысьджык арлыда зонкаяс петкөдлісны вөвьясөн дась керьяссө юяс дорө. Став уджсө лои вөчны-бергөдны ки помысь, чер-пилаөн. Та понда йөз унаысь доймавлисны.

Тшөкыда кутшөмкө өти сиктса войтыр өтувтчылісны ыджыд котырө да медасьлісны код дорө кө вөр лэдзны. Быдөн кыв кутліс өта-мөд вөснаыс. Нажөвитөм сьомсө юклісны ас костаныс быдөнлы өтмындаөн. Медасьлісны тшөтш өтка йөз.

Сиктса олысь кӧ воліс ӧти кывйӧ вӧр пӧрӧдчӧм кузя кутшӧмкӧ фирмакӧд, кырымавліс контракт, то сылы арнас сетлісны мыйтакӧ сьӧм. Аванс сямаӧс, водзвыв. Кабала вылӧ вӧлі пасъялӧма медасысьлысь могъяссӧ. Сылы коліс ставсӧ кывзыны, мый шуас-тшӧктас медалысь. Сідз, кресьянинлы оз позь вӧлі вуджны мукӧд фирмаӧ. Вуджліс кӧ, то мынтыліс тайӧ воськовсьыс штрап. Омӧль уджысь сиктса мортӧс вермисны вӧтлыны.

Уджавлісны вӧр пӧрӧдысьяс кадӧн лыддысьтӧг. Сёян-юан дасьтісны асывнас, асьныс жӧ кыпӧдлісны юр сюянін, ичӧтик вӧр керкаяс, ӧд вӧрсӧ пӧрӧдісны сиктъясысь бокин. Татшӧм олӧм-вылӧмыд омӧль боксянь тӧдчис йӧзлӧн дзонь-видзалун вылӧ. Найӧ тшӧкыда кынмалісны, висисны.

Мыйта заптасны вӧлі вӧрсӧ, стӧч сы серти мынтысьлісны. Вӧр пӧрӧдысь тӧв чӧжӧн босьтліс 20–60 шайт, вӧр кылӧдысь — 15–35 шайт. 1907-ӧд вося тӧлӧ, шуам, ӧткымын семьяяс (пӧрӧдчылісны 3–4 морт) вайлісны гортаныс 200 шайтӧдз. Унджык сьӧмсӧ видзлісны вот мынтӧм да нянь ньӧбӧм вылӧ. Мукӧддырйи вӧр лэдзысь котырӧн веськӧдлысьяс мынтысьлісны сьӧм пыдди тӧварӧн, но йӧзлы тайӧ эз во сьӧлӧм вылас. Ӧд вузӧснад мынтысигӧн век позис уджалысьтӧ бӧбйӧдлыны.

Вӧр пӧрӧдӧм-лэдзӧм, дерт, кутшӧмакӧ отсаліс коми йӧзлы. Ӧтияс, дерт, озырмыштісны. Чӧжӧм сьӧм вылӧ паськӧдісны асьыныс овмӧс, ньӧбалісны гортса эмбур, видзму овмӧс вӧдитан техника, мӧс-вӧлӧс. Мӧдъяслы вӧрса уджысь босьтӧм сьӧмыс муртса тырмис тшыг нисьӧ пӧт олӧм вылӧ.

Кольӧм нэмын коми йӧзлысь олӧмсӧ (вӧралӧм, вӧр пӧрӧдӧм, вузасьӧм) зэв яръягыда да стӧча серпасалӧма коми гижысь Луздор Вась (Василий Юхнин) аслас «Алӧй лента» нималана романын, кызвынсӧ воддза юкӧнас. Позьӧ стӧча нимтыны тайӧ романсӧ важ, XIX-ӧд нэмся коми оласног петкӧдлысь рӧмпӧштанӧн. Лыддьӧй тайӧ небӧгсӧ.

1. Кытчө нулісны Коми муысь пөрөдөм вөрсө?
2. Петкөдлөй мусерпасысь юяс, кодъяс пөлөн заптылісны вөр.
3. Висьталөй вөр заптан фирмаяслысь нимъяссө.
4. Кутшөм коми роман гижөма XIX-өд нэмын вөр пөрөдөм да вөралөм йылысь? Коді сійөс гижис?
5. Кыдзи уджавсис да овсис вөр пөрөдысь йөзлы?

4 ю к ө н

Комиын вузасьөм да паракодөн ветлөм

XIX-өд нэмын 60-өд воясö Коми муын чужö-сöвмö паракодөн ветлөм. М.К. Сидоров 1864-өд воын ньöбöма Петербургысь кык винта көрт паракод. Сетісны сылы «Печора» ним да вайисны Кама ю вылө. Сысянь кыскисны Печора ю вылө. 1864-өд вося моз 28-өд лунö Мылдин сиктса олысьяс медводдзаысь аддзисны ю кузя кывтысь паракод.

Недыр мысти М.К. Сидоровлөн овмөсыс киссис, сьөм быри. Сылысь делöсö водзö нуөдісны чердинса купечьяс. 1881-өд воын купеч И.А. Суслов лөсьөдіс буксира паракодъяслысь ветлөм Якша да Куя сиктъяс костын. Мөд кывйөн кө, ва туй воссис Печора ю йывсянь кывтыдөдзыс. Таысь купеч Сусловлы сетісны зарни медаль. 1887-өд воын вит паракод нин нуалис сөвтас Якша да Куя костын.

90-өд воясö паракодыд Печора вылын абу нин дивö. Найö оз сөмын нуны-вайны сёян-юан, көм-паськөм, мукөдтор, новлөдлөны тшөтш йөзöс. Сарлөн правительство сёрнитчö купеч М.В. Черныхкөд, медым сійö кутас кык паракод. Налөн лыдыс вочасөн содöма. Сідз, 1912-өд воын Печора кузя ветліс нин 16 паракод да 30 баржа. На пиысь быдөн вöлі эз канму, а торъя йөз киын.

XIX-өд нэмлөн мөд джынйын медводдза паракодъяс писькөдчöны Эжва вылө. Куим паракод кутіс ас киас Се-

реговса сов заводон веськөдлысь А.В. Булычев. Усть-Сы-
сольскса купеч А.М. Забоевлон вөлөма «Тотьма» нима па-
ракод. Яренск уездса кресьянин П.Н. Козлов кутис «Вы-
мичанин» паракод. 90-өд воясо паракодъяс ветлоны нин
коставлытөг Югдинсянь Усть-Сысольскөдз. Сэкса паракодъ-
яссо вöчлісны пуысь, ломтас пыдди заптылісны пес. 1907-өд
восянь паракодъяс индом кад серти воывлөны Усть-Сы-
сольскө Вөлөгдасянь да Кардорсянь. Кокниджык лои нуны
сөвтас, йөзос. Ёнмисны Коми мулон йитөдъяс Россияса
мукөд пельөсьяскөд.

Ярмангаяс. Коми войтыр уна пөлос вузос, ком-паськом,
сеян-юан, мукөд коланатор ньобліс ярмангаяс вылын. Быд
ярмангалон вөлөма аслас ним, вузасьлісны сәні некымын
лун. XIX-өд нәмлөн первойя джынйын ярмангасө нуөдліс-
ны гежөда. Вочасон налон лыдыс содө. 1893-өд воын муно-
ма нин 34 ярманга. Медся гырысьясыс да йөзаясыс — Усть-
Сысольскын, Нёбдінын да Важгортын.

Нёбдінын, шуам, төв шөр 18-өд лунсянь кык вежон чөж
мунліс Афанасьевскөй ярманга. Быд ярманга нуөдом мо-
гысь колө вөлі шыөдчыны уездса власьтьяс дорө, босьтны
насянь лөсялана кабала. Ярманга мунан лунъясө гажа ов-
лөма Нёбдінын. Йөзыс сикт тыр. Быд пельөсын пася да гын
сапөга йөз. Эмось маличаа да пимиа көр видзысьяс. Öд
Нёбдіно воавлісны ньобысь-вузасьысьяс Эжва бокысь, Пе-
чора вылысь, Изьваысь, Вятка муысь, мукөдлаысь. Вен-
зёны-ньобасьёны, горзёны, пинясьёны, сьылёны, рытнас
ветлоны кабакө.

Изьватас водзвыв дасьтысьёны вөлі ярманга кежлө.
Туйыс Нёбдінодз кузь. Туйө петтөдз лөсьөдлісны сеян-юан.
Пөжавлісны нянь. Медсясө ид пызьысь. Заптисны сыр,
рысь, вый. Изьватас да яранъяс вайлісны ярманга вылө уна
чери. Чими, гөрд пөк, осөтр яй. Вузалисны көр яй, дона
куяс, шоньд кепысьяс.

Аньяс ярманга кежлө кыавлісны мича вурун чувкияс,
кепысьяс, вөнъяс. Чердінысь купечьяс вөзйисны рудзөг да
шобді пызь. Вятка муысь воом йөз вузавлісны винтовка
стволъяс, көрт телегаяс. Луза да Сыктыв сикт-грездъясысь

воомаяс вузалісны шабді, пыш, кудель, шабді вый. Вильгортсаяс — сямодысь вочом пестеръяс, корзинаяс, туйсьяс. Печораса войтыр — чер-коса лэчталан эмбур.

Печораса чимисо ньобавлісны Вятка муысь купечьяс да усть-сысольсксаяс, сійос сэся нулісны водзё вузавны Петербургё, Москуаё, Вёлөгдаё. Усть-Сысольскса купечьяс кө окотапырысь ньобалісны чери, то асьныс вузасисны чышпъянъясён, *вундасъясён* (лентаясён), ной дораён. Афанасьевской ярманга вылын медсясё вузавлісны-ньоблісны быд полёс чери.

Усть-Сысольскын тшөкыда нуодлісны Георгиевской ярманга. Татчос олысьяс окотапырысь вөзйисны воом йозлы вöрын кыйөмторъяс — сёла, ур, тулан да мукөд дона куяс. Ярмангаыс муніс ноябр помын — декабр төлысь пуксигөн. Тайё вөлі коми вöралысьяслы кивыв. Найё буретш вөлі петөмаось пармаысь арся кыйсьөм бöрын. Эз, дерт, куш киён. Пөтка да куяс кындзи тані вөзйисны ньобасысьяслы яй, вый, кучик, шабді, нянь, пызь. Волісны купечьяс Вятка муысь, Югдінысь, мукөдлаысь. Найё вайлісны вузавны көм-паськөм, быдсяма дөраяс. Дивөөн комияслы кажитчис переч да копей. Сёян-юан кындзи тані вөзйисны кляничаысь да парпорысь вочом доздук, өшинь стеклө. Дона куяс коми купечьяс нулісны гырысь ярмангаяс вылө, весиг Сибирё да Улыс Новгородё. Ёна ньобавлісны комиын кыйөм сёла яй, нулісны сійос Петербургё.

Важгортын нуодлывлісны Крещенской ярманга. Вузасисны юысь да саридзысь кыйөм чериён, пөткаён, дона куясён, көр яйён. Мунліс ярмангаыс кык вежон чөж, төв шөр төлысьын 6-өд лунсянь 18-өд лунөдз. Важгорт сиктса да орчча вөлөсьтъясса олысьяс мөдісны кысьыны да вузавны ас кыөм дөра ярманга вылын. Уна карысь купечьяс кежавлісны Важгортё. Волісны яранъяс, изьватас вөзйисны бокысь локтөм купечьяслы көр яй, чими, гөрд пөк.

Коми йөз олөмын быд ярманга вөлі төдчана лөөмтор. Сійос дыр виччысисны, сы кезлө ёна дасьтысисны. Ньобасьөм-вузасьөм кындзи, ярмангаяс дырйи йөз шойчисны-гуляйтисны. Кылө вөлі гудөк шы, сьылөм-йөктөм.

Мичаа пасьтасьом йоз ветлөдлісны уличаясод. Кыдз шу-ласны, зілісны локтөмаяс вылө видзөдлыны да асьнысө петкөдлыны.

Вузасянінъяс. Кор чукөрмыліс унджык сьом, купечьяс, озыр мещана да кресьяна восьталісны сикт-грездьясө да Усть-Сысольскө асьыныс лавкаяс. XIX-өд нэм помын да медся нин XX-өд нэм заводитчигөн тайө вузасянінъясыс пуктісны төдчана пай Комиын вузасьом сөвмөдөмө. Сэки сійө пыр паськаліс-содіс. Коми муө вайисны водзын адзвылытөм на сөян-юан, гортса көлуй, көм-паськөм да уна мукөдтор. Шуам, шыдөс пөвстысь рис да манка. Коми йоз вермисны ньөбны ананас, лимон, өгуреч, вурсян машинаяс, макарон, велосипедьяс, *юркобувьяс* (зонтьяс) да уна мукөдтор. Весиг көм-паськөм, керка көлуй кутісны ёнджыкасө ньөбавны, а эз вөчны-дасьтыны асьныс.

XIX-өд нэм помын — XX-өд нэм заводитчигөн ва туй восьтөм-лөсьөдөм төдчымөн отсаліс вузасьом паськөдөм-сөвмөмлы. Паракодьясөн позис нуны-вайны быдсяма вузөссө.

60–90-өд воясө вузасянінъяс воссялісны Коми мулөн став гырысь сиктын. Медсясө, дерт, мир туй бокын, юяс дорын сулалась сиктьясын. Сідз, Вильгортын, Визинын, Поёлын, Абьячойын да мукөдлаын вөлі вит да унджык вузасян лавка. Найө вөліны купечьяс да озыр кресьяна кийн. Бөрьяяс пөвстас вөлі нималөны Вильгорт сиктысь В.П. Оплеснин, Пажгаысь Иван, Аифал да Дмитрий Кузьбожев вокьяс, Визинысь И.А. Митюшев. 80-өд воясө А.Е. Филипповлөн Печора уездын вөлөма курыдтор вит видзанін, нель кабак, куритчанторйөн да пызьөн кык вузасянін. Лавкаясысь позис быдтор ньөбны — дөраяс, көм-паськөм, сакар, мукөдтор. Озыр кресьяна ёна босьтасисны, нуалісны гортаныс кампет-преник, дона дөраяс, ермөг, мукөдтор. Сөвмис-быдмис тшөтш Сыктывдінкар. 1878-өд воын Коми мулөн юркарын 35 вузасянін нин. Карса купечьяс тшөкыда петавлісны уездьясө. На пиысь өткымынөн ёна озырмисны няньөн вузасьом понда. XIX-өд нэм заводитчигөн Усть-Сысольск пыр нянь нуисны роч да мукөд

вузасьысьяс. Карö вайисны туся нянь да пызь Вятка му-
ысь, Казаньысь, Россиялөн мукöд няняинысь. Озыр коми
купечьяс ньöбавлісны няньсö нöшта уездьясысь, сэсся сійöс
мöдöдлісны Кардорö.

Öткымын купеч вузасис сöмын öти пöлöс тöварөн либö
сёян-юанөн. Шуам, А.М. Забоевлөн вöлі карын дзик öти
тшай вузалан лавка. И.П. да В.П. Комлин вокьяс вöзйис-
ны йöзлы сöмын сёян-юан. Усть-Сысольскын вöліны мукöд
карысь воом купечьяслөн вузасянінъяс. Зэв ыджыд лав-
ка кутліс Югдінысь Дербенев купеч. Сэтысь позис быдторсö
ньöбны: керкапытшса кöлуй, кöм-паськöм, дöраяс, енпöвъ-
яс. «Зингер» вурсян машинаяс вöчан компаниялөн тшöтш
вöлöма аслас вузасянін.

Сикт-грездса войтыр ёнджыкасö став коланторсö, пос-
ниторьяс ньöбавлісны кока лавкаяслысь, найö ветлöдліс-
ны сиктысь сиктö да вöзьялісны коми йöзлы чышъянъяс,
кизьяс, вундасьяс, сикötшьяс, сунис-ем, майтöг да уна
мукöд колантор.

Ю а л ö м ъ я с да у д ж ъ я с.

1. Кор кутісны ветлыны Коми муын юяс кузя медводдза па-
ракодьяс?

2. Кутшöм вöлі паракодьяслөн тöдчанлуныс?

3. Лöсьöдöй сэкса ярмангаяс йылысь ичöтик висьттор либö
серпас.

4. Кутшöм карьясса купечьяслөн вöліны Усть-Сысольскын
вузасянінъяс?

5. Висьталöй, кызди Коми муын вöйдöр вузасьлісны да
мыйöн.

Политика вöсна кедзөвтöм йöз (ыстöмъяс йылысь)

Зэв важ кадсянь нин роч сар мөдöдавлöма политика-ын сылы паныд сулалысь-мунысьясöс Россияса медся ылі пельöсьясö, тшöтш Коми муö. Тадзи сар вöчö вöлі оз весьшөрö. Öти-кö, Коми муын олысь йöз омöля тöдлісны роч кыв, сідзкö, найö да ыстöмъяс костас йитöдъяс вöліны слабöсь. Видз-му овмöс вöдитысьыс Комиын век вöлі унджык да найö политикаö ёнасö эз суйсьывны. Сар лыддöв вöлі, мый ыстöмъяслы тöдчана мыждöмөн лоö кöдзыд төв да номъя гожöм. На бөрся пыр сюся видзöдліс полиция. Налы воом серакуяссö осьтавлісны да лыддисны. Ыстöмъяс эз аддзывны асьыныс рöдвужсö, ныв-писö, эз вермыны ветлыны кытчöкö бокö. Политика вöсна кедзөвтöм йöзлы артыштöма вöлі сетны быд төлысса отсöг. Сöмын сійöс сөтавлісны гежöда, дыр кыскöмөн. Овліс, мый нинöм ки выланыс эз воы. Та вöсна лунвылысь мөдöдöм йöз тшöкы-да кольывлісны төвся паськөмтöг.

Коми муö XIX-öд нэмö мөдöдлісны Москва университетса вöвлöм профессор Н.И. Надеждинöс, адвокат И.О.Ишимовöс, студентъяс В.В. Кокшаровöс, П.И. Войнаральскийöс, Польшаын 1863-öд воын ашшөрлун судзöдöм вöсна кыпöдчысьясöс да мукöдöс. Ставнысö вöлі öтувтö öтитор — найö сувтісны сарлы да Россияса империялы паныд. Öти йöзöдöма сарлы паныд гижöд, мөд отсасьöма студентъяслөн кыпöдчылöмъяс дырйи, коймөд тышкасьöма Польшалөн ашшөрлун вöсна. Ыстöмъяслөн лыдыс водзсö эз вöv ыджыд. Олісны найö медсясö Усть-Сысольскын. Но XX-öд нэм заводитчигөн политикакысь ыстöмъяслөн лыдыс Коми муын тöдчымөн содö. Шуам, 1901-öд воын вöлöма нин 200 морт гөгөр. Олісны найö Усть-Сысольскын, Кулөмдінын, Мокчойын да мукöдлаын. Мөдöдöмаяс пövстын вöліны быдся-ма йöз: ютыръясысь бокын сулалысь войтыр, большевикъяс, эсеръяс да с.в. Ыстöмъяс пövстын паныдасьлісны уна кывйөн сёрнитысьяс. Ёнмыштісны налөн йитöдъяс Коми

муын олысьяскөд. Коми йоз ыстөмъяслы вайывлісны-судзөдлісны гуся небөгъяс, пансьывліс сёрни сәкся олөм-вылөм йылысь да с.в. Ыстөмъяс кутлісны йитөд медсясö школаын велөдысьяскөд, пельшеръяскөд, велөдчысьяскөд. Бокысь мөдөдомаяс ыджыд удж нуөдісны 1905–1907-өд воясся революция кадö. Сідз, 1906-өд вося май 1-өд лун пасйисны Изъваын. Сійö воясас ыстөмъяс дасьтісны да разöдалісны Коми муын олысьяс пөвстын листовкаяс, сәні веськыда гижлісны, мый колö пуктыны сар ыджыдалөмлы пом. 1914-өд во кезлө политикаысь ыстөмъяс абу нин кольөмаөсь Коми муын. Тадзи Комиö политикаысь ысталаніныс недыр кезлө бырлөма.

Ю а л ө м ъ я с да у д ж ъ я с.

1. Мыйла Коми муö ваявлісны политикаысь ыстөмъясöс?
2. Кутшөм йитөд найö кутлісны коми йөзкөд?
3. Петкөдлөй мусерпасысь, көні овлөмаөсь ыстөмъяс.
4. Лөсьөдөй кутшөмкө ыстөм морт олөм йылысь висьттор.

б ю к ө н

Коми муын веськыда эскана (православнөй) вичко

XVIII-өд нэмөдз вичкояс вöчавывлісны сөмын пуысь. Местасö налы бөрйивлісны торйөн нин сюся да ёна корсьысьөмөн. Медым сійö медводз бура тыдавліс зэв ылысянь. Лэптывлісны вичкояссö сикт шөрö, кыпыдінö, юсянь неылын. Öд вичко сійö кадö вөлі сиктын медся тöдчана стрөйба. Öти кывйö кө йөзыс абу волөмаөсь вичко кыпöдан места кузя, вöчлөмны со кызди. Доддялөм вөлөс (доддяс кер пуктөмөн) новлөдлісны сикт кузя. Көні вöлыс сувтіс, сәні буретш кыпөдлісны вичкосö. Кыпөдлісны-тшуплісны кужөмөн, сьөлөмсяньныс. Мед быд кер топаліс öта-мөд бердас. Тадзи кер бөрся кер. Пу вичкояс мичаа серпасавлісны чер-пуртөн. Сөмын уна пу вичко сотчылөма,

найос ньылыштлөма азым би. Сэсся пу вичкояс өдйө сисьмөны вөлі. Лым-зэр, дерт, эз бур боксянь тődчывлы стрйбаяс вылө.

Коми муын XVIII-өд нэмын нин босьтчöны лэптыны кирпичысь тэчөм вичкояс. Öти-кө, найö вермисны сулавны некымын нэм чөж. Мөд-кө, пу вичкояс серти тődчымөн гырысьджыкөсь. Сöмын найос кыпөднысö вөлі ёна сьökыджык. Колісны сяма вичко тэчысьяс. Коми муын, дерт, татшөм йöзыс эз уна вöv. Зарни киа войтырөс, вичко стрөитысьясөс, корлісны Югдінысь, Совдорысь да мукөдлаысь. Кирпичысь тэчөм Вознесенье нима медводдза вичко кыптис Емдінын. Усть-Сысольскын лэптисны Трöицкөй крам. Изйысь тэчөм вичкояс кыпөдісны сідзжө Сереговö, Зövсьөртö, Кулөмдінө. Быд вичколы сетлісны торья ним. Öтияслы — вичко празньник нимъяс, шуам, Богоявленскöй, Вöскресенскöй, Трöицкöй, Рождественскöй да с.в. Мөдъяслы — вичкоөн пыдди пуктана, вежа йöзлысь — Вежа Сте-



Усть-Сысольскын Трöицкөй крам

панлысь, Николай Чудотворецлысь нимъяс. Быд вичкоын вöлі медся тöдчана да нималана енпöв, сэтчö серпасавлісны тайö пыдди пуктана мортсö либö вичколы ним сетысь гажсö. Кирпичысь вöчлісны сійö кадö вичкояссö быд гырысь сиктын. Такöд тшöтш кыпöддывлісны пу вичкояс. Роч академик Иван Лепёхин Коми муö волігөн гижліс, мый зэв мича вичкояс сійö аддзылöма Визинысь да Межадорысь. Со мый сійö пасйö Изьва сиктса вичко йылысь: «Вичкоыс Изьваын öти, кыпöдлöмаöсь сійöс пуысь, 1676-öд воын, Преображения господня нима; сы бердын джуджыд да мичаа вöчöм кöлököльня».

XIX-öд нэмö Коми муын вичко лыдыс тöдчымөн содöма. Вöлі кыпöдöма 146 вичко, на пиысь 65-сö изйысь, 81-öс пуысь. Сійö кадö кирпичысь вичкояс тэчны коми йöз велалöны нин. Татшöмъяс пöвстас сэки нимавлöма Пажга сиктса олысь Николай Кононов. Вичкояссö лэптылісны-кыпöдлісны став сиктөн. Чукöртлісны сьöмсö керкаысь керкаö ветлöдлысьяс. Енпöвъяс вöчöм вылö да кер-тьöс ньöбöм могысь, дзоньнас вежа керка лэптöм вылö.

XIX-öд нэм помын, XX-öд нэм пуксигөн пу вичкояссö Коми муын, коркöя нэмъясö серти, лэптылісны эз сідз-тадз, а водзвыв лöсьöдöм серпасъяс кузя нин. Пу вичкояс эз вöвны гырысьсöсь да паськыдöсь. Векджык öти судтааöсь, вылас — кöлököльня. Жынняян шыыс ылöдз кывліс. Буретш сійö чукöртліс-корліс сиктса йöзöс вичкоö, служба вылö. Торйөн нин жынняянъяс мичаа да гораа «сьывлывлісны» вичко празьник лунъясö. Корсюрö неминучаяс дырйи, шуам, сотчис кö кодлөнкö керка либö овмös, жынняян шы корліс сиктса йöзöс отсöг вылö. 1916-öд во кежлö Коми муын вöлöма нин 177 вичко, 84-ыс вöлöма изйысь вöчöм, мукöдыс пуысь.

Вичкоыс öтувтис-шымыртис тшöтш ас гөгöрыс матысса посни грездъяс. Ставыс тайö шусис *вичкоув*, а гөгöрас олысьясыс — вичкоö ветлысьяс. Колö шуны, мый вичко кыскыліс дай öні на кыскö йöзöс. Öтияс кежавлісны корны сьökыд кадö Енлысь отсöг, мöдъяс аттьöавны сійöс олöмас бур лöмторйысь. Вичкоын морт шойччис ловнас,

кывзіс сьылысьясос, лыддис кевмөмъяс. Морт олөм сэки топыда йитчылөма вичкокөд. Кага кө чужліс, нулісны ичөт мортос вичкоо пыртөдны, ныв-зон кө гөтрасьлісны, быть вичкоын жө венеч улө сувтлісны, кувсьыліс кө кодкө, бара сьылөдлісны сэні. Йөз пыр волевлісны вичкоо, но дзик быть нин крам празьникъяс кадө — Рөштво луно, Трөйца дырйи, Ыджыдлуно.

Сійө кадас вичко дорө велөдісны ичөт арлыдсянь. Сизим арөс тырөм мысти зонпосниос вайлісны мам-батыс висьтасьны. Мед найө бура гөгөрвоисны, мый оз позь вөчны да мый позьө, кызди лючки-бура овны да с.в.

Быд вичкоулөн веськөдліс вежаай. Сійө нуөдө вөлі вичкоын став службасө. Вежаайос нөшта вөлі шулоны «батушкоон» либө шыөдчылісны сы дорө «отеч» кывйөн да содтылісны вежаайлысь нимсө. Шуам, отеч Ладимер. Коми кыв вылө вуджөдлісны вичко небөгъяс. Вочасөн быдмисны-петісны коми йөз пөвстысь вежаайяс, артмисны Куратовъяслөн, Кокшаровъяслөн, Поповъяслөн, Тюрнинъяслөн да мукөдлөн быдса топыд вужъяс. Вичкоын служба мунліс важславяна вичко кыв вылын. Ковмывліс кө, вежаайяс вермисны сёрнитны вичкоо волисьяскөд комиөн. Но кызвынсө коми йөзлы служба нуөдан важ роч кывйыс вөлі гөгөрвотөм.

Откымын вичко бердын восьталісны челядьлы школаяс. Вичкоын уджалысьяс вермана отсөг сетлісны гөля олысь йөзлы, корысьяслы, чукөртлісны налы сьөм, вердісны-юкталісны.

Ю а л ө м ъ я с да у д ж ъ я с.

1. Мөвпыштөй, челядь, мый вөсна вичкояссө кутісны кыпөдавын-вөчны кирпичысь. Мыйла лыд сертигыс кирпичысь вичкоыс вөлі пу вичко дорысь этшаджык?

2. Мусерпасысь петкөдлөй, көні XVIII-өд нэмын лэптісны изйысь вичкояс.

3. Юасьөй бать-мамныдлысь, пөль-пөчныдлысь да висьтыштөй тіян сиктын пасьян кутшөмкө вичко празьник йылысь.

4. Мый понда йөз волевлісны вичкоо?

Уллынаса манастыр

Коми муысь ёна нимавліс да öні на нималö Уллынаса Троицко-Стефановскöй манастыр. Сулалö сійö Эжва бокин, Кулöмдін районуын зэв мичаиннын.

Лыддьöны, Уллынаса манастырлы XIV-öд нэм помын подувсö пуктылöма пö Перымса Степан. Важ йöзлөн висьтавлöм серти, Уллына нима нылöс, кодöс пыртлöма Крестос эскöмö ачыс Вежа Степан, кутöма Печораса Кыска нима тун. Но нылыд пышйöма да шыбитчöма Эжва юö. Сэтчö вöйöма. Нылöс дзеданіно Вежа Степан кыпöдöма манастыр. Сетöмаöсь сылы Уллына ним.

1646-öд воö тані сулавлöма нейджыд вичко, сы гөгөр — сәні олысь-уджалысьяслөн овмөсьяс. Шусис местаыс Спасскöй Уллынаса тыртöмин. 1667-öд воö Москваса Филарет вежаай да сылөн нель пи воöма Уллынаö. Сы кийн вöлöма кабала, кытчö Роч муын медся ыджыд вежаай индöма Филаретлы водзö сөвмөдны тыртöминсö да вичко кыпöдны. Филарет кувсьöм бöрын выль вичкоын батынысь уджсö водзö нуөдöмаöсь сылөн пияныс нин. 60-öд вояс помын Уллынаса манастырö воöны Соловецкысь манакъяс, найö водзö кыпöдöны-сөвмөдöны сійöс, дзоньталöны. Комиын тайö манастырыс ёна коліс сы понда, медым паськөдны водзö йöз пөвстын Крестослы эскөм. Манастырыс оліс аслас олөм-вылөмөн, ас сьöм вылө, канму сылы эз сетлы некутшөм отсөг. Та понда роч сар сетіс позянлун дас во чөж чукөртны Россия пасьталаысь сьöм, водзö медым позис лэптыны-кыпöдны Уллынаса манастыр.

1872-öд воын Уллынаын олөма нин 36 манак да послушник. 1913-öд во кезлө тані, манастырын, уджавліс 60 гөгөр морт. Манакъясö локталісны медсясö Коми муын олысьяс, тшөтш роч йөз, ёнджыкасö Вөлөгда аркирейувса манакъяс. XIX-öд нэмын 60-öд вояс помын Уллынаса манастыр тöдчымөн паськалө, вежö асьыс чужөмбансö. Тані кыптисны выль стрөйбаяс, медсясö, дерт, кирпичысь.

XX-өд нэм пуксигөн Уллынаын кыпөдісны 48 стрөйба, на лыдын Коми муын медся джуджыд, 64 метр судта көлөкөля, манакъяслы оланінтьяс, манастырсо кытшалысь кирпичысь потшөс да с.в.

Манастыр кутлөма ас киас ыджыд овмөс. Сы борд улын вөлөма уна гөран му, видз, скөт видзан карта, мельнича, мукөдтор. Съом вайлөма зептын новлөдлан да стено өшлан енпөвъясөн, сисьясөн вузасьом. 1918-өд воын манастырлөн озырлуныс артавсьыліс зарниөн 307815 шайт дон. Тайө озырлунсө чөжны тшөтш отсалісны манакъясөн медалөм коми йөз, кодьяс дөзьөритісны скөт, ытшкисны видзьяс, заптісны көрым, быдтісны картупель-капуста. Сійө кадө Уллынаса манастырө воліс уна юрбитысь. Вонас шөркодя вит сюрс мортөдз. Быдөнөс тані бура примитлісны: дон босьттөг вердісны-юкталісны, узытөдлісны. Волісны йөз эз сөмын Коми му сикт-грездьясысь, тшөтш ортсысысь.

Вочасөн Уллынаса манастыр лоө вичко удж нуөдөм кузя Коми муын аслыспөлөс шөрин. Тані восьтісны школа, небөгкуд, вермытөм да пөрысь пөль-пөчлы торья оланін. Манастыр лэдзис Перымса Степан олөм-вылөм йылысь небөг. 1918-өд воө манастырсо тупкисны. 1994-өд восянь Уллынаса манастыр бара восьса, уджалө, татчө воалөны выль манакъяс. Налы сетөма манастырлысь коркөя му-видзсө, кисьтлөм-жугөдлөм стрөйбаяссө өні бара дзоньталөны. Воас кад, манастырыс кутас сулавны Эжва ю бокын бара сэтшөм зумыд да мича, кутшөмөн вөвлі водзын, XIX-өд нэмө.

Ю а л ө м ь я с да у д ж ь я с.

1. Кутшөм легенда олө йөз пөвстын Уллынаса манастырлы подув пуктөм йылысь?

2. Мөвпыштлөй, челядь, кутшөм мог пуктө ас водзас манастырыс?

3. Мыйөн отсалісны Мөскуаса вежаайяс Уллынаса манастырлы?

4. Челядь, лөсьөдөй манастырлөн овмөс йылысь висьттор.




8 ю р а с

ХІХ-öd НЭМЫН КОМИ ВОЙТЫРЛӨН КУЛЬТУРА

1 ю к ö н

Йöзкостса поэзия, литература чужöм

ХІХ-öd нэмын коми войтыр олöмын выналіс уна нэм чöжөн сөвмөм йöзкостса культура, фольклор, öд сэки ас профессиональной гижысьяс, артистъяс, театръяс эз на вöвлыны. Йöзкостса поэзия — традиция серти нуодан öбрэдъяс, сыланкывъяс, кöлысясьöм, кулөмöс дзебиг бөрдөдчөм, мойдчөм, нөдөм да с.в. Коми йöз сэки овлісны сöмын сиктъясын, быд лунъя олөм да сійöс кытшалысь гажъяс дырйи велавлісны видзны да водзö сөвмөдны нэмö-вöйся сылан-сёрнитан культурасö.



Сигудөк да пöлянъяс

Медвойдөр, му уджалігөн комияс сывывлісны уджалан сыланъяс, шуам, «Гөрим ми, гөрим...». Кулом йозос дзебтөдзис да дзебиг, сэсся кодраліг бөрдлісны, бөрдөдчанкывъяс сылысыяснас вөвлісны кызвынсө аныяс. XIX-өд нэмын сар армияө пиянсө босьтіг бөрдлывлісны салдатпуяс вөсна. Кузь да пемыд төвся рытъясө мойдісны, нөдлісны, висътавлісны легендаяс. Коми му пасьтала нималісны ветлысь-мунысь мойдчысыяс, уна сё да сюрс мойд төдысыяс. Том йоз рытпукъяс дырйи гадайтчисны, пудъясьлісны, асьныс лөсьодавлісны да ворслісны ворсөмъяс, өнія театрын да клубын овлана сыпектакъяс сяма вөчавлісны. Гожся войпук дырйи, көлысыяс кадө том йоз сывлісны радейтчөм йылысь сыланъяс, нимөдан да шмонитан сыланъясын оліс-ветліс йөзлөн лолыс, сьөлөмкылөмъясыс. Лирикаа сыланъяс вөліны тшөтш гажтөмөсь, шог аскылөмаөсь, шуам «Көкө». XIX-өд нэм помын, XX-өд нэм заводитчиг коми йоз пөвстын сөвмөны нин выль сикас сыланкывъяс-частушкаяс, быдтор йылысь сылан-йөктанъяс.

Дерт, коми йоз видзисны нөшта эпической легендаяс, висъталөмъяс, тайө бытьөкө войтырлөн кывйө измөм история, паськыда висътавлісны Йиркап, Педөр Кирон, Юрка, Көрт Айка, чудъяс, му пуксьөм йылысь уна легенда, кытчө кольөма важ коми мифологияыс, нэмөвөйся эскөмъясыс, төдөмлунъясыс.

Торйөн төдчана вөлі челядь фольклор, тайө вөлі зонпоснилөн медтөдчана быдтысыс. «Төвся рыт» кывбурын Нөбдінса Виттор казьтылө ичөтдырся кадсө со таdzi:

Гөбөч вылын ыджыд мамө
Мукөд рытын мойдө.
Шы ни төв ми сэки кывзам
(Көть кодсюрө ойгө):

«Дуда, дуда, кытчө ветлін?»
«Коса дорны ветлі».
Либө, — «Бобө, кытчө ветлін?»
«Чожө гуө ветлі...»

Челядь асьныс сьывлісны-мойдлісны, óta-мөдныслы лосьодавлісны лыддьөдланъяс («Өтик-мөтик, кык-мык...»), сьыланъяс, видзлісны да чужтісны ас гөгөрсә культу-расө.

XIX-өд нэмын коми йөзлөн вежөрыс пондіс садьмыны, вочасөн чужис тшөтш ас профессиональной культура, медводз поэзия, кывбур лосьөдлөм. Көть канму веськөдлан органъяс некыдз эз ышөдлыны коми культура сөвмөдөмсө, век жө йөзөс велөдөмыс Коми муын кольөм нэмын ёна сөвмөма вөлі (мед көть велөдлісны сөмын рочөн). Уна коми интеллигентлөн чужөма ас кыв, культура, фольклор да история дорө ыджыд кыскөм. Кольөм нэм шөрын чужөны медводдза коми кывбуралысьяс. Тайө эз вөв өти морт, вөлі уна гижысь. Медводз тайө **Василий Куратов**, коми литературалы подув пуктысь Иван Куратовлөн ыджыдджык вокыс (1820–1861). Төдөмысь, ыджыд вокыс туйдөма И.А. Куратовөс петны гижан туй вылө. Паськыда нимавліс тшөтш Волся сиктын чужлөм мөд кывбуралысь — **Петр Клочков** (1831–1853). Том арлыдөн кувсьөм поэтлөн кывбуръясыс разавлісны Коми му пасьтала, лоины весиг сьыланкывъясөн, шуам, «Мыйла бөрдан, муса нылө?» кывбур. Вичкоын служитысь **Петр Распутин** (1820–1901) гижліс Ёнлы эскана кывбуръяс да сьыланкывъяс, комиөдліс вичко бурсьыланъяс. Гижліс кывбуръяс тшөтш Ёгуш (Г.С. Лыткин) (1835–1907). Сы йылысь да И. Куратов йылысь водзө поэю лыддыны унджык.

Литературакөд өттшөтш чужө коми наука. Чужан кыв да культура туялөмсө ышөдіс XIX-өд нэмын Комиө волөм уна экспедиция. 1827-өд воө Усть-Сысольскө воліс фин туялысь **Адреас Шөгрен** (1794–1855), сійө чукөртіс коми кыв материал, фольклор, йөзөдіс сэсся материалъяссө немеч кыв вылын. 1843-өд воын Изьваын да Колваын уджалөма мөд фин туялысь, профессор **Матиас Александр Кастрен** (1813–1852), сійө сэсся гижөма изьва сёрнисикаслысь грамматика. Тайө волөмъясыс чуйдөдісны татчөс велөдысьясөс, мукөд йөзөс пыдісянь туявны чужанінсө, кывсө да культурасө.

1. Кутшөм сяма культура вөвлі коми йөзлөн XIX-өд нэмын?
2. Мыйла сэки эз на вөвны профессиональной коми культура, театръяс, газет-журналъяс, артистъяс?
3. Кор пондіс сөвмыны медводдза коми поэзия?
4. Лыддьөдлөй медводдза коми кывбуралысьясос.

2 ю к ө н

Ёгуш (Георгий Степанович Лыткин)

Георгий Лыткин (Ёгуш) вөлі гырысь коми туялысь-ясысь, энциклопедистъясысь медводдза, сійö вөлі паськыд видзөдласа коми патриот, кодi ас кадö зильліс да вөчліс ставсö сы могысь, медым велөдны ас войтырöс, сөвмөдны коми гижөд кыв.

Чужлөма Ёгуш Сыктывкарын (сэки Усть-Сысольскын) 1835-өд воын ода-кора 25-өд лунö гольмөм купеч котырын. 1848-өд воö Георгий помалö уездса велөдчанін, сэсся мунö велөдчыны Вөлөгдаса гимназияö да 1854-өд воын помалö сійöс. Сэсся вит во чөж велөдчö Россия империяса юркарын, Петербургса университетын, медводз юридическөй факультетын, сэсся вуджö история-филология факультетö, помалö асыввыв факультет. Коми, фин-угор, роч да мукöд кывъяс кындзи, сійöс ёна кыскöма асыввыв филология, калмык да мукöд монгол кывъяс, география да история. Писькöс том коми зонлы университет помалігөн дасьтөм диплом уджысь сетöны зарни медаль. Бур төдөмлунъяс вöсна универ-



Георгий Степанович Лыткин

ситетö кольöдöм Г.С. Лыткин пыдiа дасьтöма асьсö асыв-
ывыв филология туялысьö.

1859–1861-öд воясын сийö уджалö экспедицияын Кал-
мыкияын, вайö сэсса аскöдыс уна материал да сетö уни-
верситетö. Но друг том морт энöвтö туялан уджсö да пырö
60-öд воясö революция да демократия кыпöдан нырвизьö,
«Земля и воля» котырö. Буретш 1861-öд воö сар йöзöдöма
манифест, код серти став канмуын колiс нуöдны либе-
ральнöй реформаяс. Г.С. Лыткин сэки сьöлöмсянныс кöсийс
отсавны коми йöзлы кыпöдны кыв, котыртны велöдчöм
чужан кывйöн. Та могысь шыöдчöма йöзöс велöдан мини-
стерствоö, медым сийöс индiсны Усть-Сысольск уездса учи-
лицеö видзöдысьö либö Коми муын школаяс вылын ин-
спекторö. Но сийöс Коми муö веськöдлысьöн эз лэдзны. Сэс-
ся йöзкотырса олöмыс другöн вежсьöма: революция кыпö-
дысь гыяссö öдийö лөньöдiсны, а Г.С. Лыткинöс университетö
эз нин кольны.

Та бöрын 1865-öд восянь сийö велöдö Ларинса гимна-
зияын, 1869-öд восянь кувтöдзыс уджалö история да гео-
графия велöдысьöн Санкт-Петербуркса квайтöд гимназия-
ын.

Мый вöчис Ёгуш Коми мулы, чужан войтырыслы?
Вöчис зэв унатор, кöть велöдчылис монгол кывъяс туялысьö,
а уджавлис нэм чöжыс география да история велöдысьöн,
гижлис география кузя некымын велöдчан небöг. Медводз,
сийö став олöм чöжыс чукöртис коми кывйысь, историяысь,
литератураысь материал да зiлис кызд позис унджык
йöзöдны комиöн, медводз вуджöдöм вичко небöгъяс. Ачыс
тшöтш кывбуръяс на лöсьöдлiс, дасьтiс йöзöдiгкежлö роча-
комиа кывчукöр. Кыв кыпöдан-сöвмöдан лючки позянлу-
ныс сэки эз вöв, став канмуыс, империя тэчасыс пöдтылис
ичöt войтыръяслысь ашшöра олöмланын синöмсö, веськыда
зiлис найöс рочмöдны. Но Ёгуш татшöм сьöкыд олöмас
аддзис туй сöвмöдны коми гижöд кывлы подувсö, кызди
Енмö эскысь морт зiлис вуджöдны коми кывйö вичко не-
бöгъяс. Йöзöдiс Матьвей, Марк, Лука да Иван серти бур
юбрьяс, Бурсыланъяс, Вежа апостольяслысь олöм-вö-

чөмторъяс да уна мукөдтор. Сійö ас кадö медуна төдлöма коми история да филологиясы. Ассыыс төдöмлунъяссö чукөртö да 1889-öд воын йöзöдö «**Зырянский край при епископах пермских и зырянский язык**» ыджыд небöг, рочөн да комиён. Небöгсö лэдзöма Ёгуш ас сьöм вылас, мынтöма йöзöдöмсьыс 2900 шайт. Унаён вылö донъялö-маöсь небöгсö да шулывлöмны, мый «это есть истинно зырянская энциклопедия».

Олöм чöжыс Ёгуш чукөртöма коми кыввор да тэчöма ассыыс кывчукөр. Сöмын кувсьöм бöрас нин, 1931-öд воö, Ленинградын вöли йöзöдöма «**Роча-комиа кылчукөр**». Сэни медводдзаён пыдисянь öткодялöма коми, удмурт да мордва кывъяслыс кыввор, йöзöдöма XIV-öд нэмся важ коми гижöдъяс.

Ёгуш пуктис ассыыс пай тшöтш коми литература подулö, вöли паськыда төдса кывбуралыс, вуджöдлис-комиöдлис тшöтш роч фольклор да литература. Георгий Степанович вöли аслас кадö зэв водзмöстчыс морт, водзвыв унатор аддзысь-туялысь.

Г.С. Лыткин кувсьöма 1907-öд вося рака төлысь 24-öд лунö, дзебöмаöсь Петербургö.

Ю а л ö м ь а с.

1. Кöни да кор чужлöма Ёгуш?
2. Кодö велöдчылöма Г.С. Лыткин, кутшöм кывъяс туявлöма Калмыкияын?
3. Мый йылысь гижöма «Зырянский край при епископах пермских и зырянский язык» небöгын? Кор вöли йöзöдöма тайö небöгсö?
4. Мый вуджöдалис Ёгуш?
5. Кутшöм медбөръя ыджыд удж гижлöма Г.С. Лыткин?

Пантилей Петрö Ольöш Иван (Иван Алексеевич Куратов)

Коми литературалөн збыль чужём-сөвмөмыс топыда йитчöма Иван Алексеевич Куратов нимкөд. Сійö чужлöма 1839-өд вося сора (юль) 18-өд лунö Кебра сиктын (өнi Куратово). Батыс кувсигөн зонкалы муртса тырö квайт арös. Семъяыс Куратовъяслөн вöлöма ыджыд, олöмны гöля. Челядь водз кутчысисны видз-му овмös уджö, гöрисны-көдзисны. Иван Куратовлөн мамыс зiлис сетны пиыслы грамота. Медводз Иван велöдчö Яренскын, *полтöса* (духовнöй) велöдчанiнын, сэсса Вöлөгда карын, полтöса семинарияын нин. Иван быдмöма вежöра да писъкös мортö, вöлöма медбуръяс лыдын. Вöлөгдаса семинарияын зiля велöдис уна кыв: грек, латынь, немеч, прансуз, важ роч. Эз, дерт, вунöd коми кыв.



Иван Алексеевич Куратов

Семинария помалöм бöрын учителялис Усть-Сысольскын, вичкоувса велöдчанiнын. Буретш тайö кадас сөвмөпестысö сылөн гижан уджыс. Иван Алексеевич чукöрталiс коми сыланкывъяс, тöдмалiс сыланногсö, тшöкыда рытйысълiс том йöзкөд, ветлывлiс ярмангаяс вылö, петавлiс сикт-грездъясö. Сылөн аслыспөлös этшыс, прöстöй йöзлысь дойсö гөгөрвоöмыс, на дорö матыслуныс, дерт, эз волы сьölöм вылас сарлысь власьт кутысьяслы, полицейскöйяслы. Енбиа коми морттö пондöны быд ногыс топöдны. 1865-өд воын И.А. Куратов мунö Усть-Сысольскыс да весиг Коми муыс. Сы мунöмыслы медшөр помкаясысь öти вöлöма сiйö, мый И.А. Куратовлы карса ыджыдалысьясыс

абу лэдзёмаось велодны челядьос школаын комион, сөмын пö рочон колö. Иван Алексеевич Куратов мунö Казаньö, сэсса Шөр Азияö. Бöрсö коми поэт оз нин лок Комиö...

Кывбурьяс тэчны Куратов босьтчöма водз, 13 арössянь на. Гижлöма абу аслас ним улын. Кырымасьлöма пыр Гугов овон, тайö лои коми поэтлы гуся ним пыдди. Гижлис коми кывйон. Кывбурьясыс Иван Алексеевичлөн шогось, синва петкөданаось, наысь тыдалö, кутшöм ёна радейтлöма поэт коми йöзöс, ассьыс потандорса кывсö. Том коми кывбуралысь зильö дорйыны чужан кывсö, петкөдлö сылысь мичсö, коланлунсö:

Тайö кывлысь мичсö
Сьөлöмөн ме кывлі —
И ме медводз сьон
Ньöжйоника сьывлі...

Тайö кылөн мукод
Гораджыка сьылас —
Сё кызь сюрс пель сэки
Уна буртор кылас!

«Коми кыв» (1857-öд во)

Иван Куратовлөн кывбурьясын шөр мортыс — видз-му вöдитысь, зиль да вежöра коми морт. Сийö вежавидзысь, йöз шог дорö абу веськодь. Поэт петкөдлö аслас кывбурьясын коми мортöс оз сöмын уджын, тшöтш радлігас, шойччигас, нимкодясигас, гажöдчигас.

Коми йöз олöмысь ярьюгыд серпас тыдовтчö «Коми бал» да «Закар ордын» кывбурьясысь. Татысь он аддзы озыра пасьтасьöм йöзöс. Керкаö быд пырысьыс колана да виччысяна. Некод оз öтдорт öта-мöдöс, морт оз шу — тэ пö озыр, ме гöль. Сиктса керкаын гажöдчöны сьөлöмсянныс, мичаа да бура. Чукöртчöмаось пöрысь да том, аньяс посни челядьон, быттö став сиктыс гажöдчö.

Куратов, велöдчöм да вежöра морт, бура аддзис, мый коми йöзöс ёна нартитöны. Та йылысь сийö эз öтчыдысь

гижлы аслас кывбуръясас. Иван Алексеевич вöлі лыддö, мый серпассö поэö вежны, паськöдны кө йöз пöвстын тöдöмлунъяс, сетны быдöнлы грамота. Сійö чорыда эскыліс, мый велöдöмсö школаясын быть колö нуöдны чужан кыв вылын. Иван Куратов ёна уджаліс, медым лöсьöдны коми кывлысь грамматика. Кывбуралысь комиöдіс И. Крыловлысь басняяс, М.Ф. Вольтерлысь, Ф. Шиллерлысь да мукöд нималана гижысьяслысь кывбуръяс.

Иван Куратов эз вöв сöмын му уджалысьöс, кресьяна олöм серпасалысь, сійö кыпöдліс уна гырысь тема, веськыда да медводз гижліс комиöн морт, радейтчöм, олöм-кулöм, шуд-шог йылысь, вöлі философ сяма кывбуралысь. Медшöр майшасянторйыс сылөн вöлі коми войтырлөн аскиа луныс, сöвмас-ö, кыпалас-ö чужан йöзыс цивилизацияöдз, петас-ö пемыдсьыс. Став сэкся шуштöмлун вылас видзöдтöг сійö век эскыліс коми войтырлөн шуда аскиа локтан кадö, сійö кыліс, мый олöмыс вöрзяс-вежсяс. Таdzi сійö гижö 1865-öд воö «Пемыд» кывбурын:

Мортлы дзескыд пемыдын...

Шонді петмысьт быдсö таті

Паськөдас тай... тіянлы!

Лолыштанныд кокныда ті!

Петас, вокъяс, шонді-й тан!

Ме нин аддза — рөммö ылын...

И енвевтса лысваыс

Югйыштас сэк шонді вылын!

Иван Куратов томөн кувсьöма 1875-öд воö пöдöм виссьöмысь (чахоткаысь) Верной карын (öнія Алма-Атаын). Ловъя дырйиыс на «Вöлөгдаса губернскойöй ведомостьяс» газетын И. Куратовлысь йöзöдлісны вит кывбур, поэтлысь нимсö индытöг, коми йöзкостса сыланкывъяс туйын. Збыль вылассö Иван Алексеевичлысь кывбуръяссö видзліс сылөн рöдвужыс, найöс паськыда йöзöдісны сöмын XX-öд нэмö 20–30-öд воясö. Öні чужан Кебра сиктас быд во мунö-

ны Иван Алексеевичлы сиём поэзия лунъяс. Ассьыныс кывбуръяссö лыддьöны коми да роч поэтыяс, юргöны сьыланкывъяс. Коми йöз бур кывйöн казътылöны нималана мортöс. Сыктывкар шöрö сувтöдöма И.А. Куратовлы казътылан мыгөр. Поэтлысь нимсö сетöма велöдысьясöс дасьтан öтиöд номера колледжлы.

Ю а л ö м ъ я с д а у д ж.

1. Висьтыштöй И.А. Куратовлөн семья йылысь.
2. Кöни велöдчыліс коми кывбуралысь?
3. Кутшöмön петкöдлывліс Иван Куратов кресъянаöс?
4. Мыйла И.А. Куратовöс шуöны коми литературалы подув пуктысьöн?
5. И.А. Куратов пыр олö коми йöз вежöрын... Кызди ті, челядь, гөгөрвоанныд тайö шуöмсö?

4 ю к ö н

Мыйö да кызди велöдлісны

Медводдза школаяс Коми муын чужисны XIX-öд нэм первой джыныйн. Капитализм сөвмиг-ёнмигöн грамотаа йöзыд ковмис нöшта на унджык. Коми йöз кутісны зільны, медым налөн челядыс эз öтдортчыны велöдчöмысь, босьтлісны бур тöдöмлунъяс. Мөвпалісны тадзи: грамотаа, сюсь вежöра, уна тöдысь мортлы олöмад лоö кокниджык. Позьö корсьны бурджык удж, быдмыны чина мортöдз. Дерт, сійö кадас грамота тöдысь мортыд этша вöлі. Сикт-грездъясын найöс пыдди пуктісны. Татчöс олысьяс тшöкыда шыödчылісны грамота тöдысь дорö — корисны сераку гижны, власьтыяс вылö норасьöм да с.в. Школалөн посни классъясын велöдісны гижны-лыддьысьны, чинтавны-содтавны, мукöдторйö. Быть велöдісны Ен тшöктöмъясö. Урокъяссö нуöдліс вежаай. Челядь тöдмасисны Библияөн, вичко празьникъясöн, велöдісны кевмöмъяс. Öткымын шко-

ла бердын лосьодалісны видз-му градъяс. Сэні челядьос велодлісны гөрны-көдзны, быдтыны картупель-капуста, мукөдтор. Велөдчөмыс посни классъясын кыссис 3–4 во. Нывкаяс да зонкаяс велөдчисны өтлаын. Посни классъясө ветлөдлыны да босьтны төдөмлунъяс сійө кадө эз вөв быть. Челядь пөвстысь унаөн энөвтлісны школасө. Помкаыс вөлі быд пөлөс. Өтияс олісны гөля, эз вермыны велөдны челядьос, өд посни войтырлы колө вөлі ньөбны көм-паськөм да мукөдтор. Мөдъяслы лои ичөтысянь отсасьны мам-бацьныслы: дөзьөритны скөт, кага видзны. Буретш посни чөйвокөс дөзьөритөм понда уна нывка энөвтліс школасө. Мукөдыс помавлісны сөмын некымын класс, та вылын төдөмлунъяс босьтөмыс джөмдыліс.

Водзө велөдчыны позис вылыс тшупөда ичөт школаясын. Татшөмыс вөлі көкъямыс — Усть-Сысольскын, Яренскын, Ношульын, Мокчойын, Емдінын, Кулөмдінын, Визинын да Помөсдінын. Велөдчыны коліс нель во. Содтөд төдмөдісны географияөн, историяөн, *гжтөмөн*, Усть-Сысольскын весиг велөдісны немеч да прансуз кывъясө. Ассьыныс быдтасьяссө велөдөмысь баць-мам мынтісны сьөм. Төдөмлунъяс босьтісны медсясө кресьяналөн ныв-пи. Школаясса велөдысьяслөн вөлі вылыс велөдчөм. На пиысь унаөн помавлісны институтъяс Петербургын, Канкарын, Вөлөгдаын.

Коми муын вочасөн кыптісны вичкоюс да манастыръяс. 1873-өд воын Усть-Сысольскын воссис духовнөй велөдчанін, кутісны дасьтыны вичкоса уджалысьясөс, вежаайяслы отсасьысьясөс (саломщикъясөс). Сэні велөдчисны вежаайяслөн да кресьяналөн челядь. Найө босьтісны бур төдөмлунъяс. Велөдісны Ен небөгъяс, латин да грек кывъяс, сьылісны вичко сьыланъяс. Полтөса велөдчанінлы өтувъя вынөн лэптісны изйысь керка. Чукөртісны сьөм. Коді мыйөн вермис, сійөн отсаліс. Өтияс вайисны пөвъяс, изъяс, кирпич. Мөдъяс — керка вевтсө лөсьөдісны, коймөдъяс — дорчисны, тувъяисны. Тайө керкаыс өні на зымвидзө-сулалө, мичмөдө Коми Республикалысь юркарсө. Сэні талун Национальнөй галерея.

Купечьяслон, кресьяналон да мукод йозлон быдтасьясыс колана тодомлуньяс босьтлісны тшотш гимназиясысь. Вөлі кык полос гимназия. Отиясын велодчисны сомын нывьяс, модьясын зоньяс. Нывьяслы гимназияыс вощьома 1909-од воын, зоньяслы — 1912-од воо. Кыкнаныс Усть-Сысольскын. Мый велодісны ныв-зон? Геометрия, литература, астрономия, латынь кыв. Гимназия помалом борын нывьяс вермисны велодны песни классьясса челядьос, зоньяс — пырны университетө. Нывьяслон гимназиялы сетісны сар готыр Александра Федоровна честь кузя Александрійскөй ним, зоньяслысь гимназиясө шуисны Николай Александрович нимаон, таон сар Николай II-ос пыдди пунктисны тшотш. Гимназияын велодчысыя новлісны торья паськом. Нывьяслы вурлісны сьод рома кузь платтьо, зоньяслы — гач да корт кизьяса китель, юраныс новлісны джуджыд козыра картуз.

Кыкнан гимназияяс велодісны ныв-зонмос сывны йоктыны, гогорвоны *шылад*. Асланыс быдтасьяслы тодомлуньяс сетомысь мам-батьлы колө вөлі мынтыны сьом. Голь челядьлы отсөг сетом могысь нывьяс гимназияын весиг лосьодісны торья котыр. Тайө котырыс ньобалис ком-паськом, небогьяс, мукодтор да разодіс голя олысь нывьяс повстө. Усть-Сысольскса гимназияяс тупкисны сомын 1919-од воын.

Ремеслоо велоданіньяс вощисны Айкатылаын (1902-од воо) да Усть-Сысольскын (1910-од воо). Велодісны сәні сомын зоньясөс. Дорчыны, улос-пызан вочны, слесараны. Дзоньтавлісны видз-му водитан корта колуй. Школа помалысыяслы козьнавлісны уджалан колуй, инструмент чукор. Тайө вөлі кресьяна челядьлы зэв тодчанатор. На пиысь од эз быдон вермы ньобны татшом коланаторсө.

Сәки быдлаын велодісны рочон. Тайө, дерт, падмодлі коми челядьос, од найө омөля тодісны роч кывтө да унатор эз гогорвоны. Со кызди серпасалө Нөбдінса Виттор «Товся рыт» кывбурын сәкся роч кывья школаын велодчөм борын гортеа удж вочөмсө:

Пызан дорын, пемыдінын,
Роч книга ме лыддя.
Зэв дөсаднө гөгөрвотөг:
Ог төд, мый и лыддя.

Ю а л ө м ь а с.

1. Кутшөм велөдчанінъяс вөліны Коми муын?
2. Кутшөм *уджсикаса* йөзөс дасьтисны сэки Комиын?

Б ю к ө н

Нималана велөдысь

Феоктиста Ивановна Забоева чужлөма 1850-өд воын ноябр 28-өд лунө Усть-Сысольскын, озыр коми купеч семьяын. Айсө, Иван Назаровичөс, карса олысьяс бура төдлісны. Буретш сы водзмөстчөмөн да отсөгөн Усть-Сысольскын воссис аньяслы уездса велөдчанін. Аслас сьом вылө Иван Назарович кыпөдіс сылысь стрөйбасө, сәсся куим во чөж мынтысис сэтчө шоныд да би сетөмысь. Став бурсө вөчөмысь И.Н. Забоевлы сетісны эзысь медаль.

Сылөн котырыс вөлөма ыджыд. Феоктиста чужлөма витөдөн. Бать-мам зілісны быдөнөс велөдны грамотаө, сетны бур төдөмлунъяс, индыны олөмас туй. Куим чой — Елизавета, Феоктиста да Антонина — лоины школаса велөдысьяс.

Феоктиста быдмис писькөс вежөра нывкаөн, вит-квайт арөссянь лыддысис нин. Усть-Сысольскын помаліс аньяслы велөдчанін. Та бөрын Совдорын велөдчөма велөдысьясөс дасьтан курсъяс вылын. 1872-өд восянь кутіс уджавны Выльгортса ичөт школаын. Сәні велөдчисны эз сөмын тайө сиктса ныв-зон, матысса грездъяссысь челядь тшөтш. Феоктиста Ивановна зэв ёна радейтліс найөс, лелькуйтліс, зіліс быд ногыс отсавны. Бур да шань сьөлөма аньөс челядь пыдди пуктісны, кывзысисны сылысь. Тайө школаас

Феоктиста Ивановна уджалома 40 во. 1912-өд воын петө пенсия вылө. Челядьос велөдөмө бур пай пуктөмысь Выльгортса школаө весиг өшөдөмаось сылысь *чужомпассө*, аслыс зіль анылы сетөмны зарни медаль.

Феоктиста Ивановна велөдөма уна сө велөдчысьос. На пөвстын нималана йөз, шуам, туялысьяс К.Ф. Жаков, В.П. Налимов, бурдөдысь С.И. Чеусов, велөдысь П.И. Киселёв да мукөд.

Ю а л ө м ь я с.

1. Көні велөдчис Феоктиста Забоева?
2. Кызди ті мөвпаланнды, челядь, кутшөм пай пуктіс айыс нылыслөн олан туй бөрйигас?
3. Бур уджысь мыйон пасйылісны Ф.И.Забоеваос?
4. Кутшөмаджык оліс аслас велөдчысьяскөд Феоктиста Ивановна?

б ю к ө н

Кужысь киа сигудөк вөчалысь

Коми йөз пөвстын пыр вөвлісны кужысь киа войтыр. На пиысь өти — Семён Иванович Налимов. Сійө чужлөма 1857-өд воын урасьөм 1-өд лунө Выльгорт сиктын. Сиктса олысьяс тшөкыда шыөдчылісны сы дорө, корисны дзоньтавны гитара, балалайка. Быдөнлы отсаліс Семён Налимов. Зарни киа морт йылысь сёрни өдйө паськалө Коми му пасьта. Орчча сикт-грездъясысь мөдісны воывлыны Семён Иванович дорө. А сійө, бур сьөлөма мортыд, зільө вөлі, медым некод эз кежав весьшөрө, лөсьөдаліс жугалөмпазалөм балалайка, гитара, мукөд музыка сетысь-чужтысь инструмент. Сэсся ачыс кутөма сигудөкъяс вөчавны. Тайө уджыс эз кокни вөв. Уна пөсь лои кисьтны Налимовлы, унаторйө велөдчыны. Сяма коми морт йылысь юөрыс воө Петербургөдз, В.В. Андреевөдз. Андреев сійө кадас вөлі

веськӧдлӧ йӧзкостса инструментъясӧн ворсан котырӧн (оркестрӧн). Зэв аслыспӧлӧс сійӧ вӧлӧма. Сьылісны сәні аньяс да айловъяс. Паськӧмныс — кресьяналӧн, сиктса олысьяслӧн. Аньяс сарапанаӧсь, айловъяс — сувтса юрйыла дӧрӧмаӧсь. Сьылісны сӧмын йӧз пӧвстын тэчӧм-артмӧм сьыланкывъяс. Ворсісны балалайкаясӧн. Аслас олӧм чӧжӧн С.И. Налимов вӧчӧма 300 гӧгӧр балалайка, на пиыс 70-сӧ — В.В. Андреевлӧн оркестрлы. Налимовлӧн сигудӧкъяс вӧліны ёсь да мича гӧлӧсаӧсь. В.В. Андреев ёна ошкыліс таысь Налимовӧс, вылӧ донъявліс коми мортлысь сьӧкыд уджсӧ, бура мынтысьліс сылы. Семён Ивановичӧн вӧчӧм балалайкаяссӧ унаысь петкӧдлывлісны — Парижын (1902-ӧд воӧ), Петербуржын (1906–1907-ӧд воясӧ). Коми мортлысь уджсӧ вылӧ донъялісны, сетісны сылы ыджыд да ичӧт зарни медаль.

Кувсьӧма С.И. Налимов 1916-ӧд воын август 22-ӧд лунӧ. Дзевӧма сійӧс Петербургӧ, Волковса шойна вылӧ. С.И. Налимовӧн вӧчӧм ӧткымын балалайка эм на торъя йӧз ордын, том йӧзӧс музыкаӧ велӧданінъясын.

Ю а л ӧ м ь я с.

1. Мыйӧн нимӧдіс асьсӧ Семён Налимов?
2. Мый ӧтувтіс С.И. Налимовӧс да В.В. Андреевӧс?
3. Кутшӧм козинъяс сетісны нималана коми мортлы, сигудӧк вӧчысьлы?





9 ю р а с

КОМИ МУ ХХ-өд НЭМ ЗАВОДИТЧИГӨН

1 ю к ө н

Овмөс сөвмөм, мупытшса озырлунъяс

История вуджис выль, ХХ-өд нэмө. Олөмыс Комиын мунис важ моз, лөня, нинөм быттьө весьөпөртанаыс эз тыдав. Сөмын тадзи эз ло, буретш ХХ-өд нэмын коми йөзлөн олөмыс, чужан муыс вуж выйөн вежсис бурланьö да лөкланьö, тайö нэмыс бөръяяс лыдын лоис медся вир кисьтана.

Коми мулөн овмөс вөлі нэмөвөйся ногса на, коми йөз сиктъясын олiг му уджавлісны, вөравлісны да чери кыйлісны. Уналаын гөран муяс эз кутны тырмыны, йөзыс эз вермыны вот мынтыны, нянь во гөгөр чөж эз тырмывлы. Та вөсна Луза, Сыктыв, Эжва, Емва вожысь унаөн төвъяснас ветлісны содтөд удж корсьны Из сайö, Сибирö, Уралса заводъясö, Вяткаö, нывбабаяс кага видзисны Питерын, Вөлөгдаын.

Комиысь бур вөръяс йылысь төдлісны Россия да став Европа пасьтала нин. Кардорса да мудорсайса промышленникъяс зілісны вужъясьны Комиö, зырны-вермыны татчөс купечьяссö, пөрөдны да юяс кузя кылөдны бур вөр. Кылөдчывлісны Сыктыв, Эжва кузя Кардорөдз да Печора кузя Йиа саридзөдз. Медасьлісны пөрөдчынысö да кылөдчынысö коми кресьяна, уджавлісны ас көлуйөн да

вөвъясөн, овлісны ас вөчөм чомъясын да керкаясын. Вөр пөрөдчысьяслысь уджсө да олөмсө, зимөгөритны ветлөмсө бура серпасавліс аслас «Алөй лента» романас нималана коми гижысь Лездор Вась (Василий Юхнин). 1901-өд воын Печора воын шведъяс кыпөдісны «Стелла поларе» вөр пилитан завод, 1906-өд воө сэні уджавлөма 400 морт. Но век жө пу уджалан индустрия бура эз сөвмыв, вөрсө пилиттөг петкөдлісны век ортсыө, Роч муө.

Водзө вөлі уджалоны Сереговын сов завод да Сыктыв вожын Кажымса да Нювчимса көрт сывдан кык завод, но көрт вөчан уджыс сэні колис важ, көть совлөн да көртлөн бурлуныс вөлі вель вылын. Сідз, 1896-өд воын Улыс Новгородын, Ставроссияса *петкөдлөм* вылын, сыктывса көртлы сетөмаөсь вөлі ыджыд эзысь медаль.

XX-өд нэм заводитчигөн Россияса уна йөз, канмуса чиновникъяс да писькөс йөз, ас вылө уджалысьяс син улө Коми му усьө кызди мупытшса озырлун лоана перъянін, озырысь-озыр ресурсъяса му. Россия экономикалы колө вөлі мусир. Ухтаын XIX-өд нэмса 80-өд воясын нин мыйтакө перйывлісны мусир, нэм заводитчигөн унаөн пондісны зіля корсьны мусирлысь выль куйлөдъяс. Сідз, 1899-өд воын Ухтаө воөма инженер А.Г. Гансберг да төдмалөма вель уна мусир петанін, котыртөма Варваринса прөмысел, лэптөма писькөдчан вышка. 1906-өд воө Комиө воөма канмуөн мөдөдөм экспедиция, веськөдлөма кодөн В.Я. Белобородов. Найө перйөмны нель скважина, төдмалөмаөсь куйлөдъяс. Экспедиция вөчөма кывкөртөд: ыджыд индустрия сөвмөдны он вермы, абуөсь туйяс, уджалысь йөз, Россия шөринысь Коми му куйлө ылын.

XX-өд нэм заводитчигөн Коми муө воліс лыдтөм туялан экспедиция. Найө төдмалісны мупытшса озырлунъяс, вөр-ва, юяс, ва туйяс. Гөгөрвоана вөлі: Коми мулөн аския луныс вермас лоны дзик мөд, тані эм уна позянлун сөвмөдны индустрия. Сарлөн правительство көсйыліс весиг овмөдны Комиө роч кресъянаөс, латышъясөс да немечьясөс. Торйөн уна пай Коми му төдмалөмө пунктисны ыстөм поляк А.В. Журавский (1882–1914) да Ылі Войвыв нималана туялысь В.А. Русанов (1875–1913).

Мукӧдлаысь волӧм туялысьясысь кындзи Комиын быдмисны ас тӧдысь йӧз. Мукӧд каръясын велӧдчӧм коми том йӧзлы лои окота туявны ас чужан му, кыв, оланног. Ыджыд туялысьясӧдз, профессоръясӧдз быдмисны П.А. Сорокин, К.Ф. Жаков, Усть-Сысольскын уджалісны, туялісны чужан му А.А. Цембер, А.А. Чеусов да мукӧд.

Ю а л ӧ м ь а с.

1. Кыдзи сӧвмис Коми муын экономикаыс нэм заводитчигӧн?
2. Мый кыкис экспедициясӧс Комиӧ, мый найӧ тӧдмавлісны?
3. Кутшӧм мытшӧдъяс вӧліны индустрия сӧвман туй вылын?

2 ю к ӧ н

Тӧдӧмлунъясла

Революцияӧдз кресъяна челядьлы эз вӧв кокни шедӧдны-перйыны бур тӧдӧмлунъяс, помавны институт либӧ университет. Велӧдчӧмысь коліс мынтыны уна сьӧм. Коми йӧз пӧвстысь сӧмын лыда мортлы, медся вежӧра да зіль войтырлы, мойвиис водзӧ велӧдчыны Мӧскуаын да Петербургын, лоны туялысьӧн. На лыдын К.Ф. Жаков да П.А. Сорокин. Кыкнанныс найӧ петісны му уджалысьясысь, бура велӧдчисны Коми муын, содтӧд тӧдӧмлунъяс сӧсся босьтісны Петербургын. К.Ф. Жаков да П.А. Сорокин ылӧдз нимӧдісны Коми му, татчӧс йӧзӧс.

(Палалей Кале) Каллистрат Фалалеевич Жаков чужӧма 1866-ӧд вося кӧч тӧлысь 18-ӧд лунӧ Усть-Сысольск уездса Давпон грездын. Айыс сълӧн му вӧдитіс да вичкоясын ӧбразъяс серпасавліс. Жаковъяслӧн ыджыд семьяын Каллистрат вӧлӧма дас ӧтиӧд кага. Попыс бӧрйӧма Каллистрат нимсӧ пыртчигӧныс да тадзи шуӧма ай-мамыс-лы: «Кымын мывкыдджык вежа ним, сымын вежӧраджык



Каллистрат Фалалеевич
Жаков

лоо морт». Сизим арөссиянь нин Каллистратлөн айыс велөдөма писо лыддысыны рочөн. Кык во сійө велөдчө Вильгортса школаын, помалө Усть-Сысольскын уездса велөдчанін. Зэв бура велөдчис Тотьма карын велөдысыясос дасьтан семинарияын.

Каллистрат Жаков пыр зилис унджык төдны, ёна велөдчис. Көть гөля олісны, сьом эз тырмы, сійө «кызь урөн зептас» муно Петербургө да пырө велөдчыны Вөр институтө, недыр мысти, комын арөсөн, пырис Киевса университетө, сэссия вуджис Петербургаө, история-филология факультет вылө. 1901-өд воын помаліс университетсө да лои велөдысьөн.

К. Жаков сьөлөмсянныс уджаліс, лөсьөдаліс мойдьяс, кывбурьяс, поэмаяс, висьтъяс. Ёнджыкасө гижис рочөн. Сөмын вөчліс тайос аснаукөн. Сійө зилис, медым роч йөз пыдісянджык төдмалісны коми войтырлысь олөм-вылөм, культура. Аслас гижөдьясө К. Жаков пыртліс коми мойдьяс да легендаяс, сыланкывьяс. Петербург да Псков карьясын сійө нуөдліс «Ставмирса мойдьяс» кружок. Том дырйиыс на К. Жаков гижис коми йөзлөн корысялана олөм йылысь висьтъяс да очеркьяс. На лыдын — «Войвылын рабочөйяслөн да кресьяналөн олөмысь очеркьяс», «Вой төвлөн шувгөм улын». Зэв төдчана да гижысыөс паськыда нимөдана удж — «Олөм бужөдьяс вомөн» повесът. Сэні К. Жаков висьталө, кыдзи олісны-вылісны коми войтыр XIX–XX-өд нэмьяс костын.

Каллистрат Фалалеевич зилис кыпөдны коми йөзлысь культура, сетны налы бур төдөмлуньяс. Сійө медводдзаяс лыдын паніс сёрни сы йылысь, медым велөдны челядьос коми кыв вылын. Сійө зилис восьтыны Усть-Сысольскын

техникао торъя велодчанін, көсйис лэдзны комион газет. Дерт, сэки нинөм сылы вөчны эз лэдзны.

К.Ф. Жаков нималіс тшөтш кыдзи философ да этнограф. Кувсьөма нималана коми туялысь Рига карын 1926-өд воо. Сэні сійөс дзебөмаось. 1990-өд воо сылысь шойсө вайисны Коми муо, выльысь дзевисны Сыктивкарса шойнао. Сэтчө жө сувтөдөма К.Ф. Жаковлы казтылан мыгөр.

Му пасьтала нимөдіс асьсө мөд коми морт, тшөтш туялысь Пителим Александрович Сорокин. Тайө ёна нималана социолог да этнограф. Чужлөма Пителим Сорокин 1889-өд вося төв шөр 23-өд лунө Вөлөгда губерняысь Яренск уездса Туръя сиктын. Мамыс Пителимлөн водз кувсьөма. Та вөсна кынөмпөтсө ковмис аслыс шедөдны. Айыскөд, сэсся вокыскөд том зон ветлөдлө сиктысь сиктө да дзоньталө вичкоясын эмбур, епөвъяс. Ай кувсьөм бөрын отсасисны Пителимлы рөдвужыс. Ичинь-ыслөн верөсыс велөдөма Пителимөс чери кыйны да вөравны.

Пителим Сорокин велөдчөма Гам сиктса кык класса школаын. Тайө школаыслөн стрөйбаыс весиг талун на эм. Сэсся водзө босьтіс төдөмлунъяс Кострома губерняса Хреново грездын, велөдысьясөс дасьтан сэтчөс семинарияын. 1905–1907-өд воаяся революция кадө пырөдчө политикао, сетчө эсеръяслань. Ветлөдліс митингъяс вылө, таысь сійөс сэсся гимназияысь вөтлісны.

Пителим Сорокин сөмын сьөлөмнас эз усь. Пыр мөвпаліс водзө велөдчөм йылысь. Гырысь сьөкыдлунъяс венөм бөрын сійө бөр воө Петербургө. Тані сылы ыджыд отсөг сьөмөн да бур кывйөн сетө коми морт К.Ф. Жаков. Пителим Сорокин помаліс Петербурга университетын юристө велөдан факультет. Сылы сетісны медводдза тшупода диплом да кольөдісны уджавны университетө.

П.А. Сорокин бура да пыдісянь вөлі төдө коми йөзлысь олөм-вылөмсө, налысь мөвпъяссө, тужа-нужасө. Тшөкыда сійө воывліс Коми муо, сёрнитліс татчөс войтыркөд, ветліс

экспедициясö. Питирим Александрович гижöма коми йöз йылысь уна удж: налön кöм-паськöм, оланin, оласног, енлы эскöм да мукöдтор йылысь.

Аслас гижöдъясын, торйön нин социология кузя, сийö пыр сувтлiс революциялы паныд. Сорокин лыддылыс, мый быд революция вайö уна лектор, медводз, дерт, йöз культуралы, налön овмöслы, революцияс дырйи кувсьöны йöз, киссьö вир. Питирим Александрович вöли сы дор, медым вежсьöмъяссö нуöдны вочасön, йöзлысь олöм-вылöм жуглытöг.

1922-öд воö П.А. Сорокинöс, мукöд нималана гижысьöс, философöс да туялысьöс моз, большевикъяс вöтлöны-мöдöдöны саридз сайö, ыли муясö. Питирим Александрович сэсся веськалö Америкаö да тани лоö колана мортön. Уна во сийö велöдö АÖШ-са зэв нималана да пыдди пуктана Гарвардса университетын, 12 во чöж веськöдлö социология факультетön. П. Сорокин ордын велöдчывлöма АÖШ-са нималана президент Джон Кеннеди. Питирим Сорокинöс, ёна уджалысь да зiлысь мортöс, кутiсны мир пасьтала тöдны. Сийö гижис уна туялан удж. Коми муысь петлöм мортöс бöрйисны Социологъяслön войтыркостса ассоциацияö президентö. Канадаын весиг лöсьöдiсны-котыртiсны П.А. Сорокин нима социология шöрин. Кувсис Питирим Александрович 1968-öд вося урасьöм 10-öд лунö.

Ю а л ö м да у д ж ь а с.

1. Мый öтувтiс олан туяныс К.Жаковöс да П. Сорокинöс?
2. Висьталöй К. Жаковлön удж-олöм йылысь.
3. Мövпыштлöй, челядь, мый нимöдiс П. Сорокинöс.

Питирим Сорокин
Кузь туй вуджӧм
(*Ас йылысь гижӧдысь торъяс*)

Коми йӧз вӧлі менӧ кытшалысь йӧзкостса да культу-
раа гӧгӧртасыс. Налӧн лыдыс сӕки вӧлі 180000 морт*. Орт-
сысянныс найӧ вӧліны кузь тушаа, вына, ён дзоньвидзалу-
на йӧз, раса сертиыс тайӧ вӧлі альпийскӧй, нормандскӧй да
неуна азияса раса типъяслӧн сорас. Кыв боксянныс найӧ сёр-
нитісны фин-угор сёрнилӧн торъя кывйӧн да матӧ став ко-
миыс сёрнитіс рочӧн кызди мӧд кывйӧн. Грамота сертиыс найӧ
вӧліны коймӧд местаын Россия-
са уна войтыр пиын (россияса
немечьяс да еврейяс вӧліны мед-
воддза да мӧд местаясын). Кы-
нӧмпӧтсӧ перйылісны кызвын-
сӧ видз-му вӧдитӧм, содтӧд пыд-
ди вӧралӧм, лэчкасьӧм, вӧр
пӧрӧдӧм, чери кыйӧм помысь.
Найӧ шӧркодя овлісны мукӧд
роч йӧзысь бурджыка. Индустрия да гырысь каръяс эз на
суйсьывны сӕки налӧн олан туяс. Дзоньнас Коми муын
ӧдва-кӧ вӧлі кӧть ӧти фабрика-завод либӧ гырысь кар.
Сӧмын Усть-Сысольск, кык сюрс гӧгӧр олыся кар, вӧлі весь-
кӧдлан, вузасян да культура шӧрин.

Коми войтырлӧн моральыс да оласногыс вӧлі мыджсьӧ
Зарни индӧд вылӧ, Дас тшӧктӧм да ӧта-мӧдлы отсасьӧм
вылӧ. Лыддӧны вӧлі, мый моральлӧн тайӧ *юрподувъясыс*



Питирим Александрович
Сорокин

* Сёрниыс муно сомн зырян-комияс йылысь.

Енмөн сетöмаöсь, наö колö кутчысьны нем вылö видзöдтöг. Та вöсна юрподувъясö эз сöмын велöдны, найö вöли паськыда пырöмаöсь олöмö. Кресьяналөн найö вöлины öтувъя оланпасөн. Оланпаслысь тайö нормаяссö абу вöли гижöма юристъяслөн небöгъясö, сы вöсна мый найö вöлины нин менам суседъяслөн вежөръясас да олан сямас. Йöзыс кутчысисны наö эз мыждöмысь полöм вöсна, тайö вöлины пыдiа йиджтысьöм «чорыд тшöктöмъяс». Кресьяналөн керкаясас томанъяс эз вöвны, гусясьысьыс эз вöвлы да. Вывтi сьöкыд мыжъясыс овлисны зэв шоча, весигтö пöрадок торкöмъясыс лолисны сöмын корсюрö. Öта-мöдлы отсасьöм вöли быд лунья йöзкостса олöмас пырöм пöрадокыс.

Коми йöз политикаас да йöзкотырса олöмас некор эз тöдлыны рабалöм да крепостной *инöд* (право). Найö век овлисны ас кöсйöмысь да веськöдлисны олöмнас ас кежсьыс веськыда юрнуöдöм пыр, та дорö матын германияса гемайншафт либö россияса община. Сиктса юрнуöдöмыс кутлис ас киас мусö кызди öтувъя эмбур, сийöс вöли некодöс пайктöг юклöны да выльысь юклöны торъя котыръяс костын налөн ыджда, чинöм либö содöм сертиыс. Öта-мöдлы отсасьöмлөн öтувъялуна вежöртöмыс ме дырйи век на вöли ён, сийö уна ногөн асьсö петкöдлис сиктса öтувъя олöмас. Тайö эз сет сöвмыны йöз костын синмö шыбитчана торъялöмыслы да экономикаын, политикаын ортсысянь тыдалана йöз чукөръяслы (классъяслы). Коми муын эз вöвны вывтi тöдчана, озыр, ыджыд кокньöдъяса йöз, элита, эз вöвны тшöтш торъя гöль, коньөрö усьöм йöз. Весигтö айловъяслөн да эньловъяслөн статусыс эз ёна торъяв. Кывкөртöд — Комиын эз вöв ни «классъяс костын тыш», ни политикаын аслас интересъяссö кутысь *ютыръяс*. Сиктса бөрьян власьтъяс (земствояс) кызвыннас тöждысисны школаяс кышöдöм, дзоньвидзалун видзöм да культура понда. Сар правительстволөн видзöдöмыс эз вöв чорыд.

Татшöм сяма йöзкотырса олöм пытшкас олiгөн да быдмигөн ме, дерт жö, босьтi ас вежөрö тайö эскöмъяссö, моральлысь нормаяссö да öбычайяссö, быдöнлөн öткодь асшөрлун, ас вылö лача да öта-мöдлы отсöг вежöртöмсö.

Сёрнитны кӧ коми йӧзлӧн эстетика боксянь вежӧр йылысь, то мичлунсӧ вежӧртӧмыслӧн торъя юкӧнӧн вӧлі, медводз, вӧр-валӧн мичасьыс-мича этшыс: гырысь индустрия-ӧн да каръясӧн няйтӧсьттӧм юяс да тыяс, помтӧм-дортӧм вӧръяс, гожӧмъяснас быд сикт гӧгӧр дзоридзалысь видзьяс да муяс, тӧвъяснас паськыд отаа бырлытӧм сӧстӧм лым да пӧшти пыр лӧз да кымӧртӧм, войяснас бриллиантъяс кодъ кодзувъяса енӧж.

Комияслӧн эстетикаа олӧмсӧ озырмӧдлісны мойдъяс, легендаяс, мифъяс, йӧзкостса сыланкывъяс, сиктса гажъяс, йӧктӧмъяс да уна серпаса ӧбрадъяс — кага чужӧм, гӧтрасьӧм, кулӧм да йӧз олӧмысь мукӧд лоӧмторъяс. Кӧть комияслӧн сэки гижан литератураыс вӧлі сӧмын на чужан выйын, налӧн фольклорыс (мойдъяс, легендаяс да висетьяс) вӧлі зӧв озыр да веж петкӧдлана мича. Сэтшӧмӧсь жӧ вӧліны тшӧтш йӧзкостса сыланкывъяс да *шылад*...

З ю к ӧ н

Коми культуралӧн выль кыпалӧм

Нэм заводитчигӧн Коми муын тӧдчымӧн сӧвмис йӧзӧс велӧдан школа, воссялісны *небӧгкудъяс* (библиотекаяс), чужис телеграфа йитӧд. Ӧти кывйӧн, цивилизация да культура вочасӧн писькӧдчӧ вӧлі ылі Коми муӧ. Торйӧн тайӧ тӧдчыліс Сыктывдінкарын, тадзи коми йӧз нимтылісны ассыныс юркарсӧ.

1899-ӧд вося лӧддза-номъя 18-ӧд лунӧ Усть-Сысольскын восьтісны карса *небӧгкуд*-лыддысянін, сэтчӧ позис пыравлыны-лыддысьны сӧм мынтытӧг быдӧнлы. 1902-ӧд воын восьтісны земстволысь небӧгкуд, воссялісны лыддысянінъяс тшӧтш гырысь сиктъясын.

1906-ӧд вося ода-кора 12-ӧд лунӧ Усть-Сысольскын воссис медводдза небӧг лӧдзанін. Сійӧс кутысьыс вӧлӧма З.Д. Следников. Сэні печатайтлісны юӧртӧмъяс, бланкъяс, небӧгъяс. Тадзи Коми муын пондіс сӧвмыны небӧг печат-

тайтём, петісны сэтысь медводдза коми кывъя сэкса небөгъяс. Газет лэдзём эз вöv сөвмөма, көть К.Ф. Жаков вöйылөма усть-сысольскса земстволы подулавны да лэдзны комиён газет. Но рочмөдан нырвизя веськөдлысьяс сійös, дерт, абу кывзөмаöсь.

Усть-Сысольскын нэм заводитчигөн котыртчөма асворсан театр, уджалөмаöсь театр радейтысьяслөн кружокъяс, волывлөмны мукөд каръясысь артистъяс. XIX-өд нэм помын вöсьмөма фотография вöчанін, 1905-өд вося моз тöлысь 16-өд лунö Усть-Сысольскын медводдзаысь петкөдлөмны кино.

Сöмын медся тыдаланаа сөвмөма сэки литература да фольклор чукөртём. Позьö шуны, XX-өд нэмса коми культуралөн сөвмөмыс, кыпалөмыс заводитчөма буретш нэм заводитчигөн. Сэки канму нырвизысь вöлі бергөдөма рочмөдөмланы, а уездса веськөдлысьяс эз сөвмөдны, эз зільны кыпөдны вужвойтырлысь чужан кывъя культурасö. Татшөм кадö чужан войтыр дорö интересысь надзöник вöлі содö, тадзи тшöтш вöлөма дзоньнас Россия империя пасьтала. Таын ыджыд пайыс **Андрей Андреевич Цемберлөн** (1874–1959), чужан му туялысьлөн. Сійö ёна отсавлөма Комиö волігъясö мудорсайса туялысьяслы налөн коми кыв да фольклор чукөртан уджас (**Юрьё Вихманлы**, фин туялысьлы 1901–1902-өд воясö да **Таави Сирелиуслы**, фин этнографлы 1907-өд воын, венгр **Давид Фокош-Фукслы** 1911-өд да 1913-өд воясö). Туялысьяс вылö видзөдіг А.А. Цембер тшöтш босьтчөма зіля чукөртны коми йöзкостса поэзия, гижны роча-комиа кывкуд. Аслас зільмөн Цембер сэсса йöзөдö 1910-өд воын «Русско-зырянский словарь», 1912-өд воö «Коми мойдан кывъяс», 1914-өд воын «Коми мойдан и сыллан кывъяс». З.Д. Следниковлөн небөг лэдзанинысь тайö йöзөдөмторъясыс — Коми муын петлөм медводдза небөгъяс.

Нэм заводитчигөн комиён кывбуръяс гижны босьтчөмны унаён — М.Лебедев, Илля Вась, Д.Я.Попов, Тима Вень, А. Маегов, Н.Шахов. Тайö шензьөданатор, өд Коми муын сэки эз петавлы ни öти коми газет-журнал, И.Кура-

товлысь кывбуръяссö тöдлісны этшаöн. Йöзыс сьölöмнас сетчисны чужан кывъя поэзиялань.

Михаил Николаевич Лебедев (Юсь) чужлöма роч батысь, коми мамсянь Межадорын 1877-öд воын, йирым тöлысь 22-öд лунö, быдмöма Кörtкерöсын, писарöн уджалысь айсяньыс велалöма лыддысьны да гижны. Лоöма паськыда тöдса роч гижысьöн, йöзöдлöма уна висът да повесът («Отец Телентий» (1899), «Иван Голой» (1890), «Таня Осинина» (1909), «В волостном омуте» (1914)). Сэсса друг Юсь дугдö гижны рочöн да пондö кывбуравны комиöн, гижны фольклор сяма да чуксалана кывбуръяс. Со медводдза кывбурыс петöма 1913-öд воын «Коми збойлун» ним улын:

Гажаджык, коми йöз, олöй.

Шогсьыны, бöрдны оз ков.

Кулöмысь, смертьысь эн полöй:

Некор оз кув миян лов.

Лов миян кувны оз вермы.

Ловлы оз волевлы пом.

Ловъя морт некön оз йöрмы.

Мортлы он пукты көртвом!

Татшöм чуксалана, коми йöз дорö ышöдана кывбур гижöма 1915-öд воын тшöтш том Илля Вась:

Велöдчöй, вокъяс!

Велöдчöм дона.

Велöдчöй вылөдз,

Бура да ёна.

Велöдчан — аддзан,

Кыдзи код олö.

Велöдчан — тöдан

Керны мый колö.

Велöдчан — воссяс

Синмыд сэк тэнад;

Венны кө шуöм —

Сэки тэ венан!

Кыв шутöг, коми йöз, интеллигенция пöвстын сөвмö вöлі виль кыпалöм, ашшөр олöмланы зильöм. Сöмын империяса тэчасыс, йöзкотырын важмöм пöрадокыс эз сетлы позянлун коми культуралы öдйö сөвмыны.

1. Кыдзи сөвмөма Коми муын культура нэм заводитчигөн?
2. Кутшөм типографияысь петісны медводдза коми небөгъяс?
3. Коді дасьтіс-гижис тайö небөгъяссö?
4. Кутшөм кывбуралысьяс босьтчисны гижны нэм заводитчигөн?

4 ю к ö н

Коми му Му шарса первой тыш кадö

1914-öд воö пансис Му шарса первой тыш. Тайö ыджыд тышас пырöдчис 38 канму. Веныс кыптіс сы понда, кодлы да көні вузавны төвар, кутшөм гырысь канмуяслы көні ыджыдавын, на лыдын Россия империялы. Сора төлысь 19-öд лунö (важ стиль серти моз 1-öд лунö) Германия юөртіс Россиялы паныд тыш панөм йылысь. Коми муысь фронт вылö босьтісны мужикуловлысь матö коймөд пайсö (26,3%). Тыш апыштіс аслас горш вомö айясös, верösъясös, вокъясös. Унаөн вöзйысисны немечкөд тышö ас көсйөм серти. На пöвстын вöліны кресъяналөн, вичкоын служитысьяслөн, мещаналөн пиян. Дерт жö, ас көсйөм серти тыш вылö мунысьяслы паныд эз сувтны. Мед сöмын арлыд да дзоньвидзалун серти лöсялісны. Ставнас Усть-Сысольскысь ас көсйөмөн мунöма фронт вылö 129 морт.

Йöзлөн олөмö тыш вайис уна омөльтор. Öд айлов китөг колисны кресъяна овмösъяс. Асьныс коми войтыр, тышсянь ылын олысьяс, зілісны отсавны öдйöджык венны вөрөгös. Найö чукөртісны сьöm да көм-паськөм, сетісны ставсö, мый вöлі: дөрөмъяс, ки чышкөдъяс, кепысьяс, куритчан да с.в. Купечьяс да озырджык йöз сетлісны сьöm.

Тышыс торкис Коми мулысь экономикасö, торкис йöзлөн лада олөм-вылөмыс. Öд медся зіль, вына да сяма йöзыс вöліны фронт вылын. Тыш кадö сикт-грездъясысь босьталісны вövъясös да мösъясös — нуисны найös армиялы отсөг сетөм могысь. Этша кутісны чукөртны сиктса

йӱз картупель да капуста, нянь. Киссисны кресьяналӱн овмӱсьяс. Содісны вотъяс. Но ловзыліс тыш кадӱ кӱрт сывдан заводъяслӱн уджыс. Найӱ босытчисны зільны армия вылӱ. Вӱчалісны минаяслы кышӱдсӱ. Сывдісны-лӱдзисны чугун. Но минаясыс артмылісны эз зӱв бурӱсь. Та вӱсна 1916-ӱд восянь тыш помлань чугун да кӱрт вӱчӱм ӱна чинӱ. Этша перйӱны сов Сереговса сов заводын. Тыш кадӱ медся ыджыд сьӱкыдлуныс уси нывбабаяслы, челядьлы, пӱрысь йӱзлы. Найӱ, позыӱ шуны, уджалісны лун да вой.


Содісны сӱян-юан вылӱ донъяс, донсялісны быд лунся тӱваръяс. Кодсюрӱ, мудер йӱз, озырмӱдчис йӱз шог вылын. Унаӱн тшыгъялісны. Сикт-грездясысь юӱрталісны: «Пызь ньӱти абу», «Миян нинӱм абу: ни яй, ни чери, ни шыдӱс, дзик тшыгъялам... Овны огӱ нин вермӱй». Тыш кадӱ ӱдйӱ озырмӱдчисны купечьяс, сиктса вuzасьысьяс.

Россия империяын экономикаын да политикаын ӱдйӱ паськаліс кризис, тыш кадӱ став йӱзкотырса олӱмыс зӱлаліс. Коми муын, кызди Россия пасьтала тшӱтш, уджалысь йӱз пондісны кыпӱдчавлыны, медым дорйыны асьыныс правасӱ. Кыпӱдчӱмыслӱн помкаясыс вӱлі йитчӱма удждонкӱд, уджалан лун дженьдӱдӱмкӱд да с.в. 1905-ӱд воын Сереговса сов заводын уджалысьяс кыкысь корлісны кыпӱдны удждон, 1905-ӱд воын кыпӱдчывлісны Қажымса заводысь войтыр. 1907-ӱд вося урасьӱм 20-ӱд лунӱ сувтіс Нювчимса завод, уджалысьясыс чукӱртісны демонстрация да йӱзӱдісны шыӱдчӱм: «Сарлысь веськӱдлӱмсӱ путкыльтам!»

Тыш чӱж канмуын олӱмыс ӱна омӱльтчис да торкисис, уна йӱзлӱн кыптіс лӱглун сар вылӱ да сылӱн веськӱдланог вылӱ, помтӱм тыш вылӱ дӱзмӱм.

Ю а л ӱ м ь я с.

1. Кызди вежсис олӱмыс Коми муын мушарса медводдза тыш кадӱ?
2. Кутшӱм лӱктор вайис тыш?
3. Кутшӱм кыпӱдчӱмъяс вӱліны уджалысь йӱзлӱн?
4. Мый вӱсна найӱ тышкасьлісны?



10 ю р п а с

**УРАСЬОМСЯНЬ ЙИРЫМӨДЗ,
САРСЯНЬ БОЛЬШЕВИКЪЯСӨДЗ
(1917–1918-өд вояс)**

1 ю к ө н

Пöрысьмөм монархия киссьö

1917-өд во заводитчигөн Россия империяын олöмыс да йöзкотырын йитöдъясыс вöвлытöма зэлалісны, экономикаын, политикаын кризиссö ёсьмөдіс Германиякөд, немецьяскөд помтöм тыш. Сарлысь ыджыдалöмсö, öти мортөн веськөдлан монархиясö веськыда көсйисны вештыны, путкыльтны унаöн. Пöрысь монархиялы паныд тышсö нуөдіс уна ютыр, медводз **кадетьяс, эсерьяс, меньшевикьяс, большевикьяс, анархистьяс**. Коми му вöлі кресьятнаöн овмөдöмин. Усть-Сысольскын вель унаöн вöліны эсерьяс дор. Тайö ютырыс сулаліс му вöдитысьяс, посни буржуазия дор, зіліс пыртны канму олөмө паськыд демократия: бөрйисян система, сёрнитны, мөвпавны вöля да с.в. Вöліны унакодьөн тшöтш **кадетьяс** дор, тайö ютырыс тшöтш сулаліс монархиялы паныд, зіліс подулавны Россияын демократия республика. Лыда морт сöмын кывліс **большевикьяс** йылысь. Тайö неыджыд ютырнас веськөдліс **Владимир Ильич Ульянов (Ленин)**, сёрөнджык нимыс ютырыслөн вежсис **коммунистическөй** вылө. Тайö ютыр дор Комиын сулавлісны кызвынсö фронтьяс вылысь воалысь салдатьяс.

Урасьом 27-од лунö Петербургын Николай II сар чöвтчис Россияын ыджыдалöмысь. Уна нэм бöрын Роч муын эз ло монархия, тышöн да кризисöн слабмөдөм канмуын вöвлытöма öдйö сөвмис демократия. Усть-Сысольскö сарöс чöвтөм йылысь юöрыс воöма вежон мысти сöмын, рака тöлысь 6-од лунö. Рака (март) 7-од лунö вöли котыртöма демонстрация, гөрд дөрапас лэптылісны гимназистьяс, сьылісны водзті кывлытөм, революция ошкана сьылантьяс, полицияös нимтісны милицияөн.

Петроградын котыртчис выль Временной правительствo, уездьясын тшöтш бöрйисны временной комитетьяс, кодьяс пондісны веськөдлыны канмуөн. Но став «выль» органтьясö веськалісны важ сар дырйи уджавлысь чиновникьяс. Сарöс чöвтөм ёна выльсö нинөм эз вай.

2 ю к ö н

«Олөм выльмөдан котыр»

1917-од вося тулысын Коми муын йöзкотырса олöмысь пондіс гызыны. Уна йöз дөзмöмаөсь вöли важ чиновникьяслөн веськөдлөм вылö да зілісны мыйкö вежны-выльмөдны, медводз бöрйыны выль веськөдлысьясöс. Тадзи кос му тöлысь 30-од лунö чужис «Усть-Сысольск уездса кресьяна да уджалысь йöзлысь олөм выльмөдан котыр», нырщикалісны сэні А.Н.Вешняков, А.М.Мартюшев да В.Ф.Попов. Найö зілісны шызьöдны йöзöс, медым олысьяс асьныс öдйөджык бурмөдісны олөмсö, сөвмөдісны овмös да пырисны выль веськөдлан органтьясö. Котырыс лэдзліс «Известия общества обновления...» газет (петавлöма сöмын 3 номер). Тайö вöли Коми муын медводдза газет чужтөм. Унаös шызьöдіс газет медводдза номерын комиөн йöзөдөм шыöдчөм — «Коми йöз дорö» нима. Сэні чуксалисны вежны важ оласногсö, пыртны олөмö демократия ёнмөдан реформаяс, медводз бöрйыны веськөдланінтьясö эскөдана йöзös. Позьö шуны, тайö газетыс да котырыс пуктіс коми

автономия чужомлы панас, од коми йозос, уездын олысь-ясос, чуксалісны котыртчыны, пырны политикао, аслыныс бурмодны-лосьодны выль оласног.

Тулыснас тшотш Комиын чужомаос медводдза советъяс, уджалысь йозлон, салдатъяслон котыртөм органъяс, кодъяс видзодісны, контролируйтісны веськодлан органъяс удж борся. Кос му толысьын котыртчома Усть-Сысольск гарнизона салдатъяслон совет. Май 30-од луно Яренскын котыртчома крестяна депутатъяслон *оксьома*, сэсся крестяналон советъяс артмаломны коми вольостьясын. Тайо вөлі збыль вөвлытомтор: уджалысь йоз да интеллигенция асьныс заводитісны отув веськодлыны вольөстса, уездса олөмнас. Крестяна да салдат советъясын эз вөвлы ни оти большевик, тайо ютыр йылысь тодліс сомын лыда морт, ставыс вөліны эсеръяс да кадетъяс дор сулалысьяс, ошкөны вөлі Временной правительство, сьолөмсяныыс виччысьоны, мый Петербургын выль юралысьяс регыдон вочасны реформаяс да кокньодасны йозлысь олөмсө. Но олөмыс муніс ас ногыс, Россияын зэлаалөмыс водзө содіс, олөмыс лөкмис.

З ю к ө н

Роч муын зэлаалөм ёнмө

Гожомнас да арнас Комиын водзө котыртчисны крестяна советъяс, 1917-од вося коч толысьо Яренск да Усть-Сысольск уездъясын бөрйисны земстволысь собраниеяс, сэтчө вөзйисны выльмөдан котыр дор сулалысьясос, важ чиновникъяс вешйисны бокө. Шуам, Усть-Сысольск уездса земской управаын юралысьнас лои **Степан Латкин**, велөдчөм коми морт, бөрынджык еджыдъяс дор сулалысь, гөрдъяслы паныд тыш котыртысь.

Арнас Комиын олөмыс дзикөдз зэлаліс, Россия пасьталаын моз. Ёна эз тырмы сёян-юан, донъяс содісны зэв өдйө. Временной правительство вылө лача өдйө быри, сійө эз

вöч реформаяс, век нуöдiс тыш немечьяслы паныд, му юклöм-торйöдöм эз вöч, та дырйи индустрия, вузасьöм дзикöдз киссис. Канму пасьтала лыбис лöгалöм, медводз юр-карьясын — Питерын да Канкарын. Правительство эз могмöд Россияса уна войтырöс, кодьяс кöсйисны сöвмöдны-котыртны аслыныс автономияс, ас канмуяс. Войтырьяс, налөн лидерьяс тшöтш лöгалiсны та вöсна шöр веськöдлан органьяс вылö. Кризисыс век ёнмис, кöть ортсысяныс Коми муын вöли важ моз лөнъ. Татшöм кадö большевик ютырлөн йöзкотырын тöдчöмыс öдйö содiс, öд В.И. Ленинөн веськöдлан ютыр кöсйис йöзлы öдйö да öтпырйö бырöдны став дзескыдлунсö: миритчыны немечьяскöд, юклыны му, сетны мездлун Россияын олысь войтырьяслы. Йирым тöлысьö шöр веськöдланног вöвлытöма слабмис, олöмыс зэлалис дзикöдз, уджалысь йöз да интеллигенция эз нин пыкны Питерын веськöдлысьясöс, А.Ф. Керенскийлөн веськöдлöмыс шатовмунис усьтöдзыс.

Ю а л ö м ъ а с.

1. Кор воис Коми муö сарöс чöвтöм йылысь юöрыс?
2. Мый вежсис Усть-Сысольскын 1917-öд вося урасьöм тöлысь бöрын?
3. Кутшöм котыр чужис Комиын 1917-öд вося тулысын?
4. Мый сийö сöвет? Мыйла найö чужисны?
5. Кыдзи вежсис олöмыс Коми муын арнас?

4 ю к ö н

Сöвет власьт котыртчöм

Октябрын большевикьяслөн власьтöс путкыльтöм йылысь юöрыс воис Коми муö, Усть-Сысольскö, йирым тöлысь 27-öд лунö. Сийö ставöс весьöпöртiс. Öд морт эз виччысь ни чайт, мый В.И. Ленинлөн нейджыд ютыр сувтас веськöдлыны став Россияөн, вермас путкыльтны да вуж выйö

вежны дзоньнас канму историясö. Тайö лоёмторсö бöрын-джык сэсса нимтасны Йирымса революцияөн, шуасны гөрд лунөн (ноябр 7-өд лунö). Öнi тшöкыдджыка тайö лунсö нимтöны Йирымса путкыльтöмөн.

Коми муын большевикъяслөн котыръяс эз вöвны, земствояс, управаяс уджалісны важ моз, йöзыс эз аддзыны-кывны некутшöм вежсьöмъяс. Но Питерсянь мунісны нин быдлаö индöдъяс: босьтны коммунистьяслы власьтсö ас киö, медводз салдатъяс отсөгөн. Большевикъяс дор сулалысь салдатъяс котырталісны Военно-революционнöй комитетъяс, выль сöветъяс. Найö асьныс зілісны веськөдлыны уездөн. Лои шензьöдана серпас — 1917–1918-өд вояс костын Коми му пасьтала веськөдліс некымын котыр, важ управаяс, важ да выль (большевикъяс дор сулалысь сöветъяс). Сэк кості олöмыс лёкмис водзö, йöзыс пондісны тшыгыявны, сёян-юан Комиö пöшти дугдісны вайны.

1918-өд вояс төв шөр төлысьö, 30-өд лунö, став тайö веськөдлан котыръясысь йöзыс чукөртчисны öтлаö да шуисны котыртны öти сикас сöветъяс, лöсьöдісны уездса временнöй сöвет, кытчö пырлісны кресьяналөн да салдатъяслөн бöрйöмаяс. Рака-кос му төлысьясö сöветъяс котыртісны вöлөсьтъясын, земскöй управаяс пöдласисны. Тадзи Коми муö пуксис Сöвет власьт, кодi мыджсис йöзлөн ас вöляысь зілысь йöз вылö. Уездса сöветлөн исполкомö ыджыднас бöрйисны А.М. Мартюшевöс. Сöветъясын большевикъяс эз вöвны, өд Коми муын весиг збыль ютыръясыс эз некор вöвны водзті. Кызвын веськөдлысьыс некутшöм ютырö эз пыравлы, шуам, А.М. Мартюшев. Сöветъясын медъёна сулалісны эсеръяс дор. Но татшöм уна ютыра сöветъяс Комиын, кыззи Россияын ставнас, дыр эз овны.

Сöветъясö пуксьöдöны большевикъясöс

1918-öд вося гожöмö унатор вежсьö. Медводз, Питерын выль веськöдлан органсянь (Народной комиссаръяслöн сöветсянь) личкöмыс ёнмис, губернясын веськöдлысьясыс вöліны большевикъяс. Найö зілісны быдлаö пуксьöдавыны ас йöзöс, коммунистъясöс. Сы вöсна мый Комиын ас большевикыс морт эз вöв, котырыс эз вöв, пуксьöдісны большевикъясöс сöветъясö бокась воом роч йöз, стöчджыка кö, Кардорысь Печора уездö мунан гöрдармееч отряд отсöгөн, веськöдліс сыөн С.Н. Ларионов.

Водзö небöгсö тырвыйö гöгöрвоом могысь эм коланлун дженъыда юöртны коммунист (большевик) ютыр йылысь, кытчö сійö нуöдіс, мый кöсйис вöчны. Öд коммунист ютыр веськöдлöм улын Коми му вöлі 73 во, 1918-öд вося гожöмсянь (лöддза-номъя 15-öд лунсянь) 1991-öд вося моз тöлысь помöдз. Россияын большевикъяс ютырöн веськöдліс В.И. Ленин, марксизм водзö сöвмöдысь. Тайö теорияыс сöвмис XIX-öд нэмын да гöгöрвоöдіс йöзлысь историсясö кызди классъяслысь (гырысь йöзчукöрьяслысь) тыш, став историсяыс пö сöвмöма кресьятана да помещикъяс, пролетариат (уджалысь класс) да буржуазия костын тышкасьöм помысь. Большевикъяс лыддисны ассыныс ютырсö пролетариатлысь интересъяс петкöдлысьөн. Ленин дасьтіс выль путкыльтöм (революция) уна во, сы вöсна мый лыддьö вöлі, мый «революция — сійö историялөн локомотив». Помся мог пыдди кöсйисны лöсьöдны му шарвылын öти шуда олöм — коммунизм, кöні эз вöвны эськö озыръяс да гöльяс, канмуяс да мудоръяс, сьöм, йöзöс нартитöм, гöльлун, пемыдлун, войтыръяс костын торъялöмъяс (кывъяс) да с.в. 1917-öд воын большевикъяс пуксисны ыджыдавыны да пондісны пырысьтöм-пыр тышкасьны вöвлöм ыджыдалысь классъяскöд, бырöдны буржуазия, кулакъясöс, дворянаöс. Медводз, мырддявыны налысь заводъяс, муяс (эмбурсö) да юклавны уджалысь йöз костын. Көть могыс большевикъяслөн вöлі ышöдана да быттöкö бур,

збыль олөмас налөн нырвизыыс водзсяныыс лои вирөсь, лёк нога, неморт нога. Классяяс бырөдан могыс вайөдіс йөзөс бырөдөмөдз, вир кисьтана пытшкөсса косьөдз, сөмын озырьяслысь эмбур мырддялөмыс гөльясөс эз озырмөд. Мөдарө, 1918–1921-өд воясө Россия пасьтала олөмыс гөльмис, вөвлытөма киссис да йөзкост овмөсыс немө воис. Пуксис тшыгьялөм.

1918-өд волөн лөддза-номгья төлысья 16-өд луно воөм большевикгьяс котыртөдісны на дор сулалысь карса йөзысь медводдза большевик котыр, коді Чрезвычайной комиссия отсөгөн юлын вөтлаліс уезд советысь бөрийөм веськөдлысьясөс, пырталіс сэсья вөлөсьтьясын сэтчөс советгьясө ас йөзөс. Большевикгьяс дор вөлі дзоньнас ситуацияыс, сы вөсна мый Коми муын єна эз тырмы сєян-юан. Большевикгьяс көсийсны өдийө венны тшыгьялөм, судзөдны нянь өтияслысь мырддялөмөн, мөдгьяслы сеталөмөн. Тасянь заводитчисны озырджык йөзлысь эмбур мырддялөмгьяс гөль йөз комитетгьяс отсөгөн. Большевикгьяс зілісны єнмөдны асьыныс ыджыдалөмсө. 1918-өд во помын быдлаын пөшти вөлі лөсьөдөма комбедгьяс да найө кутісны веськөдлыны сиктса олөмнас советгьяс пыдди нин.

Большевикгьясөн лөсьөдөм комбедгьяс сувтөдісны сиктса йөзөс өта-мөдныслы паныд. Другөн өтияс лоины кулакгьяс (вир юысьяс пө, классөвой вөрөггьяс), мөдгьяс — шөркостсаяс (среднякгьяс, сэтчө ни татчө), коймөдгьяс — гөльяс (кызвынсө медся водзмөстчытөм, дыш да горш йөз). Тадзи Комиын пестысис гражданакогтса, асгост тыш, өд нянь, эмбур мырддялөм чужтіс лөглун, водзөс сетны көсийөм. Лөклун вөлі чужтө лөклун.

Коми сиктын лөгалөм да асгост тыш пестөмсө зэв бура да мөрччанаа петкөдліс нималана коми гижысь Иван Торопов «Гымөбтіс керка шөрын» нима повесьтын (1989). Шөр геройыс — крепыда олысь Викень — ставсө нажөвитлөма аслас пөсьөн. Сиктас воө фронт вылысь сиктса «гөль» пролетарий Комбед Ольөксан, котыртө комбед. Олөм бурмөдөмсө комбедсаяс заводитлісны бура олысь йөзкөд тышсянь. Викень эз лэдз найөс мырддявны эмбурсө. Сэки

«Комбед О́льо́к косьыштис-луйис веськыда тайо́ синмас»
(Викенъыс вёлёма син пёла). Гижысьлөн кывкёртöдыс со:
«Помтöм вөрьяса ылі Коми муö йиркөдчис-пырис выль
олөм».

Ю а л ө м ь а с.

1. Вежсис-ö мыйкö Комиын Йирымса путкыльтöм йылысь
жöр воём бöрын?
2. Кор пуксис Сöвет власът? Кодъяс сэтчö пырлісны?
3. Кодъяс вöліны медводдза большевикъяс, кытысь найö во-
исны?
4. Кор вöлі лöсьöдöма коммунистъяслысь медводдза котырсö?
5. Мыйсянь заводитчис большевикъяслөн юралöмыс?





11 ю р н а с

АСКОСТ ТЫШ КОМИЫН

1 ю к ö н

Мыйсянь пестысис тыш

Сöвет Россияын 1918-öд воын йöзкотырса олöмыс вöвлытöма зэлаліс, вочасöн пестысис гражданакоствса либö канмуын аскост тыш. Россияса йöз пондiсны тышкасьны öта-мöдныскöд гырысь армиясöн власьт вöсна. Большевикъясöн дзескöдöм-öтдортöм, эмбуртöм нин йöз, буржуазия, вöвлöм офицеръяс муналісны лунвылö, лöсьöдісны еджыд армия да пондiсны кыпöдны йöзöс коммунист власьтлы паныд. Еджыдъяслы ёна отсасис АНТАНТА, Россия Империялөн вöвлöм ёрта канмуяс, кодъяс öтвив тышкасьны Германиялы паныд. Еджыдъяс зілісны бөр бергöдны Временной правительство, унаöн на пиысь зілісны бөр пуксьöдны сарöс.

Сöвет Россия, мöдарö, зіліс пöдтыны еджыдъясöс вильöн котыртöм Гөрд армияөн. Тадзи пестысис ыджыд тыш вöвлöм империя пасьтала, тшöтш Коми муын. Кöть, шуам, миян эз вöвны гырысь косьяс, ыджыд фронтъяс, уна вир вöлі кисьтöма миян муын тшöтш.

1918-öд вося август 2-öд лунö Кардорö пырисны англичана да еджыд армеечьяс. Найö бырöдісны сöветъяс да котыртiсны Войвыв обласьтса правительство. Еджыдъяс пондiсны зырны гөрдъясöс лунвылö. Комиын тышыс пан-

сис медводз Печора да Изьва вожъясын. Кӧч тӧлысьӧ еджыдъяс неыджыд отрадӧн пырисны улыс Печораӧ, вӧрзисны ю катыдлань. Печораӧ налы паныд Эжва пыр сентябр заводитчигӧн мӧдӧма Мориц Мандельбаум юрнуӧдӧм улын гӧрд отрад. Мориц вӧлӧма пленӧ веськавлӧм австрияса салдат, вӧвлӧм артист. Мунігчӧжыс сійӧ жалъ тӧдтӧг мырддялӧма озыр кресьяналысь эмбур, нянь, вӧвъяс, корсьӧма быдлаысь кулакъясӧс. Шуам, Керчомъя гӧгӧрын сы тшӧктӧм серти лыйлӧмаӧсь 10 мортӧс. Немдінын лыйлӧдӧма попӧс. Тадзи йӧзӧс грабитіг-луйліг сійӧ лӧччӧма сӧсса Печора кузя. Казытывлӧны, Печораӧд кывтіг, сиктӧ вотӧдз, лыйывлӧмаӧсь сиктъясӧ ӧрудиеясысь, повзӧдлӧмаӧсь став йӧзсӧ. Тадзи тайӧ командирыс сувтӧдӧма гӧрдъяслы паныд став Печора юпӧлӧнса йӧзӧс, ӧд сылӧн чукӧрыс пыр вердчӧма кресьяна тшӧт весьтӧ, конфискацияс вӧлӧмны тшӧтш гӧльяслысь, быдӧнлысь.

1919-ӧд вося урасьӧм тӧлысь заводитчигӧн гӧрдъяслы паныд кыпӧдчӧма став Печора вожыс. Сідз, Мылдінын кыпӧдчисны Сӧвет власьт да гӧрдъяслы паныд армияӧ сӧмын на босьтӧм гӧрдармеечыс, на дор сувтісны кресьяна. Военрук А.Ф. Мельников веськӧдлӧм улын сійӧ лунъясӧ вӧлі виӧма Сӧвет власьт дор 150 гӧгӧр сулалысьӧс. Гӧрдъяс ӧдйӧ вешйисны-бӧрыньтчисны Изьваӧ, сӧсса Эжваӧ. Тайӧ лоӧмторъяс подув вылын коми гижысь Иливапыс (Илья Пыстин) гижліс «Еджыд во» повесыт. Лыддьӧй сійӧс, челядь.

М. Мандельбаумлӧн отрадыс Печоранысь петӧма уна грабитӧм эмбурӧн. Асныралӧмсыс да лӧкалӧмсыс сійӧс судитлӧмаӧсь да пуксьӧдлӧмаӧсь 5 во кезлӧ, но регыд сӧсса вештӧмаӧсь судитӧмсӧ да ыстӧмны Лунвыв фронтӧ.

1918–1919-ӧд воясӧ косьяс вӧлӧмаӧсь тшӧтш Удораын. Торйӧн нин вир кыстанан кось мунӧма 1919-ӧд вося тӧлын Коптюга сикт гӧгӧр, сійӧс еджыдъяс абу сетӧмны гӧрдъяслы. 1919-ӧд воын гӧрдъяс вешйӧмаӧсь Удораысь, а гожӧмнас Удора дзоньнас вӧлӧма абу гӧрд, абу еджыд, Л.П. Марковлӧн веськӧдлӧм улын сәні уджалӧмаӧсь асвеськӧдлан органъяс, сэтчӧс ас вӧляысь олӧмыс вӧлӧма лӧнь, зыктӧм.


Сыктыв да Эжва вожъясын кось

1919-öд вося арöдз Эжва да Сыктыв вожъясö еджыдъяс эз пыравлыны. Сöмын сэни некутшöм лöнь олöм эз вöв, мöдарö, кресьяна вöлины зэв скөрöсь коммунистьясөн панöм уна мырддялöм вöсна. Öд сöвет власьт пыдди öни выналысь комбедъяс пондiсны мырддявны нянь да скöt. Пыртiсны продразвёрстка, став лишалана няньсö öни коммунист власьт вермис мырддыны. Тадзи «бырöдлiсны» тшыгъялöм. Збыльысьсö сöмын йöзсö скөрмöдiсны, лөгöдiсны власьт вылö. Сидз, От грездын комбед шуöма пуктыны вывтi ыджыд вот Полугрудов да Паршуков котыръяс-лы. Найö сувтöмны талы паныд. Мöд луннас öружиеа коммунистьяс ёна мучитöм бöрын лыйлöмаöсь 5 «кулакös». Гөрд террор чужтiс сэсся еджыд террор. Та вöсна гөгөрвоана, мыйла Эжваö воём еджыдъяс сы öдйö бырöдöмны сöвет власьт. Кресьянаысь унджыкыс вөлöмаöсь на дорнин, еджыдъясöс чайтлiсны гөрд супöстатъясысь мездысь вынөн.

1919-öд вося моз тöлысьын Кардорын котыртöма вöли Эжваса *аскöйысь* тышкасьысьяслысь торъя полк. Веськöдлыны сийөн индöмны капитан Н.П. Орловöс, роч дворянаысь петлöм мортöс. Унджык салдатыс сэни вөлöма коми, пленö сюрöм гөрдармееच्याс, на пиысь унаөн ас кöсйöм серти мунöмаöсь мездыны чужанiнсö коммунистьясысь. Отрадыслөн вөлöма тшöтш мöд ыджыд мог — котыртны мездöминъясын выль веськöдлан органъяс. Та могысь Комиö мунiс Войвыв обласьт правительстволөн эскöдана морт — С.О. Латкин. Орловлөн отрадыс неыджыд вөлöма, сöмын 261 морта, на пиысь 50 офицер.

1919-öд вося кöч тöлысь 10-öд лунö еджыдъяс «Мурман» паракодөн кывтöмны саридзöд Кардорсянь Мозын юöдз, сэсся Удора пыр лэччöмны Эжва вожö. Гөрдъяс чукöртöмны налы паныд вын. Орлов юкöма ассьыс йöзсö кык пельö, öтияс нырöмаöсь гөрдъясöс Яренсклань, мöдъяс — Усть-Сысольсклань. Гөрдармееच्याс, вöвлöм том кресья-

на, эз кӧсйыны юрсӧ пуктыны да унаӧн сетчавлӧмны еджыдъяслы либӧ пышъявлӧмаӧсь. Еджыдъяс кокниа бось-тӧмаӧсь Айкатыла.



Аскост тышын косьяс (1919 воын)

Сэк кості Усть-Сысольск жуё вёлөм кодзувкот моз: коммунистыяс дасьтысисны водзсасьны, совет пыдди котыртисны **ревком**. Сійөн пондіс веськөдлыны карё воём А.А. Маегов. Емдінын чукөрмисны гөрд салдатъяс, наён веськөдліс военспец А.О. Прокушев, Волсян чужлөм морт, немечьяскөд тышын быдмөма штабс-капитанөдз. Вольгым төлысьö 12–13-өд лунъясьö еджыдъяс босьтісны Тыдор да Емдін, унджык гөрдармеечыс сетчис еджыдъяслы, О.А. Прокушев вуджис служитны еджыдъяс дор жö.

Көть Усть-Сысольскын кольөма на 300 салдата гарнизон, гөрдъяс өдйö пышйисны Сыктыв катыдö Мурашлань. Колисны тыштөг Ыб, Межадор да Визин, сувтісны Чукаыб сиктын. А.А. Маегов да В.П. Юркин, гөрдъяслөн командиръяс, шуисны сувтöдны еджыдъясöс. Тайö пышйёмсö яръюгыда серпасалис Нёбдінса Виттор аслас «Бöрынтьчигөн» очеркын.

Вольгым төлысь 15-өд лунö лун шөр кадö еджыдъяс пырөмны Усть-Сысольскö, найös паныдалөма көлөкөл звөн. Еджыдыс вөлөма сөмың 50 морт. Мөд луннас карё воём С.О. Латкин лөсьөдіс карса чукөртчөм, сәні бөрийисны уездса выль земскöй управа. Мырддылөм нянь да эмбур бергөдісны бөр, гөрдъясөн панлөм став конфискация, мукөд дзескөдөмсö бырөдісны, котыртисны карса милиция, овмөс нуөдысь службаяс.

Чукаыб дорса тышын еджыдъяс эз вермыны. Прокушевлөн отрадын вөлөма 63 морт, гөрдъяслөн 127 салдат. Но та вылө видзөдтөг еджыдъяс ноябр 22-өд лунö да 25-өд лун вылө войнас видлөмаөсь босьтны Чукаыб керөссö, но 10 мортөс воштөмөн бөрынтьчөмаөсь, Прокушев тышас ранитчөма. Сыөдз гөрдъяслы Лальскысь воөма отсөг, сәсся Вяткаысь на уна салдат. Гөрдъяслөн выныс Визинын содөма 1830 мортөдз. Еджыдъяс бөрынтьчөмны Межадорөдз. Сәні тышын усьөма да доймөма налөн 26 морт. Водзö еджыдъяс бөрынтьчөмаөсь карөдз да, сійös кольөмөн, вешйөмны Эжва катыдö. Штабыс вөлөма налөн Кулөмдінын. Сэк кості Орловлысь отрадсö гөрдъяс пасьвартөмаөсь Яренск дорын. Ачыс Орлов усьөма тышын, а еджыдъяс бөрынтьчөмаөсь бөр Удораö.

Еджыдъяс да гөрдъяс төвбыд сулалісны Аныб улын, өтамөд дорас ыставлісны төдмалысьясос. Төвнас еджыдъясос Войвылын лои жугөдома, урасьом төлысь 19-өд лунө еджыдъяс да интервентъяс пышйөмаось карабъяс вылын Кардорысь. Лои гөгөрвоана, мый Эжваын, Печораын, Изьваын кытшө веськалом еджыдъяслы регыд воас пом. Найос сэк кежлө эз нин терпитны, өд лөнь олөм пыдди еджыдъяс асьныс пондісны пуксьөдавны, лыйлыны коммунистьясос да на дор сулалысьясос. Еджыд армия оліс кызыннас кресьяна тшөт весьтө, босьталіс йөзос армияө, сөвтас да йөзос кыскавны вөвъясос.

1920-өд вося рака төлысьын еджыдъяс тыштөг сетчисны гөрдъяслы, офицерьясө гөрдъяс дзик пыр пуксьөдомны, сэсся лыйлөмаось. Вылыс Эжваын виртөг аскост тышыс сөмын эз помась. Көть еджыдъяс лоины кытшын, Аныбын да Керчомъяын найө эз сетчыны, дыр водзасисны. Аныб сиктсө гөрдъяс дыр лыйлөмаось өрудиеясысь да уна керка сотомны. Кулөмдінын; Помөсдінын, Мылдінын еджыдъяс сетчисны, офицерьясос пыр жө гөрдъяс пуксьөдалісны. Посниджык тышъяс вөлөмаось на та бөрын Изьваын да Печораын. Тадзи аскост тыш Комиын помасис, вырысь, тшыгыялөмысь да шогысь кындзи, сійө нинөм йөзыслы эз вай.

Аскост тыш помасьом бөрын Комиын вөвлөм косьяс лоины уна серпас гижөдлы тема пыдди, та йылысь гижлісны И. Сажин, П. Доронин, И. Пыстин, Г. Фёдоров. Медыджыд романъяс лөсьөдліс Изьваын тыш йылысь нималана коми гижысь **Яков Рочев** — «Кык друг», «Изьва гызьө» да «Му вежандыр» трилогия. Тайө да мукөд гижөдьясын аскост тышсө серпасалома сөмын өти ногөн — вермөны век быттө гөрдъяс, найө бурөсь, а еджыдъяс лөкөсь, дуркөсь, историяын абу правөсь, уджалысь йөз пыр сулалөны гөрдъяс дор. Збылысьсө гөрдъяс да еджыдъяс өткодя дзик лөкавлісны, кисьтлісны вир мыжаяслысь да мыжтөмьяслысь. Кыкнан котырыс тышкасис канмуын ыджыдалөм-власьт вөсна.

Коми комилы паныд

Аскост тышö коми йöз, уна нэм чöж лöня олöм бöрын, сувтисны медводдзаясь öта-мöдныслы паныд. Öтияс тыш-касисны еджыдъяс дор, мöдъяс — гöрдъяс дор. Кыкнанладорсянныс вöліны правöсь, тышкасисны асланыс интересъяс вöсна, кыкнанладорсянныс вöліны геройяс, повтöм тышкасысьяс. Сöмын быд тышын усълöны медся зіль, медводзмöстчысь йöзыс, тайö усёмгьясыс öти войтырлөн öтувъя воштöмтор. Висьтыштам дженъыда паськыда тöдса кык коми морт йылысь, тышкасьлöмны найö öта-мöдныслы паныд.

Степан Латкинлөн туй

Чужлöма сійö 1886-öд воö Усть-Сысольскын, Нёбдінысь петлöм гöлиник вузасысьлөн семъяын, 1901-öд воö помалöма карса велöдчанін да лöма сэсса писарөн, земство управаса секретарлы отсасысьсөн. Öбичанас вөлöма кокни вöраса, сёрнитны кужысь, гажа морт. 1904-öд восянь пырöма политикаö, эсеръяс ютырö, сарлы паныд гуся уджысь сійöс некымынысь весиг пуксьöдлöмаöсь. 1908-öд восянь велöдчö Петербургын агрономö, 1910-öд воын тöдмасьö дорйысь (адвокат) А.Ф. Керенскийкөд да социолог П.А. Сорокинкөд. Но велöдчөм бöрын Степан Осипович локтö бөр чужанінас да мыйтакö кад агрономалö. Урасьöмса революция бöрын, 1917-öд вося гожöмын, бара пырöма политикаö, зільöма кыпöдны-котыртны уездын выльмөдөм олөм. Йöзыс сылы эскöмаöсь, 1917-öд вося моз тöлысьын бөрйöмаöсь уездса земство управаөн веськөдлысьö.

Кызди буржуазной демократия дор сулалысьлы коммунистьяслөн ыджыдалöмыс сылы сёлөм вылас некызд эз волы. 1918-öд вося тулысын выль власьт сійöс пуксьöдöма дзескыдінö, сэсса амнистия бöрын лэдзöмаöсь бөр. С.О. Латкин мунöма П.А. Сорокинöс корсигмоз Кардорөдз, сәні сійöс суöма аскост тыш.

Окотапырысь, ас көсйөмөн С.О.Латкин пырöма Орлов-

лөн еджыд отрадө, служитөма сәні радөвөй чинын. Еджыдъясөн Усть-Сысольск босътөм бөрын «выль губер-
натор» зільөма ставсө вөчны бурөн-ладөн: гөрдъяс дор су-
лалысь 50 пуксьөдлөм мортысь сәки некодөс абу лыйлө-
маөсь, мөдарө, лэдзалөмны бөр. Сійө дугөдөма эмбур да
нянь мырддялөм, лэдзөма кресьяналы мытшөдъястөг ву-
засыны. Эз весьшөрө коми йөз паныдавлыны Латкинөс
няньөн-солөн. Но, дерт, еджыдъяслысь террорсө Степан
Латкин сувтөдны некыз эз вермы. Ачыс сійө некодөс абу
луйлөма ни дойдавлөма, сөмын сьөлөмсяныыс служитлө-
ма еджыдъяслы, вынсьөдавлөма гөрдъясөс лыйлөм-пуксьө-
дөмъяс йылысь тшөктөмъяс.

1920-өд вося төв шөр төлысь С.О. Латкин мунөма Ку-
лөмдінысь Кардорө, но бөрсө воны абу нин вермөма,
урасьөм 19-өд лунө кывтөма карабөн Ыджыд Британияө,
Лондонө. Сәні сійө восьтөма да кутөма ассьыс небөг вуза-
ланін, судзөдлөма Комиысь «Югыд туй» газет, уна ветлөд-
лөма Европаөд. Мый быттьө сылы сән абу овсьөма? Сөмын
кыскөма бөр чужанінас, Россияө. 1925-өд воө воөма гөрд
канмуө да овмөдчөма Саратовө пи ордас, бара агронома-
лөма. ГПУ регыдөн сійөс коряс, йөршитас дзескыдінө да
1927-өд вося кос му төлысь сійөс шуасны лыйлыны.
Юасигъясас С.Латкин некодөс абу вузалөма, кутчысьөма
повтөг да чорыда. 1927-өд вося көч төлысь 18-өд лунө
«Югыд туйын» петө юөр, мый Степан Осипович Латкинөс
луйлөмаөсь...

Домна Каликовалөн ордым

Тайө эньюлосө важысянь лыддьöны ань-геройөн, сійө
вужъясис коми литератураө, унаөн сы йылысь гижлісны
ворсөмъяс, висетьяс да романъяс, сы йылысь эм балет.

Чужлөма Домна Фёдоровна 1896-өд воын Вильгорт
вөлөсьтса Дав грездын гөля олысь кресьяна семьяын. Көть
велөдчыны сылы эз мойвилы, ас гөгөрыс аддзыліс да
төдмавліс унатор. Öд 14 арөссиянь сійө служитлөма озыр
йөз дорын Кардорын, сәсса Петербургын уджавлөма кысян



Домна Каликова

Эжол грезд дорын сійөс кыйомаось еджыдъяс. Домнаос тѳдмалѳма да явитѳма еджыдъяслѳн юѳр чукѳртысь Н.А. Малевинский, усть-сысольскса поп пи. Юасьѳм-дойдалѳм бѳрын Домнаос лыйлѳмаось. Висьтавлѳмаось, сійѳс лыйлѳмны кыкысь, доймалѳм-кымѳм мортѳс виѳмаось мѳдысь. Тайѳ вѳлѳма Помѳсдинын.

Том, 24 арѳса ныв абу вѳвлѳма коммунист, но олѳмсѳ жалиттѳг тышкасьлѳма гѳрдъяс вѳсна. Сы нимѳн шуѳма Сыктывкарысь ѳти улич, сувтѳдѳма сылысь казьтылана мыгѳрсѳ. Коми литератураын Домналѳн образыс ѳнджыкасѳ легенда сяма, зѳв идеальной. Н. Дьяконов да С. Ермолин гижлисны сы йылысь «Домна Каликова» героической драме, поэзияын Николай Фролов аслас «Домна» поэмаын восьтис повтѳм анылысь образ, гижлис сійѳс лыйлѳм кузя таdzi:

Лым вольпась вылын Домна узѳѳ,
А вывтѳ тюргѳ дзоля ѳль, —
Дзор коз пу кисьтѳ лапъяс кузя,
Кыз, гашкѳ, мамыс, синва моль.

А, гашкӧ, тайӧ дольд синва,
Мый бара тулыс, енӧж — лӧз,
Мый эмӧсь кустӧм, кувтӧм нимъяс,
Оз вунӧд найӧс мездмӧм йӧз.

Медуна сы йылысь гижӧма Г. Фёдоровлӧн «Кыа пегтӧн» романын, Домна сійӧ небӧгас шӧр геройясысь ӧти.

Ю а л ӧ м ь я с да у д ж ь я с.

1. Мый сійӧ аскост тышыс? Коді сәні тышкасьлӧ?
2. Мыйсянь пансис тышыс Коми муын?
3. Висьталӧй Мориц Мандельбаумлӧн ветлӧмъяс йылысь. Кутшӧма сійӧ мӧрччис Печора вожса йӧз вылӧ?
4. Кызди муніс Эжва да Сыктыв вожъясын косьыс?
5. Висьталӧй Степан Латкин йылысь, олан туй йывсьыс. Мый вӧсна сійӧ тышкасьліс?
6. Висьталӧй Домна Каликова йылысь, сылӧн олан туй йывсьыс.
7. Индӧй мусерпасысь 1918–1920-ӧд воясы тышкасянінъяс.





12 ю р н а с

КОМИ АВТОНОМИЯ ПАНӨМ

1 ю к ө н

Асшөрлун перъян мөвп чужом

Коми войтыр уна нэм чөж оліс Россия империяын ас-лас канму сяма котыртчөмтөг, торйөн, разі-пели, некымын губерняө пырөмөн. Сідз, XIX-өд нэм помын Коми му пырліс Вөлөгда да Кардор губерняясө, лунвывса неыджыд юкөн пырліс Вяткаса, Печора йыв бара Перым губерняө. Канмулөн некутшөм төжд коми йөз да налөн культура вөсна эз вөвлы, став йөзкостса олөмыс да веськөдланногыс мунліс рочөн. Со кызди тайө кад йылысь гижліс «Мунөны» поэмаын Илля Вась:

Гашкө нө, сьылісны важ коми олөмсө,
Сук парма вөр пытшкысь кынөмпөт перйөмсө,
Ним вөлі тэныд кор «скөт»,
Олөмыд вөлі са сьөд?
Гашкө нө, сардырся олөм?
Сап пемыд... эз позь весиг
Асьнымөс адзыны, кывны...

XIX-өд нэмын коми велөдчөм йөз (И.А. Куратов, Г.С. Лыткин, К.Ф. Жаков да мукөд) зілісны югдөдны коми йөзлысь юръяснысө, велөдөмөн кокньөдны чужан войтыр-

лысь олёмнысö. XX-öd нэмын Россияын мыйскюрö вежсис: уна ютыр, политик панісны сёрни посниджык войтыръяслы унджык инöd да ашёрлун сетом йылысь. Россияын национальной проблема вöлі зэв ёсь: пöрысьмом монархия век кутліс войтыръясöс джаггөрöдын. Та вöсна XX-öd нэмса кумнан революцияыс Россияын вöлі веськөдöма тшöтш войтыръясöс наргитöмлы паныд, налы ашёрлун да мезд перйом вöсна. Буржуазной ютыръяс да эсеръяс зілисны сетны быд войтырлы культураын автономия, кор войтыръяслөн вöлі эськө позянлун велöдны асьыныс кыв, сөвмöдны культура, сьывны-йöктыны, ас кывйөн ас костын сёрнитны, котыртавны клубъяс да с.в. Медъён уджтасыс вöлі та боксянь большевикъяслөн. В.И. Ленин пуктыліс мог сетны быд войтырлы асвöляысь олём бөрьян инöd ашёр канму подулалөмөдз. Ичöt войтыръяс пöвстысь тайö могсö унаөн зэв матö пуктісны сёлөм дорас. Та вöсна большевикъяс дор 1917-öd во бöрын унаөн сувтісны. Большевик ютыр көсйысис вуж выйö вежны войтыръяслысь олёмнысö, канму мусерпас вылын выль ног лөсьöдны республикаяс. Войтыръяслөн том интеллигенция, комияс тшöтш, матö дзоньнас сувтіс та дор, нюжмасьтөг унаөн пыралісны большевик ютырö, вуджавлісны сэтчö мукöд ютыръясысь.

Коми муын ашёрлун судзөдөм йылысь мөвпыс медводз петіс эз большевикъяссянь, а **Дмитрий Яковлевич Поповсянь**. Сійö вöлі чужлöма Выльгортын 1862-öd воын. Попалöма Дереваннойын, велөдлöма на ичöt Нёбдінса Виторос, ачыс гижлöма комиён кывбуръяс. Вөлöма эсер, IV-öd Государственной Думаö пырысь. Коми автономия йылысь мөвпсö сійö паськөдлöма 1917-öd вося революциясöдз на. Öти кывйөн кө, коми йöзлы ашёрлун перьян мөвпыс вöлі бура сөвмöма аскост тышөдз нин.

Коми автономия обласът котыртöм

Аскост тыш помасьöм бöрын Коми муын пондiсны веськöдлыны сöмын коммунистъяс, тайö лои дзик öти ён ютыр, кодi мыйкö вермис сэки вöчны-вежны тайö му вылас. Коми йöзысь унаöн пырисны большевик ютырö мукöд ютыръясысь, шуам, вöвлöм эсеръяс Д.А. Батиев, Е.М. Мишарин, мукöдъяс вуджисны РКП(б)-ö. Коммунист ютыр дорö сувтiс матö став том коми интеллигенцияыс, медводз сы понда, мый большевикъяс көсйисны сетны позянлун лöсьöдны быд войтырлы ас олöмсö сiдзи, кыдзи найö асьныс көсйисны. Мöд-кö, выль экономика *кансямö* (рочöн НЭП-ö) вуджöмыс, продрозвёрстка (став лишалана нянь, яй мырддьöм) пыдди урчитöм вот пунктöмыс мунiс бур вылö, олöмыс вочасөн лөнис. Россияын аскост тышъяс помасьöм да Сöвет власьтлөн видз-му уджалысьяслысь олöм-вылöм да овмöс бурмöдöм кузя воськовъяс бур боксянь тöдчисны Коми муын олысьяс вылö. На пиысь унджыкыс эз нин ло Сöвет власьтлы паньд.

Сийö жö кадö, аскост тыш бöрын, Коми мулөн öтувъялуныс эз вöв. Сылөн öти юкөн пырлiс Кардорса губерняö, мöд — Войвыв Двина губерняö. Коми мулөн кык ыджыд пельöс — Эжва бокса да Изьва-Печораса (сэни медясö олісны-зілісны коми войтыр) — öта-мöд костаныс прамöй йитöд эз кутны, туйяс эз вöвны да. Индустрия сөвмис омöля, видз-му овмöс муртса лолалiс, сьöм эз тырмы, бур специалистъяс татчö воливлісны зэв гежöда. «Зырянская жизнь» газет 1920-öд вося вöльгым 20-öд лунö гижліс: «Ыджыд уджсö лючки-бура бергöдöмыс позяна сöмын сэки, лоö кө пыр жö лöсьöдöма зыряналысь торъя (автономия) обласът, юркарыс кодлөн эськö лоас Усть-Сысольск».

Коми йöзöс öтувтан мог ас водзас пунктiсны коми коммунистъяс. 1921-öд воын январ 8–13-öд лунъясö Усть-Сысольскын мунiс Коми муса коммунистъяслөн медводдза *öксьöма* (съезд). Сэтчö волісны бöрйöмаяс Коммуысь, Изьваысь, Печораысь, коми йöзөн быд овмöдöминысь.

Комиын ашпӧр (автономия) котыртчӧм лӧсьӧдӧм кузя ӧксӧма вылын сӧрнитысьяс юкисны кык пельӧ. Ӧтияс, налӧн нырщикӧн лои Наркомнацын Коми представительствӧн юрнуӧдысь Дмитрий Александрович Батиев, сувтисны сы дор, медым пыр жӧ котыртны-лӧсьӧдны Коми муын автономия. Мӧдъяс, на лыдын Мӧскуаын уджалысь коми чиновник А.В. Нахлупин, лыддисны, мый автономиясӧ котыртны водз на. Комиын сӧкся унджык олысьыс, эз сӧмын ылі Изьва да Мылдинсянь, но Усть-Сысольсксянь матысса вӧлӧсьтъясысь, веськӧдыпырысь на видзӧдісны Комиын автономия лӧсьӧдӧм вылӧ. Та вылӧ видзӧдтӧг ӧксӧма вынсьӧдіс, мый колӧ котыртны Коми Автономияя Сӧветскӧй Социалистическӧй Республика.

Вензисны тшӧтш сы йылысь, кутшӧм инъяс суйны Республикаӧ. Чужис ӧтувъя кӧсйӧм — ӧтувтчыны перым-комияскӧд да артмӧдны ӧти канму сяма. Но олӧмыс эз арты йӧз кӧсйӧм серти, автономияя республика пыдди лои котыртӧма обласът, а перым-комиясӧс эз лӧдзны ӧтувтчыны, налы котыртисны автономияя кытш. 1918-ӧд вося рака тӧлысьӧ Усть-Сысольск Сӧветса I ӧксӧма ыстис Кардорӧ телеграмма. Сэні корисны сетны зырян-комияслы ас административнӧй тэчас. Сійӧ воас Мӧскуаын Наркомнац бердын вӧлі котыртӧма зырян юкӧд, 1920-ӧд воӧ сыӧн веськӧдлыны пуксьӧ Д.А. Батиев.

Национальностьяс кузя Народнӧй комиссариат ошкис Комиын автономия котыртӧм. Но сӧм эз тырмы сійӧ кадӧ, специалистъяс эз вӧвны, та вӧсна оланпасъяс дасьтан органъясын вӧзйисны лӧсьӧдны Коми муын ашпӧр (автономияя) республика пыдди автономияя обласът.

1921-ӧд вося моз (август) 22-ӧд лунӧ РСФСР-са ЦИКлӧн Президиум вынсьӧдіс «Коми (зыряналысь) автономияя обласът котыртӧм йылысь» Декрет. Юркарнас лои Усть-Сысольск.

Коми йӧзлӧн юркарын лӧсьӧдісны обласътса учрежденияс. На водзын пуктисны мог — веськӧдлыны став олӧм-вылӧмӧн, политикаӧн, овмӧсӧн, культураӧн. Лои дасьтӧма коми войтырӧс водзӧ сӧвмӧдӧм могысь подув РСФСР

өтүвъя канму пытшкын. А 1922-өд вося өшым 30-өд лунө чужис Сөвет Өтувлун, дзик выль канму. Сэтчө, РСФСР пытшкын нин, пырис тшөтш коми йөзлөн автономияа обласът.

Тайө интерес чужтө

«РСФСР пытшкын Коми (зыряналысь) автономияа обласът котыртөм йылысь» ВЦИК-лөн Декрет:

1. «1921-өд вося август 22-өд лунө котыртны Коми (зыряналысь) автономияа обласът, кызди Россияса Социалистическөй Федеративнөй Сөвет Республикалысь юкөн, юркарыс лоө Усть-Сысольск кар.

2. Автономияа обласътө пыртөма: Кардорса губерняысь — Печора уезд, Пустозеркса, Чилимдін уездъясысь да сідзжө Тиманса тундра кындзи. Сэні колө нуөдны став йөзлысь юасьом. Войвыв Двинаса губерняысь: Усть-Сысольскса уезд, нөшта Яренкса уездысь татшөм вөлөсьтьяс: 1) Чупровоса; 2) Важгортса; 3) Селибса; 4) Косланса; 5) Ертомса; 6) Гловоса; 7) Туръяса; 8) Онежьеса; 9) Княжпогостса; 10) Сёськаса; 11) Серёговса; 12) Севогорскөйса; 13) Ыбса; 14) Часовоса; 15) Прокопьевкаса; 16) Нёбдінса; 17) Айкинаса; 18) Гамса; 19) Зөвсьөртса; 20) Коквицаса; 21) Пальса; 22) Пыссаса вөлөсьт, кытчө пырліс сэки Латьюга грезд (Кардор губернялөн Усть-Важскса уезд).

ВЦИК-өн веськөдлысь — М.И. Калинин.

ВЦИК-са секретар — А.С. Енукидзе.

З ю к ө н

Комиөдан туйөд

Со тадзи, сьөкыда да дзуртөмөн, лои котыртөма-лөсьөдөма Коми йөзлысь обласът. Лои пуктыны уна вын да сям өтүвъя зильөмө. Медым веськөдлыны став уджөн, колісны вежөра йөз. Медсясө тайө делөсө бергөдөм могысь

кутісны босьтавны коми войтырӧс. Сэсся нимтісны сійӧс «комиясӧ веськӧдлан аппаратӧ сюян» делӧӧн. Быдлаын мӧдісны пыртны коми кыв. Но сьӧкыдлуныс паныдасис вель уна. Ӧд коми кывсӧ бура тӧдіс коми служакъяс пӧвстысь сӧмын 2–3%. Тайӧ вӧлӧсьтъясин. А Коми мулӧн юркарын — 37%. Та вӧсна шӧр могыс лои ӧти — лючки-бура велӧдны да тӧдны коми кыв. Бокысь воӧм роч йӧзлы коліс «ас кӧсйӧм серти велӧдны коми кыв».

Олӧм-вылӧмӧн веськӧдлӧм могысь котыртлісны Сӧветъяс. Сэтчӧ бӧрйылісны медясӧ гӧля да шӧркодя олысь йӧзӧс. Сӧветъясын видлалісны, кызди уджалӧны учреждениеяс, мый найӧ кӧсйӧны водзӧ вӧчны да с.в. Сӧветъяс вужъясисны сьӧкыда. Эз тырмы йӧз, дзескыд вӧлі сьӧмӧн. Век жӧ 20-ӧд воясӧ артмис нин Коми обласьтӧн веськӧдлан подулыс.

20–30-ӧд воясӧ водзӧ ловзис Коми муын экономика овмӧс да йӧзкотырса, политика олӧм. Воддза кад серти лони тӧдчымӧнъя вежсьӧмъяс. Кресьяналӧн коркӧя лӧнь олӧмлы кутіс воны пом. Налӧн аския луныс пыр топыдджыка йитчис политикакӧд.

Медсьӧкыд уджӧн лои Коми (асшӧр) автономия обласьтлысь ыдждасӧ тӧдмалӧм-индӧм. Сӧвет правительство зӧля отсасьӧ вӧлі таын том обласьтӧн веськӧдлысьяслы. Ӧти боксянь кӧ, сійӧ збыльмӧдіс налысь корӧмъяссӧ, шуам, пырталіс обласьт борд улӧ мукӧд губернясысь ӧткымын вӧлӧсьт да грезд, кӧні олісны медясӧ коми йӧз. Мӧд боксянь кӧ, сувтіс обласьтса веськӧдлысьяслӧн вывтӧясӧмлы паныд, найӧ кор мырдӧн корлісны обласьт улӧ Кама да Вятка юяс бокысь роч вӧлӧсьтъяс.

Коми обласьт пытшкын лӧсьӧдлісны нель уезд: Усть-Сысольскса уезд (пырис 38 вӧлӧсьт, шӧриннас лои Усть-Сысольск кар), Кулӧмдін уезд (пырис 16 вӧлӧсьт, шӧриннас индісны Кулӧмдін сикт), Емдін уезд (пырис 21 вӧлӧсьт, шӧриннас лои Емдін сикт) да Печораса (Ижма-Печора) уезд (пырис сэтчӧ 25 вӧлӧсьт, юрсиктнас лои Изьва сикт). Татшӧм серпасыс вӧлі 1929-ӧд воӧдз. Та бӧрын, кор Коми асшӧр автономия обласьт пыртісны Войвыв крайӧ, арт-

мөдiсны-лөсьөдiсны өкмыс район да 134 сиктсөвет. Водзө котыртчалiсны-артмалiсны пыр выль районъяс, пыртiсны Комиö Чилимдiн район.

Зэв ыджыд вермөм шедөдiс комиодан комиссия: 1924-өд воын Сөветъяслөн обласътса IV-өд өксьөма шуис, мый Коми автономияя обласът пасьтала өнiсянь лоö кык каналан кыв — коми да роч. Торъя инструкция урчитө вöли, мый коми вөлөсьтъясын став кабаласө колө гижны комиөн, коми кыв пыртiсны тшөтш *ёрдъясö*. Регыдъя кадөн йөзөдiсны комиа-роча кывкудъяс, велөдчан небөгъяс, роч служакъяс велөдчисны сёрнитны да гижны комиөн. Сидз, 1924–1926-өд воясö коми кыв курсъяс вылын велөдчөма 1679 морт. Коммунист ютырса органъяс, сөвет аппарат сюся видзөдлiс комиодан удж нуөдөм бөрся.

20-өд вояс коми йөзлөн олөмө колисны бур пас: өдйö сөвмис овмөс, культура, литература, коми кыв.

4 ю к ö н

Автономия панысьяс

Асшөрлун шедөдөмын пайыс эм уналөн, 20-өд воясö коми веськөдлысьяс уджалiсны зэв зiля, өдйö, öтувъя гырысь могъяс ас водзас пунктөмөн. Ыджыдавлис öта-мөдлы отсөг, ёрта-ёртөс пыкөм. Комиодан комиссияын сөмын мыйта уна сикас йөз уджавлөма — А.А. Маегов, Д.Я. Попов, А.А. Цембер, В.А. Молодцов, В.И. Лыткин, Н.А. Шахов, мукөдъяс. Кык мортөс позьö повтөг шуны *ловнуөдысьясөн*, коми автономиялы айясөн.

Дмитрий Яковлевич Попов

Неуна вöли юөртөма нин сы йылысь. Попалигас нин сийö зэв ёна зiльөма, уна буртор вөчлөма вичкоас ветлысьяслы. Вичкоын служитысьяс вөзйөмны сийөс IV-өд Государственной думаö. Д.Я.Попов депутаталигас уна вөчлөма, ме-

дым Комио нюждны корт туйяс. 1917-од воо пырö политикао Коми муын, лоо эсерон. 1918-од вося төв шөр 17-од лунö Сöветъяслы панас пуктан öксöма вылын Д.Я. Попов медводдза мортон төдчöдöма, мый комияслы зэв ёна колö автономия, помалöма öксöмасö тадзи: «Мед олас мездмöm коми войтыр да сылөн Сöвет!» Водзö сийö вöзйöма аслас сёрниясас Коми автономияя республика сöвмöдан дзонь уджтас. Кыдзи поп, сийö сёлöмсянныс кöсйылöма пыртны коми кыв вичко службаö, вежны вичкоын пöра-докъяссö. Тайöс вöчны сылы абу лэдзöмаöсь — босьтöмны поплысь сансö. 1918-од воын сийö Н.А. Шахов да И.Т. Чисталёвкöд панлис нöшта öти коми ютыр, «Коми автономист чукөр» нимаос. Сэни сийö вöлöма медыджыд юралысь, ловнуодысь — мөвп чужтысь морт. Д.Я. Попов уджавлöма Усть-Сысольск совнархозон веськöдлысьөн, ветлöма уджавны тшöтш Югдинö. Сэсся висьмöма да воöма Дереваннойö, сэни 1921-од вося йирым төлысья 9-од лунö кувсьöма.

Дмитрий Александрович Батиев

Чужлöма Эжва горувса Гам сиктын, Кебырыб грездын 1896-эд вося урасьом төлысья 2-од лунö голь кресстьянин котырын. Ичöтсянныс бура велöдчö, помалö 1912-од воын Гамса кык класса школа, сэсся 1912–1917-од воясö велöдчöма велöдысьясöс дасытан семинарияын Хренов карын (Кострома губерняын). Кык во сэсся велöдчöма Петербург университетса юридическöй факультетын. Большевик ютырö пырöма, воöма Комио да дзик пыр жö суйсьöма политикаö, яра дорйöма виль мөвпгъяс — котыртны Коми автономияя республика. Сылөн видзöдласыс вöлöма повтöм да ярскöб — öтувтны öти канмуö оз сöмын зыряна да перым-комиос, но тшöтш удмуртъясöс, пыртны сэтчö улыс Печораысь да улыс Эжваысь роч муяс, судзöдны кыз позьö ыджыдджык ашшөрлун, ас милиция да тышка вын котыртöмөн, лэптыны Вой саридзын ас öзынгъяс (портгъяс) да с.в. 1920–1921-од воясö Д.А. Батиевöс ыстöны уджавны Канкарö, Наркомат бердын Комиос петкöдланинөн юралысьö



Д.А. Батиев рөдвужыскөд

пуктöны. Буретш сэки 24 арöса том морт «перйö комилы автономия», вензьö И.В.Сталинкөд, ветлөдлö колана комиссариатъясöд, уджалö йöзкөд. Юралысь уджас сюрöм нелючкияс вöсна сйöс вештöны уджысь, ыстöны бөр Усть-Сы- сольскö. Сэсся том морт зйля уджалö Коми му тöдмалан котырын, öттшöтш — «Коми му» журнал редколлегияö пырысь. 30-öд воясö Д.А.Батиевöс мыждöны, медводдзаясьсö 1933-öд воын. Пуксьöдлöны весиг куимысь, нинöм абусьыс мыждöны лыйлыны. 1941-öд воын вöльгым тöлысь 11-öд лунö лыйлöмаöсь. Бур нимсö сылы бергöдöмны сöмын 1989-öд воö.

Ю а л ö м ь а с.

1. Кор чужöма Комилы ашшöрлун перьян мöвп? Кутшöм ютыр збыльысь зйлис бырöдны Россияын войтыръяслысь проблемасö?

2. Кор да кызди вöли котыртöма Коми автономияя обласьт?

3. Кутшöм муяс пырисны выль Коми обласьтö?

4. Мый сйö «комиöдöмыс», кодi нуöдiс комиöдан уджсö?

5. Кодъяс вöлины Коми автономия панысьяс? Висьталöй Д.Я.Попов да Д.А.Батиев йылысь.

6. Кутшöм сяма республика кöсьылiс котыртны Д.А. Батиев?



13 ю р п а с

20-өд ВОЯС — СӨВМАН ВОЯС

1 ю к ө н

Ас вын вылө лачаён

20-өд воясө Коми обласьт сөвмис кызвынсө аслас вынйөрөн, ачыс веськөдліс пытшкөсса делөяснас да лөсьөдліс водзө сөвмөм вылө уджтасъяс. Позьё шуны, кутшөмкө тырвуйё ашшөрлун да пытшкөсса демократия Коми муын вынавліс сөмын сэки, 1929-өд воөдз, Войвыв крайё пырттөдз, экономикаын выль кансямлөн (НЭП-лөн) выналігөн. 1926-өд воын Коми автономияя обласьтын олөма 255,5 сюрс морт, на пиысь 92,2% вөлөма коми йөз. Сэки Коми збыльысь вөлі коми, веськөдлысьясысь, коммунист ютырысь матө ставыс сёрнитісны комиён.

Обласьтөн веськөдлысьяс дзик пыр пондісны мөвпавны аския лун йылысь, зілісны бурмөдны йөзлысь олөмсө, медводз кресьяналысь. Но тайөс вөчны регыдөн вөлі сьөкыд, өд паськыд муын экономика сөвмөма вөлі зэв слаба, бур туйяс эз вөвны (ва туйясысь кындзи). Медыджыд лача кутлісны вөр вылө, көсйисны сөвмөдны вөр лэдзан да пу уджалан индустрия, медводз обласьтса лунвыв районъясын. Та могысь зілісны нюжөдны сэтчө көрт туйяс, лөсьөдалісны проектъяс. Уна вензьөм бөрын вынсьөдісны Пинюг-Сыктывкар көрт туй лөсьөдан бала, туйсө 1929-өд воын вөлісти пондісны нюжөдны, но некымын во бөрын стрөйтөмсө

другон дугодисны. Вескөдлысьяс аддзисны сэки өти петан туй — индустриализируйтны обласьтсө, кыпөдны выль пабрика-заводъяс, медводз вөр пилитанінъяс да пу уджаланінъяс, заводитны перйыны мусир да биару. Но тайө планъяссө сэки эз позь пөртны олөмө уджалан вын да туй-яс абутөм вөсна. Обласьтса вескөдлысьяс кутісны төд выланыс медводз коми войтырлысь интересъяс, коланлунъяс.

Став медшөр делөяссө вөчлісны, видлавлісны обласьтса Сөветъяслөн чукөртчөмъяс вылын, ставнас вөлөма 11 татшөм өксьөма. Тайө вөлі сэкся демократиялөн зэв төдчана тшупөд. Йөзыс сёрнитөмаөсь сэк восьсөн, вескыда, нинөм дзебтөг. 30-өд воясө татшөмторйыс абу нин вөлөма.

2 ю к ө н

Сиктса олөм кыпалө

Экономикаын выль туйвизь босьтөм бөрын Сөвет Өтувлунын да Коми обласьтын лоины бурлань вежсьөмъяс. Сиктса войтырлы, кодъяс олісны-бергөдчисны ас уджөн, лои өна кокниджык, канму кутіс лючкиджык төждысьны на понда. Автономия котыртөм бөрын Коми муө кутіс воны видз-му вөдитан көрта көлуй: гөръяс, көдзан да вартан машинаяс, мукөдтор. Найөс вузавлісны торъя йөзлы. Гөль йөз вермисны босьтны дженъыдик кад кежлө водзөса сьөм (ссуда), медым водзө сөвмөдны асьыныс овмөс. 1923-өд воын өткымын сикт-грездын воссялісны видз-му техника сеталанінъяс, сэтчө чукөртавлісны канмуөн сетлан машинаяс. Неуна сьөм мынтөм бөрын сиктса олысь вермис босьтлыны сэтысь мый колө: көрт гөр, көдзан машина, вартан техника да мукөдтор. Озыр кресьяна, дерт, став коланторсө ньөбавлісны аслыныс. Позис водзөсөн тшөтш босьтлыны көйдыс. Тайө өна отсавліс сиктса йөзлы, өд өні эз ков повны ичөт урожайысь либө көйдыс тырмытөмторйысь.

Уездьясын да вёлөсьтъясин содіс видз-му вөдитны ку-
жысь да велөдчөм войтыр — агрономъяс да зоотехникъ-
яс. Найö котыртлісны опытной овмөсъяс, босьтчисны скөт
рөдмөдан уджө, лөсьөдалісны-восьталісны видз-му овмөс
сөвмөдан кружокъяс, паськөдісны бур кужанлунъяс. 1923-
өд воö Коми муын муніс медводдза видз-му овмөс петкөд-
ланін (выставка). Татшөм жө петкөдланін котыртчыліс
Мөскуаын. Сэтчө ветліс Комиысь 183 морт, мөдөдлісны
тшөтш видз-му овмөсын быдтөм-рөдмөдөмторъяс. Ловзис
уджыс Чилимдінса видз-му овмөс сөвмөдан станцияын.
1925-өд воын Изьваын воссис ветеринарно-бактериологи-
ческой институт.

Сійö кадө, 20-өд воясө, сиктса йөз олөмын чужө уна
вельтор. Шуам, чужөны-сөвмөны кооперативъяс, сэтчө зіля
өтувтчалөны коми войтыр. Кооперативъясыс вөліны быд
пөлөсөсь. Öтияс сетісны водзөсөн сьөм, мөдъяс — видзис-
ны йөла скөт, коймөдъяс вузасисны шылльө-мылльөөн,
сөян-юанөн, нельөдъяс гөрисны-көдзисны. Сиктса йөз око-
тапырысь пырисны кооперативъясө, найö бура гөгөрвоис-
ны, мый войвылад сөмын вынъяс өтувтөмөн позьө венны
сьөкыдлунъяс. Сэсся канмулы тадзитө вөлі кивывджык.
Öд өтувъя овмөсъясыдлы, торъя йөз серти, позис сетны
төдчанаджык отсөг. Вочасөн олөмыс бурмис. Коми сикт-



Тыла ректөм

грездъясын этшаджык лоома голь йöзыс, öткымын овмöсь-
ясын сöмын (сёысь витас кымын) уджавлöма медалöм йöз.
Но дзоньнас кө босътны кызьöд воясья видз-му овмös, то
ясыда тыдалис, мый сийö сöвмытöм на вөлöма, жебиник,
абу на тырмымön сетлöма йöзлы сёян-юан.

1924-öд воын Усть-Сысольскын вöли восьтöма «Коми-
сельхозбанк», сийö пондiс сетаवны му уджалысьяслы во-
дзöса сьöм (кредитъяс). Комиын ёна сöвмисны быдсяма ко-
оперативъяс, медсясö потребительслөн котыръяс. Сэтчö
пырлiс кресътяна овмöсьясысь 80%. 1928-öд воын видз-му
овмöсын вöчанторйыс вевтыртiс войнаöдзсасö.

Дзоньнас 20-öд воясын коми сикт ёна сöвмис: паська-
лисны овмöсьяс, кресътяна овмöдчалисны выль пöчинöкъ-
ясö, паськöдiсны му-видз. Вочасön йöзыс озырмисны, ньöба-
лисны эз сöмын гөр-агасъяс, но тшöтш коми небöгъяс, вор-
санъяс, бурджык көм-паськөм, зiлисны велöдны челядь-
нысö весиг мукöд каръясын.

З ю к ö н

Вөр уджалан индустрия панöм

Обласътön веськöдлысьяс ёна тöждысьлисны вөр лэдзöм
вöсна. Но йöз эз тырмы, öд колiс төв-гожöм пөрöдчыны.
Та вöсна обласътön юралысьяс шыöдчöны Мöскуаö, медым
Комиö мөдöдiсны сутшкасьысь сутуга сайын пукалысь
йöзöс. Тадзи чужины миянын лагеръяс. Бокысь вайöм
йöзöс уджöдiсны медсясö вөр пөрöданiнын. Вочасön Коми
обласът, сёрöнджык Коми АССР, лои Россиялөн пукалысь-
ясöс, сiдз шусяна спецпереселенецъясöс, кулакъясöс, уго-
ловникъясöс мөдöдан пельöс. Та понда Комиын олысьыс
тöдчымön содiс, татчö овмöдалисны уна кывъя йöзöс.

Тайö жö кадö сöвмö индустрия: 1926-öд воын Усть-
Сысольскын кутiс уджавны вөр пилитан завод, Усвавомын
босътчисны лэптыны яйысь да чериысь кансер вöчан за-
вод. Емдiнын да Изьваын кыптiсны би сетан станцияяс.

Интерес кыскö сійö, мый 20-öд воясö Комиын уджалö-маöсь тшöтш мукöд муяскöд öтвылысь кутан трестъяс, шуам, «Руссанглолес» да «Руссголландлес». 1927-öд воын вöлі котыртöма «Комилес» трест, обласьтын медыджыд вөр лэдзан предприятие. Автономиялөн веськöдлысьяс кöсийсны лöсьöдны вөр индустриясö сідзи, дзоньнас мед пуысь вöчны вузöссö Комиын, сöвмöдны вөрхимия, мебель вöчöм да с.в. Но тайö кöсийöмыс сэки ни бöрынджык тырвийö эз збыльмы.

Ю а л ö м ъ я с.

1. Кыдзи кöсийсны сöвмöдны Коми му 20-öд воясын?
2. Кымын морт олiс 1926-öд воын Коми обласьтын, кымын прöчент на пиысь вöлі вужвойтырыс?
3. Кыдзи сöвмис сиктса олöм 20-öд воясö, мый выльыс чужліс сэки?
4. Кыдзи сöвмис индустрия 20-öд воясö, мый вылö лача кутлісны обласьтөн веськöдлысьяс?





14 ю р п а с

КЫВ ДА КУЛЬТУРА КЫПАЛӨМ

1 ю к ö н

Гижөд кыв сөвмө

Коми обласътын культура кыпöдан удж медводз вöлі гижөд кыв сөвмөм сайын, öд сыөн вöдитчисны велöдчанинын, клубын, курсъяс вылын, быдлаын. Тöдса, мый коми гижөд кывйыс чужлис XIV-öд нэмын на, тайöс вöчлис Перымса Степан. XVIII-öд нэмö гижан кыв сөвмис роч шыпасъяс подув вылын нин, XIX-öд нэмын чужис коми литература. Но торъя гижысъяс да туялысъяс гижлисны сэки ставныс ас нога, эз öткодя, öтувъя индöдъяс эз вöвны. Колö вöлі лöсьöдны öти öтувъя гижөд кыв, став комилы гөгөрвоана, культураа кыв.

1918-öд вося моз тöлыссын Емдинö чукöртчисны Усть-Сысольск да Яренск уездъясысь коми велöдысъяс да воисны öти кывйö — подулавны гижөд кыв, сы подулö пуктыны Сыктивдинкар бердса сёрнисикас, öд сийö öтувтö вöлі мукöд сёрнисикасъяслысь аслыспöлöслунъяссö, öткодя гөгөрвоана уналы. Велöдысъяс вынсöдисны тшöтш коми анбур — **Владимир Александрович Молодцовöн** вöзйöм шыпас чукөр да найöс гижанног. 1928-öд вося коми гижысъяслөн II конференция вылын вöлі шуöма, мый гижөд кыв колö озырмöдны да паськöдны став сёрнисикас тшöт весьтö, медбурсö, медколанасö сэтысь босьтöмөн. Öтшöтш колö гижны да сёрнитны зумыд индöдъяс серти.

1918-өд вося моз төлысьö коми школаяслы да коми войтырлы литература чукөртөм да лосьөдөм могысь вöлі котыртöма торъя комиссия. Сэтчö пырисны И.Т. Чисталёв, В.И. Лыткин, А.А. Маегов, В.А. Молодцов, мукөдъяс. Колö вöлі регыдъя кадөн могмөдны медводз школаяс коми велөдчан небөгъясөн. 1919-өд во заводитчигөн велөдчанінъясö комиссияса разөдісны нин выль коми шыпаскуд (буквар), 1920-өд воын нин сійöс йөзөдісны «Лыддысьны велөдчан» ним улын (гижис В.А. Молодцов). 1921-өд воын вöлі йөзөдöма «Шонді югөр» лыддысян небөг. Тадзи заводитіс сөвмыны-кыпавны öнія коми гижөд кывным.

20-өд воясö вөвлытөм ёна сөвмө да паськалө коми кыввор, сэтчö пыралöны сёрнисикасыясысь торъякывъяс да артмалöны дзык выль кывъяс, неологизмъяс, шуам, көть кывбур, лыдпас, шыпас, шөрин, кып «гимн», ичөт лыян «револьвер», уджлун «трудодень», котыра овмөс «колхоз», индөдалысь «инструктор» да уна мукөд. Ва-коми кывлань синöмыс сэк ёна вöлі төдчö.

2 ю к ö н

Коми школа, литература, театр

1918-өд вося велөдысьяслөн пасйылөм нин чукөртчөм шуліс пыртны челядьöс велөдан уджö коми кыв, лосьөдны коми школа. Тайöс вöчны вöлі зэв сьökыд, но поэяна. 20-өд вояс чөж унджык верстыö йөзсö велөдöма лои лыддысьны да гижны, коми кыв пырис велөдан уджö. Сідз, 1924–1925-өд велөдчан воö 230 школаясь 217 уджаліс коми кыв вылын. Тайö паськалөмсö ышөдіс Комиöдан комиссия, сійö уджаліс 1929 воөдз. Коми школалы колö вöлі лосьөдавны да йөзөдны велөдчан небөгъяс, дасьтыны велөдысьясöс.

Вöлі котыртöма Коми небөг лэдзанін. Кутісны петны коми кыв вылын челядьöс велөдан небөгъяс, мукөдтор. Пондіс артмыны вужвойтырлөн культура сөвмөдөм могысь

зумыд подув. Сійö кадö ёна колісны велöдчöм йöз. Та мoгысь 1925-öд воын нин вoссис Усть-Сысольскын велöдысьясöс дасьтан да Уллына сиктын видз-му овмöс техникумъяс, кык профессионально-технической школа (Усть-Сысольскын да Айкатылаын), йöзöс уджö велöдан нель мастерской. Сэсся канмуса институтъясын да техникумъясын велöдчис уна коми ныв-зон.

Гижöд кыв сöвмöм-лöсьöдöм, том йöзöс грамотаö велöдöм отсаліс тшöтш кок вылас сувтны коми литературалы. Таö ыджыд пай пунктисны коми гижысьяс М.Н. Лебедев (Юсь), В.Т. Чисталёв (Тима Вень), Н.П. Попов (Жугыль). Коми сиктысь, коми йöз пöвстысь петіс ыджыд енбиа кывбуралысь Виктор Савин (Нёбдинса Виттор). 20-öд вояс помын — 30-öд вояс заводитчигöн босьтчис гижны томджык войтыр: В.В. Юхнин, Г.А. Фёдоров, И.В. Изъюров, И.И. Пыстин, Я.М. Рочев, П.Г. Доронин, И.М. Вавилин да мукöд.

20-öд воясö чужö тшöтш коми театр. Сійöс котыртны босьтчö В.Савин. 1921-öд воö Нёбдинса Виттор лöсьöдö «Сыкомтевчук» нима котыр («Сыктывкарса коми театрын ворсысь чукöр»). Тайö котырыс уджаліс-зіліс, гажöдіс йöзöс 20-öд вояс помöдз. Сы подув вылын 1930-öд воын тэчсьö-чужö Коми инструктивно-передвижной показательной театр.

20-öд воясö пансьö Коми обласьтын нöшта туялан удж, көть эз на вöв сэки ни öти вылыс велöдчанін ни туялан институт. 1920-öд воын чужис Коми му тöдмалан-туялан котыр (ОИКК). Водзмöстчысь йöз отсöгöн туялісны коми кыв, археология, этнография, история, экономика, коми йöзлысь культура. Зіля уджалісны Коми му туялысьяс А.М. Мартюшев, А.А. Чеусов да мукöд. Нималана туялысьясөн лоины В.И. Лыткин да А.С. Сидоров. Коми муöс туялан котыр 1924-öд восянь лэдзліс «Коми му» торъя ас журнал. Сэні йöзöдлісны обласьтлөн экономика, мупытшса озырлунъяс, история, этнография, кыв йылысь материалъяс, петавлісны тшöтш серпаса гижöдъяс, кывбуръяс.

Выль литературалы подув пуктысьяс

Кöть коми литература чужис-сöвмис ХІХ-öд нэм шöрын, йöзыс сэкся гижысьясöс паськыда эз тöдлыны, öд эз вöвны журнал-газетъяс, И.А. Куратов, П.Клочков да мукöдъяс гижлісны «пызанас», аслыныс. Та вöсна 20-öд во-ясса коми литератураöс повтöг поэö нимтыны выльöн. Дивö босьтö, кызди татшöм регыдъя кадö бордъясьöма-быдмöма сы мында енбиа гижысь, кывбуралысь, медводдза «Парма ёль» альманахъяссянь (1922–1923) быд тöлысся «Ордым», медводдза коми литература журналöдз. Öтияс гижлісны нэм заводитчигöн нин (Илля Вась, Юсь, Д.Я. Попов), унджыкыс босьтчисны 20-öд воясö. Гижлісны гöрд командиръяс — Афанасий Маегов (Варыш), гырысь веськöдлысьяс, прöстöй уджалысь йöз, нывбабаяс Мария Йоль (М.И. Безносилова), Войт (Ю.А. Попова), Öньö Агни (А.А. Суханова (Даньщикова)). Литература петіс чукöстана кывбуръяссянь, сыланкывъяссянь, гижисны драмаяс, тешъяс, сэсся чужисны висьтъяс, очеркъяс. Дзордзалис сыланкывъяс лöсьöдан туй, öд ёна эз тырмыны коми сыланъяс. Кыпалöмыс заводитчис «Коми рытъяссянь», сэнi öттшöтш кылісны сыланъяс, йöзыс йöктісны, ворсісны пьесаяс, лыддисны кывбуръяс. Куим сэкся яръюгыд кодзув йылысь пасъям торйöн.

Нёбдінса Виттор

Ыджыд енбиа морт вöлöма Викторыс, кывбуралысь, драмаяс гижысь да ворсысь, редактор, уна йöзкотырса удж нуöдысь. Чужлöма 1888-öд вося вöльгым тöлысь 21-öд лунö Нёбдін сиктын голь кресъянин котырын. 8 чоя-вокаысь медыджыдыслы сюрліс быдсяма удж, том зонка помалöма Дереваннойын кык класса школа да уджавлöма писарöн Печора вожын. 1906-öд воын мунöма айыскöд Уралса заводъясö нажöвитчыны, сэсся веськалöма лунвылö, Украинаö. Мöд войтырлөн вылыс культураыс да литератураыс



Виктор Алексеевич Савин

ышодöма том мортос гижны комион. 1918-од вося юлын Виттор воö чужан муö да моз төлысын нин «Зырянская жизнь» газет йозодö сылысь «Гörd звон» кывбур. Нёбдинса Виттор уджавлис уналаын, гижлис войяснас сыланъяс, поэмаяс, кывбуръяс, драмаяс, проза. Уна гижлис öти лун олысь гижод, но йоз паметью кольома медводз лирикаа сыланкывъясон, найö зев öдйö вуджёмаось йозкостсаясö, шуам, «Югыд кодзув», «Öтчюд овлө», «Чужи-быдми съод вөр шöрын», «Коми море».

Сылысь сыланъяс сылöны тшöтш перым-комияс Коммуын. Куслытöм гаж да серам сетöны сылөн «Райын» да «Инасьтöм лов» тешъяс, Сюзь Матвейе коми öбича нуысь герой — шöйöвоштöм, ас вылө лача кутысь, эновтчытöм, пикö сюрлытöм, муно адысь-райысь («Адö ме эг шедöдчы, Гажа муö мөдöдчи...»).

Нёбдинса Виттор медводдзаөн пондiс гижны коми литература вылө критика, уна том гижысьлы восьтiс туй, велöдiс гижны. 30-од воясö, Сталинлөн культ кадö, Витторос пондiсны мыжавны абутöм мыжъясысь, лёкмысь олöмысь эз сет нин сылы *ловбисö* гижны 20-од воясын моз. 1937-од вося йирым төлысь 7-од луно сийöс пуксьөдöны НКВД-саяс, подувтöг мыжалöны да ыстöны Сибирö. 1943-од воö моз төлысьö сийö дзескыдинын кувсьöма. Öнөдз на морт оз тöд сылысь гусö.

30-од вояс помö сылысь небөгъяссö соталисны, зилисны вуштыны нимсö йоз паметысь. Но йöзыс сылисны сыөн лөсьөдöм сыланъяс, век видзисны «югыд кодзулос» юраныс. 19 во коми литератураысь сылысь нимсö вöли вуштöма. Сöмын 1956-од воын сийöс бөр бергöдiсны коми йöзлы.

Илля Вась

Чужлөма 1895-өд вося өшым төлысь 27-өд лунö Сык-
тивкар бердса Тентюков грездын, кык арöса кольöма бать-
тöгыс. Ичөтдырся зиль уджыс вöчöма сийöс зиль да писькöс
велöдчысьöн, сыысь быдмас оз
сöмын кывбуралысь, но гырысь
туялысь, финно-угровед. Велöд-
чöма Сыктивкарса велöдчанін-
ын, сэсся Тотьмаын велöдысь-
ясöс дасьтан семинарияын. Се-
минарияс нин коми студентъ-
яскöд öтвыв котыртöма кружок
да пондöма кывбуръяс лöсьöдав-
ны, каникуласигас чукöртлöма
йöзкостса поэзия. Революция-
ясöдз том морт гижö сарлы,
озыръяслы паныд кывбуръяс,
чуксалö коми йöзöс югыдлань,
велöдчыны. 1916-өд воын сийöс
босьтöны сар армияö тышкась-
ны германечьяскöд. 1918-өд воö
Илля Вась воö бөр чужанінас да пырö коми школаяслы
велöдчан небöгъяс гижан уджö. 1919-өд да 1920-өд воясö
сийö Гөрд армияын, тышкасьö еджыдъяслы паныд, весь-
кавлöма полякъяслы пленö. 1922-өд воö вöвлöм салдат
пырö велöдчыны Москваса университетö, сэсся 1925-өд воын
аспирантураö, ветлö водзö велöдны рöдвуж кывъяс Фин-
ляндияö да Венгрияö. Коми муысь сийö эз торйöдчыв,
йöзöдö велöдчан небöгъяс, лирикаа кывбуръяс, 1927-өд
воын, Йирымса революциялы 10 во тыригкежлö, гижö «Му-
нöны» поэма. Тайö поэмаыс Коми мулы сиём радейтана
кыв, том йöз мунöны дорйыны чужан мусö еджыдъясысь.
Коді оз тöд сылысь кывъяс:



Василий Ильич Лыткин

Дзордзав жö, Коми му, коляоз дзоридзöн,
Сьöлаоз синъясöн, гөрд лежнöг цветъясöн!

30-өд воясö том поэтöс көртвомалис НКВД, ланьтöдiс 50-өд воясöдз, мыжалiсны СОФИН делöбiсь, быттöкö сийö көсйöма путкыльтны Комиын Совет ыджыдалöм да сетны чужанiнсö Финляндиялы. 1933-өд воын чекистъяс Канкарын йөршитiсны сийöс дзескыдiнö да мыжалiсны думыштöм, вöвлытöм мыжысь, сетiсны 3 во. Пукалöма Бiлi Асыввылын, Хабаровск крайын. Тöлка морт, В.И. Лыткин эз во бөр Комиö ни Канкарö, воис Европа юкөнö сöмын 1938-өд воын. Сэсся уна во уджавлiс Уфаын, Чкаловын (Оренбургын), Рязаньын, велöдiс пединститутъясын. Сэсся 1959-өд воö, Сталин кулöм бöрын нин, вуджö Канкарö, нэмсö сэсся туялö фин-угор кывъяс, лоö профессорöн. Кувсис Илля Вась 1981-өд вося моз тöлысь 27-өд лунö. Дзёбöма Сыктывкарö.

Олiгчöжыс Илля Вась озырмöдiс чужан кывсö, зiлис гижны мичаа, шылъыда, уна выль кыв пыртöмөн, ёна вуджöдлiс-комиöдлiс, бөръя каднас гижлiс кызвынсö челядьлы.

Тима Вень

Вениамин Тимофеевич Чисталёв нэмсö вöвлi челядьöс велöдысь, öттшöтш гырысь, мöвпалысь морт, литература-лы подув пуктысьясысь öти. Чужлöма 1890-өд вося йирым тöлысь 20-өд лунö Помöсдiнын, вөлöсьтса писар котырын. Велöдчöма школаясын Помöсдiнын, Дереваннойын, ёна көсйылöма велöдны челядьöс. Көть Тотьмаса семинарияö коми зонмöс абу босьтöмны, сийö велöдчöма ачыс да 1908-өд воын пырöма велöдны Пожөгса школаö. Сэки нин Тима Вень гижöма коми шыпаскуд да комиөн челядьлы лыддъясян небöг. Но нинöм, дерт, сардырся кадö сылысь эз йöзöдны. Сэсся том мортöс босьтöны тышкасьны германечьяскöд, веськавлöма Украинаö. Тайö ветлöмыс унатор вылö сылысь синъяссö восьтöма. Революцияс бöрын, 1918-өд восянь 1933-өд воöдз, олö да уджалö Помöсдiнас, ёна гижö — кывбуръяс, висътъяс, пасйöдъяс, поэмаяс.

Тима Вень унаторйөн вöлi матыс философ дорö, му уджалысь синъясөн сийö аддзис ас гөгöрсъыс чужан мулысь,

вөр-валысь, ас войтырлысь мич,
гажлун, кыпыдлун. Сійö гиж-
ліс:

Лöсьыд, гажа зэв
Овны му вылын!
Долыд сьёлöмлы
Овны тулысын!

1929-öд воын сійö гижö ко-
ми литератураын медбур «Три-
пан Вась» висьт. Сэні пыдіа,
психология боксянь стöча сер-
пасалöма тшыг кадö кöдзны
кайлысь кресъянинöс. Гөрöм-
көдзöм, турунасьöм бöрын Три-
пан Вась гортö бөр кывтігас
кувсьö. Тайö уджалысь коми
мортлы кып, Трипан Вась эскö
аслыс, аслас вынö, олö аския
лунö лача кутöмön, зумыда да падъявтöг. Öти Ен сылön
эм — ас вылö удж.

Тима Вень комиön гижысь ыджыд мастер, стилист,
збыль коми классик. Та вылö видзöдтöг Тима Веньöс
сісьтісны-бырöдісны дзескыдінын. 1937-öд вося ноябр 27-öд
лунö сійöс пуксьöдісны контрреволюция удж нуöдöмысь
быттö. 1939-öд воын сійöс пуксьöдісны 3 во кезлö. Ви-
сьöмъясысь гижысь кувсьöма 1939-öд вося йирым 13-öд
лунö. 1956-öд воын сійöс реабилитируйтöмаöсь.

Нёбдіна Виттор, Илля Вась, Тима Вень быдмисны гы-
рысь гижысьясöдз 20-öд воясö, нимöдісны Йирымса рево-
люция, коммунист ютырöс комияслы мездлун сетöмысь,
сулавлісны Сöвет власьт дор. Но 30-öд воясö асьнысö найöс
Сöвет власьт, канму, НКВД мыжаліс, пуксьöдіс, немö вö-
чис. Татшöм вöлі историялön шыбöльыс, дорйысьясöс, оп-
кысьясöс шульвлісны вөрөгъясөн. Но нимъясыс налön, ги-
жöдъясыс эз вушйыны историяысь, колины миянлы, аслас
мичлуннас шензьöдöны öнöдз, велöдöны бурö.



Вениамин Тимофеевич
Чисталев

Нимтылісны асьнысö коми ногөн

20-öд вояс коми йöзлы, культуралы, дзоньнас коми оласноглы — кыпалан-туан да дзордзалан кад. Тайö тöдчö яръюгыда тшöтш сыысь, мый коми йöзысь унаöн асьнысö пондінны сэк нимтыны эз роч ног, шуам Савин Виктор Алексеевич, а лöсьöдлісны коми нимтаннога шуöмъяс — Нёбдінса Виттор. Öд коми сиктын важөн дай öні на йöзыс шыасьöны öта-мöд дорас оз официальной, ним-вичөн, овөн, а вöдитчöны сиктса нимтöмөн (Савö Наталь, Петыр Вась). Збыльысьсö коми ногөн тадзи эськө колö. 20-öд воясö коми гижысьяслы, веськөдлысьяслы донзъымөн лоöма роч ногөн нимтысьöмыс, найö казялöмаöсь нэмöвöйся озырсьыс-озыр коми нимъяс. Со кызди Нёбдінса Виттор «Менам томкадся олöм» гижöдын лыддьöдлö асьыс чужанвужсö:

«Ме ачым — Виттор.

Код Виттор? — Öльöш Виттор.

Код Öльöш? — Öньö Öльöш.

Код Öньö? — Öнись Öньö.

Код Öнись? — Лева Öнись.

Код Лева? — Трöш Лева.

Код Трöш? — Педь Трöш.

Код Педь? — Аврам Педь.

Код Аврам? — Сава Аврам.

Код Сава? — Кузь бива вотлук...

Мый лоö «вотлукыс» — ме ачым ог тöд».

Öти сиктъясын мортсö нимтылісны айъяс сертиыс (мам сертиыс, эз кө вöв «официальной» айыс), мукöдлаын — орд сертиыс, кутшöмкө важ ай либö энъ ним серти, либö прöзванньö серти (Куран Валя).

20-öд воясся газет-журналъясö, коми литератураö кольöма уна сё коми ногса нимталöм, на пиысь унаöн тöдсаöсь миянлы. Асьнысö йöзыс нимтылöмаöсь чужанін сертиыс (Нёбдінса Виттор — В. Савин), Луздор Вась — В. Юхнин),


айним сертиыс (**Илля Вась** — В.И. Лыткин, **Тима Вень** — В.Т. Чисталёв), орд ним да мукөд прözваннö сертиыс (**Изьюр Иван** — И. Изьюров, **Ичöt Иван** — И. Сажин), ним-ов-вичсö дженьдöдöм серти (**Иливапыс** — Илья Иванович Пыстин, **Мивашеков** — Михаил Иванович Шестаков), роч ов комиодöм серти (**Юсь** — Михаил Лебедев). Унаысь йöзыс асьнысö серпасавлісны öбичаныс серти, шуам, **Биа Öгыр** (Я.И. Чупров), **Чард** (А.Н. Надеев), **Варыш** (А.А. Маегов), **Жугыль** (Н.П. Попов), **Жан Морöс** (И.Т. Чисталёв). Вöліны тшötш зэв аслыссяма ногөн лöсьöдöм мöд нимъяс. Сідз, челядьлы коми гижысь Ю.А.Попова гижсылöма **Войт** нимөн.

Збыльысьсö кö öд, XIX-öд нэмсянь нин коми литератураын тайö традицияыс кыссьö, шуам, Иван Куратовлөн вöлі **Гугов** мöд ним, **Георгий Лыткинлөн** вöлі **Ёгуш**, **Каллистрат Жаковлөн** вöлі **Палалей Кале**.

40-öд вояссянь рочмöдан нырвизыыс лööма сэтшöм ён, мый гижысьяс, дзоньнас коми интеллигенция дугдöма нимтыны асьнысö коми ногөн, öнöдз выналö роч ногса нимтанног, шуам, **народнöй писатель Геннадий Фёдоров**, **народнöй поэт Серафим Попов**, **Геннадий Юшков**, **Альберт Ванеев**, **Галина Бутырева**. Сöмын öткымынысь öні мыччысьлö коми ногөн нимтысьöм, шуам, **Скөр Кöсьта** (К. Сердитов). Гашкö, коркö 20-öд воясся бур водзмöстчылöмыс ловзяс на?

Ю а л ö м ъ я с да уд ж.

1. Кор вöлі пунктöма подув öнія коми гижöд кывлы да кöні?
2. Кутшöм анбур вöлі сэки вынсьöдöма? Коді сійöс лöсьöдіс?
3. Кор чужис коми национальнöй школа?
4. Кутшöм гижысьяс гижлісны 20-öд воясö?
5. Кор чужис коми театр, коді сійöс подулаліс?
6. Висьтыштöй Нёбдинса Виттор, Илля Вась, Тима Вень йылысь.
7. Мый накöд лоис 30-öд воясö?



15 ю р н а с
КӖДЗЫД 30-Ӗд ВОЯС

1 ю к ӧ н

Олӧмыс чорзӧ, енӧжыс букышмӧ

20-ӧд вояс помын нин дзоньнас Сӧвет Ӧтувлунын олӧмыс кутіс чорзбыны, ыджыдалӧмыс вуджис канмуын дзик ӧти мортлы — Иосиф Виссарионович Сталинлы. Сійӧ вӧлі сӧки большевик ютырӧн веськӧдлысь, Шӧр Комитетса секретар, В.И. Ленин кулӧм бӧрын лои юралысь. 30-ӧд вояс чӧж Коми обласьтлӧн ашпӧрлуныс вочасӧн чиніс, заводитчис тайӧ 1929-ӧд воӧ, кор Коми АО пыртісны Войвывса крайӧ (шӧриныс вӧлі Кардор). Ӧні Усть-Сысольсксянь овмӧс кузя став делӧсӧ, плансӧ ковмис нин мунны ладмӧдны Кардорӧ, сӧсся вӧлисти Канкарӧ. Йӧзкотырса олӧмыс вочасӧн тшӧтш шуштӧммис.

Коми муӧс Войвыв крайӧ пыртӧм бӧрын ассыным оласног да олӧм сӧвмӧдӧм йылысь сӧрнияс вочасӧн лӧнисны. Водзӧ петісны эз национальнӧй, а экономика кузя могъяс, ӧтувъя канмуӧс сӧвмӧдан делӧяс.

20-ӧд воясӧ зіля да бура уджаліс «Коми му туялантӧдмалан котыр». Сійӧ лӧдзӧ вӧлі «Коми му» журнал. Котырӧ пырысь йӧз гижалісны журналӧ ёсь, сьӧлӧмтӧ вӧрзӧдана гижӧдъяс Коми мулӧн талунъя да аския лун йылысь. Но выліын пукалысьяслы, Мӧскуалы, эз во сьӧлӧм вылас журналлӧн повтӧмлуныс. Та вӧсна 1930-ӧд воӧ

«Коми му» журнал тупкӧны, а недыр мысти, 1931-ӧд воӧ, тупкӧны «Коми му туялан-тӧдмалан котыр». Такӧд тшӧтш вочасӧн чинӧ Коми мулӧн политикаын, экономикаын да культураын сьӧкыдлунъяс йылысь гижӧд лыдыс. Быттӧ ставыс шылъыд-бур лоӧма. Петӧны ёнджыка Коми мулӧн, татчӧс йӧзлӧн вермӧмъяс йылысь гижӧдъяс.

Шӧринсянь чорыд контроль, веськыда личкӧм содӧс сы понда, мый И.В. Сталинсянь петӧс мӧвп ӧдйӧ лӧсьӧдны социализм, вынӧн, мырдӧн вежны ыджыд канмуӧс, сӧки сийӧ вӧлі капитализма муяс костын дзик ӧтнас. Воддза планъяс вуж выйӧн вежисны, пунктисны югыр водзӧ куим мог — кыпӧдны ыджыд индустрия, медым Сӧвет Ӧтувлун вермис водзсасын буржуазной канмуяслы (индустриализуйтӧм), котыртны став ӧтка кресьяна овмӧссӧ колхозъясӧ, бырӧдны посни буржуазия кыдзи классӧс (коллективизируйтӧм), кыпӧдны йӧзлысь грамота (культураын революция). Тайӧ гырысь могъяссӧ пондӧсны пӧртны олӧмӧ веськыда кесйӧдлӧмӧн, мырдӧн, йӧзлысь юасьтӧг вӧтлісны быдӧнӧс «шудӧ». Ӧттшӧтш такӧд 30-ӧд воясӧ, торйӧн нин 1937–38-ӧд воясӧ, кыпалӧсны репрессияяс: йӧзӧс пондӧсны пуксьӧдавны, лыйлыны, ыставны мыжтӧгыс, думыштӧм абутӧм грекъясысь. Сталин ногӧн, социализм стрӧитигӧн классъяскостса тышыс пӧ вӧвлытӧма содӧ. Та вӧсна НКВД, югырса комитетъяс корсялісны «народлысь врагъясӧс», Комиын, мукӧд республикаясн да обласьтъясн бырӧдалӧсны «националистъясӧс».

Такӧд тшӧтш Коми обласьтын йӧзкостса овмӧсыс, торйӧн нин войвылын, ӧдйӧ сӧвмӧ, уджалысьяс костын кыптӧ ордысьсӧм, кыпалӧ зӧля уджавны кӧсйӧм, водзӧ сӧвмӧ культура, йӧзӧс велӧдӧм.

30-ӧд вояслӧн мӧд джынйын водзӧ сӧвмӧ-ёнмӧ канму власьт. 1936-ӧд вося *Оланподув* серти Коми обласьт пыдди лои лӧсьӧдӧма Коми Автономияя Сӧветскӧй Социалистическӧй Республика. 1937-ӧд вося юнь 23-ӧд лунӧ мунис XI-ӧд эновтны позьтӧм (чрезвычайной) Сӧветъяс съезд, кодӧ вынсьӧдӧс-лӧсьӧдӧс республикалысь медводдза Оланподув. 1938-ӧд воӧ мунисны Коми АССР-са Медвылыс Сӧветӧ

бөрйысьömтьяс. Сійö лöсьöди́с Коми мулысь правительство — Нарoднöй комиссаръяслысь сöвет. Коми АССР-ысь Медвылысь Сöветлөн Президиумса юралысьö бөрйисны Г.Н. Вeтошкинöс, Нарoднöй комиссаръяслөн сöветөн веськöдлысьö — И.И. Оплеснинöс. Коми йöз ошкисны тайö вежсьöмсö. Öд обласьт пыдди лoи республика. Но такöд тшöтш тайö вежсьöмысь выльöн лöсьöдöм-кoтыртöм республикалысь ашшöрлунсö эз содты. Сэк кeжлö канму веськöдлöм комиöдан уджыс сетiс ыджыд водзöс. Со мый вöли пасйöма Коми облысполкомлөн «Сöветскöй строительство» нима докладын:

«Коми автономия обласьтөн веськöдлан аппаратö ас, коми йöзöс пыртöмын шедöдöма зэв гырысь вермöмтьяс. Сиктса Сöветъясын, райисполкомъясын, мукöд Сöвет аппаратын öнi уджалöны медясö коми йöз. Обласьтса учреждениеясын уджалысьясысь 80 прöчентыс — коми войтыр. Коми кыв вылын петöны небöгтьяс, газет-журнальяс...»

Сöмын 30-öд вояс помын Коми АССР-ын коми кывлөн выныс кутiс чинны, збыльысь кö, сийöс пондiсны тшöтшöдны. Сидз, 1937-öд вoся Оланпoдулын эз нин вöв пасйöма, мый республикаын коми кыв каналан кыв. Сэсса уна роч кывъя мортöс ыстiсны Комиö, коми йöзыс пондiсны «вошны-сывны» локтöмтьяс пöвстын.

30-öд вояс помын республикаөн да районъясөн збыльысьö веськöдлiсны кытыр органъяс, обком да райкомъяс, Сöветъяслөн позянлунъясыс ёна чинiсны, найö пондiсны веськöдлыны кызвынсö пытшкöсса овмöсөн. Коммунистъяссиянь колö вöли сöмын кывзысьны вылиса чинаялысь, вöчны сийöс, мый тшöктöны, мöвпавтöг, салдат моз. Эз öд весь сэки чуж шуöм: «Коммунист — партиалөн салдат». А став коммунист вылын, канмуын быд олысь вылын сулалiс öти вoждь, Сталин, му вылын ен.

Кулакъясöс бырöдны, мукöдсö — колхозö

Коллективизуйтöм йылысь сёрниыс кыпаліс 1929-öд воын, көть этшаник колхозъяс да совхозъяс вöліны водзджык. Коллективизуйтöм мог вöлі пунктöма ютыр водзö 20-öд воясö, но сәки чайтлісны, мый му уджалысьяс паськыд кооперация подув вылын асьныс, ас көсйöмөн öтувтчасны öтувъя овмөсьясö. Но И.В. Сталин тэрмөдліс социализмсö лөсьöдны лыда во чöжөн. Заводитчис нәмөвöйся сиктса олөмөс жугöдөм.

Коммунист ютыр подуласис тайö кампания нуöдигөн гöльяс вылö. Сиктса йöзöс официальнойö юклісны нöшта шөркодья олысьяс да озыръяс (кулакъяс) вылö. «Гöльяслөн» чукöртчөмъяс вылын райкомъяслөн тшöктөмъяс серти шуалісны котыртавны колхозъяс, пыртöдісны сэтчö шөркост олысьясöс, öтувтісны муяс, пода (скöт), машинаяс, гөр-агасъяс. Öттшöтш «бырöдавлісны» кулакъясöс классöс моз — мырддявлісны эмбурсö, вöтлалісны гортъяссьыс, ыставлісны, судитлісны. Некутшөм нормаяс эз вöвны, кодöс кулакөн нимтыны, кодöс шулісны, сійöс кулакавлісны. Лөгөн видзöдісны тшöтш колхозö пырны көсййтөмъяс вылö. Коми обком 1930-öд во заводитчигөн пунктіс мог öтувтны ар кежлас му уджалысьяс пиысь джынсö.

Тадзи пестысис выль аскостса тыш, öні нин му уджалысьяс костын. Тышсö тайöс пестіс ВКП(б) да канму. Озыр овмөс кутысьыс вөлöма Комиын сөмын 3 прöцент мында. Тайö вöлі медзіль, медписькөс, медся водзмöстчысь, велöдчөм йöз, кодъяс ас уджөн, вежөрөн сяммылісны овмөдчыны бурджыка. Канму пöдтіс найöс эз сөмын вынөн, пöдтіс найöс вывті ыджыд вотъясөн, видз-му овмөс вöчантор содтöд заданиеясөн, штрапъясөн. Кулакъясöс мырдөн ыстывлісны вөр пөрöдны, сетавлісны вöчны вермытөм нормаяс. Сәсся татшөм мырдөналөм вуджис öтка овмөс кутысьяс вылö, шөркост да гöль кресьяналы, кодъяс эз көсйивны колхозö пырны. Тадзи вочасөн кулакъясöс бырöдісны, кодöс дзескыдинö, кодöс мырдөн пыртöдісны кол-

хозö. Му уджалысьяс та вылö вочавидзлісны ас ногыс — му уджалан машинаяс, эмбур вузавлывлісны, скöтсö начкавлісны. Мед оз веськав колхозö нэм чöжөн најöвитлём-чöжём эмбурыс. Сідз, 1928-öd воын обласьт пасьтала вöлöма гырысь скöтыс 153800 юр, 16400 порсь, а 1932-öd воын лоöма 114300 мös-вöv да 4900 порсь. Коллективизациясö нуöдісны öдйö, мырдөн, шорөн киссис синва да вир, жугалісны семьяяс, янсавлісны ай-мам челядьыскöд, чоявока, 1940-öd воын республикаын вöлöма нин 718 колхоз, сэтчö пырлöма став кресьянаысь 90% сайö.

Коллективизуйтан кад литератураын важ тема нин, 30-öd воясö та йылысь гижлісны: Г. Фёдоров «Сиктса асыв», «Колхозницаяс» повесьтьяс, И. Изьюров «Трактористка Василиса», В. Юхнин «Дінъёлса вөрпункт» повесьтьяс. Ставыс сэні гижöма партияса критикалөн тшöктöмтьяс серти — колхозö ас вöляысь пырём йöз тышкасьлісны план тыртöм вöсна, вредитысьяс да кулачитöм вөрөгьяслы паныд. Кулактьяс, ас овмös кутысьяс йылысь бурөн, найös гөгөрвоёмөн нинём абу гижöма, найö быттьökö историяса лөп кодьöсь.

80–90-öd воясö коми гижысьяс сюсьджыка туялöны-серпасалöны 30-öd воясса лоёмторьяссö. Медводз, Г. Юшков аслас «Чугра» романын ярьюгыда гижис ас овмösö кутчысьысь Ревекка йылысь, сійö помöдз оз пыр колхозö, көні сыён кутасны кесйöдлыны, мортыс воштас ашшөрлунсö. И. Торопов зэв кужёмөн серпасалöма 30-öd воясса коми сиктлысь сынöдсö «Нельён войся бипур дорын» повесьтын. Пемыд вой öти бипур дорын суö кык ая-пияös, коми Микитös да Василей писö (колхозö неважөн пырöмаясös) да роч Степанös да Сашка писö, кодьясös кулакалём бöрас ыстöмны Комиö, съöd вөр шöрас «виль олём» вöчны. Ая-пия пышйöны лунвылö, гортас. Войся бипур öтувтö россяса кресьянаös, ладмöдö найös.

Та вылö видзöдтöг, сиктса олöмыс вöлі сöвмö водзö. Коми йöз вочасөн сöвмöдісны оласногсö, öд 1939-öd воын Коми АССР-ын олысь йöзысь (320 сюрс мортысь) 290300 морт овліс сиктын. Войвывса вөр-ваын олiг-выліг колхозь-

яе кутшöмакö кокньöдлісны кресьяналысь олöмсö, öд канму дугдывтöг отсавліс öтувья овмöсьяслы, кыпöдіс сиктса выль ногса экономика. Гöль йöз да шöркодья олысь войтыр колхозьясын олісны бурджыка. Нянь вылö дон вежласьöм найöс ёнасö эз вөрзьöд. Колхозьясын мынтісны этша, но тайö сьöмторйыс отсаліс налы. Öд Войвылад быдөн мөвпаліс, кыз эськö тöвсö коллявны, ловйөн кольны. Колхозьяслы канму сетліс водзöсөн сьöм, кöйдыс, мукöдтор.

Колхозьясö воалісны йöз — агрономьяс, зоотехникьяс. 1932-öд воын Визинын воссис медводдза МТС (машинно-тракторной станция). Сэсся татшöм станцияяс вөссялісны мукöдлаын. Колхозьяс ньöбалісны тракторьяс, автомашинаяс, комбайньяс, мукöд техника. Кыпталісны сиктгрездьясын скöt видзан гырысь гидьяс, кöйдыс видзаніньяс.

1940-öд воын Ставсоюзса видз-му овмöс петкöдланін вылын, Мöскуаын, ассыныс шедöдöмторьяссö петкöдліс Коми муысь кык район, 129 колхоз, 7 йöv лысьтан ферма, Пажгаса МТС, видз-му овмöсса 129 уджалысь. Кулöмдін районысь «Вөр фронт» да Изьва районысь «Ленин туйöд» колхозьясöс, Изьва вожысь кукань видзысь М.Т. Артеваöс бур уджысь пасйисны Уджалан Гöрд Дöрапас орденөн.

Вочасөн олöмыс 30-öд вояс помланьö заводитіс ладмыны, сиктса войтыр ньöбалісны патефоньяс, бурджык көмпаськөм. Сиктö воис радио, уналаын кыпöдісны-вөссталисны клубьяс, лыддысяніньяс. Сöвмис сиктса культура, вөссялісны асворсысь театрьяс.

З ю к ö н

Индустрия вужйöдан вояс

30-öд воясö Коми муöс виччысьтöг пондісны пöртны гырысь индустрияа муö, öд социализм кыпöдан öдьяслы колö вöлі войвывса из шом, мувый, вөр, биару да с.в.

Республикаөн веськöдлысьяс уна вын пуктісны, медым заптыны унджык вөр, сөвмöдны индустриялысь тайö



Вор фронт вылын

юкӧнсӧ. Вӧрын медгӧна уджавлісны сійӧ жӧ колхозникгьяс, сиктса коми йӧз. Колхозӧ ӧтувтӧдӧм йӧзӧн веськӧдлыны вӧлі кокни. Овмӧсгьясӧ вылісянь лэдзлісны плангьяс, та бӧрын тӧвбыд мужичӧйяс, ангьяс, том йӧз лэдзлісны сортовка, пӧсь уджалан гожӧм бӧрын «шойчигмоз». Тадзи дзонь коми войтыр пессис-уджавліс кык фронт вылын, гожӧмбыд му вылын, кузь тӧвбыд кер дорын. 30-ӧд воясӧ коми йӧзысь унаӧн зільӧны вӧлі вӧрын, лоӧны нималана йӧзӧн аслас бур удж помысь. Ӗна нимавліс сэки **Антон Васильевич Карманов (1909–1983)**, Палаззяын, Сыктыв вожын чужлӧм морт, вӧрын «стахановскӧя» медводдза уджалысь. 1930–31-ӧд вося тӧлӧ сійӧ панӧма сідз шусяна «тысячникгьяслысь» ордйгьсӧм дзоньнас Коми обласгьт пасытала.

Индустриализуйтӧмыс 30-ӧд воясӧ муніс тыр ӧдӧн, но эз сідзи, кызди кӧсйывлісны обласгьтӧн веськӧдлысьяс 20-ӧд воясӧ. Сійӧ муніс Москваса плангьяс серти. Медводз, 30-ӧд вояс заводитчигӧн дугӧдісны нюжӧдны Пинюг–Сыктывкар кӧрт туй, кӧть 1933-ӧд во кежлӧ став уджсгьыс 60% вӧлі дась нин, прӧсекасӧ кузяла пӧрӧдлісны нин. Уджавлісны стрӧйтчӧм вылас пуксӧдӧм йӧз.

20-өд вояс помсянь нин Комиё воліс ГПУ веськөдлөм улын некымын экспедиция Ухта–Печора инъясө. 1932-өд воын вөлі вөчөма төдчана воськов — котыртөма вөлі Ухта–Печораса трест. Сійө жө кадө Наукас Академияыс Полярной комиссия заводитіс лөсьөдны тырвуйө урчитөм план, кызди Ухта–Печораса регионыс вөчны мупытшса озырлун перьян район, мед сійө пөрас сэсса Ленинград карса индустрияөс ломтасөн могмөдан базаө. Тайө планыс урчитліс сәні олыс йөзлыс содөм — 1934-өд вося 71 сюрсыс содас 1942-өд воын 168 сюрсөдз, а 1947-өд воө 500 сюрсөдз нин. Татшөм ногөн Коми республикаса войвылын олыссыс лои эскө унджык 1939-өд воын республикаын став олыс лыдыс. Республикаса войвывлөн историяыс дугдіс лоны коми йөзлөн историяөн, сійөс кутіс вежнывөчны куим ыджыд предприятие: мусир перьян «Ухтокомбинат» трест, из шом перьян «Воркутауголь» да Войвывса Печорской көрт туй.

30-өд воясө мусир кутісны перйыны Чибьюын да Ярегаын. 1934-өд воын кыптис Комиын мусирыс бензин да мукөдтор вөчан завод, сэсса ләптисны сьөкыд мусир перьян медводдза шахта. Таыс кындзи, 1933-өд воө чужис аспальтит рудник, сійө сетліс вөчөмторсө канмуса электроника да мавтас вөчан индустриялы. 1929-өд восянь сөвмө из шом перйөм, 1934-өд воө Вөркутаын кыптө из шом перьян медводдза шахта. Сөмын мусир да из шом перйөмсө падмөдліс сійө, мый тайө озырлунсө нинөмөн вөлі петкөдны. Выль предприятиелыс вөчөмторсө первойсө петкөдісны векни көрт туйөд, гоз-мөдыс сөвтлисны-ректылісны, сэсса ва туйөд нулісны водзө. Та вөсна 1937-өд воө вөлі шуөма нюжөдны Котлас–Вөркута көрт туй. Сійөс ләптисны зэв өдйө, 1941-өд вося декабрын туй кузя ветлісны-котралісны нин поездъяс.

Өттшөтш чужины сөян-юан вөчан, стрөйтчан, караб лөдзан предприятиеяс. Позьө шуны, дзик выль лои юяс кузя ветлан флот. 30-өд воясө Комиын сөвмө авиация. 1932-өд воө Чилимдинө ләптөны няр вөчан завод.

Кызди аддзам, Коми му сійө кадө өдйө сөвмө. Но вөлі

өти сьöкыдлун — эз тырмыны уджалысьяс. Та вöсна из шом да мусир перйыны, көрт туй лэптыны, вөр пөрöдны вайисны уна пуксьöдöмаöс. Налөн лыдыс Комиын пыр содiс да регыдъя кадөн лои татчöс олысьясысь унджык, көть эськö сутшкасьысь сутуга сайын пукалысь войтырлы овны да уджавны вöли зэв сьöкыд.

Буретш 30-öд воясö тэчсьö республикаса индустриялөн подулыс. 1937-öд воö индустриялөн пайыс овмöслөн ставторсö вöчöм-лэдзöмын кыптiс 75 прöчентöдз.

30-öд воясын лои шензьöданатор — Коми АССР юкис быттьö кык юкөн вылö: öтиас выналіс гражданскöй, республикаса власьт, кызвынсö лунвывса да войвылын сиктса районъясын, мöдас — выналісны СССР-са шөр комиссариатъяс НКВД юрнуöдöм улын Ухтаын, Вөркутаын, тайö вöли ГУЛАГ*-лөн юкөн, кодi кывзысьліс сöмын Канкарса тшöктöмъясысь. Коми АССР-лөн кутшöмкö кыв ни көсьöм мöд юкөныслы эз мөрччы. Москваса шөр комиссариатъяс вöчисны Коми муын мый көсьисны. Тадзи Коми АССР-лөн ашшөрлуныс вочасөн быри, коли сöмын мода вылас. Сöмын культураын, йöзöс велöдöмын, искусствоын кольліс коми ногса руыс.

4 ю к ö н

Культура сöвмö да падмö

30-öд воясö водзö вöвлытöма öдйö паськаліс йöз пöвстын грамота, сöвмис коми школа, литература, театр. Рокöсыс вöли бур — 20-öд воясын культуралөн шензьöдана сöвмöм-кыпалöмыс. Öттшötтш чужисны культура быдмöмлы зумыд мытшöдъяс, сійöс пондiс личкыны-пöдтыны партиялөн идеология, Сталинлөн дзоридзалысь культыс.

30-öд вояс заводитчигөн водзö сöвмö коми кыв, сійö

* ГУЛАГ — рочөн тайö Главное управление лагерей, НКВД-өн веськöдлан лагеръяс, дзескыдiнъяслөн вез, паськавліс канму пасьтала, торйөн нин Войвылын, Сибириын.

паськалӧ, лоӧ тырвыйӧ каналан кывйӧн. 1930-ӧд вося кӧч тӧлысьӧ ВКП(б) обком да Облисполком шуисны вуджӧдны коми гижӧд молодцов анбур выльысь латин анбур вылӧ. Регыдъя кадӧ, сьӧкыдлунъясӧн, йӧзыс выль ног велӧдчисны гижны, выль шыпасъяс вылӧ во-мӧдӧн вуджис школа, небӧг-газет лӧдзӧм, делӧяс нуӧдӧм. Но тайӧ анбурис оліс эз дыр. 1935-ӧд воын нин пондӧсны вуджны бӧр молодцов анбурӧ, а 1939-ӧд воын бырӧдісны молодцов анбур, вуджисны ӧнія шыпасъяссӧ, (і, ӧ) кык латин шыпас содтӧмӧн. Латин анбур вуджӧдысьясӧс, сійӧс ошкысьясӧс сӧсса 30-ӧд вояс помын мыжалісны национализмысь, пуксьӧдалісны, шуам, нималана кыв туялысьяс А.С. Сидоровӧс, В.А. Лыткинӧс. Пуксьӧдісны тшӧтш В.А. Молодцовӧс сыысь, мый латин анбурӧ вуджӧдӧмыслы паньд мунлӧма да водзсасьлӧма.

Коми му пасьтала ӧдйӧ сӧвмис ас кывъя школа. 1936-ӧд во кежлӧ быд кага мунліс да помавліс ичӧт школа, став челядысь 80% вӧлі пырӧ сизим класса школаӧ, сӧки уджаліс нин Комиын ас пединститут (вӧлі восьтӧма 1932-ӧд воын). Таысь кындзи Сыктывкарын, Емдінын да Мокчойын уджавлісны педучилищяс. 1940-ӧд воын Коми АССР-ын вӧлі нин 375 ичӧт школа, 103 сизим класса да 27 шӧр школа. 1938–39-ӧд велӧдчан воӧ став школасыс 71,8% уджаліс-велӧдіс коми кывйӧн, 7,4% комиӧн да рочӧн, 20% рочӧн сӧмын. Став шӧр школалы вӧлі дасьтӧма коми кыв вылын велӧдчан небӧгъяс, быд велӧдантор кузя ставсӧ вӧлі комиӧдӧны, лӧдзӧны мусерпасъяс да глобусъяс, таблицаяс челядылы чужан кывйӧн.

Паськалісны клубъяс, 1940-ӧд во кежлӧ налӧн лыдыс содӧма 269-ӧдз. Сыктывкарын уджалісны коми да роч драмтеатръяс. 1939-ӧд воын вӧлі котыртӧма «Асья кыя» сылан да йӧктан ансамбль. Петалісны районъясын газетъяс (ставыс комиӧн, Чилимдін районысь кындзи), вӧлі республикаса 4 газет, на пиысь куимыс петаліс комиӧн («Коми кӧлхозник», «Вӧрлӧдзысь», «Коми комсомолец»), ӧти рочӧн («За новый Север»). Литература журналлӧн нимыс вежсис — «Ордымысь» лои «Ударник».

Ним вежӧмыс петкӧдлӧ дзоньнас литературайысь гырысь вежсьӧмъяс. Ӑти боксянь кӧ, сійӧ водзӧ кыпаліс-сӧвмис.

Сідз, 30-өд воясö пырисны литератураö выль том гижысь-яс: Педь Гень (Г. Фёдоров), Луздор Вась (В. Юхнин), Или-вапыс (И. Пыстин), В. Елькин, В. Латкин, А. Размыслов, Митрук Як (Я. Рочев), Н. Фролов. Сöвмис поэзия, проза, петісны повесътъяс да медводдза коми романтъяс. Медводдза коми романтъяс кыпöдісны ас войтырлысь тема, гижысь-яс зілісны гөгөрвоны коми войтырлысь вужъяссö, нэм-вöйся оланногсö. 1936-өд воын «Ударник» журналын Павел Доронин йöзöдö «Парма сьölöмын» романысь воддза юкөнъяссö, сёрниыс сәні мунö Печора йывса сикт йылысь германечьяскöд тыш водзвылын. Тайöтор йылысь сёрни-ыс мунö тшöтш 1939-өд воын «Ударникын» жö йöзöдöм Василий Юхнинлөн «Алöй лента» романлөн медводдза юкөнын. Вöралысьяс, му вöдитысьяс, ай-мам да верстьö челядь, удж, радейтчöм, XX-өд нэм заводитчан кадся став олөмсö збыльысь петкөдлöма. Илья да Вера — том йöз, быдмöны-верстяммöны, пырöны йöзкост олөмö. Но помöдз збыля войтырлысь сәкся олөмсö петкөдлыны оз нин вöлі позь. Официальной критика корис гижны ВКП(б) олөмын тöдчöм йылысь, коммунистъяслөн историяын правлун йы-лысь. Мыжалөмтъясысь полөмөн П. Доронин дугдöма гиж-ны романсö помöдзыс, мөд гижөм юкөнсö сотöма.

Коммунист ютырлөн веськөдлөм-кесйөдлөмыс пырис литератураö, партияса критикъяс пондісны чорыда велөд-ны, кызди гижны да мый йылысь, мый оз ков гижны. Став енбиа гижөдсö, кодтъяс кыпöдісны 20-өд воясö коми лите-ратура, пондісны мыжавны, видны, сьөдөдны. Мыжавны кутісны тшöтш гижысьяссöс. Литература донъявлісны эз эстетика боксянь, сйöс лыддыны кутісны ВКП(б)-лы от-сасьысьөн, социализм кыпөдан инструментөн. Та йылысь да коми гижысьяслы паныд репрессияс йылысь унджык лоö юөртöма водзö, 16-өд юрпасын.

30-өд воясö зэв аслыспөлöса вöлі йитчöма öтлаö лөкыс да бурыс, йирмөг петкөданаыс да лача сетанаыс. Комиын, дзоньнас Сöвет Öтувлунын моз, некутшöм лөнълун да олө-мас зумыллун эз ло, эз виччысьны лөнь олөмсö йöзыс и водзö, сылана-ошйысяна официальной пропаганда вылö видзөдтөг.

Ю а л ö м ь а с.

1. Кутшöм нырвизь пондiс ёнмыны Сöвет Öтувлунун 30-öд воясын?
2. Мый вежсис Коми муын 30-öд воясö, кутшöм лои автономиялöн статусыс да нимыс?
3. Мый вöчсис 30-öд воясö сиктъясын? Кыдзи пыртöдiсны йöзöс колхозъясö?
4. Мый бурыс лои видз-му овмöсын 30-öд вояс помлань?
5. Кутшöм йöз отсöгөн лэптiсны виль шахтаяс, нюжöдiсны көрт туй?
6. Кыдзи сöвмис 30-öд воясö Коми АССР-ын культураыс?
7. Кутшöм гижысьяс сэки пырисны коми литератураö?





16 ю р п а с

УСТЬ-СЫСОЛЬСКЫСЬ ЛОӦ СЫКТЫВҚАР

1 ю к ө н

Усть-Сысольск — Коми обласьтлӧн юркар

Коми автономия лӧсьӧдӧм бӧрын сылӧн юркарӧн лои Усть-Сысольск. Тайӧ кадеяньыс сылӧн тӧдчанлуныс тӧдчымӧн содіс. 1920-ӧд воын кӧ карын да сы матігӧгӧрын олӧма 5929 морт, то 1941-ӧд воӧ Сыктывкарын вӧлӧма нин 32,4 сюрс.

20–30-ӧд воясӧ Коми обласьтлӧн юркар став коми йӧзлы вӧлі ёна нимкодясянтор, сӧвмӧдан-кыпӧдантор. Нӧб-дінса Виттор 1933-ӧд воын коми юркарлы сиис да гижис «Сыктывкар» поэма. Сійӧ тадзи заводитчӧ:

Сыктывкар!

Тэнад история абу зэв ичӧт.

Тӧдӧмысь, дзик пыр тэ карӧн эн ло.

Кар нимсӧ новлӧдлан, честьтӧ эн личӧд,

Сӧ да ветымын дай куимӧд во.

Нӧльсӧ во сайын тэ вӧвлін «починок»,

Куимсӧ сайын тэ вӧвлін «погост».

Ёгорей вичкоа, квайт керка «чина»...

Сэксянь, дерт, карӧдзыд зэв ыджыд кост.

Карын котыртчаліс-чужис уна выль учреждение, найӧ босьтчисны веськӧдлыны политикаӧн, овмӧсӧн да культу-

ра оломён. Тани тшо́кыда мунисны оксьо́маяс, конференция-яс, быдсяма чукор́тчылөмъяс. Карын кутисны велөдны об-ласьтса йөзөс.

1920-өд воын чужо́ Коми небөг лэдзанин. Кутисны пет-ны коми кыв вылын небөгъяс. Чужан кыв бура да пыди-сянь велөдо́м могысь лөсьөдо́ма лои зумыд подув. Йөз зилисны велөдчыны, содтыны ассыныс то́до́млунъяс. Та понда ковмис восьтавны выль школаяс. 1924–1925-өд ве-лөдчан воо́ Усть-Сысо́льскын во́ли 7 первой тшупо́да (ичот) да оти мо́д тшупо́да (шо́р) школа. Сэни велөдчис 1283 морт, медсясо́ Усть-Сысо́льскысь, Сыктыв, Емдин да Куло́мдин уездъясысь. 1941-өд воо́ Сыктывкарын уджаліс нин 17 школа, сэни велөдчис 5,2 сюрс морт. Карса олысьяс пөвстысь унао́н зилисны лоны школаса велөдысьясо́н, агрономъясо́н, окотапырысь то́дмасисны Коми муло́н во́р-вао́н, обласьтло́н то́рытъя да аския лунө́н. 1921-өд воо́ карын воссис На-родно́й образование институт да педагогъясо́с дасьтан тех-никум. 1922-өд воын найо́с во́ли отувто́ма, тадзи чужис На-родно́й образованиелө́н практичеськө́й институт (ПИНО). Но институтын бур велөдысьяс эз тырмыны. Та во́сна во мысти институтысь во́чисны педагогика техникум. Сийо́ кадө жо́ Усть-Сысо́льскын вощьо́ видз-му овмо́с техникум. 1922-өд воын котыртчо́ Коми му туялан котыр.

Коми йөзлө́н өдйө́ содо́ грамота, найо́с кыскө́ унджык то́дны ас му йылысь, ас кыв, нималана коми йөз йылысь. 1930-өд вося рака 26-өд лунө́ карлысь роч «Усть-Сысо́льск» ним вежо́ны коми «Сыктывкар» ним выло́. 1936-өд вося өшым 5-өд лунө́ Сыктывкар лои Коми АССР-лө́н юркарө́н.

1932-өд воын Сыктывкарын воссис Коми педагоги-чеськө́й институт, 1934-өд воо́ лөсьөдо́ны тшо́тш туялан институт, сэтчө́с уджалысьяс туялісны Коми мулысь исто-рия, экономика да культура. Тайо́ жо́ воо́ восьто́ны во́р, строитчан, кооперативно́й да медицина техникумъяс, Коми драмтеатр.

Карын олөм-вылөм

Сөвмис Усть-Сысольск, сөвмис сыкөд тшөтш татчөс индустрия. 1921-өд воын карын уджаліс сөмын 16 ичөтик предприятие: куим дорччанін, кучик вөчан куим завод, майтөг вөчанін, типография, электростанция. Ичөтик предприятиеясын уджалісны 1-4 мортөн, типографияын — 24, би сетан станцияын — 11. Усть-Сысольск карса йөз вөдитісны видз-му овмөс. Ас скөт видзисны да му гөрисныкөдзисны сідзжө служакъяс, ремесленникъяс, рабочөйяс.

1926-өд вося августын лэдзисны кык рамаа вөр пилитан завод. Сійө лои Сыктывкарын медся ыджыд предприятие. Сійөс лэптигөн-кыпөдігөн ыджыд отсөг сетісны Кардорысь да Ленинградысь специалистъяс. Айму вөсна ыджыд тыш водзын заводын вөлі уджалө 400 морт.

Карын өна стрөитчисны. Та могысь колө вөлі уна кирпич да мукөд стрөитчантор. Лои кыпөдны Дырнөсө кирпич завод. Карса кооперативъяс вурисны көм-паськөм, дзоньталісны часі, вөчисны гортса эмбур, нянь-булки, коддзөдтөм юанторъяс да уна мукөдтор.

Йөзөс да сөвтас сэки новлөдлісны карын вөвъясөн, нөмөвөйся ногөн. 1930-өд воын Сыктывкарө воис медводдза автомобиль. 1925-өд вося август 14-өд лунө Сыктыв ю вылө пуксис медводдза гидросамолөт. Сэки жө обласьтса да карса веськөдлысьяс, өткымын олысьяс шуисны тэчсьыны 5 шайтөн, медым лэдзны-вөчны «Коми морт» самолөт. Та кузя найө шыөдчисны йөз дорө «Югыд туй» газет пыр. 1929-өд воө Комиө вайисны медводдза самолөтъяс, а во мысти воссис Кардор-Котлас-Сыктывкар авиавизь. Кардорөдз позис воөдчыны квайт часөн (ва туйөд некымын лун).

Юркарысь вичкояс кисьтöм

30-öд воясö вуж выйöн вежсьö юркарса шöриныс, сэтсь жугöдöны-кисьтöны куим мича, изйысь тэчöм вичко. Тайöс вöчисны власьт тшöктöм серти. Тадзи көсийсны бырöдны сардырся олöмысь став коляссö. Эз некод мöвпыштлы, мый архитектуралöн тайö медтöдчана да медваж, медмича стрöйбаяс бырöдöмыс вöлі неморт нога йöйталöм. Бырöдöм вичкояс пыдди сэтшöм жö мичасö нинöм эз кыпöдны.

Юркарын öнiя Вежа Степан изэрд местаын сулавлöма Степан крам, Сыктывланьынджык сулавлöма нöшта кык вичко — **Пöкрöвса** да **Трöицаса**. Бөрья кыксö кыпöдлöмны вöлöм XVIII-öд нэмö на. Медыджыд, зэв ылiсянь тыдалана вöлі **Степан крам**, 47 метра кузьта, 26 метра пасьта, 45 метра джуджта. Кольöм XIX-öд нэмö сийöс лэптöмаöсь, медым нэмьяс кежлö сетны коми йöзлысь казьтылан кыв **Перымса Степанлы**. Йöзсянь, вузасысьсясянь чукöртöм сьöм вылö крамсö стрöитöмаöсь дыр, 1856-öд восянь 1883-öд воöдз, матö 40 во чöж, сэсся 10 во на пытшкөссö мичмöдöмаöсь.

1917-öд вося Йирымса революция бöрын сийö уджавлöма на. Крамö ветлан кевмысьысьяслөн общинаас 1923-öд



Степан крам сулало на

воё пырлөма 63 морт. Сэтчө ветлысьяс вөлөмаоьсь «обновленечьяс», Совет власьтлы паныд найö эз сулавлыны. Тайö эз мезды Комиын медыджыд крамөс тупкөмысь. Медводдзаясь тупкылөмны 1924-öд воё, но локтан онас восьтөмаоьсь бара. 20-öд вояс помлань енмө эскысьяслы лои төдчымөн сьöкыдджык, öд ВКП(б)-сянь вичко вылө личкөмыс сэки ёна содiс. Буретш сэки пондiсны пöдлавны эскысьяслысь обшинаяс да мырддявны налысь вичкояс. Усть-Сысольскын Степан крам вöли тупкөма 1929-öд вося кöч төлысь 1 луно карисполкомлөн индöдөн. Официальнöя помканас шуöма вöли, уджалысь йöзлы пö колöны культура учрежденияяс. Збылысьсö медводдза судтаас восьтiсны сёянiн, мөдас клуб. 1932-öд воын сэсся шуисны разны вичкосö, кирпич абутөм вылө ыстысьöмөн. Медводз взорвитiсны көлөкөлнясö, асьсö, кык судтаа вичкосö, вузалiсны 48 сюрс шайтысь Комилеслы, а 1932-öд вося арын крамсö дзикöдз разисны нин. Чукöртөм кирпичысь вöли кыпöдöма вöрзавод дорын би сетан станция.

Во мысти кисьтiсны Пöкрöвса да Трöицаса медваж вичкояс. Тадзи кисьталiсны вичкояс, часовняяс мукöдлаын. Шуам, сийö воясö разисны Емдiнысь XVIII-öд нэмын кыпöдлөм Вознесенскöй да Благовещенскöй вичкояс. Тадзи сэкся веськöдлысьяс «мичмöдлiсны» обласьтлысь юркарсö. Дзоньнас Сыктывкарын колис изйиь тэчөм сöмын öти вичко, Кырулын.

4 ю к ö н

Карса олысьяслөн олөм-вылөм бурмө

Сыктывкар öдйö быдмис-сöвмис. Содiс карса олысь, медясö сикт-грездьясысь локтысьяс тшöт весьтö. Паськалiс тшöтш карса овмöс. 1936-öд воын Совет улича вылын воссис карын сёян-юанөн вузасян медводдза ыджыд вузасянiн, во мысти — универмаг. 1932-öд воё öнiя вартчанiн бокö лэптiсны карса рынок. Вузасысьяслы кыпöдiсны бур вевт-

ув, лосьодісны быдөнлы вузасян места, тані волысьяс вер-
мисны шырсыны, тшай юыштны, шойччыштны.

Карын ёна стрөйтчисны канму отсөгөн, сэтчөс олысьяс зільмөн. Быдмисны ёнджыкасө өти да кык судтаа пу кер-
каяс. Учреждениеяс кыпөдоны вөлі медясө кирпичысь. Сідз, 1940-өд воын 1390 керкаысь сөмын 29-сө вөлі лэптө-
ма изйысь. Сійө воясө Коми пединститутлы стрөитісны выль велөдчан корпус, Печать керка, мукөд стрөйба, а 1939-өд
воын Киров улича вылын кыптис канализация, пось ваа, ваннаа медводдза олан керка. Во мысти Ленин улич вы-
лын воссис кинотеатр (өнія «Родина»). Кыдзи аддзанныд, ыджыд тыш водзвылын нин Сыктывкар ичөтик карысь
вочасөн быдмис Коми мулөн индустрияа да культураа шө-
ринө.

Нёбдінса Виттор 1933-өд воын «Сыктывкар» поэма ги-
жигөн донъявліс став выль вежсьөмсө бурсьыс-бурөн. Сійө серпасалө кар быдмөмсө тадзи:

Тэнад быдлаын өдъяс гырысь,
Выль, сөветскöй Сыктывкар!
Быдман збоя, нимкодъпырысь,
Пытшкад ыпъя көсьян жар.

Со — тэ гөгөр выль заводъяс,
Кыптө кык выль комбинат,
Чужө-быдмө тайө подъяс
Коми пролетариат.

Енлы эскөм оз нин личкы,
Быри звөнөн лөвтан гор:
Эз ло ыджыд Степан вичко,
Эз ло варгыльтчөм собор...

30-өд воясө унатор лои Сыктывкарын тшөтш мөд ног,
лөк ног, медводз вежсис сынөдыс, йөзыс. Карса дзескыдін
тырны кутіс «войтырлөн вөрөгъясөн», вөвлөм нималана,
бур, енбиа йөзөн, юркар гөгөрын быдмисны сутшкасысь
сутугаөн потшөм дзескыдінъяс. Та йылысь лыдды водзө
воана юрпасысь.

1. Мый вöсна Усть-Сысольск лои Коми обласът шöринөн?
2. Мыйтор висьталіс сы йылысь, мый карса олысьяс зільöны вöлі велöдчыны?
3. Кор карлысь Усть-Сысольск нимсö вежисны Сыктывкар вылö?
4. Кутшöм предприятиеяс кыптисны Сыктывкарын?
5. Мый серти тыдаліс, мый карса олысьяслөн олöмыс вöлі бурмö?
6. Кытчö вошис юркар шöрысь изйысь лэптöм куим ыджыд да мича вичко?
7. Висьталöй Степан крамлөн история йылысь?
8. Кутшöм ыджыд гижöд кутшöм коми кывбуралысь гижліс Сыктывкар йылысь да кор?
9. Кыдзи вежсис карлөн чужöмбаныс 1930-öд вояс помö?





17 ю р н а с

1937-өд ВО — МУ ВЕЖАНДЫР

1 ю к ö н

Сталин — му вылын ен

30-өд вояс помланьö Коми муын пуксис му вежандыр. Ставнас сöвет канмуын пестысис йöзöс бырöдан би, тайöс пестысьнас вöли Сöвет Öтувлунöн сэкся веськöдлысь **Иосиф Сталин** (1878–1953). Канмуөн да коммунист ютырөн сийö веськöдлис 1922-өд восянь 1953 воөдз, кувтöдзыс. 20-өд вояс помсянь кыптис сылөн культ, кор öти вождьöс вывтi кыпöдiсны-ошкисны, ен пыдди пуктисны. Ортсысянныс тайö быттьö бур, тöждысьысь, вежöра нырнуöдысь, ыджыд юралысь. Сталинöс нимöдiсны, сывлiсны сылангъяс, матö быд лун газетгъясын петавлiсны сылөн *чужöмпасгъяс*. 30-өд воясö пуксьöдлöм коми гижысь Н. Попов «Шуда синва» висьтын гижö:

«Быд асыв энä-ныла орччөн мунлiсны карса улича кузя пöвгъясысь вöчöм паськыд москияс вывтi, важ коргъя пуяс пöлөн. Детсад водзын öшинь улас быдмöны дзоридзгъяс. Неважөн сэтчö, дзоридзгъяс пöвстас, сувтöдiсны скульптура. Зэв мичаöс, ставнас еджыд. Скульптураыс петкöдлö туша джын выйöныс дядьöс, паськыд да нывкöс пельпомгъясаöс. Дядьö копыртöма юрсö да видзöдö морöс бердас топöдöм кага вылö, чужöм тырнас мелiа нюмгъялö, весиг ускыс нюмөн шевкнитчöма.

— Мамö, коді тайö дядьöйс? — юаліс Нина, кор пер-
войысь аддзис скульптурасö.

— Тайö, Ниночка, дядя Сталин.

— Мамö, видзöдлы, кутшöм мелі!»

Сöмын Сталин ёрт эз вöв мелі, вöлі вöвлытöм лёк.

Н. Поповлөн висьтын буретш сійö луннас Ниналысь мамсö
мыжтöг пуксьöдöны дзескыдінö. Татшöм шогыс суліс
30–50-öд воясö уна сюрс мортöс.

И.В. Джугашвили (Сталинлөн) мөвп серти, социализм
öти канмуын стрöитіг ёна ёсьмö классъяскостса тыш,
быдласянь кыпöдчöны «народлөн врагъяс». 30-öд вояс
помлань, торйөн нин 1937–38-öд воясö, политикаысь
вөрöгъяс корсьöмыс, збыльысьсö мыжтöг пуксьöдöмыс
вöвлытöма содіс. 20-öд воясö кö пуксьöдавлісны вöвлöм
еджыдъясöс, эсеръясöс, попъясöс, ютырын Сталинлы паныд
мунысьясöс, то 30-öд воясö карайтысь шыпуртыс пондіс
керавны ас коммунистъясöс, армияса офицеръясöс, быдсяма
веськöдлысьясöс. Йöзыс пондісны вузавны öта-мöдсö,
удтысьны, мыжавны ёртъяссö, чöвтчыны бать-мамысь, чоя-
вокасыс. Пуксис му вежандыр. Торйөн йирмöг босьтана
аскылöм вöлөм Коми муын, нейджыд юркарын да вöвлöм
лөнъ сиктъясын.

2 ю к ö н

Веськöдлысьясöс «весалöм»

30-öд вояс помын Коми АССР-са НКВД паніс зэв уна
делö сы могысь, медем мыжавны 20-öд воясын ёна уджа-
лысь да нималана йöзöс, коми автономиялы подув пуктысь-
ясöс. Вöлі висьталöма нин **Дмитрий Батиевлөн** туй
йылысь, сійöс вöлі лыйлöмаöсь абутöм контрреволюция
вöсна. Сутшкасысь сутуга сайö сійö каднас веськавны вöлі
зэв кокныд. Колхозъясса уна веськöдлысьöс пуксьöдлісны
«вредитчöм» понда, НКВД-саяслы тырмымөн вöлі мы-
жалöм вылö быдсяма ылöга гижöд, удтысьöм, телефон пыр

юөртөм. Сідз, 1938–1939-өд воясө республикаын вежсьома колхозъясысь 465 веськөдлысь, либө став веськөдлысьлөн джынйысь унджык. 1937–1938-өд воясө Коми АССР-са НКВД кыома ыджыд вез зэв уна сэкся нималана йөзлы, Сыктывкарса дзескыдинө став совет канму пасьталаысь чукөртөмабсь веськөдлысьясөс, туялысьясөс, гижысьясөс, өттшөтш контрреволюция да национализмысь найөс мыжалөмөн. Тадзи вөлөма Совет Өтувлун пасьтала, канкарсянь местаяс вылө ыстылөмабсь вөлөм индөдана лыдпасъяс, кымынөс колө пуксьөдны воон, төлысьөн. «Революциялөн рыцаръяс» татшөм ногөн тшөтш тыр-талөмны да вевтырталөмны асьыныс планъяссө.

Гырысь веськөдлысьяс пөвстысь пуксьөдлісны Коми АССР-са облисполкомөн веськөдлысьясөс И.Г. Коюшевөс да Ф.И. Таракановөс, перым-коми автономия кытш подула-лысьөс, йөзкост овмөсынгырысь котыртысь А.И. Бабушкинөс да уна мукөдөс. Ставсө лыддьөдлыны кабалаыс оз тырмы. Тані висьтыштам сөмын өти веськөдысьлөн шога туй йылысь.

Варышлөн бөръя лэбзьөм

Афанасий Маеговлысь нимсө сетөма юркарса 35-өд номера школалы да өти уличлы. Сійө төдса кызди ХХ-өд нэм заводитчигөн медводдза коми гижысьясысь өти, пондылөма кывбуръяссө гижны 1912–1914-өд воясын на, кырымасьлөма Варыш нимөн. Чужлөма Варыш 1893-өд вося сора төлысь 3-өд лунө Сыктывдинкарын, голь кресьянин котырын. Айыс водз кувсьома. Быдтөма сійөс Василей вокыс, велөдөма карса велөдчанінын, а 1908-өд восянь 1912-өд воөдз велөдчөма велөдысьясөс дасьтан Тотьмаса семинарияын. Сэні сійө ас пытшкас босьтөма революция дорө синан нырвизьсө, медводз сарлы паныда мөвпъяс. Сэні сійө котыртөма коми велөдчысьяслысь землячество, босьтчөма гижны комиөн чуксалана кывбуръяс. Сэсся кык во велөдөма челядьөс Нёбдин сиктын. 1914-өд восянь германскөй фронт вылын, быдмөма армияс поручикөдз.

1917-öd восянь зіля пырö политикаö, сулавлöма медводзсö эсеръяс дор, сэсса 1918-öd вося йирым тöлысь 1 лунсянь пырö большевик ютырö. Дерт, медводз А. Маегов аддзöма революцияс чужан войтырлы мезд, важ увтыртöмöс бырöдöм. Та вöсна сійö повтöг тышкасьö еджыдъяслы паныд 1918–1920-öd воясö войвылын, Удораын, Сыктыв да Эжва вожъясын, Вынва дорын. 19–20 арöса зон веськöдлöма полкөн. Сэсса 1922-öd воөдз тышкасьöма Украинаын бандаяскöд, та бöрын воöма сöмын на котыртöм Коми автономия обласьтö да уджалöма 1926-öd воөдз юралысьöн уна ведомствоын. Варыш зіля тышкасьлöма тшöтш быдсяма оппортунистьяскöд, вöлöма ВКП(б)-лөн зэв яр да кывзысьысь салдатөн. 1927-öd восянь А. Маегов велöдчö Канкарын Гөрд профессура институтын, лöф философия кандидатөн. Уджалö сэсса «Под знаменем марксизма» журналын, быдтö Спартак писö сöвет му патриотөн.

Но 30-öd воясö весигтö татшöм сöвет власьт дорйысьяслысь, яр коммунистьяслысь голяяссö песовтлісны. Тадзи лоис тшöтш Варышкöд. 1936-öd воын Варыш уджалöма Челябинскса обласьтын. НКВД да ВКП(б)-лөн Коми обком судзöдöмаось сійöс и сэтысь. 1937 воын сійöс вöтлісны ютырысь, 1938-öd вося йирым 25-öd лунö УНКВД пуксьöдіс сійöс. Юасьöмъяс дырйи нöйтöмөн пычкылöмаось признайтчöмъяссö, юасьöмъясыс кысьсöмны 10 час чöж. Пуксьöдöмаось 8 во кежлö троцкизмысь да вредитöмысь, мөдöдöмаось пукавны чужанінас, Ухтижемлагö. Сьöкыд уджысь да висьöмъясысь Варышлөн олöмыс орöма 1942-öd вося төв шөр 30-öd лунö, сійöс дзёбöмны öтувья гуö Ветлосян лагпунктын.

З ю к ö н

Туялысьясöс да гижысьясöс — дзескыдінö

Коми АССР-са НКВД-өн кыöм везйö кыялісны зэв унаос эз сöмын 20–30-öd воясса веськöдлысьяс-коммунистьясöс, но тшöтш меднималана да енбиа гижысьясöс да туя-

лысьясӧс, кодъяс 20-ӧд воясӧ кыпӧдісны коми литература да наука. Висьталӧма нин вӧлі «Коми му» журнал тупкӧм йылысь, сійӧс нимтісны кулак, буржуазия дор сулалысь да национализм пестысь органӧн. Сэтчӧс став уджалысьсӧ да гижысьсӧ зілісны пуксьӧдавны, корсисны Совет канму пасьтала да вайӧдалісны конвой улын аддзӧм-эрдӧдӧм «шпионъясӧс» да «вредитысьясӧс».

Коми литератураын 1937–1938-ӧд вояс — сьӧд кадко-ласт. Сэки пуксьӧдісны Коми гижысь котырысь матӧ ставнысӧ (Нёбдіна Витторӧс, Илля Васьӧс, Тима Веньӧс, на йылысь небӧганым висьтыштӧма нин). Пуксьӧдтӧг вӧлі кольӧма сӧмын Юсь — М.Лебедев. Пуксьӧдалісны эз сӧмын быдӧнлы тӧдса классикъясӧс, кӧрт роскӧн шердйисны тшӧтш томъясӧс, быдмысь-верстяммысь гижысьясӧс — Иван Симаковӧс, Виль Пашӧс (Павел Шеболкинӧс), Изъюр Иванӧс (Иван Изъюровӧс), Н.Поповӧс, Шыладорса Мишӧс (Михаил Доронинӧс), тшӧтш енбиа да зіль туялысьсӧс. Сы йылысь колӧ пасйыштны неуна унджык.

Шыладорса Мишлӧн туй

Михаил Павлович Доронин чужлӧма 1902-ӧд вося кӧч тӧлысь 2-ӧд лунӧ Сыктывдін районса Шыладор сиктын. Овлӧмаӧсь гӧля, та вӧсна весиг школаӧ абу ветлӧма. Та пыдди велӧдчӧма ачыс, а 1921-ӧд воын пырӧма медводдза тшупӧда совпартшколаӧ, сэсса 30-ӧд вояс заводитчигӧн помалӧма редакторъяслысь курсъяс. Том морт ӧдйӧ быдмӧ удж кузяыс: 1935-ӧд воын юрнуӧдӧ нин Коми гижысь котырӧн да редактируйтӧ «Ударник» журнал. Но мыжалан машинаыс НКВД-лӧн ӧддзӧма нин вӧлі. Друг, виччысьтӧг 1937-ӧд вося йирым 7-ӧд лунӧ сійӧс вӧтлӧны ютырысь да сійӧ луннас тшӧтш нюжмасьтӧг пуксьӧдӧны. Мыжалісны сыысь, быттьӧ сійӧ важӧн нин нуӧдӧ пӧ гуся удж сы могысь, медым путкыльтны совет власьт, торйӧдны Коми обласьт СССР-ысь да лӧсьӧдны ашшӧр Коми буржуазной республика. Шыладорса Миш эз копырт юрсӧ, мыжаӧн асьсӧ эз шу, сёрни гижӧдас абу кырымасьӧма, мортӧс абу удтӧ-

ма-лякӧма. Та вылӧ да мыж абутӧм вылӧ видзӧдтӧг НКВД-лӧн торья чукӧртчӧм мӧдӧдӧ сийӧс уджалан лагерӧ (колонияӧ) 5 во кежлӧ. Сэтысь гижысь абу нин бергӧдчӧма, 1939-ӧд вося ӧшым 13-ӧд луно М.П. Доронин кувсьӧма.

Татшӧм рӧкыс суӧма тшӧтш сэкса этшаник коми туялысьӧс, медводз 1933-ӧд воын пуксьӧдӧмны СОФИН делӧ кузя Илля Васьӧс. Та бӧрын судзӧдалісны мукӧдӧс ылі карьясысь, сы понда мый таӧдз унаӧн пышйылӧмаӧсь Коми обласьтысь кодӧ кытчӧ. Висьтыштам кык гырысь коми туялысь йылысь.

Алексей Семенович Сидоров (1895–1953) 1837-ӧд воын оліс да уджавліс Ленинградын, Кыв да гижӧд туялана институтын. Сэк кежлӧ сийӧ нимавліс кызди гырысь туялысь, кыв, литература, этнография, археология кузя тӧдчана специалист. Буретш сэки дасьтӧ вӧлі И.А. Куратовлысь гижӧдъяссӧ йӧзӧдігкежлӧ. 1937-ӧд вося кӧч тӧлысь 21-ӧд луно войнас нин сийӧс пуксьӧдӧны да этапӧн мӧдӧдӧны Сыктывкарӧ, сэсса йӧршитӧны дзескыдинӧ «революциялы паныд уджысь» 3 во кежлӧ. Став гижӧд-документъясыс сылӧн сэки вошӧма. Олӧм помӧдзыс А.С. Сидоров, кӧть сэсса дорьяс кандидат да доктор ним вылӧ диссертацияс, олӧма «народлӧн враг» пасӧн, сэкса сӧвет канмуын медся увтыртана, шогмытӧм олысь туйын.

Ёна шогджык вӧлӧма олӧм помыс **Василий Петрович Налимовлӧн** (1879–1939), Выльгорт сиктысь петлӧм нималана туялысь-этнографлӧн, профессорлӧн. Сидоров моз, В.П. Налимов чужлӧма гӧль кресьянин котырын да ачыс велӧдчӧма медводз пельшерӧ. Сэсса нин 7 во пельшералӧм мысти воӧма Канкарӧ да велӧдчӧма 1907–1912-ӧд воясӧ университетын. 1918-ӧд воӧ быдмӧма профессорӧдз. Сийӧ вӧлі медводдза коми этнограф, нэмӧвӧйся оласног да традицияс туялысь. 20-ӧд воясӧ ёна зільӧ туявны ичӧт вытьръясӧс, ветлӧ уна экспедицияӧ. Збыльысьсӧ В.П. Налимов абу овлӧма Комиын, сӧмын йӧзӧдлӧма гижӧдъяссӧ «Коми му» журналын. Сӧмын тайӧ абу кутӧма сийӧс неминучаысь: 1938-ӧд вося моз тӧлысь 25-ӧд луно сийӧс Кан-

карын пуксьөдöмаöсь, а ар помлань подöн вайöдöмаöсь Сыктывкарö. Пöрысь мортöс нин видзöмаöсь дзескыдінын, корсьöмны да кöвъявлöмны абутöм мыжъяс. Съöкыда висьмöм бöрын профессор Налимов 1939-öд вося öшым тöлысь 28-öд луно кувсьöма сыктывкарса дзескыдінын.

30-öд вояс помын коми литература да наука зэв унатор воштис, дыр кежлö вушйылісны уна йöзлөн нимъяс. Небөгъяс да гижöдъяс вöлі бырöдöма, ловйöн кольöм коми интеллигенцияöс повзьöдöма лои, эбөссö бырöдöма. Медыджыд воштöмыс — торксис культура сөвмöдан традицияыс, сöмын 50-öд вояс помын вошлöм нимъясыс воисны бөр ас войтырлы.

4 ю к ö н

Вичкояслөн, попъяслөн пом

30-öд вояс помын репрессияяс суисны уна попöс, вичкоын кесъялысьöс, көть эськö найö унаöн эз нин сэки попавны. НКВД-саяс сюся корсьысьöны вöлі вөрөгъясöс вичкоö ветлысьяс пöвстысь, вöвлöм попъясысь. XX-öд нэм заводитчигөн Коми муын вöвлöма 113 поп да дяк, уджавлöма 152 вичко да 249 часовня. 20-öд воясö вичкояссö ёна пöдлавлöмаöсь, 30-öд воясö кольöма сöмын 30 кымын уджалысь вичко, кызвынсö сöмын гырысь сиктъясын. Тышкасян атеизма канмуын попъяс лöмны повзьöдчанторйөн. Сідз, 1923-öд воын вöлі пöдлалöма Уллыана манастыр, сэтчöс манакъясöс пуксьöдавлісны 30-öд вояс помын, быттöкö коммунист ютыр да сöвет канму паныд гуся уджысь. Вичкоын кесъялысьяслысь курыд олан помсö серпасалам öти морт йылысь висьтөн. Мортыс тайö вöлі медводдза коми гижысь Иван Куратовлы рöдвужа морт, кывбуралысьлысь гижöдъяссö видзысь, бур да велöдчöм поп.

Степан Куратов вежаайлөн туй

Иван Куратовлы Степан Афанасьевич Куратов вөлөма вежапи (племянник). Чужлөма сійө 1867-өд вося рака төлысь 30-өд лунө Межадорын поп семьяын. 1891-өд воын помавлөма Вөлөгдаса духовной семинария да сы бөрын 1899-өд воын велөдлөма Ен оланпас Помөсдін земствоса велөдчанінын. 1899-өд воө сійөс вуджөдөмаөсь попавны бөр чужанінас, Визинса Трөица нима вичкоө. Степан Куратовлөн вөлөма ыджыд *небөгкүд*, став көкъямыснас челядсө быдтөма да бура велөдлөма. Тшөкыда да зіля вичкоас лыддылөма комиөн, медым роч кыв төдтөм йөз вермисны пыдіа гөгөрвоны Ен кывсө. Иван Куратовлысь кывбуръяссө бура видзлөма, некодлы абу сетлөма бокө, сылысь гижөдъяссө С.А. Куратов сетөма 1922-өд воө сөмын А.С. Сидоровлы, аслас зятлы, сэки төдчана кыв туялысьлы нин.

20-өд воясө сөвет власьт пондөма вичкояс топөдны, уытырты енлы эскысьясөс. 1929-өд воын С.А. Куратовөс судитөны нянь поставкаяслы паныд агитацияысь быттьөкө, сәсся судитөны 1930-өд воын вот мынтытөмысь, 1933-өд воө пуксьөдөны «контрреволюция уджысь». 1930-өд воын Визинын вичкосө тупкөмаөсь, йөзыс воывлөмаөсь кевмысьны-юрбитны Степан Куратов керкаас. Тайө чукөртчөмьяссө лыддымаөсь власьтлы паныд агитацияөн. Удтысьөм подувылын 1937-өд вося моз төлысь 5-өд лунө вежаайөс пуксьөдөны, моз 29-өд лунө УНКВД-лөн «тройка» чукөртчөм вылын шуөны С.А. Куратовөс лыйлыны. Кык лун мысти 71 арөса пөрысь мөртөс лыйлөмаөсь. Сійө луннас тшөтш бырөдөмаөсь Селиб сиктысь поп Бронников Григорий Алексеевичөс. Татшөм помыс вөлі зэв уна вежаайлөн. Енлы эскысь мөрт, торйөн нин вичкоын кесъялысь, сійө кадсяньыс лои официальной видчана кывйөн, тешитчанторйөн. Татшөм вөлөма сөвет канмуын «тышкасян атеизмысь».

Коми му — ГУЛАГ-лөн юкөн

30–50-өд воясö Совет Öтувлунын вынавліс канму пытшыкын торъя канму — ГУЛАГ (Главное управление лагерей, трудовых поселений и мест заключения), сійö котыртöма вöлі 1930-өд воын, 1934-өд восянь сійö лои НКВД-лөн юкөн. Буретш тайö «канму» отсөгөн, зэв донтöм уджалан вынөн лои регыдъя кадөн кыпöдöма енмөн вунöдöм инъясын, Войвылын, Сибирын ыджыд индустрия. Комиын ГУЛАГ-ö пырлöма 13 организация, быдсяма лагерьяс да колония чукөрьяс (медыджыдыс Воркутлаг, сэсся Ухтпечлаг, Ухтижемлаг, Сыктывкарса дзескыдін да мукöдъяс). Уна сюрс мыжтöм мортöс подөн, паракодөн, сэсся поездөн вайöдалісны Комиö мукöд инъясысь. Пукалысь йöз лыдыс Комиын 1938-өд воын содöма 125242 мортöдз, Коми АССР-ын став олысь лыдысь тайö вöлöма коймöд пайыс. Быд коймöд олысьыс пукавлöма. Коми кывйын сэки чужöма весиг **уселон** видчан кыв, öнöдз на пöрысь йöзсянь позьö кывлыны «**уселон кодь**», «**уселон моз пасьтасьöма**». Уселон нимыс артмö УПСЕВЛАГ (Управление северных лагерей) дженьдöдöм кывйысь. Коми му тыртöма лои пуксьöдöм йöзөн да сутшкасысь сутугаөн кытшовтöдöм йора лагерьясөн.

Пукалысьяс кыпöдісны заводьяс, шахтаяс, мусир перьянінъяс, пöрöдісны вөр, медыджыд стрöитанторйыс налөн Котлас—Вөркута көрт туй, сы гөгөр кузяла сулалöны вöлі лагерьяс. ГУЛАГ канму век паськаліс, сылы век ковмывліс содтöд йöз, уджалан вын. НКВД тайö вынсö тыр-бура да öдйö сетавліс, сюрсъясөн пуксьöдавліс аддзöм «вөрөгьяссö», кызвынсö дзик мыжтöм йöзöс. Йöзöс бырöдан, дзескыдінö йөршитан татшöм кадыс кысьöма 50-өд воясöдз. Но та йылысь лоö торъя висьт.

Ю а л ө м ъ я с д а у д ж ъ я с .

1. Кутшөм мортлөн культ паськаліс 30-өд воясө? Мыйөдз сійө вайөдіс?

2. Кутшөм йөз веськавлісны «народлөн врагъясө»?

3. Кутшөм коми веськөдлысьясөс мыжтөг пуксьөдісны? Висьталөй Варышлөн туй йылысь.

4. Кутшөм коми гижысьяс веськалісны дзескыдінө?

5. Мый лои уна коми туялыськөд 1937–1938-өд воясын?

6. Висьталөй вичкоын кесъялысьяслөн олан туйяс йылысь.





18 ю р п а с

АЙМУ ВӨСНА ЫДЖЫД ТЫШ

1 ю к ö н

Чужан му дорйысьяс

1941-өд вося лөддза-номъя 22-өд лунө канму вылө виччысьтөг уськөдчис фашист Германия. Тадзи пансис Айму вөсна ыджыд вир кисьтана тыш. Коми муын олысьяс лөгпырысь кывзисны тайö курыд да лөк юöрсö.

Войналөн мөд лунө нин йөзöс кутисны босьтавны фронт вылө, унаөн ас көсийм серти мунлисны вөрөглы паныд. Артыштöма öнi, мый тыш воясö фронт вылө Коми муысь мунлöма 170 сюрс сайö морт. На пиысь 58 сюрс мортыс бöрсö абу воöмаöсь чужанinö, пуктöмаöсь ассыныс юрнысö пеж вөрөгкөд тышын.

Коми АССР-ысь петлөм-воём йөз тышкасьöмаöсь быд фронтын. На пöвстысь унаөн паныдалöмаöсь вөрөгöс мудор вылын на, сетöмаöсь сылы бур водзöс. Сидз, Румыниякөд мудор бердын сулалысь «Стояновка» нима застава, көнi служитис коми морт, отделениеөн веськөдлысь сержант М.Е. Тимушев, быдса дас лун кутöма немечöс водзö мунöмысь. Повтöмлунысь М.Е. Тимушевлы сетисны Ленин орден. Миномётчик Василий Космортов пуктис юрсö войналөн медводдза лунö, Брестса изкар дорйигөн. Печораысь бортрадист Алексей Калинин, кодi лэбалис капитан Н.Ф. Гастеллокөд öтлаын, повтөг пуктис юрсö, медым сотчысь усян самолётөн нырыштны унджык вөрөгöс.

Ыджыд туй мунис-вуджис съёкыд тышгъясөн 28-öd но-
мера Невельса стрелкөвöй дивизия, сәни унджык салдатыс
вөлөма Коми муысь. Найö мездисны вөрөгысь Великие
Луки, Новосокольники, Невель, Себеж каръяс, лыдтөм
сикт-грезд. Сідз, Великие Луки кар мездөм дырйи пов-
төмлунуысь 50 коми салдатос да офицерос вөлі пасйöма ор-
денгъясөн да медальясөн. Кык орден вичмис дивизияса том
йözös котыртысь майор А. Ракинлы, кодi коркө уджавліс
комсомол Коми обкомса секретарөн.

Вир кистана тышгъясын повтөмлун петкөдлөмысь Айму
вöсна ыджыд тыш воясö Коми АССР-ысь 26 мортлы вөлі
сетöма Совет Öтувлунса Геройлысь ним. Со налөн нимгъ-
ясыс: М.А. Бабинов, Н.С. Бойков, М.П. Бочаринов, И.М. Во-
ротынцев, Н.Н. Габов, И.С. Гаврилов, И.П. Горчаков,
Н.Ф. Гуцин, Н.П. Давидович, А.Д. Данилов, В.И. Дончук,
В.П. Кисляков, И.П. Лешанов, В.И. Лобанов, Н.Д. Марин-
ченко, М.Д. Никишин, Н.В. Оплеснин, С.А. Сердитов,
Г.Е. Собянин, П.С. Сафронов, Г.Ф. Тимушев, А.Г. Хатан-
зейский, С.М. Черепанов, А.И. Черкасов, А.Е. Чупров,
А.А. Шевелёв.

Коми АССР-са олысыяс пиысь Совет Öтувлунлөн мед-
воддза геройөн вөлі И.П. Марков, сылы герой нимсö сетлө-
маось фингъяскөд 1939-öd вося тышын повтөмлунуысь. Ачыс
И.П. Марков тшöтш тышкасылöма Айму вöсна да усьöма
Ленинградса фронт вылын.

Геройясөн вөліны тшöтш найö, морос вылын кодгъяслөн
дзирдалисны-öшалисны куимнан степеня Нималан орденгъ-
яс. Татшöмыс петіс Коми муысь 8 морт: И.Д. Бажуков,
Н.П. Ерилов, В.А. Забоев, А.И. Павлов, В.А. Соров, А.А. Ти-
мушев, А.Г. Худяков, К.М. Чупров. Тыш бöрын нин Комиö
овны вуджисны А.А. Щипачкин да А.М. Язов.

Коми муысь сё сайö морт ас көсийөм сертиныс, на лы-
дын квайт нывбаба, тышкасис вөрөгкөд Тойво Антикайнен
да Чапаев нима партизан отрадгъясын. Коми войтыр дор-
йис чужан му тшöтш мукөд партизан отрадгъясын: Ленин-
градса, Смоленскса, Новгородса обласгъясын, Белоруссия-
ын, Украинаын, Балтика бердын, водзос сетісны немеч ты-

лын (В.А. Истомин), Францияын, сэтчөс партизанъяскөд тшөтш (А.М. Нечаев, В.А. Панов, Г.И. Сивергин).

Тыш кадö Комиысь петлөм йөз пөвстысь унаөн лоины нималана военачальникъясөн. Сідз, генерал-лейтенант Д.Г. Дубровский (Сивков) быдмис фронтлөн военной советса шленөдз, гвардияса полковник Н.В. Митюшев веськөдліс нималана «Катюшаяс» полкөн, С.И. Турьев — дивизияөн, М. Осипов да А. Жилин юрнуөдісны танк бригадаясөн, унаөн вөліны полкъясса командиръясөн.

Тыш кадся сьөкыд да вир кистана косьясын на пиысь быдөн лючки-бура, повтөг, ассьыс олөмсө видзтөг пөртис олөмө сы водзын сувтөдөм мог — дорйис Айму. Öтувья вынъясөн зъвер кодъ фашистъясөс лои вермөма.

2 ю к ö н

Николай Оплеснинлөн туй

Николай Васильевич Оплеснин чужлөма 1914-өд вося öшым төлысь 12-өд луно Вильгорт сиктын, но томлуныс кольөма Сыктывкарын. Коми кресьянин котырын быдмөм том зон нинөмөн ёнасö абу торъявлөма тшөтшъяяссьыс: велөдчөма школаын, пырөма комсомолө, ноксьөма спортөн, дасьтөма асьсө дорйыны Айму уна ёрт мозыс. Помалөма 1933-өд воö Сыктывкарса стрөйтчан техникум да куим во уджавлөма техник-стрөйтчысьөн, гажөдчылөма, рытьяс-нас гуляйтлөма паркын, ёна уявлөма Сыктылын. Морт на сэки эз эськө шу Николайөс, том зонмөс, лоана геройөн. 1936-өд воын сійөс босьтөны Гөрд Армияө, буретш 30-өд вояс помын Сталинөн пестөм репрессияяс вöсна зэв уна офицерөс вөлі пуксьөдөма. Та вöсна колө вөлі öдйö дасьтыны выльясөс. 1939-өд воын Н.В. Оплеснин помалөма шөр командиръяслысь курсъяс да водзö служитөма взводөн командуйтысьөн нин.

Айму вöсна тышыс Николайлөн заводитчөма 1941-өд вося юньсянь, медся сьөкыд кадколастас, 1941–1942-өд



Н.В. Оплеснин

воясö сійö тышкасьлöма рытыв-
войвывса инъяс дорйигөн, кор
миянлысь салдатъясöс зырлöм-
ны унджык да сэки ёнджык на
тышка вына вөрөгъяс. Кызди
ён, бура велöдчöм да винёв офи-
церöс, Н.В. Оплеснинöс индöны
писькöдчысь-тöдмалысьö. Вол-
ховса фронт вылын сійö тыш-
касьлöма Остров, Псков, Луга
каръяс дорйигөн. 1941-öд вося
кöч тöлысьö налөн 111-öд
стрелкöвöй дивизияыс бöрынть-
чиг-водзасиг веськалöма не-
мечьяслы кытшö, зильöма öтут-
чыны бөр войскаыскöд, петны
кытшысь. Писькöдчысь-тöдма-
лысьяслөн командуйтысь, младшöй лейтенант Оплеснин
1941-öд вося кöч тöлысь 20-öд, 25-öд да 29-öд лунö
вартчöмөн вуджö арся Волхов ю Ямно дорын да тöдмалö
дивизиялы кытшысь петан туйяс. Та бöрын дивизияыс ву-
джöма Волхов юлөн асывывладорö да петöма кытшысь.
Тадзи öти мортлөн повтöмлуныс мездöма дзонь дивизия.
Таысь Николай Васильевичлы сетöны Ленин орден. Та
бöрын Н. Оплеснин волöма на дженъыд кад кежлö чужан
Сыктывкарö. Бөр фронт вылö мунöм герой усьöма 1942-öд
вося рака тöлысь 19-öд лунö Ленинград обласьтса Чудово
кар дорын, дзёбöма Чудово карö. Сэни сылы 1960-öд воын
сувтöдöма казътылан мыгөр. Сы нимөн шуöма уличьяс Чу-
довоын, Сыктывкарын, Выльгортса шөр школалы сетöма
сэни велöдчылöм геройлысь ним.

Николай Оплеснин кодъ геройыс вөлöма уна, тöдсаыс
да тöдтöмыс, нимаыс да гора нимтöмыс. Куслытöм казъ-
тылöм на йылысь коляс!

Ставыс мунö фронтлы

Коми АССР-ын пöрöдöм вöрсö медсясö кутисны нуны фронтлы отсалöм могысь, вөр предприятиеяс вöчисны Гöрд Армиялы лызьяс. Ньючим заводса уджалысьяс лэдзисны гранатаяслы да минаяслы кöрт кышöдъяс. Чилимдинса няр вöчан завод босьтчис лэдзны самолетъяс вöчöм вылö колана торъя няр.

Коми республикаысь фронтöс могмöдöм могысь мунис зэв унатор. Сидз, Печораса из шом бассейн могмöдлис из шомöн Войвыв флот, Ленинградса, Кировса, Горькийса, Мöскуаса предприятиеяс, Ухта дорын перйылисны кокни да сьöкыд мусир. Тыш кадö Ухта сетис канмуын — перьян саысь джынсö, а асфальтит да лак битум перйылисны сöмын Коми муын. Ухтаын лэдзан са отсöгөн вöчисны бур резина, сийö эз пов кöдзыдысь ни ёна шоныдысь.

Коми муысь унаöн мунисны фронт вылö. Татчö кольчысьяс вöчисны ставсö, медым дорны Вермöм, зилисны бура уджавны. Сöмын техникаыс тшöкыда жугласьлис, вежантор эз тырмыв. Вöрын, шуам, унджык уджсö бергöдисны ки помысь. Но йöз эз усьны сьöломнаныс, Коми республикаысь вөр мунис канмуса 40 гырысь предприятиё, на лыдын öружие вöчан заводъясö, кöрт туй вылö.

Содис вөр заптöм сы понда нöшта, мый кыпалис-нюжалис Войвыв—Печора кöрт туй. Коми АССР-ын лэдзисны 400 пöлöс ас вöчöмтор: майтöг, истöг, көм-паськөм, кучик. Фронт вылö мöдöдисны сикт-грездъясысь гын сапöг, пасьяс, шапкаяс, кепысь да с.в.

Индустрия да видз-му овмöс тыш кадö сөвмис сьöкыда, дзуртöмөн. Öд фронт вылö мунис медся ён, зиль да тöдысь войтыр. Найöс вежисны олöма йöз да челядь. Унджык уджалысьыс вöчлис смена чöжөн 2–3 норма, көть сёян-юанён сэки вöли зэв дзескыд.

Колхозъясын быд мортлы уджыс ёна содис, матö кык пов. Йöзлы колис уджавны колхозын да вöрын, пес заптыны. Артавны лои быд картупель, быд ид тусь. Унджык

уджалысьыс вöліны челядь да нывбабаяс. Гөрны-көдзны корлісны сійö кадö весиг школаын велөдчысьясöс, слу- жакъясöс, кутшöмкö отсөг сетны вермысьясöс.

Фашист Германиякөд тыш вöвлытöм ногөн ышöдіс Коми АССР-ын индустрия водзö сөвмөмсö. Печораса көрт туй эштöдöма лои 1941-өд во помын нин, кыпöдісны гы- рысь войвывса юяс вомөн посъяс. Пуксьöдöм йöз киясөн тыш кадö Вөркутаын да Интаын вöлі панöма 29 выль шах- та, на пиысь 12 лои дасьтöма. Фронт вылö из шом да му- сир мөдöдлісны көрт туйöд. Сылөн тöдчанлуныс вöлі сэтшöм ыджыд, мый немечьяс 1943-өд воö шыбитісны торъя десант сы могысь, медым бырöдны Печора вомөн пос. Тадзи ылын gryмакылысь тышыс инмыліс тшöтш Коми муö.

4 ю к ö н

Печора вылö десант

1943-өд воын германечьяслөн командуйтысьяс көсйис- ны диверсантъяс отсөгөн ордны Печораса көрт туй вывті фронт вылö сөвтас нуөмсö. Вöлі урчитöма шыбитны Коми АССР-са войвылö некымын диверсант чукөр. Медводдза- ыс эз вöч некутшöм диверсия: сэні вөлöма коми морт, сійö ышöдöма вöлі пленö веськавлöм салдатъясысь диверсантъ- ясö велөдöм йöзöс ас вöляысь сетчыны власьтлы. Тайö ис- тория йывсьыс нималана коми гижысь Геннадий Юшков гижліс «Югыд вой, көка вой» повесыт, сэні медшөр герой образ подулас вөлöма збыль морт — **Александр Гаевич Доронин**.

1943-өд вося лөддза-номъя 5-өд лунö 12 морта дивер- сант котыр кык самолёт вылын кыпöдчис Рига карса аэро- дромсянь да лэбис Норвегияса Нарвик кар пыр войвыв, Пе- чоралань. Десантөн юрнуöдіс сар армияса вöвлöм офицер Николаев. Котырас вөлöма коми морт, А.Г. Доронин, коді веськаліс немечьяслы пленö да лэбзис Комиö кызди тайö мусö тöдысь да вуджөдчысь. Десант водзö вöлі пуктöма не-

кымын мог: өти-кө, жугөдны Печора ю вомөн нюзөдөм көрт туй пос либө көрт туй складъяс, служба жыръяс да с.в., медым көрт туй кузя эз нин сэсся мунны поездъяс; мөд-кө, гусьон төдмавны да рация пыр юөртны немечьяслы, уна-ө сөвтас мунө татчөс көрт туй кузя, кутшөм военной стрөйбаяс кыптөны войвылын; коймөд-кө, төдмавны сідзжө, көні эмось Комиын пленө шедөм немечьяслөн лагеръяс, юөртны та йылысь, артыштны, позь-ө на дорө шыбитны десант, өружие, медым найө кыпөдчисны Совет власьтлы паныд; нельөд-кө, видлыны кыпөдны чуткасьыс сутуга сайын пукалысьясөс канмулы паныд. Тайө могъяссө олөмө пөртөм эськө вайис ыджыд лектор.

Гөгөрволис бура тайөс тиөтш Александр Гаевич Доронин, Удора районса Глотова сиктын быдмылөм коми морт. Сийө мөвпыштіс торкны вөрөглысь думыштөмторсө. Александр Доронин гусьоник сөрнитіс та йылысь өткымын десантниккөд. Шуисны Комиө воөм бөрын вины Николаевөс да висьтавны десант воөм йылысь татчөс власьтъяслы. Тайө мөвпсө Доронин кутіс важөнсянь нин, немечьяслы пленө веськавлөмсянь. Тадзи сийө зілис отсавны чужан канмулы тышкасьны вөрөгкөд.

И со югыд көка войө, 1943-өд вося лөддза-номъя төлысь 5-өд лунө рыт помлань германскөй самолөтъясөн диверсантъяс лэбзисны Комилань. Со кызди серпасалө Доронинлысь кылөмъяссө Г. Юшков, өд вөлисти коми морт пленысь вөлі лэбзё чужанінас: «Асывлдорсянь ыджыд ю мыччысис, йи на сэтысь петіс. Кымын лунвыв, сымын паськаліс юыс, босьтөма ытванас кыті мый вермөма. Чуймөдіс тайө Доронинөс: мыйла рытив-лунө визувтө юыс, али абу тайө Печора?

Лои гөгөрвоана бөрынджык, кор юыс зурасис асьыс на паськыд да войө петысь юө. Отлаасянінсянь бура тыдаліс, көть и ылісянь. Уса ю на тай, сідзкө, вөлөма, воддзаыс, өд сийө Вой Уралсянь и локтө, а мөдыс — Печора. Сідзкө, регыд нин воасны, абу нин тасянь дыр лэбны чеччыштанінөдзыс. Сьөлөмыс Доронинлөн кылөмөн кутіс дітшкыны морөсас, быттё лолыс эз кут тырмыны...»

Пуксисны Комиө десантникъяс 1943-өд вося юнь 6-өд

лунö Кожва районса Конецбор сиктсöветлön «Кедрöвöй Шор» совхозсянь 75 километр ылнаö. Быд десантник вöли НКВД-са уджалысь паськöма. Налы немецьяс быдтор сөтöмны — пулемёт, автоматьяс, ичöt лыянъяс, минаяс, гранатаяс, рация, печатьяс, штампьяс, сэкся сöветскöй документьяс, гожся да төвся паськöм, төлысь кежлö сёян-юан.

Десантлön кык котыр аддзысисны сöмын рытнас, а мöд асывнас котырön веськöдлысь Николаевöс виисны. Доронин да радист Одинцов петисны туйö, корсьны татчöс олысьясöс. Лöддза-номъя 8-öд лунся водз асылын найö веськалисны Развилка нима скöt видзанинö, сэни висьталисны десант шыбитöм йылысь кык стрелоклы. Доронин да дас стрелок мунисны корсьны десантникьясöс. Кыптылис нейджыд кось. Николаевлы отсасьысьöс та дырйи мыйлакö виисны, мукöдыс, 8 морт, сетчисны тыштöг. Сетчысь йöзöс «кыйöмысь» Коми АССР-са НКВД-ысь вель уна чина офицерöс пасйисны орденъясөн. Александр Доронинöс эз пуксьöдны пленясь петöм уна мортöс моз, öд тайö десант бöрын фашистьяс эновтчисны воддза кöсйöмьяссьыс.

Десант йылысь ставсö төдмалöм бöрын чекистьяс лэдзöмаöсь А.Г. Доронинöс вöля вылö, десант йылысь бура юөртöмысь пö. 1947-öд вося рака төлысьын А.Г. Доронин сьöкыда висьöм бöрын кувсьöма Ростовса обласьтын. Сэни сийö вөлöм уджалö öти сиктса школаын директорön.

Ю а л ö м ъ а с д а у д ж ъ а с .

1. Кыдзи тышкасьöмаöсь фронтьяс вылын Комиысь армияö босьтöм салдатьяс? Кымын мортöс вöли босьтöма, кымынön абу воöмаöсь гортаныс бөр?

2. Сöвет Öтувлунса кымын герой петлис Комиысь? Нималан ордена кымын тыр кавалер Комиысь вöли?

3. Висьталöй Николай Оплеснинлön олан туй йывсьыс.

4. Кутшöм кöсйöмön уджавлисны Комиын йöзыс Айму вöсна ыджыд тыш дырйи? Мый мунис фронт вылö Комиысь?

5. Висьталöй немецьяслön Печора вылö десант шыбитлём йылысь. Коді вöли Александр Гаевич Доронин?

6. Кутшöм повесът кутшöм коми гижысьлön эм тайö десант йывсьыс?



19 юрнас

СТАЛИН КАДЛӨН ПОМ (КОМИ МУ 1945—1953-өд ВОЯСӨ)

1 юкөн

Зэлалöмыс эз чин

Ыджыд тыш вайис уна лёктор Коми мулы да дзоньнас канмулы. Юрнысö пуктисны медся ён, мича да енбиа йöз. Сикт-грездъясын уджалісны вын жалиттөг, ставсö вöчисны сы могысь, медым öдйöджык венны вөрөгöс.

Тыш кадö кыпаліс уна выль предприятие. Но стрöитчисны сэки тэрмасьöмөн. Тайö стрöйбаяссö колö вöлі водзö кыпöдны. Видз-му овмöсын техника важмис, жугласис, киссис. Көть тышыс абу инмöма аслас сьöd бордйөн Коми муö, но татчöс овмöсьяс педзисны öти местаын, водзö эз сөвмыны. Тыш бöрын коліс найöс кыпöдны-лэптыны, бурмöдны йöзлысь олём-вылём.

1946-өд вося августын коми йöз пасйисны Коми автономиялы 25 во тырём. Волісны Удмурт муысь, Башкирияысь, Марий АССР-ысь, Кардор, Вөлөгда да Киров областьясысь гөсьтьяс. 620 мортлы сетісны орденъяс да медальяс.

Айму вöсна Ыджыд тыш бöрын йöзкотырын зэлалöмыс эз чин, йöзыс уджалісны, бөр ловзьöдісны киссьöм овмöссö. Колхозъясын, позьö шуны, мырсисны аттьö вöсна, сьöмөн

налы мынтысытөг. Канмуын выналіс И. Сталинлөн культ, помкатөг мыжаломъяссө эз дугөдны, йөзөс пуксьөдалісны водзө. Өттшөтш вождьөс ен пыдди пуктөмыс сөмын ёнмис, сійө өттшөтш өтнас юрالیс СӨКЮ-ын, правительствөын, вөлі генералиссимус, сы улын вөлі дзоньнас армия. Ютырлөн веськөдлөмыс Комиын кутчысис обкомын, сысянь сэсся став индөдсө формальнөя вынсьөдісны сөветъяс. Районъясын став ыджыдалөмыс вөлі райкомъяслөн. Көть Комиын век вынсяліс ГУЛАГ, морт эз чайтлы, мый тадзи оз ков, матө ставныс эскылісны да лача кутлісны му выв енлы — Иосиф Сталинлы. Коми гижысьяс нимөдлісны сійөс, кывбуралысьяс тэчлісны сы йылысь сыланъяс да кывбуръяс.

Ыджыд Сталин веськөдлөм улын сөветскөй йөз (буретш тадзи нимтылісны сійө кадө канмуысь гражданаөс) кыпөдісны социализм. Медводз зілісны сөвмөдны индустрия, кызвынсө видз-му овмөс, сиктса йөз тшөт весьтө. Тадзи вөлі Сөвет Өтувлун пасьтала, тадзи вөлі тшөтш Коми АССР-ын.

2 юкөн

Ас овмөс отсөгөн, ас йөв-ййөн

Сиктса йөз, колхозникъяс 1945–1953-өд воясө олісны зэв сьөкыда, кынөмпөт перйылісны кызвынсө ас овмөс, град йөр, ас скөт помысь, өд өтувъя овмөсын уджысь налы вештылісны сөмын уджлунъяс. Тайө сьөкыд олөмсө позьө серпасавны Геннадий Юшковөн 1952-өд воын гижлөм «Письмө» кывбурөн:

Воис меным письмө да,
Гижө сэтөн мам:
«Таво няньсө юклісны
Зэв нин кыксө грамм.

Но а сьөмтор виччысьны
Весиг оз и ков.
Көм ни паськөм некытысь,
Кызди кужан ов.

Сизим во нин войнаыс
Помасис, а ми
Век на быттьо кусодчам,
Век на конкө би.

Но а видлы шуасьны,
Пыр тэныд и суд.
Сөмын вао пырөмысь
Некоді оз кут.

Вот и юртө лэдзөмөн
Олан мыжа моз.
Мыйкө бара Сталиныс
Төдө али оз?

Сиктса йөз лача кутісны, мый канмуөн веськөдлысьяс пондасны ёнджыка төждысьны сикт вөсна. Сөмын төждыс вөлі зэв ичөт: кызди таөдз вөлі, колхозъяслы лэдзалисны планъяс, матө ставсө босьталісны зэв донтөма. Содтөд на колхозникъяслы град йөрысь, скөтысь колө вөлі мынтыны быть сетанторъяс (обязательной поставкаяс) — яй, йөв, кучик, кольк либө вештыны тайөс сьөмөн. Он кө вешты, мырддялісны ёрд пыр эмбур, сетлісны содтөд штрапъяс да пуксьөдавлісны. Та дорө колө содтыны, мый колхозын уджалысьяслөн паспортъяс эз вөвны, найө эз вермыны некытчө мөдлаө овмөдчыны, мунны кытчөкө велөдчыны. Збыльысьсө колхозникъяс вөліны сардырся крепостной кресьянаысь на улынджык тшупөдынөсь.

Колхозъяс Коми муын сэки вөлөмаөсь неыджыдөсь, найө бергөдлісны кызвын уджсө ки помысь да вөвъясөн, гөра-көдза дырйи да урожай босьтигөн сөмын медавлісны МТС-ясысь техника. Көть надзөник, видз-му овмөсын содө вөлі техника да специалистъяс. 1945–1950-өд воясө трактор лыдыс содіс 38% вылө (775–1069), комбайн лыдыс — 15% вылө, көдзан машина лыдыс содіс 36% вылө. Ставнас Комиын сэки вөлі 17 МТС. На бердын велөдлісны трактористъясө, бригадиръясө, Сыктывкарын уджалісны видз-му овмөсө веськөдлысьясөс дасьтан кык вося курсъяс. 1948-өд воын XVIII-өд партконференция пасйис, мый видз-му овмөс

кольччö оломсьыс, оз совмы колана ногон. Ышодомъясон, соцордыйсьом котыртөмөн сомын киссьом овмөссө он вөлі вермы вөрзёднысö.

50-өд воясö став Совет канму пасьтала колхозъяссö пондисны ыдждодны, некымын ичот колхоз пыдди лосьодавны кутисны оти ыджыдөс. Шүөмъяс сэки портисны оломö зэв өдийö, армияын моз. 1950-өд во заводитчигон кө вөлі 673 колхоз, во помнас лоöма нин 400.

Дзоньнас ыджыд тыш бөрын 1953-өд воөдз унатор боксянь видз-му овмөс войнаөдзса совман выйөдзыс эз во, көдзан мулөн пасьтаыс весиг чинöма 11,6% вылө. Пода видзөмын делöыс неуна бурмыштис, содис гырысь скот юрлыдыс 21,2% вылө, ыж юрлыдыс 17% вылө. Колхозъясын содöмыс вөлөм төдчымөн ыджыдджык на, сы вöсна мый ас овмөсьясын скот юрлыд содтöмысь пуктылисны гырысьджык вотъяс. Буретш сийö кадас чужöма көзаөс «сталинса мөскөн» нимтöмыс, өд мөскысь колö вөлі мынтыны өна унджык вот, сетны поставкаяс йөлөн, яйөн.

З ю к ö н

Индустрия совмө водзö

Коми АССР-лөн йозкостса овмөс водзö совмис. Индöма вөлі 1940-өд во серти лэдзны унджык вöчантор, кыпöдны выль предприятиеяс, заводъяс. Тайö мөвпъяссö портисны оломö 50-өд вояс шöрын нин. Кыптисны выль шахтаяс, кирпич лэдзан заводъяс, вөр лэдзан предприятиеяс. Сэтчö вайисны выль тракторъяс, пилаяс, вөр петкөдан механизмъяс. Содтөд перйисны из шом, мусир, вөр.

Экономика совмөдан воськовъяссö совет кадö вөлі урчитöны витвояс серти. Медводз вөлі Совет Öтувлунлөн Медвылыс Совет вынсьөдö оланпас, сэсся татшөм сяма оланпасъяс вынсьөдалöны республикаясса Медвылыс Советъяс. 1946-өд вося моз төлысьын Сыктывкарын вынсьөдөм оланпас серти IV-өд витвоын колö вөлі совмөдны медводз из

шом перьян, мусир да биару перьян, вөр индустрия. Та вылө канму сьомсө сетлис ёна лышкыда, из шом перйём сөвмөдөм вылө сьомыс воис 2,2 пөв, мусир перйём вылө 3,5 пөв, вөр пөрөдөм вылө 7 пөв унджык тыш дырйи сетлөм сьом дорысь. Совет Өтувлунса министерствояс сөвмөдिसны из шом перйём — «Воркутауголь» комбина-тын кыпөдिसны 8 выль шахта, 1950-өд воын мусир да биару перйём содөма 3 пөв 1945-өд воын серти. Ухта гөгөр кыпөдисны са вөчан выль заводьяс, Сыктывкарын стрөитисны вөр лэдзан техника дзоньталан завод.

Вөр лэдзан өдьяс 1945–1953-өд воясө содисны, кык пөв унджык вөр кутисны лэдзны во чөж (8,9 млн. кубометра 4,2 млн. пыдди 1945-өд воын). *Вөрпромовмөсьясын* содис техника, вөрсө пондिसны петкөдны тракторьясөн да векни көрт туйяс кузя. Зөвсьөртын кыпөдисны панера вөчан завод. Тайө кадколастө помалисны лөсьөдны-нюжөдны Печораса көрт туй, Канкар—Сыктывкар—Вөркута нырвизьөд пондисны лэбавны рейс вөчан самолөтьяс.

50-өд вояс заводитчигөн экономика сөвмөмын тыдовтчис өти тырмытөмтор — дзоньнас Коми муысь вөчлисны сөмын сыррьө перьянн, мупытшса озырлуньяс да вөр век нуисны Европа юкөнса лунвылө да рытыввылө. Экономика сөвмис өти ногөн.

4 ю к ө н

Йөзөс велөдөм да культура

Видлалана кадколастас Коми АССР-лөн ашпөрлуныс кольлис зэв ичөт, быд ыджыд да поснитор колө вөли республикаса веськөдлысьяслы ладмөдны Канкарын, сэтчөс шөр министерствоясын, Госпланын да СӨКЮ-лөн Шөр комитетын. Коми руыс, дзик аслыссикас рөмьясыс кольлисны сөмын йөзөс велөдөмын да культураын. Но Сталин кадө культура сөвмис зэв сьөкыда, сы вылө век ёна личкис идеология да политика.

Ыджыд тыш бõрын йõзõс велõдõмын лоины важõн нин виччысына вежсьõмъяс. Медводз, школаясын пондїсны õтлаын велõдны зонкаясõс да нывкаясõс, õти классъясын. Пондїсны велõдны уджõ, сõвмõ вõлї политехнической школа. Йõзõс велõдан министерстволы 1953-õд воын вичмис 92 миллион шайт. Видлалана кадколастас кыпõдõма вõлї 60 выль школа. Восьталїсны рытья школаяс, кõнї луннас уджалысь том йõз вермис велõдчыны водзõ. Шõр да вылыс велõдчанїнъясысь õтдор уджалїсны коммунист ютырлõн курсъяс, дзонь политпросвещение система. 1947-õд воõ восьтõма вõлї Республикаса партийной школа, сәні дасьтылїсны кызвынсõ веськõдлысьясõс.

Водзõ сõвмис Коми АССР-ын наука. 1949-õд вося йирым тõлысьõ наукаяс Академиялõн база лоис Сõвет Õтувлун НА-лõн филиалõн, 1953-õд воын сәні уджалїс наукаясса 3 доктор да 27 кандидат. Дерт, туялан нырвизьясыс медводз могмõдлїсны сыръё перьян индустрия — геология, из шом перйõм. Но такõд тшõтш туялїсны биология, Коми мулысь история да коми кыв, литература, йõзкостса поэзия.

Йõз дорõ медматысса культура котыръяс — клубъяс. Сәні уджалысь йõз шойчывлїсны, гажõдчылїсны, кино видзõдлїсны. Õд сәки *пертаскудъяс* эз на вõвлыны, йõзыс зїля рытйысисны, торйõн нин кузь тõвся рытьясõ. 1953-õд воõ Коми АССР-ын уджалїс 352 клуб, 460 небõгкуд. Клубъясын сõвмис асворсысь артистъяслõн искусство — дзоньнас вõлõма сюрсысь унджык сылан да йõктан коллектив. Сиктьясын уджалїс 3 профессиональной театр — сїдз шусяна колхозно-совхозной театръяс Абъячойын, Кулõмдїнын да Изъваын. 1949-õд воын сьõм абутõм понда найõс тупкалїсны.

Õдйõ содõ вõлї небõг лэдзõм. 1946-õд воын кõ Коми небõг лэдзанїнысь петлõма 60 небõг, то 1953-õд воын — 120. На пиысь джынйыс кымын петлїс комиõн, ёна вуджõдлїсны коми вылõ быдсяма небõгсõ, марксизма-ленинизма, серпаса, велõдчан, уджалõм вылõ. Та вылõ сьõмсõ сәк тырмõдлїсны. 1953-õд воын петавлїс 28 газет, налõн петан лыдыс 1940-õд во серти содõма 2,4 пõв. Тыш дырйи коми сер-

паса литературалы журнал эз петавлы. 1946-öd восянь сійö петö «Войвыв кодзув» ним улын 2000 лыдöн.

Коми литература тайö съöкыд кадколастас водзö оліс-сöвмис. Кötь «Войвыв кодзув» петнысö заводитліс 1946-öd восянь, 1947-öd во заводитчигöннин ВКП(б)-лөн Коми обком аслас индöдын восьтö журналысь, дзоньнас коми литератураысь гырысь тырмытöмторъяс. Коммунист ютырса век велöдлісны, кызди колö да мый колö гижны коми гижысьяслы. Литературасö донъявлісны сы серти, кызди сійö отсалö кыпöдны социализм, аддзисны сыысь сöмын йöзöс воспитайтантор. 40–50-öd воясса коми литература эз петкөдлы збыль олөмсö, сійö вöлі, кызди корö ютыр, индö йöзлы сөвман нырвизьяс. Тшыг нисьö пöt олөм пыдди гижлісны сэки идеальнöй, зэв бур, пötöса колхознöй дзордзалөм йылысь, петкөдлісны совет салдатъяслысь да коми партизанъяслысь повтöмлун. Коми войтырлысь туй да аслыспөлöслун йылысь эз позь весиг гарыштыны партиялы ошкана кывтөг. Шөр нырвизьясь гижысьяслөн вöлі — славитөм, Совет канму да коммунист ютырöс ошкөм.

Медтöдчана гижөдъяс сэки вöліны: Василий Юхнинлөн «Тундраса бияс» роман, Я. Рочевлөн «Кык друг» роман, Г. Фёдоровлөн «Война лунъясö» повесыт. Медыджыд шедöдөмторйыс вöлі **Николай Дьяконовлөн** «Свадьба приданнöйөн» теш, кодысь 1950-öd воö сылы сетлісны Сталинса премия. Коми гижысь гижліс дзик роч овъяса геройяс йылысь, Ольга Степанова да Максим Орлов, Николай Курочкин, Пирогов да Муравьев йылысь, кызди колхозын шу-

СССР-лөн ИСТОРИЯ

ДЖЕНЬДÖДÖМ КУРС

ПРОФ. А. В. ШЕСТАКОВ
РЕДАКЦИОНЪН

ОТДЕЛЪН
СТАВЛОУТСА ПРАВИТЕЛЬСТВЕННÖЙ
КОМИ СВЯНО

Коми гижысьяслы

КОМИ ГИЖ 19, 9

50-öd воясö история
велöдлісны комиён на

даа да гажаа кыпөдөны овмөс, радейтчөны, кокниа венөны падмөгъяс. Коми гижөд кыв сэки көть бергавліс республикаын вель ёна да паськыда, вөлі зэв ёна рочмөма. Серпасалам тайөс Фёдор Щербакөвөн 1949-өд воын гижлөм «Менам **отчизна**» кывбурьыс юкөнөн:

**Свет да разум, твердыня и слава,
И став уджалысь йөзлөн почёт,
Здравствуйт, миян великөй держава —
Мирын мирлөн могучөй оплот!**

Дерт, тайө кывбурьыс Сөвет Öтувлун йылысь, буретш медводз сы гражданаөн кывлісны асьнысө Комиын олысьяс. Му шар вылын медбур, медъён, социализм кыпөдысь, фашизм вермысь канмуөн нимкодьясьлісны, радейтлісны ыджыд чужаніннысө, көть тшөкыда овлісны тшыг нисьө пөтөсь.

1953-өд вося рака төлысьө шогө усьліс дзоньнас Сөвет канму, Коми АССР-ын унаөн бөрддзылісны — кувсьөма пө Канкарын И.В. Сталин. «Войвыв кодзув» журналса 4 номерын петө Серафим Поповлөн «Сталин миянкөд» кывбур:

Кувсис Сталин... Кыдзи талы эскан,
Кутшөм кылөн восьтан мортлысь шог?
Пармалысь ме кори: — Миян весьтысь
Вермис өмөй бырны шонді гож?..
Парма вочавидзис: — Кыдзи шонді
Шонтө аслас югөръясөн му,
Гений сылөн **лыдтөм нэмъяс** пондас
Индыны народъяслы выль шуд...

Морт сэки эз вермы мөвпыштны, мый во-мөд-коймөд мысти кулөм вождьөс дугдасны весиг гаравлыны, а йөзкогырса олөмыс төдчымөн вежсяс. Сөмын тайө торъя сёрнитантор.

Ю а л ö м ъ а с.

1. Мый вежсис ыджыд тыш помасьöм бöрын Комиын?
2. Бурмис эз му уджалысьяслөн олöмыс? Кыдзи олісны колхозьяс?
3. Кутшöм нырвизьöд сöвмис индустрия, мый сöвмис öдйöджык?
4. Кутшöм вежсьöмьяс лоины йöзöс велöдöмын?
5. Кутшöм вöлі коми литература 1945–1953-öд воясö? Кодлы 1950-öд воын вöлі сетöма Сталинса премия да мыйысь?
6. Кор котыртісны Сыктывкарын наукаяс Академиялысь Коми филиал, мый сэнi туялісны?





20 юрпас

УЛЬДЫЛӨМ БӨРЫН ДУДАН КАД (КОМИ АССР 1954–1985-өд ВОЯСӨ)

1 юкөн

Олөм бурмөм вылө лача

Пасйөм кадколастас Коми муын вөлөма уна лоөмтор, вежсьөма уна төв. Öти кывйөн он серпасав тайө кадсө, но олөмыс дзоньнас И.В. Сталин кулөм бөрын төдчымөн бурмө, овмөсыс сөвмө. Коми АССР-са олөм вылас Канкарын власьтбердсалөн зильөмыс, быд вежсьөм төдчылис веськыда. Совет Öтувлунөн веськөдлис коммунист ютыр, ютырөн веськөдлысьнас век вөвлі СÖКЮ Шөр комитетлөн 1 секретар. И.В. Сталин кулөм бөрын тайө арта нимсө босьтис **Никита Сергеевич Хрущёв** (1894–1971), 1958–1964-өд воясө сійө веськөдлис өттшөтш Министрьяс Советөн. Н.С. Хрущёв нималис сыөн, мый СÖКЮ-лөн ХХ-өд өксьөма вылын эрдөдіс Сталинөс кызди уна лектор вөчысьөс, мездіс бөр мыжтөг пуксьөдөмаясөс дзескыдінъясысь, пыртіс өна унджык демократия коммунист ютырө да советьяс уджө. Сы дырйи Совет канму ышловзис кокныдджыка, мукөд мирыслы лои восьсаджык, пондіс сөвмыны-кыпавны өна өдйөджык.

Коми АССР-лы тайө вежсьөмъясыс инмисны веськыда. 50-өд вояс шөрын вөлі разьөма ГУЛАГ система, вой-вылысь уна пуксьөдөм мортөс лэдзөма вөлі, реабилитируй-

тöма, налы бергöдöма лои бур нимъяссö. Но колонияяс миян войвылысь эз бырны, сэнi колисны уголовнöй мыжъясысь пуксьöдöм йöз. Комиö локтöм йöзöс вайöдöмыс вуж выйö вежсьö. 50-öд воясянь выль уджалысьясöс коралисны **оргнабор** отсöгөн нин. Мöд кывъясөн кө, Россия лун-вывсаджыкинъясысь, Украина да Белоруссияысь вербуйтлісны колхозъясысь, каръясысь том йöзöс, армияысь, флотысь служитысьясöс. Налы мынтылісны уджаланинöдз муномысь, сетлісны водзвыв сьöм (подъёмнöйяс), войвылö найöс кыскис медводз бур удждон. Унаөн пышйылісны гöлиник колхозъясысь, корсисны аслыныс пötöсаджык олöм Коми муысь.

Мöд торъяланлун Коми АССР олöмын — экономика, транспорт, видз-му овмöслөн ёна öддзöмөн сöвмöм. Тайö бара йитчöма Н.С. Хрущёвлөн мөвпкөд сы йылысь, мый Сöвет канмулы ёна выныштчöмөн коліс 20 воөн лöсьöдны коммунизм, вöвлытöма сöвмöдны экономика, видз-му овмöс да тадзи вötöдны да панйыны Америкаса Öтувтчöм Штатьяс, нырнуöдны му шарвывса олöмын, паськöдны социализм система мукöд инъясö. Коммунизм лöсьöдöмсö сэки чайтісны збыльысь верманаөн. Ютырлөн XXI-öд да XXII-öд öксьöмаяс урчитлісны лöсьöдны кык дасвоөн классъястöм йöз котыр, көні эз вöв эськö торъялöм сикт да кар, кипом да вежөрөн удж костын, көні эськö эз вöвны нин войтыръяс да на костса торъялöмъяс. Көні эськö ставыс быдөнлы вöлі тырмымөн, быдөн уджавліс эськö аслас кужанлун сертиыс, босьтліс коланлун сертиыс. Тайö социальнöй утопияыс сэки уналы воліс сьölöм вылö, Сталин кадся дзескөдöмъяс да полöмъяс бöрын могыс кажитчыліс öдйö вермана, унаөн сьölöмсянныс эскылісны талы. Коми кывбуралысь Г. Юшков 1967-öд воын гижліс:

Коммунизм!

Ме думөн сэтчö волі:

Бытьö дзоридз,

Восьбöма сэн морт,

Ышнясьöм

Ни веглясьöм,

Ни полѳм —
Нинѳм абу.
Дона тѳ и колан.
Муса вок тѳ,
Виччысяна ѳрт.

60-ѳд вояс заводитчигѳн дзоньнас канмуын, Комиын тшѳтш, олѳмыс пуѳмѳн пуис, ѳна вежсис став йѳзкостса овмѳсыс, медпаськыда бергалысь кывъясыс вѳліны «коммунизм», «интернационализм», «автоматизация», «химизация», быдлаын мунісны вежсьѳмъяс, абу ставыс бурѳсь да быть коланаѳсь. 1964-ѳд воын Н.С. Хрущѳвѳс чѳвтѳны власьтысь да сы пыдди пуктѳны Леонид Ильич Брежневѳс, коді веськѳдліс 1982-ѳд воѳдз, кувтѳдзыс. Экономика сѳвмѳдан ѳдъясыс первойсѳ эз вежсьыны, но сѳсся пондісны ньѳжмыны. 70-ѳд вояс шулѳны нѳшта дудан кадѳн, сы понда мый сѳки овмѳс сѳвмиг-ѳнмигкоста канмулѳн тѳчасыс, идеологияыс, веськѳдланногыс, бѳрйысян система сѳвмѳмыс сувтіс, эз кут вочасѳн лѳсявны кадыслы, дзоньнас Сѳвет ѳтувлун пондіс кольччыны капитализма муясысь, кѳні сѳк кежлѳ мортлѳн олан-уджалан тшупѳдыс тѳдчымѳн кыпаліс. Тайѳ сѳсся вайѳдіс Сѳвет канмуѳс пемыд гуѳ, ѳсь кризисѳ.

Коми АССР вѳлі коммунизм кыпѳдан полигон сѳма, кадыслѳн бурыс да лѳкыс яръюгыда тѳдчис миян республикаын, ѳна вежсис коми войтырлысь оласногсѳ. Медводз, тайѳ каднас ѳдйѳ вежсис республикаын олысь лыдыс.

Коми АССР-лысь йѳзкост овмѳс сѳвмѳдѳм могысь лои видзѳма уна сѳм. Колісны уджалысь йѳз. Та могысь медавлісны миянын уджалѳм могысь бокысь воѳм войтырѳс. Сідз, 1960-ѳд восянь 1980-ѳд воѳдз республикаын олысь лыдыс содѳма кык пѳв. Гырысь каръясѳн лоины Сыктывкар, Вѳркута, Инта, Ухта, Печора. Чужисны-сѳвмисны выль каръяс — Усинск, Вуктыл да Емба. 1989-ѳд вося йѳзѳс гижалѳм бѳрын тыдовтчис татшѳм серпас: Комиын олысьяс пѳвстысь кык коймѳд юкѳныс зіліс-уджаліс республикалѳн войвыв юкѳнын, кѳні вѳлі ѳнмѳма-паськалѳма из шом, мусир, биару перйѳм. Унджык йѳзыс оліс каръясын да ра-

бочой посёлокъясын. Сикт-грездъясын серпасыс вöлі дзык мөд пöлөс, тані оліс сөмын быд нельөд мортыс. Дерт, сиктъясыс унаоң муналісны каръясө, зілісны сәні аддзыны уджда оланін. Коми йөз став олыс пөвстас лои этша лыда чукөр, 1989-өд вося йөзөс лыддьом серти, комиыс босьтліс сәки сөмын 23%. 50-өд вояс шөрын унджык комиыс оло вöлі сиктъясын на. 80-өд вояс помлань сиктъясыс унаоң вуджөмны каръясө, комиыс матө джынйыс лоөма карса йөз. Но вужйыс налөн вöлі да кольө сиктын.

2 ю к ö н

Коми сиктлөн ловзьом да сөвмөм

Тшыг пыкөмысь Россияын сиктсө мездіс 1953-өд вося СÖКЮ-лөн Шөр комитетса пленум, сійө шуис кыпөдны колхозъясыс сёян-юан ньөбан донъяссө, вештіс налыс уджйөзсө да ёна чинтіс йөзлыс быть сетанторсө (поставкаяс). Та бөрын коми сикт төдчымөн ловзьө, сы вөсна мый канму бергөдчис вөлисти сиктлань, пондіс сөвмөдны медводз өтувъя овмөсьяс. Но эз колхозникъяслыс ашшөр овмөсьяс, найөс весиг 1958–1965-өд воясын зільөны вöлі дзыкөдз бырөдны.

60–80-өд воясө Коми АССР-са колхозъяс да совхозъяс воддза кад серти кутісны ёна өдйөджык сөвмыны. Талы медсясө отсаліс сійө, мый му вылө, скөт картаясө воис выль техника, кокняммис йөзлөн удж-олөм, колхозъяс пыдди котыртчалісны совхозъяс. Тайө воясас видз-му овмөс сөвмөдөм могыс видзисны медся уна сьом. Шуам, 1960-өд воын Комиын кө вөлөма 1303 трактор, 1965-өд воын лоөма нин 2012. Унджык сиктө воис би, мукөдъясас уджалісны дизеля би сетан станцияяс. Уна важмөм техника пыдди сиктъясө воисны выль машинаяс да тракторъяс. Механизмъяс отсөгөн кутісны вөчны-бергөдны сьөкыд уджъяс — ытшкыны-куртны, мөс лысьтыны, скөт видзан картаясө ва сетны. А сэтшөм водзмөстчыс овмөсьясын, кызди «Сык-

тивкарской» совхоз, став көрымсө заптісны нин техника отсөгөн. Яй да йөв, мукөд овмөсьяс серти, тани шедіс ҕна донтөмджык.

Комиын сійө воясө медся ыджыд төдчанлун сетлісны скөт видзөмлы. Кыптисны Зеленечса порсь видзан комплекс, курөг дөзьөритан вынйөра вит фабрика, механизируйтөм скөт картаяс. Медся уна сөян-юан сетісны совхозьяс. Коми АССР-са олысьясөс найө могмөдісны таdzi: картофелөн 80% вылө, йөлөн да йөла сөянөн — 50% вылө, яйөн — 40% вылө.

Гөрана муяс вылын быдтісны картофел, капуста-морков, скөтлы көрым. Выль муяс да видзьяс вөчны-лөсьөдны отсасис мелиорация. Сійө жө кадө, медым бөсьтны унджык көрым, картофел, капуста да с.в., кутісны коявны муяс да видзьяс вылө минерала *мувердас*.

Выль техника пыртөм вайис тшөтш омөльтор — совхозьясысь чиніс уджалысь лыдыс. Сиктса олысьяс тшөкыда муналісны карьясө да посөлокьясө, корсисны удж да вужьясисны нэм кежланыс. Сэк жө видз-му овмөсын вөлі на уна кипом удж. Сэссия бөсьтөм урожайысь ыджыд юкөн сісьмывліс, эз воы лавкаясөдз.

1958–1965-өд воясө Совет канмуын йөзөдөма вөлі абу витво, а *сизимво*, коммунизм кыпөдан туйын төдчана кадколаст. Сиктьясын унатор вежсис, бурланьө да лөкланьө. Сизимво помланьө колхозьяссө ыдждөдлісны да вуджөдалісны совхозьясө. Комиын кольөма сөмын 71 колхоз (сәні уджавліс 9,6 сюрс морт), совхоз лыдыс содіс 42-өдз (уджавліс 23,6 сюрс морт). Совхозсалы мынтісны удждонсө сьөмөн. Йөзлы тайө вөлі бур. Мөд боксянь, колхозьяслөн пытшкөсса тэчасыс вөлі демократияа: юралысьөс бөрийлісны өтувья чукөртчөм вылын, унатор боксянь колхозса олісны ас юрөн, удж вөсна кыв кутөмыс сәні ыджыдджык вөлі. Совхозьяслы кыdzi канмулөн организацияслы вылісянь лөдзалісны зумыд тшөктөмтьяс, плантьяс, веськөдлысьясөс сэтчө пуктавлісны. 70-өд вояс помлань колхоз лыдыс зэв ҕна чинө. Став коми нимьяссө налысь («Югыд кодзув», «Шонді югөр», «Гөрд партизан» да мукөдьяс) вежлалісны

өти бала серти тэчалом, -ский роч кывйылаяс вылө («Ручевский», «Пожегодский», «Объячевский» да с.в.) Өти сыйын кресьяна класс Коми АССР-ын лои бырөдома, совхозса уджалысьясос официальнойа лыддылысны нин рабочей классон. Со лоес йөзкотырын өтсеяма класс тэчас — рабочей класс да уджалысь интеллигенция. Сөмын, дерт, тайө класс вежсьөмыс йөзыслы вөлі дзик мода вылас, ним вежом сяма.

Коммунизмлөн теория серти, сэтчө пырысь йөзлөн оз вермы лоны ас матор, скөт, татшөм сяма эмбур. Та вөсна 1958–1965-өд воясө, Н.С. Хрущёв ыджыдалігөн, пондісны вылісянь, ютыр комитетьяс пыр, чинтөдны йөзлысь скөт лыд, муяс да ытшканинъяс. Весиг мырдөн босьтавлөмаөсь «ковтөм» ыжъяс, куканьяс, кыйөдчөмны йөз бөрся, мырд-дявлөмны ытшкөм турун да с.в. Лыддылөмны сэк, быттьөкө йөзыс быдтор пондасны ньобавны лавкаясысь, карьясын моз. Но олөмыс эз ло тадзи,— Хрущёвөс чөвтөм бөрын, 1965-өд воын ковтөг пуктөм нормаяссө вөлі бырө-дома. Ас овмөсьясын бара содіс скөт юрлыд, кодзан, пук-тан му. Өд сәки да өні тшөтш сиктса йөз кызвынсө олөны ас овмөс тшөт весьтө.

60-өд воясө тшөтш мырдөн, вылісянь тшөктөмөн вөлі медбур муяссө кодзөны кукурузаөн, сакара свеклөөн, сөян бобиөн, лунвывса культураясөн. Шуам, 1962-өд воын ку-курузасө кодзлөмаөсь 5574 гектар вылө. Но урожайыс вөлөма вывті ичөт, кынмалөмъяс вөсна сійө өна эз быд-мыв. Таясь ковмис энөвтчыны.

70-өд воясө лои мөдара нырвизь, бара вылісянь кес-йөдлөмөн совхозьяслы тшөктісны вуджны монокультура-яс вөдитөм вылө, «специализация» кывйөн сайөдөмөн. Сідз, коми сиктъясын дугөдісны быдтыны нянь, кодзны да вун-дыны шобді, ид, рудзөг, вөдитны шабді, пыш. Сы пыдди ставсө веніс картофель, капуста, силос вылө турун, сәссия быдлаө паськодісны борщевик. Том йөзысь весиг унаөн оз төдны, кызди вөдитны няня культураяс, абу аддзылөм-ны дзоридзалысь шабді. Ставыс тайө өна гөльмөдіс коми-яслысь му вөдитан нэмөвөйся культурасө.

Өтувья овмөсьяс ыдждөдөм вайөдіс сэтчөдз, мый уна

посни сикт бырис, аския лунтём сиктъяс бырёдан политика республикаса веськөдлысьяс паныд абу мулёмны, пёртлёмаось оломö вылісянь лёк индөдъяссö. Та йылысь унджык гижөма лоö водзö 20-өд юрпасын.

70–80-өд воясö республикаын пондिसны кыпөдны скөт видзан гырысь комплексъяс (Лөзымын, Межадорын), ёнджыка механизируйтны скөт видзём. Дзоньнас сиктса йöз 60–80-өд воясö пондисны овны бурджыка, бур уджысь вöлі бура мынтысьöны. Та вöсна социалистическөй ордысьём паськавліс ёнасö эз нималём, а медводз бура мынтысьём понда. Вель уна том йöз кольчывліс совхозъясö, весиг дзонь классъясөн кольчывлісны кыпөдны чужанінсö. Дерт, та бöрын унаөн мунавлісны жö, но 70–80-өд воясса сикт овліс аския лунö бур лачаөн.

Нимавлісны Коми АССР пасьтала Социалистическөй Уджывса Геройяс. Картопель вөдитысьясысь меднималанаö петіс сэки, 70-өд воясö, **Александр Николаевич Плешев**, 1933-өд вося сора төлысь 20-өд лунö Визин сиктсöветö пырысь Катыдпом грездын чужлём морт. 9-өд витвоö сылөн звеноыс быд гектар вылысь босьтлөма картопельсö 400 центнерөн.

З ю к ö н

Перйыны, ыстыны унджык сырё

60-өд воясö коммунизм кыпөдан нырвизыыс веськыда төдчис Коми муын индустрия паськөдём вылө. Видзму овмөс дорысь сырё перьян индустриялы төждыс сетөма вöлі ёна унджык, Коми АССР, торйөн нин сылөн войвылыс, вöлі стрөйтчанін, выль кар, посёлок артмөданін.

Тайö воясö канмулөн войвыв пельöсьясын кутісны лөсьөдны-тэчны подув сы могысь, медым перйыны унджык мупытшса озырлун. Медводз, дерт, биару, мусир да из шом. Гырысь куйлөдъяс аддзисны Вөркута гөгöрысь. 1969-өд вося сентябрын пырис уджö Ухта—Рыбинск биару туй,

кыпөдісны-нюжөдісны сійөс воён-джыниён, көть эськө кузьтаыс вөлі сюрс сайё километрысь унджык. Став мир пасьтала татшөм өдйөсө некод на *биару туйсө* эз вермыв вөчны. Өд туйсө нюжөдісны көдзыд төлын, бур туйястөг. Тадзи республикаын чужис выль, биару перьян индустрия. Содіс тшөтш мусир перйөм-нуөм. Торйөн нин уна сійө кутіс воны Усинск гөгөрысь да мукөдлаысь. Из шом перьян шахтаясын унатор вөчисны сы могысь, медым вежлавны важмөм техника, паськыда пыртны уджө из шом перьян комбайнъяс. Техника воис тшөтш вөр лэдзысьяслы, сійө сетіс позянлун кокньөдны налысь уджсө. 60-өд вояс помын Удора районө воисны болгаръяс. Вөлі котыртөма вөр пөрөдан өтувья предприятиеяс. Өткымын воясө Коми муын вөрсө лэдзө вөлі 20 сюрс гөгөр болгарин. Сэки жө республикаса веськөдлысьяс гөгөрвоисны, мый пөрөдөм вөртө сідз-тадз вузалөмыд уна сьөм оз сет. Коліс сыысь мыйкө вөчны. А вөчны позис унатор. Та могысь Сыктывкарө кыпөдісны вөр комплекс (ЛПК), Ембаө пу сыысь плита вөчан завод (ДВП), Сыктывкарын *керка көлуй* (мебель) вөчан фабрика. Таысь кындзи, кыптисны дзык выль пөлөс предприятиеяс. Шуам, республика юркарын быдмис кытөм материал лэдзан фабрика.

Сөвмысь индустриялы колө вөлі унатор нуны-вайны. 60–70-өд воясө водзө нюжалө Войвыв Печора көрт туй. Сійө воөдчө Сыктывкарөдз, Косланөдз, Мылдинөдз, Усинскөдз. Став карас да унджык районө йөз вермөны вөлі лэбны самолётөн. Коми муысь лэбалісны нөшта канмулөн уна мукөд пельсө. Тайө кадө босьтчөны нюжөдны чорыд веркөса (асвальт) туйяс. Позьё шуны, артмө өтувья транспорт система.

Колө вөлі тшөтш унджык электроби йөзлы да предприятиеяслы. Та могысь кыптөны Печораын да Сыктывкарса ЛПК-лөн би сетан станцияяс. Найөс стрөйтөм бөрын Коми АССР олө нин аслас биён.

Став вермөмъяс вылө видзөдтөг республикаын индустрия водзө сөвмис өти ногсөн — кыпөдлісны бара ёнджыкасө сырьё перйысь предприятиеяс, матө став вөчөмторйыс мунліс ортсьө (мусир, биару, из шом, вөр). Сөмын

Ухтаын да Сыктывкарын вöлі кыпöдöма гырысь заводъяс, кодъяс уджалöны ас сыръёон. Та дырйи республикаса олысь-яслы гырысь индустрияысь водзöсыс вöлі зэв ичöt. Шуам, биару нулісны трубаяс пыр лунвылö, но ни öти коми сиктö сійö эз волы, весиг Вуктыл районын, биару перъянінын. Сыръё перьян индустрияын вöлі кызвынсö кипом удж, та вылö колö вöлі уна уджалысь. Республикаö век воалісны локтöм йöз, кызвынсö велöдчытöм да ичöt культураа. Унаöн кольччавлісны Комиö дзескыдінъясысь, унаöс ыс-тивлісны войвылö (лытунъясöс, гуляйтысь аньясöс, алко-голикъясöс). Тайö уджалан выныс зэв ёна вежласис, вой-вывса каръясын пыр олысь йöзыс вöлі этша. Вужвойтыр тайö локтöм йöз пöвстас вöлі сылö-вошö.

Татшöм ногса индустрия лёк ногөн тöдчис вөр-ва вылö, торйөн нин вөр пөрöдöм, да мусир перйöм вылö (Усинск гөгөр, тундраын). Көр видзанінъяс мусир перйöм вöсна ёна чинöмаöсь, вөр пөрöдöм, да торйөн нин молльөн сійöс кылöдöм, ёгöсьтö вöлі мусин, та вöсна косъмöны вöлі юяс, нюръяс. Öти кывйөн кө, Коми АССР-ын индустрия сөвмис зэв öдйö, но сійö вöлі уна сьöм видзана, ичöt водзöса. Мед-ыджыд предприятиеяснас веськөдлісны союзса министер-ствояс, эз республикаса власьт.

4 ю к ö н

Йöзöс велöдöм да культура

Тышбörся кадö школа вуджис дон босьттөг сизим класса велöдöмсянь дон босьттөг жö том йöзлы шөр велöдöмö. Шөр школа лыдыс содіс. Сідз, 1986-öd воын татшöм школаыс вöлі республикаын 224, 1940-öd воын — сöмын 40. Велöдчöм йöз лыд серти мян республика воськовтіс ёна водзö. Быд сюрс олысь вылö воис вылыс да шөр школа помалöм 845 морт. Сійö жö кадö коми школа лыдыс чинö.

Олöм мунö водзö. Содö позянлун республикаса том

йöзлы некытчö ылö мунтöг босьтны вылыс тöдöмлунъяс гортаныс. 1967-öд воöдз Коми АССР-ын вöли öти вылыс школа — Коми каналан педагогика институт. 1967-öд воын Ухтаын воссис индустрия институт, 1972-öд воын — Сыктывкарса канму университет. Вөркутаын кутис велöдны том йöзöс Ленинградса горнöй институтлөн филиал. Специалистъясöс дасьтис республикаын 18 техникум да 33 профессионально-технической велöдчанин (ПТУ).

Сыктывкарын водзö уджалис СССР-са наукаяс Академиялөн Коми филиал. Коми туялысьяслөн нимъясыс пасыкыда юргисны. Сидз, 1979-öд воын Сыктывкарын мунис электрокардиология кузя медводдза войтыръяскостса симпозиум, сэтчö волісны СССР-ысь, Бельгияысь, ГДР-ысь, Голландияысь, АÖШ-ысь, Францияысь, ГФР-ысь да Чехословакияысь туялысьяс. 1985-öд воын республикаса юркарö, VI-öд войтыръяскостса конгресс вылö, чукöртчылісны финно-угроведъяс. Воліс 730 туялысь Сöвет Öгувлунуысь, Венгрияысь, Суомиысь, Австрияысь, ГДР-ысь, Италияысь, Норвегияысь, АÖШ-ысь, Чехословакияысь, Францияысь, ГФР-ысь, Швецияысь, Японияысь да мукöд муысь. 80-öд воясын СССР-са наукаяс Академиялөн Коми филиал подув вылын котыртчö Россияса наукаяс Академия Урал юкөнса Коми наука шöрин. Сійö вочасөн лои Европаса Войвыв-Асыввылын наукалөн зумыд мыджöдөн. Öттшötш наукаын корсьысисны-уджалісны Сыктывкарса университетысь, Коми пединститутысь, Ухтаса индустрия институтысь велöдысьяс.

Сöвмис-ёнмис тайö кадö серпаса литература. Чужöны выль гижöдъяс — кывбуръяссянь гырысь романъясöдз. Коми АССР-ысь вель уна кывбуралысьöс да прозаикöс босьтöны СССР-са гижысь котырö. Коми гижысьяслысь кывбуръяс, висьтъяс вуджöдöны вöли мукöд кывъяс вылö. Коми муын кадысь кадö мунлöны литература лунъяс. 50–80-öд воясö республикаын ёна сöвмö роч кыв вылын литература, быдмисны гырысь гижысьяс — Александр Рекемчук (мунис овны Канкарö), Виктор Кушманов, Надежда Мирошниченко, Лев Смоленцев да мукöд.

Водзö уджалис Коми драма театр, сәні пуктісны спек-

такляс рочөн да комиён. Бур уджысь театрсо пасйисны Войтыръяслөн ёртасьом орденён, И.Аврамовлы да Г.Сидоровалы сетисны «СССР-са народной артист» нимъяс. 1958-öd воын воссис Сыктывкарын музыка театр. 1939-öd восянь уджаліс Коми АССР-са «Асья кыа» сылан да йөктан ансамбль. Сійö унаысь вöлі ставроссияса да войтыръяскостса фестивальяс вылын лауреатён. Ёна нимавліс паськыда тöдса да радейтана коми сылысь Валентина Васильевна Есева (1923–1990).

1978-öd воын чужис композиторъяслөн котыр. Зіля уджалісны сылан лөсьöдысьяс Я. Перепелица, П. Чисталёв, петісны томъяс — М. Герцман, В. Брызгалова да мукöд.

60–80-öd воясö Коми АССР-ын сөвмöны серпасасьом, сёртчöм, графика, мукöд искусство. Содö кужысь киа йöз лыдыс. 1950-öd воын кө серпасасьыслөн котырын вöлі 5 морт, 90-öd воясын налөн лыдыс содіс 30 мортöдз. Сэтшöм серпасасьысьяс, кызди Р.Ермолин, С.Торлопов, Э.Козлов, тöдсаöсь уналаын. Ёна нималöны сёртчысьяс В.Мамченко да В.Рохин. Тайö зарни киа йöзыслысь уджъяссö эз öтчыд петкöдлыны миян канмуын да мудор сайын овлысь петкöдланінъяс вылын. 1977-öd воын Сыктывкарын восьтісны коми литературалы подув пуктысь И.А. Куратовлы казтылан мыгөр (сёртысьяс В. Мамченко, архитекторыс В. Эдельгаус). Р. Ермолинлы сетісны «РСФСР-са народной художник» ыджыд ним.

Культура сөвмөм-ёнмөмö ыджыд пай пуктісны клубьясын да небöгкудьясын уджалысьяс. На вынъясөн котыртчалісны художествоа асворсысь котыръяс. Сылісны йөктісны сцена вылын вөр лэдзысьяс, скöt видзысьяс, велöдчысьяс, велöдысьяс. 1959-öd воын Коми АССР-ын муніс йöзкостса искусстволөн медводдза декада. Сійö жö воас йöзлы университетъяс воссисны Сыктывкарын да Интаын. Бöрынджык татшöм университетъясыс воссисны республикалөн быд карын, гырысь посёлोकын да сиктын. Сэні во-лысьясöс тöдмөдісны нималана серпасалысь уджъясөн, по-этьяслөн да прозаикъяслөн тöдчана гижöдьясөн, уна мукöдторйөн.

1959–1964-ӧд воясö Коми АССР-ын югзисны пертаскуд экранъяс — Вӧркутаын, Ухтаын да Сыктывкарын кыптисны да кутисны уджавны телешӧринъяс. 80-ӧд вояс шӧрын Коми муын петалис 30 газет да 4 журнал. Коми кыв вылын сӧвмысь культура йылысь торъя сёрни кутас мунны водзӧ, 21-ӧд юрпасын.

5 ю к ö н

Кризислӧн тыдалана петасъяс

1954–1985-ӧд вояс Коми АССР-ын вӧлины зэв тӧдчанаӧсь, ӧд буретш сэки вӧлі лӧсьӧдӧма-кыпӧдӧма экономикалысь ӧнія вынйӧрсӧ, нюжӧдӧма туйяс, сӧвмӧдӧма культура. Экономика сӧвмӧдӧмӧ зэв ыджыд пай пунктисны республикаӧн сэкса веськӧдлысьяс, медводз И.П. Морозов, Коми обкомысь медводдза секретар, П.А. Безносков, Министръяс Сӧветӧн веськӧдлысь, З.В. Панев, Медвылыс Сӧветса юралысь. Ставыс найӧ петлӧмаӧсь коми кресъянаысь, сиктысь. Найӧ зилисны сӧвмӧдны республиканымӧс, торйӧннин лунвывса районъяс, кӧть ӧттшӧтш найӧ вӧлины аскадлӧн пиян, вӧчлисны тшӧтш шыбӧльяс.

Иван Павлович Морозов веськӧдлӧма республикаӧн, СӖКЮ-лӧн Коми АССР-са котырӧн матӧ 20 во. Чужлӧма 1924-ӧд воын кӧч тӧлысь 30-ӧд луно Межадор сиктын шӧркодя олысь кресъянин котырын. Помавлӧма 1942-ӧд воын Сыктывкарса медучилище, пырӧма 1943-ӧд воын СӖКЮ-ӧ, тышкасьлӧма, пельшералӧма. 1945-ӧд восянь комсомол удж вылын Сыктыв районуын, помалӧ партшкола. 1953-ӧд восянь уджалӧ Вӧркутаын да Интаын карисполкомъясса веськӧдлысьӧн, 1963-ӧд восянь уджалӧ Сыктывкарын ютыр обкомын. 1965-ӧд воын сійӧс бӧрйӧны обкомса медводдза секретарӧ, уджалӧ сәні 1986-ӧд воӧдз. Сы веськӧдлӧм дырйи ёна сӧвмис республикалӧн юркар, Сыктывкарын лои котыртӧма ас университет, кыпӧдӧма уна мича стрӧйба (музтеатр, вартчанін, лызьӧн котралан стадион). Сійӧ уджавліс



И.П. Морозов да А.Н. Косыгин том Усинск карын (1975 во)

сэк, кор Канкарсянь сөвмөдлісны медводз войвывса карьяс. И.П. Морозов вермис унатор вöчны республикалы, көть тайöс вöчнысö сэк вöлі сьökыд, öд ашшөрлуныс Комилөн вöлі кабала вылын сөмын, став гырысь да посниторьяс ладмөдны колö вöлі Мөскуаын, сэтчöс министерствоясын.

Веськөдлысьяслөн тöжд вылö видзөдтөг, кыдзи дзоньнас Сöвет Öтувлунун, 70–80-öд воясö республикаын кутіс тöдчыны кризис. Официальной сэкся пропаганда вöлі сьылö сөвмөм социализм йылысь, ыджыд вермөмьяс да шедөдөмторьяс йылысь, сөмын збыль олөмыс вöлі зумышмö. Медводз, экономикаыс дзоньнас пондіс чотны, планьясөн урчитан овмөс сетліс ичöt водзöс. Тайö инмыліс республикаын олысьяслы: эз тырмыв сөян-юан (яй, вый, фрукты, чери), бур төварьяс ньöбны лои сьökыд, быдлаын дзордзалис блат, омöля кыпöдісны йөзлы оланін, торйөн нин Сыктивкарын да сиктьясын, ёна паськаліс вина юöm, лөк вöчөм эз чин, содö вöлі. Коми АССР-ын олысьяслөн ёна торьявлис удждоныс, медозыра олісны войвывса карьясын (сэні ёна бурджыка вöлі пунктöма вузöс да сөян-юан вайöm), гөльджык олөм вöлі лунвывса районьясын, а Лузабердса да Койгорт районун мынтылісны йөзыслы медэтша, сэні

эз вöв войвывса содтöдыс. Та вöсна сэтýсь олысь йöз лыдыс воысь воö чинö вöли.

Медыджыд кризисыс лои йöзкотырса олöмын. Важ сöвет идеология вочасөн олöмыслы эз нин понды лöсъявны, став пропагандаыс йöзыслы тöдчымөн дышöдiс-дөнзис. Та йылысь унджык лоö гижöма бөръя, 23 юрпасын. Кризисыс вайöдiс Сöвет Öтувлун киссьöмöдз.

Ю а л ö м ъ я с.

1. Кутшöм вежсьöмъяс йöзкотырса олöмын лоины 1953-öд во бöрын?

2. Кыдзи вежсис Коми АССР-ын олысь лыдыс?

3. Кор кокнялис олöмыс коми сиктын?

4. Кутшöм шыбöльяс вöлины сиктса олöмын 60-öд воясö?

5. Мый вежсис 60–80-öд воясö индустрия сöвмöмын?


6. Кыдзи сöвмис йöзöс велöдöм да культура?

7. Кутшöм вылыс школа восьтöма вöли Сыктывкарын 1972-öд воын?

8. Кодъяс веськöдлiсны республикаөн 60–80-öд воясö?

9. Мый серти тöдчис олöмас ёнмысь кризисыс?





21 ю р п а с

ВЫЛЬ КАРЪЯСЛӨН ЧУЖӨМ, ИЧӨТ СИКТЪЯСЛӨН БЫРӨМ

1 ю к ö н

ВЫЛЬӨН КЫПӨДӨМ КАРЪЯС

XX-өд нэмын Коми мулөн мусерпасыс вуж выйö веж-сис, республикаын олысь лыдыс вöвлытöма содiс, медводз ортсысыс воалысьяс понда. 30–40-өд воясö Комиö пондiс-ны ыставны пукалысьясöс дзескыдiнъясö, кулакъясöс, вой-наöдз ыставлiсны финъясöс, полякъясöс, немечьясöс. Торйөн öдийö йöзсö пондiсны коравны войвылö 50–60-өд воясö. Сидз, 1939-өд воын кö Комиын олысь лыдыс вöли 320,3 сюрс морт, то 1959-өд воын содiс 815 сюрсöдз, 2,6 пöв. А 1970-өд воын олысь лыдыс лоöма нин 964,8 сюрс морт. Сэки каръясын овлöма став олысьяссьыс 62%. Мед-уна выльөн овмöдчöм йöзыс вужъясьлiсны каръясö да кар-сяма посёлокъясö.

1930-өд во кезлö Комиын чужис уна выль сикт-грезд. Сöвмисны тшöтш важъясыс. Вöли дзик öти кар — Сыктыв-кар. 20-өд вояс помын — 30-өд воясö öдийö кутiсны корсь-ны да перйыны мусир да из шом, медясö Коми му вой-вылын. Талы ёна отсалiс Войвыв—Печора кöрт туй, сы бер-дын кыптiсны выль посёлокъяс. Найö вочасөн быдмисны-сöвмисны, сэсся лоины каръясөн. 40-өд воясö Комиын чужö нöшта куим кар — Ухта, Вöркута да Печора. Торъя-

ланлуныс вöлі сöмын сыын, мый тайö каръяссö кыпöдисны ёнджыкасö пуксьöдöмаяс, буретш найö перйылісны из шом, мусир да с.в.

УХТА. 1929-öд вося моз тöлысьö Уква ю бокö, буретш сэтчö, тэрыб Чибью усянінас, воöма мусир корсьысь-перйысьяслөн медводдза экспедиция. Сэні вöлöма 126 морт. Воöмаяс вайöмаось аскöдныс мусир корсян некымын станок, мукöд көлуй да во кежлö сёян-юан. Геологъяслысь лагерсö шуисны «Чибьюса экспедициялөн база». 1929-öд вося йирым тöлысьын сэтчö воис нималана геолог Н.Н. Тихонович. 30-öд воясö Чибью посёлокбердса лагерьясö чукöртисны гырысь туялысь-геологъясöс, мусир перйысьясöс, химикъясöс. 1930-öд вося тулысын кыптис мусир перьян 5-öд номера бурөвöй. Арнас сэтысь перйисны нин мусир.

Чибью посёлок вочасөн быдмис. Йöз содісны, вайисны аскöдныс уна техника да с.в. Кыптисны выль оланінъяс. 1932-öд воын посёлокын кыптис би сетан станция. Кык во мысти би мöдісны сетны индустриялы.

1939-öд вося сора тöлысьын Чибью посёлоклы сетисны Ухта выль ним. Недыр мысти сэні кыптис би сетан выль станция, мусирысь бензин, солярка да мукöдтор вöчан завод. 1943-öд вося ноябр 20-öд луно Ухта посёлокысь лои кар. 40-öд—50-öд воясö Ухтаын лэптисны механической заводлысь цехъяс, биару уджалан да кирпич лэдзан заводъяс, босьтчисны дзоньтавны вөр лэдзан техника. Ухта вочасөн быдмис-паськаліс, 40-öд—50-öд воясын сійö лои Сыктывкар бöрын наука да техника вынйөр сертиыс мöд кар. 1959-öд воын сэні олö вöлі 36,2 сюрс морт, 1989-öд воын нин 112,1 сюрс морт. Сэні воссис индустрия институт, мусир перйыны велöдан, медицина, вөр техникумъяс.

ВÖРКУТА. Вөркута ю йылысь коми йöз тöдлісны важөн, но сы бокын оланінъяс чужисны-кыптисны сöмын 30-öд воясö, из шом перьян кадö нин. 1931-öд вося августын Чибьюсянь Вөркута ю бокö воöма 43 морта экспедиция из шом перйыны. Посёлокыслы сетисны Рудник ним. 1934-öд вося көч тöлысьын татчöс 1/2 номера шахта сетис медводдза из шом. Во мысти кыпöдисны техника дзоньта-

лан шөр мастерскöйяс, отсöг вылö воис би. Но сöмын 1936-öд воын югыд би воис сэтчöс йöз оланінъясö. Рудник посёлксянь Вöркута ю вомöдз, дзескыдінö пуксьöдöмаяслөн лагерöдз, вöлі нюжöдöма векни көрт туй. Тайö туй кузяыс из шомсö нуисны ю дорöдз, сэсся Вöркута, Уса, Печора юяс кузя да Войвыв саридз туйöд водзö, Кардорöдз да Мурманскöдз.

1937-öд вося сора тöлысь 26-öд лунö Вöркута юлөн шуйгаладор берегас воысьяс босьтчисны лэптыны мöд посёлок, буретш сійö быдмас Вöркута карöдз. Öттшöтш кыпöдисны «Капитальнöй» шахта, лöсьöдисны нöшта кык шахталы подув. 1941-öд воын Котлас—Вöркута көрт туй кузя мунисны медводдза поездъяс. Та бöрын чужисны выль посёлокъяс. А 1943-öд вося вöльгым тöлысь 26-öд лунö некымын посёлокысь подулалисны Вöркута кар.

ПЕЧОРА. Печора ю важысянь нимавліс кызди Коми муын медся тöдчана ва туй. Шуйга вадорас тшöкыда тöвйылісны ю кузя ветлысь катер-баржаяс. 1940-öд воын тані босьтчисны кыпöдны ва вылын уджалысьяслысь Канин-Нос нима посёлок. Юлөн веськыдладор берегас, Печора юсö көрт туй вомöналанінас, пондісны стрöитны Печора станция да көрт туй вылын уджалысьяслы посёлок.

1941-öд воын тані кутісны лöсьöдавны предприятияс: вөр комбинат, техника дзоньталанінъяс. Пöвъясысь тэрмасьöмөн тувъялöм-вöчöм паравоз депо дорын вöлі сулалö некымын вагон, сэтчö овмöдисны воысь йöзöс. Водзассö найö олöмаöсь мукуаясын да баракъясын. 1942-öд воын чужö медводдза улич, шуöны сійöс Көрт туй уличаөн. 1943-öд воын тані лэптисны челядьöс велöдан медводдза школа.

1941-öд вося рака тöлысь 11-öд лунö Кожва районлөн шöринөн лоö Канин-Нос посёлок. Во мысти сәні вöлі нин Совет Керка, бурдöдчанін, йöзöс шойччöдан керка, велöдчанін, сёянін—клуб, связь гөрöд, кык судтаа некымын олан керка. 40-öд воясын тайö кык посёлок пырыс муніс көрт туй, ва туй, енэж туй. 1949-öд вося тöv шөр 18-öд лунö РСФСР-са Медвылыс Совет Президиумлөн индöдөн Печора да Канин посёлокъясысь подулалисны Печора кар.

ИНТА. Печораса из шом перъяннн восьтѳм да уджѳдны заводитѳм бѳрын чужис Комиын нѳшта ѳти войвыв кар — Инта. 1924-ѳд вося гожѳмын, Ыджыд Инта ю бокын, уджаліс геологъяслѳн экспедиция, веськѳдліс сійѳн Е.Ф. Сошкина. Сійѳ тѳдмаліс-туяліс, эм-ѳ сѳні из шом. 1936-ѳд воын ю дорас лѳсьѳдісны выль лагер — Ухтпечлаг. Из шомсѳ корсисны 1940-ѳд вося тулысѳдз. Аддзисны. Пыр жѳ босьтчисны дасьтыны кык шахталы подув. 1940-ѳд воын «Ыджыд Инта Рудник» посѳлокын вѳлі нин 30 стрѳйба, на лыдын пуксьѳдѳмаяслѳн 9 барак, пывсян, 6 вѳчасяннн, мѳс карта, вѳв видзаннн да с.в. 1942-ѳд воын кутісны лѳптыны дзоньтасян механической завод, во мысти сѳсся Интаысь мѳдѳдісны медводдза из шом.

1954-ѳд вося йирым 4-ѳд лунѳ посѳлок пыдди лои Инта кар. 1959-ѳд воын син водзын быдмысь карын оліс нин 45,2 скурс морт. Кыпалісны выль шахтаяс, стрѳитісны паськыд экрана кинотеатр, ыджыд бурдѳдчаннн, поликлиника, нянь пѳжалан да йѳв заводъяс, йѳзлы оланннъяс, чужины выль уличаяс. Налы нимъяссѳ сетісны буретш сійѳ йѳзлысь, медводдзаяс лыдын кодъяс кыпѳдісны тайѳ войвыв карсѳ. Тайѳ геологъяс Г.П. Семьяшкин, А.А. Чернов, Е.Д. Сошкин, танн олысь коми йѳз Ф.А. Филиппов, Я.Г. Филиппов, Ф.А. Истомин да мукѳдъяс. 1992-ѳд во заводитчигѳн танн вѳлі олѳ 60,7 скурс морт.

СОСНОГОРСК. 1939-ѳд воын Изва ю бокѳ воисны медводдза кѳрт туй кыпѳдысьяс да босьтчисны уджѳ: пѳрѳдісны вѳр, дасьтисны кѳрт туй подув. Медводдза керкаяс кыпѳдісны кѳрт туй станция дорѳ. Посѳлоксѳ да кѳрт туй станциясѳ нимтисны Ижма. 1942-ѳд вося урасьѳм тѳлысьын Ижма пыр муніс Вѳркутаысь петкѳдан из шом тыра медводдза поезд. Сійѳ жѳ воас танн котыртчис Ухтаса вѳрпромвмѳс. Кѳрт туй кыпѳдѳм-лѳптѳм муніс 1949-ѳд воѳдз. Ѳтгшѳтш Ижмаын босьтчисны биаруысь быдсяматорсѳ вѳчны. Пырис уджѳ са вѳчан завод, 1949-ѳд вося моз тѳлысьын — технической углерод вѳчан-лѳдзаннн. 1955-ѳд вося ѳшым 1-ѳд лунѳ татчѳс посѳлок пыдди лои Ижма кар. Но 1957-ѳд вося лѳддза-номъя тѳлысь 27-ѳд лунѳ Ижма карлысь нимсѳ вежисны, шуисны сійѳс Сосногорскѳн.

МИКУНЬ. Йӧз овмӧдчӧмаось татчӧ 30-ӧд вояс помын, 40-ӧд вояс пуксигӧн, Войвыв—Печора кӧрт туй стрӧитигӧн. Кӧрт туй станциясянь Микунь быдмис ыджыд посёлокӧдз. Микуньсянь кӧрт туй вожъяс сэсся нюжӧдісны Сыктыв-карӧдз да Удораӧ. Коркӧя ичӧтик станцияысь лои тӧдчана кӧрт туй шӧрин. Быдмис-сӧвмис тшӧтш посёлок. 1959-ӧд вося рака тӧлысь 23-ӧд лунӧ сылы сетісны кар ним. Кыптис Микунь-2 выль станция, паськалісны кӧрт туй деполӧн цехъяс, чужис «Войвыв кыа» биару туйлӧн куим компрес-сор станция, мукӧд стрӧйба, велӧдчанінъяс, профтехвелӧд-чанін. 1989-ӧд воын Микуньын олӧ вӧлі 12400 морт.

УСИНСК. Ломтас корсьысь-туялысьяс казялісны, мый Коми муын мусир эм тшӧтш Уса ю вожын. Тайӧ вӧлі 1960-ӧд воын. Кык во мысти геологъяс корсьысины Усаӧ усьысь Болванбӧж ю дорын. Йирым тӧлысьын нин 2958 метра пыдтаысь му веркӧсӧ кыпаліс медводдза мусир. Та-дзи чужис Усинск кар. Таӧдз сійӧ вӧлі рабочӧй посёлок. Тайӧ нимсӧ сылы сетісны 1966-ӧд воын. 1972—1973-ӧд во-яся тӧлын нюжӧдісны Усинск—Ухта мусир туй. Сы кузя 1973-ӧд вося гожӧмын мунны кутіс усинскса мусир. 1975-ӧд воын Усинск лои Усинскса районлӧн шӧрин. Сійӧ жӧ воас кыпаліс сәні медводдза вит судтаа олан керка. 1984-ӧд вося лӧддза-номъя 20-ӧд лунӧ посёлоклы сетісны кар ним. Сійӧ воас тані перйисны 100 миллион тонна мусир. Водзӧ вылӧ канмулӧн уна пельӧсӧ унджык мусирыс муніс буретш Усин-скысь. 1989-ӧд воын Усинскын вӧлі олӧ 71,7 сюрс морт, 37 кывъя йӧз.

ВУКТЫЛ. 30-ӧд воясӧ геологъяс Г.А. Добролюбова да С.Д. Сошкина туялісны-корсисны Коми му войвылысь из шом, мусир, биару. Уджаліганыс найӧ кежалісны тшӧтш Печораӧ усьысь Вуктыл ю вылӧ, тӧдмалісны, мый сәтысь вермас сюрны мусир. Сёрӧнджык, 1955-ӧд вося гожӧмын, геологъяс В.А. Аношин да П.М. Мельников стӧчмӧдісны воддза юӧръяссӧ да чорыда шуисны, Вуктыл ю дорын пӧ эм мусир да биару. 1963-ӧд воӧ тані ләптисны-лӧсьӧдісны корсьысян скважина. Во мысти мӧдӧд номера скважина «ловзис», сетіс вуктылса биару. 1966-ӧд воын тані чужӧ-

быдмӧ Вуктыл нима выль посёлок. 1967-ӧд воӧ шуӧма вӧлі нюжӧдны «Войвыв кыа» нима биару туй. Кык во мысти вуктылса биару воис миян канмулӧн уна пельӧсӧ. 1975-ӧд вося урасьӧм 21-ӧд луно Вуктыл лои Вуктыл район шӧринӧн, а 1984-ӧд вося моз 21-ӧд луно посёлоклы сетисны кар ним. 1992-ӧд воын сэнӧ оло вӧлі 19 сюрс морт.

ЕМВА. Войвыв—Печора кӧрт туй стрӧитӧгӧн Коми муын чужӧма уна выль посёлок. На лыдын Емва, сийӧ сулалӧ Емва ю шуйгаладорас. Водзассӧ сийӧс шулисны Железнодорожнӧй посёлок. 1985-ӧд вося моз 2-ӧд луно посёлоклы сетисны кар ним. 1992-ӧд воын Емваын вӧлі оло 18,7 сюрс морт.

2 ю к ӧ н

Аскиа лунтӧм сиктъяс

Сӧвет кадся историяын сикт да сиктса йӧз дорӧ ныр-визыс, политикаыс век вӧвлӧ увтыртана, торйӧн нин 30–50-ӧд воясӧ, кор сиктысь, колхозъясысь век пычкывлісны сӧян-юан, кокни индустриялы донтӧм сырӧе, кресьяна ныв-пиян мунавлісны уджавны пабрик-заводъясӧ. Сӧмын 20-ӧд воясӧ, НЭП кадӧ, му уджалысь овліс-уджавліс



Питирим Сорокинлон чужанӧн — онӧя Турья сикт

ас кӱсйӱм сертиыс. Пасйылӱм нин 1953-ӱд вося видз-му овмӱс кузя СӱКЮ-лӱн пленум бӱрын олӱмыс коми сиктъясын кокнялыштӱс, но 60–70-ӱд воясӱ сиктысь йӱзыс век ёнджыка пондӱсны мунавны овны каръясӱ. Эз сӱмын ки помысь сӱкыд удж да омӱльдзык олан условияс вӱсна, сы понда тшӱтш, мый веськӱдлан органъяс уна сикт пӱдлалӱсны, нӱмӱвӱйся оланӱнъяс бырӱдӱсны. 60–70-ӱд вося сиктъяссӱ юклӱсны аския лунаяс (перспективааяс) да аския лунтӱмъяс (перспективатӱмъяс) вылӱ. Канмуӱн веськӱдлысьяс кӱсйисны видзтыны сӱм, медым эз ков посни сиктъясын видзны школаяс, бурдӱдчанӱнъяс, клубъяс, колхозъяс. 1970-ӱд воын Коми АССР-ын официальной лыддӱны вӱлӱ 1050 сиктса оланӱн, на лыдысь «республикаса батыяс» аския луна сиктъясӱн нимтӱмаӱс сӱмын 97 сикт, став мукӱдыс — аския лунтӱмӱс пӱ. Чайтӱны вӱлӱ, мый 97 сиктас канму лӱсьӱдас карын код оланнога оланӱнъяс, сӱдз шусяна «агрокаръяс», мукӱд сиктъясысь йӱзӱс сӱтчӱ овмӱдӱмӱн. Тайӱ мӱвпсӱ вӱзйылӱма нӱшта Н.С. Хрущӱв, татшӱм ногӱн сӱйӱ кӱсйӱ вӱлӱ коммунизм ӱдйӱ стрӱитӱгӱн бырӱдны кар да сикт костын торъялӱмсӱ. Коми АССР-ӱн сӱкся веськӱдлысьяс абу мӱвпыштлӱмны, кытчӱдз вермас вайӱдны татшӱм сикт бырӱдӱмыс, мый сиктъяс — коми йӱзлӱн нӱмӱвӱйся оланӱн. Найӱ, кыдзи колӱ вӱлӱ партиалӱн салдатъяслы, пӱртӱсны тшӱктӱмъяссӱ олӱмӱ. Тайӱ вайӱдӱма шемӱсмӱданторйӱ — 1970–1980-ӱд воясӱ Коми АССР-ын сикт лыдыс чинӱма 1050-сянь 740-ӱдз. Бырӱмаӱс медводз неыджыд грездъяс, сӱтшӱмъяс, кыдзи Кузьдӱюр, Кузьмыльк, Лӱмтыбӱж, Ношва, Ыджыдвис, Якунь-керка да уна-уна мукӱд. Висьтавны кӱ став тыртӱммӱм сикт-грезд йылысь, ковмас эськӱ гижны уна тома серия. Висьтыштам сӱмын ӱти бырӱдӱм сикт йылысь.

Кöні тэ, Кобра?

Сыктыв йылысь петлём коми гижысь Иван Торопов 1967-öд воын гижöма «Кöні тэ, кар?» висьт. Сэні шөр геройыс Федя Мелехин зонка ёртъясыскöд Айму вöсна Ыджыд тыш кадö кылöдоны Сыктыв кузя сьöкыд пурьяс, виччысьöны, кор нин кывтасны Сыктывкарö, республикаса юркарö. Сэні найöс виччысис удждон, шойччөг, водзö олём вылö гырысь лача. Öнi кө Федя, олöма нин морт, бөр катас Сыктыв кузя бөр, то уна посни сикт оз нин паныдась, он нин вермы сэтчö сувтлыны шойччыштны, бушков сэні виччысьны. Койгорт районса медлунвыв Кобра сикт он жö нин аддзы, сы пыдди эм сöмын тыртöмин да некымын киссьöм керка. Кольöма вежсьытөг сöмын Вяткаö визувтысь чукуля-вегыля Кобра ю.

Кобра сикт йылысь медводдза пасйöд вöли вöчöма 1747-öд воын, 1784-öд воын сэні вөлöма 158 олысь, 1859-öд воö овлöма 372 морт нин, вөлöма сэні öзын. 1861–1866-öд воясö Кобраö лэптöмны вичко, вөлöма тшöтш öти часовня, вичко бердын уджавлöма школа. 20-öд вояссиянь Кобраын вөлöма ас сиктсöвет, 30-öд воясö котыртчöма «Искра» колхоз. Кобраса сиктсöветын 1926-öд воын овлöма 567 морт. Нималана коми гижысь да туялысь Илля Вась (В.И. Лыткин) 20-öд вояс помын удитöма на воыны Кобраö да велöдны-туявны сэтчöс зэв аслыссяма коми сёрниогсö, сэтчö кольлöма на зэв важ пöдса 0 шы. Та вöсна кобраса сёрнисö Койгорт районса мукöд олысьяс весиг шмонитанаа серпасалöны таdzi: «Коборо муно каро, туйыс модоро муно, лымйыс шляпко-усё...» 30–60-öд воясö Кобраын вöвлöма ичöt школа, милиция, клуб, пельшер-акушерлөн пункт, колхоз (бöрынджык бригада), кыпöдлöмаöсь дизеля би сөтан станция. Йöзыс овлöмаöсь, кутлöмны важ оласног, быд грездын вöвлöмаöсь аслас гажъяс, сэні гажöдчылöма став сиктыс. Турубановъяс, Костинъяс, Шемяковъяс, Котковъяс да Шутовъяс эз көйыны некытчö мунны нэмöвöйся олансьыс, челядсьö быдтылісны овны чужанінас.

60-өд вояс помлань сиктсө заводитисны бырөдны, тупкалисны вочасөн школа, клуб, пельшер пункт, пошта, мукөд учреждение, шуисны йөзыслы, мый совхоз бригадасө туйяс абутөм вөсна тшөтш тупкасны. 1973-өд вося кос му төлысь 5-өд лунө бырөдисны Кобраысь сиктсөвет. Та бөрын йөзыслы быть ковмис вуджны овны Койгортө, матигөгөрсө посёлокъясө, орчча Киров областьтө. 70-өд вояс помөдз медбөръя овмөсьяс мунисны-эновтисны чужан сиктсө. Та дырйи канму нинөмөн абу отсалөма кобрасалы, сьөмөн мортлы шайт абу вөли вештөма. Татшөм вөлөма республикаса веськөдлан органъяслөн ас сиктса йөз вөсна төждыс.

70-өд вояс помлань нин гөгөрвоана лон, мый аския лунтөм сиктъяс бырөдан нырвизыс немө вайөдө россияса сиктсө дзоньнас. Өд сиктъяс бырөдөм вөсна йөзыс пышйисны эз гырысь сиктъясө, а кызвынсө каръясө. Өттшөтш сьөмыс эз лишав агрокаръяс вөчны. Йөзыс эз көйыны вуджны овны тшөктөмъяс серти, эновтны овмөс, керка-карта, бура вөдитөм муяс. Аския лунтөм сиктъяс бырөдөм Комиын вайөдис сэтчөдз, мый весиг вөвлөм гырысь сиктъяс кутисны өдийө тыртөммыны. Со көть Сыктыв районса Волся сикт. Коркө XIV–XVII-өд нэмъясө тайө вөлөма Сыктыв вожлөн шөрин, вөлөма сәни изкар, манастыр. 1916-өд воын Волсяын овлөма 1995 морт. Сөвет кадө сиктыс тыртөммөма, 1970-өд воын олысь лыдыс чинөма 563 мортөдз, 1989-өд воын кольөма сөмын 367 олысь. Татшөм сиктыс Комиын уна.

Аския лунтөм сиктын олысьяслөн аскылөм йылысь бура гижө Александр Ульянов «Сьөд ар» висьтын Петыр нима эндөм зонмөс петкөдлөмөн. Мам кувсьөм бөрас сийө шогпырысь мөвпалө: «Мөдарсянь кө, кодкө сись юра жө сәни пукалө. Мед көть и партийной морт. Кыдзи нө сідзи — перспективатөм грезд либө сикт. Нэмсө тані йөз олисны, челядьөс чужтисны-быдтисны, му вөдитисны, скөт видзисны, а өні өтчөдөн ставсө керыштны-помавны? Водзын быттьө тані лешак перспективаыс вөли, а талун эз ло. Өти здукөн, вылісянь шуөмөн, улісаыслысь юавтөг, натөг сёрниттөг. Мый нө сідзкө артмө? Перспективатөм кө сикт-грезд, пер-

спективатомось лооны и сэтчос олысьяс. Тшөтш и Петыр. Кутшөмөн чужин, сэтшөмөн и кулан, съодас нэмтө кутан овны. Быд лун, вояс чөж, пöрысьмытöдзых. Сы вöсна, мый водзвыв нин кодкө киөн плешкад гижöма — овны да кувны тэныд, Петыр, ковмас тані, Эжва йылö эндөм грездын...»

Дерт, аския лунтөм сиктъясысь петөм йөз эз эндыны, аддзисны оланін да удж, лöсьöдісны выль овмөсьяс, быдтисны челядьöс. Но сөмын воштөм, збыльысьсö воштөдөм чужанін пондаыс сёлөм дойныс налөн кувтөдзыс коляс.

Ю а л ö м ъ я с д а у д ж ъ я с.

1. Мыйкөд йитчöма Коми му войвылын выль каръяс чужöмыс?
2. Кутшөм öтувъялун эм налөн сөвмöмын?
3. Висьтыштöй Ухта кар чужөм-сөвмөм йылысь.
4. Кыдзи чужис-быдмис Вөркута кар?
5. Висьтыштöй Печора кар йылысь.
6. Индустриялөн кутшөм юкөн сетіс олөмсö Инта карлы?
7. Мыйла Микунь кар шуöны туйяслы зумыд гөрөдөн?
8. Төданныд-ö ті Ижма нима сикт либö кар?
9. Индустриялөн кутшөм юкөн отсаліс чужны Усинск карлы?
10. Мыйсянь чужис Вуктыл кар?
11. Кымын сикт бырис Коми АССР-са мусерпас вылысь 70–80-öд воясö?
12. Висьталöй Кобра сиктлөн история йылысь.
13. Кытчö муналісны «пöдлалөм», аския лунтөм сиктъясысь олысьяс? Кöсйисны-ö эновтны найö чужанінсö?





22 юрнас

КОМИ КУЛЬТУРАЛӨН СӨВМӨМ ДА ПАДМӨМ

1 юкөн

Коми школась лои роч

1953–1986-өд воясö коми кывйөн вöдитчöмыс ас республикаын ёна чинöма. Збыльысьсö кө, тайöс вöчисны тöдöмөн, а медвылысса коми веськөдлысьяс некыдзи абу зильöмаöсь дорйыны чужан кыв вылын культурасö. 50-өд вояс помöдз коми кыв зумыда на вöли кутчысьö школаын, печатын, небöг лэдзöмын, клубъяс да небöгкудъяс уджын. Сидз, 1958/59-өд велöдчан воын коми кыв вылын велöдлісны 257 ичöt школаын, 77 абу тыр шөр да 41 шөр школаын, став школа лыдысь джынъяс. Коми АССР-са 84 сюрс велöдчысьысь 22707 морт (22%) велöдчыліс коми школаын. Шөр школаяслы петавлісны комиён велöдчан небöгъяс (арифметика, история, физика, чужан да роч кывъяс), глобусъяс да мусерпасъяс, уна сикас таблица.

50–60-өд вояс вуджөмö другөн ставыс вежсис, вылісянь национальнöй школалысь донсö лои уськөдöма. Тайö бара вöли йитчöма коммунист ютырлөн кансямкөд. Н.С. Хрущёвлөн коммунизм кыпöдан планыс лөк ногөн кучкис абу роч войтыръяслөн кывъяслы да культураяслы. Чайтöны вöли, мый коммунизм дырйи пö лоас öти войтыр да ставныс пö вуджасны öти кывйö. Совет Öтувлунун та вöсна пондісны ышöдны войтыръясöс сөлькнитчыны-öтувтчыны,

ошкыны уна войтыръяса семьяяс, съывны социалистической интернационализм йылысь, кор йозыс (комияс, тотара да мукодьяс) бөрйоны роч кыв чужан кыв пыддиыс ас косьом сертиыс. Роч кывлысь статуссо кыподома вöли зэв выло, сийос шуисны ертасян да мирлөн, мод чужан кывйөн, коть мортлөн, кызди мам, бать, вермас лоны öти чужан кыв. Вочасөн йозкотырын совмис видзодлас став национальной вылас (рочысь кындзи) кызди важмомтор, ковтомтор либö регыдъя кадö бытьөн бырантор выло. Коми АССР-ын татшом видзодласыс коми кыв выло ёнмис буретш 60-öд воясын да кыссис 80-öд вояс помöдз.

1958-öд воын петис школа йылысь ставсоюзса оланпас, коклөн 15-öд статья сетö вöли инöд ай-мамныслы аслыныс бөрйыны, кутшом кывйөн велöдны челядьсö. Коми АССР-са Медвылыс Совет 1959-öд вося лöддза-номъя 26-öд лунся индöдын ошкö тайос. Лои поэна коми кыв не велöдны, ай-мамыслы кö тайö оз ков вöли. Тайö ёнасö эз ков тшöтш йозос велöдан министерстволы, сы вöсна мый коми школа бырöдöм мунис сылөн индöдъяс серти, коми кывсö вöтлисны тшöтш *челядь йöргясысь*, мырдөн вежисны роч кывъя уджтас выло. 1965/66-öд велöдчан воö кольöма нин 144 ичöt школа, 95 комиа-роча шөр школа. Чинöма коми кыв велöдысь челядь лыдыс. Сидз, коми уджтас серти велöдчысь челядь лыдыс кö 1975/76-öд воö вöлöма 28600, то 1986/87-öд велöдчан воö сийö чинöма 14300-öдз. Коми кывлөн статусыс лöома весиг мудорсайса кыв дорысь омöльдзык, öд бөръясö колö вöли велöдны быть, коми кыв поэö вöли велöдны, позис не велöдны.

Велöдысьясос дасьтан уджын вöли зэв ыджыд воштöм. Коми пединститут 1932-öд воын котыртчöмсяныс лэдзлис вылыс тöдöмлунъяса коми кыв велöдысьясос. Тайö важ традициясö панлис на А.С. Сидоров, институтын вöли лöсьöдöма методика сетан бур подув. Важ зумыд традициясö 60-öд вояс помын ачыс пединститут (сэтчос ректоратыс) бырöдöма, дугдöмны сәни велöдны студентъясос филология факультетын коми юкöнын, сидзи нин неыджыд, 12 морта коми группаö йозос эз нин босьтлывны велöдчыны.

Ыстысьлөны вөлі, абу пö кöсйысьыс. Татшöм ногөн Коми АССР-ын некымын во чöж эз дасьтыны вылыс тöдöмлунъяса коми интеллигенцияöс. Мездысьнас тайö шогсьыс лои 1972-öд воын котыртöм Сыктывкарса канму университет, сэтчö, история-филология факультетö, пыр жö котыртöма лои коми юкөн. Сэки вөлі подув пунктöма коми кыв да литература кафедралы, котыртысьяснас вөлöмаöсь филология кандидат **Геннадий Григорьевич Бараксанов (1934–1997)** да **А.Н. Карманова**, сэсся сэтчö воöмаöсь наукаяс Академиялөн Коми филиалыс А.К. Микушев, Е.А. Игушев, В.В. Пахорукова. 25 морта коми группаяс пунктисны зумыд подув выль университетын коми филологиялы. Öнi матö став уджалысь, коми кыв велöдысь, журналист, туялысь — университетса быдтасьяс.

70-öд воясын коми школаыс лои роч школа, ичöt школаöс вуджöдисны рочөн велöдöм вылö, коми кыв да литература лоис сöмын велöданторйөн. Татшöм ногөн, 20-öд воясö пунктöм зумыд панассö (коми кывъя школа) 70-öд воясö бырöдöма лои.

2 ю к ö н

Небöг лэдзöм да газет-журналъяс

Медся уна небöг комиён лэдзлісны 50-öд воясö, зэв ёна сэки вуджöдчöны вөлі коми вылö, петавлісны уна лыдөн А.С. Пушкинлөн, А.П. Чеховлөн, Л.Н. Толстойлөн, Дж. Лондонлөн, Д. Дефолөн да уна мукöд гырысь классиклөн небöгъяс. Сідз, 1946–1956-öд воясö печатысь петлöма 671 коми небöг, онас шөркодя 60 небöг. 70–80-öд воясö тайö лыдыс чинöма матö 3 пöв, петавлö вөлі онас 20 гөгөр небöг. Сöмын куим сикас темаа небöгъяс сэсся пондисны петавны — велöдчан небöгъяс, коми гижысьяслөн серпаса литература да шочиника туялан небöгъяс. Вуджöдöм литература лэдзöм 60-öд вояссянь бырöдöмаöсь. Ыстысьöмны, комиясыс пö рочнас сідз нин бура сёрнитöны-лыдды-

сьоны, асьныс ставсö пö рочөн лыддясны. Торйөн этша пондiсны лэдзны челядьлы. Сiдз, 1959-öд воын кö комиён челядьлы петалöма 26 небöг, 1988-öд воын сöмын 5.

Коми газет лыд коммунизм стрöитан кадколастö тшöтш ёна чинтöмаöсь. Медуна газет петавлöма 30-öд воясö, сэки быд районын газетыс вöлöма коми кыв вылын, лэдзлöмаöсь тшöтш том йöзлы «Том большевик» газет. 1960-öд воö петавлöма комиён 12 газет, «Югыд туй» став республикалы да 11 районса газет. 1965-öд воын коми газет лыдыс чинöма витöдз, а 1967-öд воын лоöма сöмын 4. 1967-öд воö вуджöма роч кыв вылö газетыс Изьва районын, районас öнi коми йöзыс босьтö 80% став олысь письыс. Дзоньнас дудан кад коми печатълы вöли сьöкыд кад, «Югыд туй» газетлөн петан лыдыс век чинлöма да усьöма, 80-öд вояс шöрын 4500–5000-öдз сöмын. Нинöм республика вöли оз лэдз челядьлы да том йöзлы — коми газет ни журнал том-уловлы эз вöв. А öд комиыс вöли республикаын 280 сюрс.

Неуна бурджык вöли журналъяслы, петiсны «Войвыв кодзув» да «Чушканзi» журналъяс. Серпаса литература 60–70-öд воясö ёна сöвмис, тайö тöдчö вöли тшöтш «Войвыв кодзув» журнал петан лыд серти. Сiдз, 40–50-öд воясö «Войвыв кодзув» кö петавлис онас 2000, то 1975-öд воын петан лыдыс содöма 7000-öдз, куим да джын пöв. Сэсса петан лыдыс бара жö заводитöма чинны да 80-öд вояс шöрын чинöма вит сюрсöдз.

Сöвмöмыс тыдалiс сöмын телевидениеын. Кыззи тöдса, Комиын пертаскудъяс ломзялöмаöсь 1959-öд восянь, сэки Вöркутаын заводитöмны петкöдлыны Мöскуаысь телеуджтасъяс. 1964-öд воын котыртöма Сыктывкарса телевидение студия. 1967-öд восянь пондiсны лöсьöдны лючки репортажа уджтасъяс тшöтш комиён, уджалан лунъясö петöны вöли «Выльторъяс», театр спектакляс, концертъяс. Коми радио да телевидение судзис медся пыдi пельöсьясö, медся посни сиктъясö, öтувтiс найöс юркаркöд.

Литература кыпалом

50-өд вояс пом — 60-өд вояс заводитчөмсö шулывлöны ульдылөмөн нöшта сы вöсна, мый сэки став Сöвет Öтувлун пасьтала пондiс öдйö сöвмыны литература, театр, кино, серпасасьöм, сёртчöм. Татшöм ногөн тшöтш лоис Комиын. Буретш сэки гижысьяслы позис гижны нин ёна вöсьсöнджык, повтöгджык. Ютырлөн литература вылö личкöмыс эз ло вывтi чорыд, литератураыс надзöник дугдö лоны ютырöс да сöвет канмуын шедöдöмторъяс сьылана-ошкана. Мөд-кö, 30-өд воясö уна пуксьöдлөм гижысьöс вöли правдайтöма, вöсьтöма лыддысьяслы дзёбöм гижöдъяссö, найö вөрөгъясысь, националистъясысь лоины коми литературалы классикъясөн. Уна во коставлөм бöрын «Войвыв кодзув» йöзöдiс Нёбдинса Витторлысь, Тима Веньлысь, Илля Васьлысь да мукöд пöдса нима гижысьлысь уджъяс. Ачыс олөм кыпалöмыс, экономикалөн ёнмöмыс сетiс ышöдана вын дзоньнас йöзкотырыслы.

60–70-өд воясö коми литература кыпалiс вель ёна, сэки öттшöтш гижлисны олөма нин, уна кужысь гижысьяс Яков Рочев, Иван Вавилин, Иван Изъяуров, Геннадий Фёдоров, Серафим Попов. Литератураö пырис сэкса том гы, енбиа гижысьяс Геннадий Юшков, Иван Торопов, Альберт Ванев, Владимир Попов, Егор Рочев, Виктор Напалков да мукöдъяс, мыччысисны 70-өд воясö öнiя кадся верстыö, сэки томиник на петасъяс Александр Некрасов, Александра Мишарина, Василий Лодыгин, Александр Ульянов, Алексей Попов да мукöд. Серпаса литература сöвмöдiс водзö коми кыв, сiйö пондiс вочасөн весаммыны, мынтöдчыны рочысь ковтöг пыртöдөм кывворысь. Татшöм сöстөм гижöдъяслы бур пример сетлисны Иван Куратов да выльöн вöсьтөм, реабилитируйтөм классикъяс. Торйөн ёна 60–70-өд воясö сöвмö вöли поэзия да проза.

Поэзияын став рөмъяснас пöртмасисны сэтшöм гырысь енбиа кывбуралысьяс, кыдзи Владимир Попов, Альберт Ванев, Серафим Попов, Александра Мишарина, Владимир

Тимин, Юрий Васкутов, Василий Лодыгин да мукөдъяс. На пиысь гоз-мөд кыв пасйыштам Изьва вожысь петлөм сылысь йылысь.

Владимир Попов чужлөма 1934-өд вося төв шөр 1 луно Изьва сиктын, быдмөма-овлөма уналаын. 1951-өд воын помалөма Мокчойса шөр школа да пыр жö пырöма М. Горький нима Литература институтö. 1960-өд воö петö сылөн медводдза кывбур чукөр— «Тувсов йөлöга». Та бöрся петлөм вель уна небöгын кывбуралысь сылö ас чужан му, уджалысь йöз, радейтчöм, Печора ю, аслас ёртъяс да коми поэтъяс йылысь. Ыджыд да джуджыд мөвпъяса сылөн гижöд петö 1963-өд воö, тайö «Сылысны бабаяс, сылысны» поэма. Сэни В. Попов гижö

1943-өд вося коми сикт йылысь, буретш Нёбдинса Витторлөн дзескыдинын кулан кадся йылысь. Ылын Сибырын пуксьöдöм ыджыд кывбуралысь кулö, но чужанінас аныяс уджалöны тыш вылö мунöм верöсьяс пыдди да сылöны Витторлысь мыла сыланкывъяс. Поэмасö сиöма В. Савины, радейтана кывбуралысьлы да сылөн гижöдъяслы. Аслас öбича, оласног, сёрни сертиыс В. Попов вöлі збыльысь кывбуралысь, пуан сёлöма, кыпид, öттшöтш унатор кылысь, кадсö, йöзсö, аскылöмсö, историясö. Со кызди сійö гижö «Чуксасьöны вояс» аслас кывбурын:



Владимир Александрович
Попов

Чайтан, мунöм воясыс оз волены?
Чайтан, найö ланьтисны нин помöдз?
Но öд найö сёлöмъясын олöны,
Сы вöсна и томöсь найö, томöсь.

Медым яръюгыдаджык петкӧдлыны коми литература-лысь сэкса верстяммӧм-сӧвмӧмсӧ, торйӧн пасьям кык коми классиклӧн олан туй да гижӧдъяс йылысь. Сы понда тшӧтш, мый асланыс унджык гижӧдъясас найӧ пыдӧ петкӧдлісны Коми мулысь, мортлысь ХХ-ӧд нэмса, неважӧн-ся да важся историясӧ.



Геннадий Анатольевич
Юшков

ӧттшӧтш да медъяна нимаवны кутӧма прозаа гижӧдъясӧн. Ээв тӧдчанатор — Г. Юшковлӧн гижан туяс сюрӧса пыдди мунӧ коми войтыр, сылӧн ӧнія история, аслыспӧлӧс ӧбича петкӧдлан тема. Буретш 60-ӧд воясӧ коми литератураын бара ёнмӧ национальной нырвизь. Коми йӧзлӧн сэки асвежӧртӧмыс кыпалӧма, ёнмысь рочмӧдан тӧвру вылӧ видзӧдтӧг. Г. Юшков тайӧ сьӧлӧмкылӧмсӧ петкӧдлӧ аслас паськыда тӧдса кывбурын.

Ми — комияс!

Ми — парма шӧрса козъяс,

И некор огӧ куснясьлӧй,

Кыз росъяс.

Ми — комияс!

Геннадий Юшков. Геннадий Анатольевич чужӧма 1932-ӧд вося рака тӧлысь 14-ӧд лунӧ Сыктывдін районса Час сиктсӧветӧ пыран Ситбар грездын. Ичӧтдырыс сюрӧма тыш кад вылӧ. 1950-ӧд воын Сыктывкарса 12-ӧд номера школа помалӧм бӧрын том зон куим во журналисталӧ коми радиоын. 1953-ӧд восянь Геннадий Юшков велӧдчӧ М. Горький нима Литература институтын, сӧсса сійӧс помалӧм бӧрын олӧмыс век вӧлі йитчӧма гижысь котыркӧд. Геннадий Анатольевич пырӧма литератураӧ кызди кывбуралысь, сӧсса сетчӧма драматургияӧ,

Ми — парма шӧрса юяс.
А юясыдлы
Сӧстӧмлун и туяс.
Ми — комияс!
Ми — парма шӧрса чомъяс,
Век восьсаӧсь бур мортлы:
Лок, эн донъясь.
Ми — комияс!
Ми — парма шӧрса вӧрыс
И ӧттшӧттш меліось,
И зумышӧсь,
И скӧрӧсь!

60–80-ӧд воясӧ Геннадий Юшков медъяна гижӧ проза, сәні сійӧ зильӧ гӧгӧрвоны морт да история, сылӧн кӧсйӧм да канму костын зурасьӧмъяс, олӧмлысь мичсӧ да лӧксӧ. Ӧттшӧттш петкӧдлӧ яръюгьд коми ӧбичаа геройясӧс «Конӧ Семӧ» висътын, «Вилядь сиктса ань», «Пияна ош» повесътъясын. Сӧвет кадколаста история серпасалигӧн вочасӧн содӧ сійӧс аслыссикас донъялӧмыс, сійӧ торъялӧ вӧлі сәксә официальной визъысь. Тайӧ тӧдчис «Чугра» да «Рӧдвуж пас» сылӧн ыджыд романъясын. Сәні гижысь ӧна вылӧ кыпалӧ ӧсь темаяс восьтигӧн (аскост тыш, коллективизуйтӧм, немечьяскӧд тыш, индустрия сӧвмӧдӧм). «Чугра» романын бура петкӧдлӧма, мый войвылӧ индустрия паськӧдӧм вайӧ оз век буртор, сійӧ тшӧттш торкӧ нәмӧвӧйся оласногсӧ.

Иван Торопов. Чужлӧма Сыктыв йылын, Койгорт сиктын 1928-ӧд вося моз тӧлысь 27-ӧд лунӧ му вӧдитысьяс котырын. Став ичӧтдырыс да том олӧмыс сылӧн йитчӧма вӧлі сьӧкыд тыш кадкӧд. 1941-ӧд вося арӧ усьӧма фронт вылын айыс, 1945-ӧд воын кувсьӧма 39 арӧса мамыс. Ачыс 1942-ӧд восянь, сизим класс помалӧм бӧрын, петӧма нин ас нянь вылӧ, уджавлӧма вӧрын, колхозын, кылӧдчӧма, велӧдчӧма рытъя школаын, журналиставлӧма. Буретш очеркъяс гижалӧмсянь том морт пырӧ коми литератураӧ, 1962-ӧд воӧ петӧ сылӧн «Ныв локтіс пармаӧ» повесът. Коми



Иван Григорьевич Торопов

налысь корсьысьсьомъяс, съокыдлунъяс венёмсö. Том йöз оз усьны съөлöмнаныс, быдмöны-верстяммöны, мöвпалöны олöмас асланыс туй йывсьыныс. Öнi на челядьлы лоас интереснö тöдмасьны тайö гижöдъяснас, кодъясысь И.А. Тороповлы 1984-öд воö сетiсны Россия Федерациялысь литература премия.

«Чужин кө мортөн» романын гижысь кыпöдö ёсь проблемаяс: олöмын дзугъяс, лючкитöмлунъяс, морт да йöзкотыр, мыж вöчöм да кыв кутöм. Бөръя воясö Иван Торопов гижö Комиын история лоöмторъяс йылысь, кызди найö мөрччöмны коми морт, му вöдитысь олöм вылö. Тайö теманас гижысь восьтiс асьсö вöвлытöм ногөн.

4 ю к ö н

Вужвойтырöс вöли вунöдöма

Коми кыв пондiс чусмыны, бергавны шочджыка сы вöсна нöшта, мый Коми му Сöвет каналан кадö вочасөн дугдiс лоны коми йöзөн овмöдöминөн, сийö лоис сё сайö вой-

тыра регион, көні вынавны пондіс роч кыв да օтувъя совет, роч культура. Асьныс комияс 60–70-օд воясօ лоины кык кывъяёсь, матօ ставныс кокниа нин сёрнитісны да гижлісны рочօн. Йօзօс лыддьօдлօмъяс петкօдлісны комияслысь став олысь пօвстысь пайсօ тадзи: 1926-օд воын комияс босътлісны 86,9%, 1939-օд воын 72,5%, 1959-օд воын 30,1%, 1970-օд воын 28,6%, 1979-օд воын 25,3%, 1989-օд воօ 23,3%. Воысь воօ локталօм йօз содօм вօсна вужвойтырлօн лыда пайыс век чинօма. օттшօтш чинօма коми войтырлօн доныс, сы вօсна тօждыс, сійօс пыдди пуктօмыс.

Дудан кадօ канму да ыджыдалысь коммунист ютыр тօждысьлісны коми войтыр да культура вօсна мода вылас нин, весиг национальной тема кыпօдны оз позь вօлі. 1978-օд вося ода-кора 23-օд луно Коми АССР-лօн Медвылыс Совет вынсьօдіс автономия республикалысь выль Оланподув, кօть нинօм ёна вылыс сәні эз вօв. Коми йօз йылысь нинօм эз вօв пасйօма сәтчօ, коми кыв йылысь гарыштօма вօлі сօмын, мый «школаын позьօ велօдны чужан кыв вылын» (39-օд статья), мый Коми АССР-са оланпасъяс йօзօдօны комиօн да рочօн (98-օд статья), мый ёрд нуօдны позьօ либօ рочօн, либօ сәтчօс олысьяслօн чужан кыв вылас (148-օд статья). Со став официальной вынсьօдօм доныс коми кывлօн сәкся кадօ. Ютырлօн идеология серти, Совет օтувлунын социализмсօ вօлі лօсьօдօма 1936-օд воын нин, сідзкօ национальной проблемасօ важօн пօ бырօдօма. 60–70-օд воясօ кылօ вօлі сёрни сօмын коми культура «дзоридзалօм» йылысь, роч культура дорօ сылօн матыс-мօм йылысь. Мыйкօ коми тема йылысь сёрнитлывлісны сօмын гырысь юбилейяс пасйигօн да туялан конференцияяс дырйи. Коми кыв зэв шоча кылօ вօлі каръясса уличьясын, восьса сёрниын. Шуам, сәки кօть медыджыд веськօдлысьясыс республикаын вօліны комияс, демонстрация, чукօртчօм ни пертаскуд пыр чина морт комиօн шы вօлі оз сетлы. Веськօдлан постъяс вылօ йօзօс пуксьօдігօн эз видзօдлыны сы вылօ, тօдօ оз мусօ, войтырсօ мортыс, кужօ оз сёрнитны йօзыскօд комиօн. Сідз, 30-օд вояс бօрын Коми обкомօн веськօдлісны нин роч йօз: А.Г. Таранен-

ко (1940–1948-өд воясö), А.Г. Дмитрин (1957–1965-өд воясö). Выналан идеологияыс восьсөн эз ошкывлы коми йылысь весиг сёрни паном да вен сы вылö ыстысьомön, мый сөвмöm социализм дырйи пö войтыръяслön сьöкыд-лунъяс дзоньнас Совет Öтувлунын эз вöвны, налы подуvsö пö важөн бырöдöма, найö пö эмöсь сöмын капитализма муясын.

5 юкөн

Спортын коми кодзувъяс

50–80-өд воясö республикааным ёна кыпаліс тшöтш спорт. Сэки му уджалысьяслön, став йöзыслön олöмыс вочасөн бурмис, коми сикт ловзис-кыпаліс, сөвмис водзö йöзöс велöдöм, культура да спорт. Буретш/сйö кадö вужвойтырысь петісны выль спортсменъяс. Найö ас пайысь нимöдöны вöлі коми йöзöс Россия, Совет Öтувлун да му шар пасьтала.

Вылөдз кыпалісны коми лызьён котралысьяс Николай Бажуков, Василий Рочев да Раиса Сметанина, насянь му шар пасьтала унаөн медводз, гашкö, кывлісны войвывса Коми му йылысь. Куимнанныс петісны пыді коми сикть-



Олимпиада вылын вермысьяс: Н. Бажуков, Р. Сметанина, В. Рочев

ясысь, аясныс моз найö ичötсянныс лызьöн исласьöмаöсь, асланыс зумыдлун, зильöм, повтöмлун помысь шедöдöмны шензьöдана-шемöсмöдана вермöмъяс.

Николай Серафимович Бажуков чужлöма 1953-öд воö сора тöлысь 27-öд лунö Мылдин сиктын, сэни шөр школа помалöм бöрын пырöма ыджыд спортö, 12-öд да 13-öд Тöвся Олимпиадаяс вылын шедöдöма зарни медальяс, лоöма Совет Öтувлунун 8 пöv вермысьöн.


Василий Павлович Рочев чужöма Изьва вожын, Бакур сиктын 1951-öд воын öшым тöлысь 22-öд лунö, 1965-öд восянь зильö ыджыд спортын. Быдмöма 13-öд Тöвся Олимпиадаса чемпионöдз, Совет Öтувлунун 12 пöv вермысьöдз.

Раиса Петровна Сметанина, меднималана лызьöн котралысь ань, чужöма тшöтш Изьва вожын, Мокчой сиктын 1952-öд вося урасьöм тöлысь 29-öд лунö. Велöдчöма чужан сиктас 8 класса школаын да Сыктивкарын педучилищын. 1972-öд восянь уна во чöж котралöма лызьöн быдсяма ордысьöмъяс вылын, сöмын Олимпиада ворсöмъяс вылын шедöдöма 3 зарни, 5 эзысь да 1 бронза медаль. Бөрья кык спортмортыс öнi уджалöны тренерьясöн, быдтöны лызьöн котралысьяслысь выль чужанвуж.

Нималана коми гижысьяс, артистьяс да спортмортыяс кыпöдiсны ловсö коми йöзлысь, нимöдiсны ас войтырсö.

Ю а л ö м ь я с.

1. Кутшöм рök суис коми кыв школаын 60–70-öд воясö?
2. Кор да кодьяс подулалiсны Сыктивкарса университетын коми филология велöдöмсö?
3. Кыдзи вежсис коми кывйöн вöдитчöмыс небöг лэдзöмын да газет-журналъясын?
4. Мыйла кыпалö вöли коми литература 60–70-öд воясö?
5. Кутшöм коми гижысьяс нимавлiсны сийö кадас?
6. Кутшöм вöли коми кывлөн официальной статусыс дудан кадö?
7. Мый кыпöдлiс ловсö коми йöзлысь 60–70-öд воясö?



23 юрпас

ВЫЛЬМӨДӨМ, АСШӨРЛУН, ВЕЖСЬӨМ (КОМИ МУ 1986–1999-өд ВОЯСӨ)

1 юкөн

ВЫЛЬМӨДАН ТӨВ ВЫЛЫН

Коми муын 80-өд вояс мөд джынсянь, кыдзи дзоньнас Сөвет Өтувлунун, заводитчис вежсян кад. Сэки буретш чужисны татшөм кывъяс, кыдзи **вильмөдөм, вуж вуйё вежөм, восьса сёрни**. Тайё нырвизыыс муніс 1985-өд воын СӨКЮ-лөн 1 секретарё пуксьөм **Михаил Сергеевич Горбачёвсьянь**, коді зілис вуж вуйё вежны коммунист ютырын да дзоньнас канмуын уджаланногсө. Восьсөн пондісны сёрнитны уна вося тырмытөмторъяс йылысь экономикаын, йөзкотырса олөмын, войтыръяскостса йитөдъясын. Комиын 80-өд вояс помын тшөтш кыптис ёсь сёрни историяын дзебөмторъяс йылысь (Сталинлөн культ йылысь), коми кыв да культураын сьөкыдлунъяс йылысь. Водзмөстчис сэки таын том йөзлөн «Молодёжь Севера» газет. Вочасөн содіс йөзлөн ассиянь зильөмыс, Сыктывкарын котыртчалісны дискуссияс нуөдан (вензян) клуб, «Демократическөя бөрйысьөм» өтувтчөм. Найё эз нин вөвны коммунист ютыр кипод улын, сөвмисны асьныс. Воссисны туйяс мудор сайё, унаөн республикаысь пондісны ветлыны мукөд муясө, рытыввылө, унаөн сэтысь волісны татчө. Тадзи заводитчис вежсян кадколастыс.

Некымын воён дзоньнас йёзкотырлөн воссисны синъясы Совет Өтувлунун воддза да өнiя олөм вылас, вежсис история вылө видзөдласыс. Водзтi висьтавлiсны, историяыс сөвмө пö К. Маркс да В.И. Ленин ногөн — гöльяслөн да озыръяслөн классьяс костын пö тышыс йөткө водзö историясö, тышыс пö вайөдö революциясыс, капитализмыс, медвылыс тшупöдыс — империализмыс пö — сiсьмысь, кулан строй, мый му шарын регыд быть вермас социализм система тыштөг ськөд ордйысьөмөн. Лои бура гөгөрвоана, мый бөръя, 50–70-өд воясыс историяыс, вөлөмкө, сөвмө оз революциясыс, а реформаяс отсөгөн, эволюционнöя, вочасөн. Капитализма канмуясын йёзкотырыс ладмөдö классьяслысь интересьяссö, косьөдз оз вайөд. Дзоньнас сэтчөс системаыс ачыс өдйө вежсьö-сөвмө, вайөдö йөзсö вылысджык олан тшупөдö. Уналы төдса лои, мый сэтчөс олысьяслөн олөмыс өна бурджык, озырджык да пөтөсadjык. Тайö ставыс жугөдiс коммунист ютырлысь вөвлөм өн сюрөссö — марксизма-ленинизма идеологиясö. Та вöсна СÖКЮ вочасөн ачыс киссис, эз вермы ладмөдны асьыс уджсö выль сикас олөм дорö. Коммунистьяс, канмуын став йөзыс өдйө юксисны выль ютыр-котыръяс вылө.

2 ю к ө н

Республиканым перйö ашпöрлун

Коми АССР 80-өд вояс помлань пондiс вöчны воськовьяс аслыс ыджыдджык ашпöрлун шедөдөм могысь. Тайö нырвизысь өнмө вильмөдан кад помлань, кор дзоньнас Совет Өтувлун пондiс юксыны торъя канмуясыс вылө, Россия Федерация ачыс зiлис торйөдчыны Совет Өтувлунуысь. Шöрин да дорьясыс костын вензян-зыксян кадсö нöшта нимтiсны **ашпöрлуньясыс парадөн**. Сiдз, И.П. Морозовөс вежысь обкомса 1 секретар В.И. Мельников ёся сёрнитiс республикалөн дойясы йылысь СÖКЮ-лөн XIX-өд конференция вылын. Совет Өтувлунун республикасыс торйөдчöны вöли уна помка вöсна, медводз экономикаын дзугьясыс понда.

Выльмөдан нырвизь вылө видзөдтөг ыджыд канмуын планъяс серти урчитөм экономика уджаліс век лёкджыка, сьөкыдлунъяс эз чинны, мөдарө — содісны. Омөльтчис удж дисциплина, дзоньнас олөм-вылөмыс. Республикаса предприятиеяс хотісны, уджыс муніс дзуртөмөн, йөз тшөкыда эз кутны петавны удж вылө, бастуйтісны. Этша кутісны вөчны яй, йөв, картопель, капуста. Канмуын да республикаын олөм омөльтчөмыс вайөдіс сэтчөдз, мый өдйө кутісны содны донъяс сөян-юан, көм-паськөм, гортгөгөрсэ эмбур вылө. Сьөмлөн доныс чиніс, төваръяс пондісны судзөдавы вежласьөмөн (бартерөн). Сідз, из шом, вөр вежлавлісны сөян-юан да көм-паськөм вылө. Быд республика да обласът пондіс торйөдчыны, кутны вузөссө мукөдлаө нуөмысь, Абъячой дорын лөсьөдөма вөлі та могысь *канкерка*. Немө эз вайөд М.С. Горбачёвлөн вина юөмлы паныд тышыс, бырөдісны сөмын алкоголь вөчан индустриясө, йөзсө дөзмөдісны. Коми муын вужъясис сөян-юанөн карточкаяс серти вузасьөм. Быд мортлы сетлөны вөлі квартал вылө карточкаяс ньөбны мыйтакө вый, шыдөс, сахар, вина-водка, яй. Йөзыслөн сьөмыс чукөрмис вель уна, но лавка джаджъяс өдйө тыртөммисны. Тайө ставыс ышөдіс судзөдны, перйыны республикалы ашшөрлун, медым Сөвет Öтувлун шөринлысь босьтны содтөд позянлунъяс овмөс сөвмөдөмын да политикаын. 1990-өд воын унджык союзной республика да РСФСР юөртіс нин Сөвет Öтувлун шөринысь аслас ашшөрлун йылысь.

1990-өд вося моз 29-өд луно Коми АССР-лөн Медвылыс Сөвет чередьтөг нуөдан аслас мөд сессия вылын вынсьөдіс Коми АССР-лөн ашшөрлун йылысь декларация. Кабалаас вөлі урчитөма унатор: мый став озырлуныс өнісянь лоө республика кыин, сійө ачыс урчитө бюджет, волысьө мукөд канмуяскөд, мый Комиын өткодя бергалө кык каналан кыв — коми да роч, мый республикалөн эм аслас канпас, дөрапас да кып. Декларация бөрын вөлі вөчөма вель унатор ашшөрлун ёнмөдөм могысь. 1991-өд вося ошым төлысьын киссис Сөвет Öтувлун, сы пыдди чужисны ашшөр канмуяс: Россия Федерация, Грузия, Украи-

на, Литва, Казахстан, Эстония да мукӧдъяс. 1991-ӧд вося моз тӧлысьын Сӧвет Ӧтувлунын власьт путкыльтны видлӧм бӧрын оланпасӧн вӧлі дугӧдӧма коммунист ютырлысь уджсӧ. Россияын котыртчисны мукӧд ютыръяс, канмулӧн ӧтувъя идеология эз ло. Вӧвлӧм ССР-яс пыдди лоины торъя республикаяс. 1990-ӧд вося кос му тӧлысьянь республикаса Медвылыс Сӧветӧн веськӧдлысьӧ бӧрйӧм бӧрын пуксис **Юрий Алексеевич Спиридонов** (чужлӧма 1938-ӧд вося вӧльгым 1 лунӧ Омск обласьтса Полтавка сиктын). Коми республикалӧн лоины аслас канму пасъяс. Вынсӧдісны Коми Республикалысь кып, дӧрапас да канпас.

Кып подулӧ пунктӧма Нӧбдинса Витторлӧн «Варыш поз» сьыланлысь *шыладсӧ*. Коми мулӧн дӧрапасыс куим рӧма. Вылысладорыс — югыдлӧз, шӧрыс — турунвиж, улӧыс — еджыд рӧма. Дӧрапасыс ӧти метра пасьта да кык метра кузьта.

Коми Республикалӧн канпасыс (лӧсьӧдысьыс А. Неве-ров) зарни рӧма ыджыд лӧбач, сійӧс лӧсьӧдӧма-вӧчӧма перымса зъвер стиль серти. Лӧбачлӧн морӧс вылын тыдалӧ аньлӧн мыгӧр, мыгӧр гӧгӧрыс йӧра юръяс. Канпассӧ лӧсьӧдысь мӧвп серти, лӧбачыс петкӧдлӧ канмулысь вын, каналӧм (власьт), видзӧ чужан му да татчӧс йӧз-войтырӧс быдсяма лекторсьыс. Лӧбачлӧн паськыда шевкнитӧм бордъясыс петкӧдлӧны, мый коми йӧз гӧсьтъяслы век радӧсь, дасьӧсь вӧчны-бергӧдны бур уджъяс. Лӧбач аслас гыжъясӧн быттӧ топыда кутӧ республикалысь озырлунъяссӧ гусялӧм-нуӧмысь. Аньлӧн мыгӧрыс петкӧдлӧ Коми мулысь чужӧмбансӧ, йӧраыс — коми вӧр-ва, коми парма.

1994-ӧд воын республикаӧн веськӧдлан системаыс вежсис. Медыджыд чина мортӧн лои республикаса Юралысь, Медвылыс Сӧвет пыдди лои Каналан Сӧвет, сэтчӧ пырӧ 50 бӧрйӧма, уджалӧны найӧ 4 во да сӧсья найӧс выльысь бӧрйӧны. 1994-ӧд вося ода-кора 8-ӧд лунӧ Юралысьӧ унджык йӧзыс бӧрйисны Ю.А. Спиридоновӧс, 1995-ӧд вося тӧв шӧр 22-ӧд лунсянь Каналан Сӧветӧн веськӧдлӧ В.А. Торлопов. 1996-ӧд воӧ Канкарын вӧлі кырымалӧма Россия Федерация да Коми Республика костын сӧрнитчӧм сы йылысь,

кодi мыйöн веськöдлö, кытчöдз инмö республиканымлөн ашшөрлуныс. Вöли сiдзжö лöсьдöма да вынсьöдöма Коми республикалысь выль Оланподув.

Та дорö содтöд пыдди пасъям сöмын, мый öни республиканымлөн ашшөрлуныс абу ыджыд да вына. Унджыкторсö вöчны-бергöдны колö важ моз, Россия Федерация шöр веськöдлан органъяслысь юасьöмön, накöд ладмöдчöмön. Медшöрторйис — республикаысь унджык чукöртöм вотыс важ моз мунö Мöскуаö, бöрсö сьöмыс воö ёна этшаджык. Та вöсна Коми республикалөн статусыс абу ашшөр канмулөн кодъ, сийö тöдчымön слабджык.

З ю к ö н

Вужвойтыр пырö политикаö

80-öд вояс помын вöвлöм ыджыд кыпалöмыс, канму олöмын демократиялань вежсьöмъясыс бур ногön тöдчисны коми войтыр вылö. Интеллигенцияысь, уджалысь йöзысь уналы лои гөгөрвоана коми йöзлөн сьöкыд олöмыс, медводз туялысьлы да гижысьяслы. 1989-öд вося рака толысь 28–30-öд лунъясö Сыктывкарын мунис «Коми кыв öния олöмын» конференция, котыртлис сийöс Кыв, литература да история институт. Уна сёрниын чукöртчöмаяс серпасалисны чöжсьöм сьöкыдлунъяс да дзугъяс, коми школа абутöм, кывлысь йöзкотырын ичöt донсö да коми йöзлысь рочмöмсö. Сiдз, 1989-öд вося йöзöс лыддьöм серти Сöвет Öтувлунун олысь 345000 зырян-комиысь 70,4% лыддьö вöли коми кыв чужан кывйöн, сiдзкö, быд коймöд коми морт рочмöма нин вöли. Конференцияын уджалысьяс тырвийö вежöртисны, мый кыв да культура сöвмöдны он вермы политикаö нырччытöг, Медвылыс Сöвет да правительство вылö тöдчыны позяс сöмын торъя котыртчöм отсöгön. Сийö кадö пондисны Комиын бöрйысьны выль ног, некымын депутатпуысь öтиöс. Сöвет Öтувлунун «бöрйылисны» сөветъясö öти кандидатысь öтиöс, кодöс вынсьöдисны ком-

мунист кытыр органъяс. 1989-өд вося медводдза бөрйысьём петкөдліс, мый коми депутатпуясөс зэв сьёкыда да шоча бөрйёны сөветъясө, сы вöсна мый бөрйысьысьясыс унджыкыс вöліны рочъяс. Корсюрö коми депутатпуяссö тöдöмөн öтдортлöны, омöльтöны вöлі.

Конференция бöрас коми гижысьяс пöвстын чужис мöвп лöсьöдны «Коми кытыр» нима организация, 1918-өд воын коркö Яренскын кытырлöм öтувтчöмсö ловзьöдны, кыпöдны коми йöзлысь культура, асвежöртöм. 1989-өд вося öшым тöлысь 1 лунö драма театрын вöлі «Коми кытырлөн» панас пуктан чукöртчöм, кытчö волісны коми йöз став районьс да республика ортсыыс. Тайö вöлі комияслөн медводдза öтувъя чукöртчöм, сэни лыбис ыджыд сёрни став ёс тема йылысь, вöлі бөрйöма кытырö нырнуöдысьясөс, юралысьнас бөрйисны гижысь Геннадий Юшковöс. Таысь öтдор видлалöма вöлі уджтас да устав балаяс. Сэки вöлі шуöма нуöдны удж, медым чукöртны войтырлысь медводдза öксьöма, коді эськö лöсьöдас коми войтырлысь интересъяс петкөдлан документъяс да чорыда корас республикаса власьтлысь пöртны найöс олöмö.

1991-өд вося тöv шөр тöлысь 11–12-өд лунъясö Сыктывкарын музыка театрö чукöртчис коми йöзлөн I öксьöма,



Коми войтырлөн чукортчом

сэни уджаліс 800 гөгөр бөрйөм морт, быдлаысь, тшөтш Перым-Коми автономия кытшысь. Өтув өксьөманас веськөдлісны Г.А. Юшков да **Вячеслав Иванович Худяев**, сэки Министръяс Сöветса юралысь. Кык лун чөжөн вынсьөдöма вöлі 5 резолюция, кытөн дженъыда юөртöма войтырöс ловзьöдан-сöвмöдан колана нырвизьсö. Өксьöма бөрйис ассыс уджалан орган — Коми йöзöс сöвмöдан комитет (24 мортысь). Сыөн веськөдлынысö бөрйисны **Валерий Петрович Марковс**, сэки СКУ-ысь физика велöдысьсö, наукаса кандидатс. Выльöн бөрйөм комитетс пасйöма лои юстиция министерствоын, сылөн лои оланпасъяс вöзъян инöд. Тадзи заводитчис канму веськөдлöмö коми войтырлөн пырöмыс.

Вочасөн вужвойтырлөн кансямö нырччөмсö лои вынсьөдöма официальной. 1991-öд вося вöльгым тöлысьö чукөртчыліс коми йöзлөн II чередьтöм өксьöма. Сэни вöлі урчитöма войтыр өксьöмалысь статуссö да корöма, мед өксьöмалысь шуөмъяссö быть видлаліс правительство. 1992-öд вося ода-кора тöлысьö Медвылыс Сöвет вынсьöдіс «Коми войтырлөн өксьöма йылысь» оланпас. Сійö жö тöлысьö, 28 лунö Медвылыс Сöвет ошкис да вынсьöдіс «Коми Республикаса каналан кывъяс йылысь оланпас», сы серти республикаын öткодя бергалö кык официальной кыв — коми да роч. Тайö вöлі ыджыд вермөм, сэкса Россияын фин-угор регионъяс пиысь татшөм оланпасыс вöлöма сöмын на комияслөн. Та бöрын 2 во чөж Медвылыс Сöветын дасьтисны оланпас олөмö пöртан уджтас, кодс сэсса 1994-öд вося төв шөр тöлысьö вöлі вынсьөдöма. Тайö уджтас олөмö пöртысь пыдди войтырлөн өксьöма корөм серти вöлі котыртöма 1993-öд воын уна войтыр делöяс министерство, медводдза министрнас вöлі **Г.В. Бутырева**.

Дзоньнас тайö кадколастас чукөртчылöма 5 өксьöма, I да II өксьöмаясыс 1991-öд воын, III-öд өксьöма 1993-öд воын, IV-öд өксьöма 1995-öд воын, бөръя V-ыс 1997-öд воын. Бөръя өксьöмаыс шуис чукөртчывны сэсса 4 во мысти, комитет нимсö вежис исполком вылö. Шедөдөмторъясысь кындзи өксьöмаяслөн уджтасыс унаторйөн олөмас абу на пöртöма. Сідз, абу лөсьөдöма өксьöмаяслөн корөмъяс серти

вужвойтырлысь II палата, унджык вöйöмсö правительство оз видлав да оз казьяв, каналан кывъяс оланпас олöмö пöртöм вылö сетöны зэв этша сьöм, комитет/исполкомлысь оланпас балаяссö оз вынсьöдны либö вежлалöны кызди кöсйöны.

Таысь öтдор Коми муын öнi уджалö вужвойтырлөн некымын котыр-ютыр. Медводз, «Коми котыр» зильö унатор вöчны сэтшöм роч кывъя каръясын, кызди Ухта, Печора, Инта, Сыктывкарын Эжва районын, ёнджыкасö уджыс мунö культураын да йöзöс велöдöмын. 1993-öд воын котыртчöма право доръян «Доръям асьнымöс» нима ютыр, веськöдлысьыс Н.А. Митюшева. Ютыр ёна зильö велöдны йöзöс да югдöдны вежöрсö асьыныс интересьяс дорйигөн. Кадысь кадö асланыс сьöм вылö ютырса лэдзöны комиён да рочён «Доръям асьнымöс» газет. Ютыр сулалö сы дор, медым эськö коми войтырöс сöвмöдöмыс мунис ёна öдйöджык. Таысь кызди артмисны кутшöмкö öти вожысь комиясöс öтувтысь котыръяс. Сидз, Изьва районын уджалö «Изьватас» котыр (став изьва-комисö öтувтöны сэтчö), Кулöмдiн районын пасйöма «Эжватас» котыр, Канкарын уджалö «Парма» котыр, сийö öтувтö Россия юркарын олысь зырян-комиясöс да перым-комиясöс, котырсаяс йöзöдöны «Парма» журнал. Сэтшöм котыр эм тшöтш Питерын, нимыс «Неватас». Бөрья кадö Сыктывкарын котыртчалöны кутшöмкö районьыс петлöм йöзлөн котыртчöмъяс — Луза-Летка вожысь, Эжва йылысь, Удораысь, Сыктылысь, Печора йылысь. Сэтчö пырысьяс пиысь унджыкыс коми йöз. Öти кывйөн, вужвойтырлөн йöзкотырса олöмас да политикаас зильöмыс 80–90-öд воясö тöдчымөн содiс.

4 ю к ö н

Экономикаын вежсьöмъяс кучкöны йöзлы

1991–1992-öд вояс костын зэв уна выльтор лои дзонь вöвлöм Совет Öтувлунын, тшöтш Комиын. Вежсис дзоньнас канмулөн йöзкотырса да политика тэчасыс, экономи-

калөн *юрподувъясыс*. Коми ССР-ысь лои Коми Республика, сійö лои Россия Федерациялөн юкөн. Планъясөн урчитан экономика вайöдiс став йöзкотырcö ёсь кризисö, та вöсна Россияса виль веськöдлысьяс (Б.Н. Ельцин да Е.Т. Гайдар) шуисны вуджöдны канмуöс рынока экономикаö, кöни ставcö урчитö оз план, а вöчны, вузавны-ньюбны коланлун. Та могысь канму эмбурöс (кызвынсö), вузасьöм, быт служба, мукöдтор лои асэмбуралöма, завод-пабрикъяс кутысьясөн лоины сэтчöс коллективъяс, фирмаяс, торъя йöз. Öти кывйөн кö, канмуын лои сардырся Россияын 1917-öд воöдз кымын вöвлöм овмöс, лои уна сикас эмбур кутысьяса экономика (торъя йöзлөн, канмулөн, öтувъя эмбур). Воссис туй мудорсайса капиталлы, виль власьт веськыда корис мудор сайысь сьöм пуктыны Россия экономикаö. Канму дугдiс кутны вузöс вылö урчитöм донъяс. 1992-öд вося төв шöр 1 лунö россиясалы воис виль вося козин — донъяс лыбисны уна пöв да важ чöжöм сьöмыс öдйö донтöммис, позьö шуны, вошис. Тайö ёна кучкис быд мортлы, торйөн нин олöма да пöрысь йöзлы.

Тадзи пестысисны реформаяс тшöтш Комиын. 1992–1999-öд воясö овмöсын став уджалан-сöвман öдыс ёна чинiс, кöть ачыс экономика тэчасыс колис важ, нинöм ёна вильыс эз чуж. Вöлöмкö, рынока экономикаа Россиялы збыльысьсö колö ёна этшаджык из шом, мусир, вөр, биару, видзму овмöс вöчантор. Регионъяслөн восьса ордйысьöмын вермöны лунвылынджык куйлысь муяс, сэни вузöслөн *асдоныс* войвывсаысь ёна донтöмджык. Та вöсна республикаö пондiсны унджык сёян-юансö вайны лунвылысь, Киров областьтысь, Марий Элысь, Канкарысь, мукöдлаысь. Тайö ёна кучкис сиктъясын олысьяслы. Личалöм да öдйö сöвмöдöм пыдди реформа вайöдiс нöшта на омöльджыкторъясöдз. Пондiсны тупкысьны предприятияс, содiс уджтöмалöм, быралiсны посёлокъяс.

Сиктса овмöс уна дас во чöж кутчысьлис кык тор вылын, колхоз-совхозъяс да асшöр град йөр, скöт вылын. Бөръя 8–9 воён канму, позьö шуны, шыбитiс сиктöс «рынокö» отсöгтöг. Совхозъяслы тырмымөн сьöм оз сетны, та

вöсна йöв-яйлöн, град выв пуктаслöн асдоныс зэв ыджыд, сийöс этша ньöбöны. Та вöсна ловъя сьöм уджалысьяслы мынтöны зэв этша, кызвынсö сеталöны пызь, сакар, мукöд төвар. Му уджалысьяслөн олöмыс реформа воясö ёна омöльтчис, йöзыс гöльмисны. Удж чинöм вайöдиc сэтчöдз, мый сиктса районъясын лои медыджыд уджтöмалöм. Сидз, 1995-öд вося йирым тöлысьын став уджавны вермысьыс Кулöмдін районын уджтöмалöма 18,7%, Кörtкерöссаын — 13,6%, Изъваын — 12,3%, Удораын — 11,9%. Тайö лыдпасьясыс тöдчымөн ыджыдджыкöсь каръясын уджтöмалöмысь. Кар да сикт костын торъялöмыс лои повзöдана: сиктын, видз-му овмöсын уджалысьлөн удждоныс шöркодя 3–5 пöв ичөтджык индустрияын уджалысьлөн удждон серти. Сиктын эз ло быт служба, киссян выйын лои потребительяслы кооперация, йöзыс пондiсны кызвынсö кынöмпöt перйыны ас овмöс тшöт весьтö да ай-мам (пенсионеръяс) отсöгөн. Бур көть, республикаын пенсия сеталöны ас кадö.

Сиктын совхозъяс пиысь уна овмöсысь лои колхоз либö видз-му овмöс кооператив. 90-öд воясö чужисны ас овмöс кутысьяс (фермеръяс), кодъяс асьныс му помысь перйöны кынöмпöt, вузалöны-иналöны йöв-яй. Сöмын канмулөн бур отсöгтöг татшöм овмöсыс этша, сы вöсна мый сöмын ас тшöт весьтö овны зэв сьökыд. Унджыкыс сиктъясын уджалöны на совхоз-колхозын да вöдитöны уна му да скöt, бөръя кадö ёна вотчöны, вöралöны, чери кыйöны.

Коми сиктлөн чужöмбаныс öни абу öтпöвст, сьökыдлунъяс вылö видзöдтöг унаөн кыпöдöны выль керкаяс, паськöдöны овмöс. Лача кутöны том йöз ас вылö, рöдвуж да тöдсаяс отсöгөн зиль йöз кыпöдöны унджык и унджык овмöс. Унаөн кольччöны сиктö, öд бокö мунны либö велöдчыны колö уна сьöм. Кодсюрö, мöдарö, озырмö, восьталö ас вузасянiнъяс, кыскалö йöзöс ас машинаөн, вайö вузöс да разöдö сиктъясö. Öти кывйөн, кызди вөлöма 1917-öд воодз, зиль да писькöс, энöвтчытöм йöзлы век став öдзöссö восьтасны, унджык олысьыс пикö оз во.

Республикаса индустрия 90-öд воясö, позьö шуны, эз

сөвмы, мөдарө, чинтис ассыыс өдсө. Ёна чинис из-шом перйөм, Вөркутаын некымын важ шахта пөдлалисны, эз кыпөдны выльясөс. Мусир да биару перйөм тшөтш чинис, уна вөр лэдзны коланлуныс эз ло. Канму дугдис ыли войвылын олысьяслы сетаवны ыджыд кокньөдъяс, Вөркутаын удждоныс эз нин ёна кут торъявны Россия шөринисы, сы вөсна мый донъясыс войвылын век вөлисны вылын-джыкөсь. Та вөсна войвывса каръясыс унаөн пондисны мунавны бөр шөр Россияө да мудор сайө, кызвынсө том йөз да пенсионеръяс. Сыктывкарын дугдисны кыпөдны военной завод, банкротасис да пөдласис мебель вөчан кык пабрика, вөр комбинат чинтис уджалан өдсө да эз нин паськөдчы водзө.

Та вылө видзөдтөг республикаса Юралысьлөн да правительстволөн Комиын индустрия сөвмөдан нырвизыыс кольөма важ — век унджык перйыны да ыстыны-вузавны сырё. Сидз, пондисны перйыны Тиманысь боксит да ыстыны Россияө. Чужис гырысь план, лөсьөдны Белкомур көрт туй (Перым—Сыктывкар—Кардор). Сөмын водзө индустриализуйтөм вылө некодлөн вын ни сьом эз нин вөв, мудорсайса сьом эз ыльөбты. Такөд өттшөтш республикаса веськөдлысьяс пөшти эз сөвмөдны вылыс технология производсвояс, энөвтөма лои пу уджалан, мебель вөчан индустрия, эз паськөдны туризм. Индустриялөн чинөмысь бурыс бара лои вөр-валы, сийө лои сөстөмджык, вөръяс эз кутны важ моз куштыны, молльөн вөр кылөдөмысь энөвчисны.

Овмөсын татшөм вежсьөмыс вайөдис демографияын синмө шыбитчанаторъясөдз, Совет Öтувлун киссьөм бөрын Коми республикаын олысь лыдыс пондис чинны, унаөн муналисны важ чужанінъясас (кызвынсө роч кывъя йөз). 1990–1998-өд воясө республикаын олысь лыдыс чинөма 104,2 сюрс морт вылө, тайө сымда, мыйта олөны өтвылысь Изьва, Көрткерөс, Лузберд, Сыктывдин районъясын. Муналысьяссыс кындзи, мөд помкаыс — йөзлөн кулалөм содөм, торйөн нин сиктъясын, омөльтчөм олөм, юөм-кодалөм вөсна. Став карысь Сыктывкар кындзи олысьяссыс муна-

лөны. Сідз, 1990–1997-өд воясö Комиысь мунöмаяс весьтö олысь лыдыс чинöма 90700 морт вылö. Такöд öттшötш чинöма кага вайöм. Комиö воысьяс пиын мукöдлаысь пыш-йысь уна морт, торйөн нин унаөн овмöдчöны Кавказысь да Шөр Азияысь.

5 ю к ö н

Йöзöс велöдöм да культура выльмö

Коммунист ютыр идеология 80-өд вояс помлань йöзкo-тырын эз ло, тайö бур боксянь тöдчис унатор вылö, мед-водз водзынджык увтыртöм вичко да коми кывъя школа, дзоньнас культура вылö.

Енлы эскöм, вичко эз нин ло видантор, та вöсна Коми-ын пондiс öдйö содны вичко лыд. 50–80-өд воясын кö дзоньнас Коми АССР пасьтала уджалiс сöмын 3 неыджыд вичко Айкатылаын, Ыбын да Кöджпонын (юркар бердын), 1999-өд воö та дорö содтöд лои восьтöма 58 вичко да 7 ма-настыр (3 аньяслы, 4 айуловлы). Роч веськыда эскан вич-колөн Комиын уна нэм мысти лои выльысь восьтöма торъя



Емдiнын выль да важ вичко

аркирейув 1995-өд вося йирым 5-өд лунө. Өшым төлысьö пуксьöдiсны аркирейөн Питиримöс. Православие кындзи паськалöны мукöд эскöмъяс, евангелльö ногса вичко кы-пöдiс мича крам юркарö, Мичурин нима парк дорö. Восьсөн пондiс уджавны коми кывъя вичко, бурвисьталысьнас сэнi вöли **Висер Вась (Василий Иванович Попов)**. Буретш Висер Вась сьöкыд сöвет кадö гусьöник комиöдöма вöли Библия, йöзöдöма сийöс сэсся Стокгольмын 1979-өд воын. 90-өд воясö восьсөн нин позис комиöдны ен гижöдъяс, Библия вуджöдан институт отсöгөн мудор сайын комиён йöзöдöма вöли бур юөръяс Марк, Лука, Иван да Матьвей серти. Паськалiс Комиын тшöтш лютеран ногса кристиана эскöм, ислам, важ öбрэдъяса православие, уна мукöд посниджык секта.

Коми войтырлөн I öксöма аслас кыв да культура кузя декларацияын вöзйис дзонь уджтас сы могысь, медым ловзьöдны вужвойтырлысь чусмыны пондылöм кывсö. Медводз, унджык челядь кутчысисны велöдны школаясын коми кыв да да литература, тшöтш каръясса да посёлөкъясса школаясын. Сидз, 1990–1991-өд велöдчан воö кө коми кыв велöдiс 21518 велöдчысь (школаö став ветлысьысь 10,5%), то 1995–1996-өд воын сийöс велöдiс 269 школаын 33091 морт, тайö школаясö став ветлысьысь 17,95%. Вьльторйис сыын, мый комисö пондiсны велöдны тшöтш роч уджтас серти уджалысь школаясын да классъясын.

Челядьлы да том йöзлы лой комиён лыддянторъяс. 1986-өд восянь йöзöдöны ичöt челядьлы «Би кинь» журнал, 1992-өд восянь петö том йöзлы «Йöлöга» газет. Тöv шөр төлысь 24-өд лунö сийö жö воын восьтöма вöли коми кыв вылын уджалысь фольклор театр. Каналан кывъяс йылысь оланпас серти кык кыв вылын пондiсны гижны юөръяс, йöзаингъяслысь нимъяс, комиён тшöтш лэдзны Каналан Сöветлысь юөръяс. Коми кыв пондiс ёнджыка кывны уличьясын, сылөн доныс бөръя дас воö тöдчымөн содiс. Чужалiсны кык кывъя журналъяс — велöдысьясöс дасьтан-бурмöдан институт лэдзö методикаысь «Чужан кыв» журнал, уна войтыр делöяс министерство — «Арт»

культурология журнал. Такöд öттшöтш коми кыв паскöдан уджыс муно нбöжмыда на, мукöдлаас сöвмöмыс оз тыдав. Шуам, Коми небöг лэдзанинлы канму сетö зэв этша сьом коми небöггъяс йöзöдöм вылö (öни онас петалö дасысь этшаджык небöг сöмын), нинöм комиыс эз коль опера да балет театр репертуарын, драма театрын овлö онас сöмын 1–2 выль коми спектакль. Республикасянь тöждыс вужвойтырлөн кыв да культура вöсна вöли коланасыс ёна ичöтджык.

Дерт, сöвмис ёна тшöтш роч кывъя школа да культура. Дзоньнас 1986–1999-öд воясö культураыс республиканын сöвмис, ёнмис, вежсис, экономика, мöдарö, киссьö вöли. Йöзöс велöдан системаыс эз ло öтпöлöс, важ моз чорыд стандарта. Школаяс подув вылын чужины гимназияяс, колледжгъяс, лицейяс, велöдны пондiсны челядьöс вичкояс бердын, университетын да пединститутын. 1997-öд воясянь Сыктывкарын уджалö Вöр институт, ёна сöвмис водзö Сыктывкарса университет. Сэни пондiсны дасытыны юристьясöс, бурдöдысьясöс, социальной уджалысьясöс. 1993-öд воясянь филология факультетса коми юкöнысь лои фин-угор факультет, сэни велöдчыны кöсйысьыс быд во унджык и унджык лоö.

Коми, роч, мукöд кывъя культура тыр-бура петкöдлö асьсö фольклор фестивальясын, уна сикас ордйысьöмын, гажын, шуам, «Шондiбан», «Василей», «Сыктывкарса тулыс». Ёна сöвмис уна войтырлөн культураыс выльöн артмöм öтувтчöмгъясин: немечьяслөн «Ловзьöм», чилимдiнсалөн «Русь Печорская», тотара-башкиргъяслөн «Дуслык», асьнысö еврейөн нимтысьяслөн «Шолом» нимаын. Такöд öттшöтш ёна омöльтчис тайö каднас йöз дорö медматыс, клубса культура. Сиктьясын клубьясыс дзикöдз гöльмöмаöсь, сьом та вылö чинiс, уна песни клуб пöдлалöма лои. Дзикöдз киссис кино петкöдлан система, гöльмöмны небöгкудгъяс.

Коми литература да кыв öнiя кадö

Коми гижысьяс да лыддысьысьяс 90-öд воясö унатор тöдмалiсны водзтi тупкылöм, «вунöдöм» нимъяс йылысь. Вөлöмкö, комияслөн вөлöма 1917-öд воöдз гырысь, нималана, мöвпалысь интеллигенция, на йылысь воддза власьтьяс оз вöли лэдзны весиг сёрнитны, национализмөн повзöдчиг. Тайö коми гижöд лöсьöдысь Перымса Степан да Ёгуш (Г.С. Лыткин), XIX-öд нэмса коми кыв да история туялысь, зiль комиöдысь. Восьса лоис Питирим Сорокинлөн да Каллистрат Жаковлөн гижöдъясыс, перым-коми туялысь да патриот Игнатий Мөсшеглөн öткымын гижöд. Кык бөръя гижысьлысь олан туйсö осьтiс коми кыв туялысь, филология доктор **Адольф Иванович Туркин (1936–1996)**. Ёна ясыдджыка пондiс тыдавны коми йöзлөн историяыс, коми литературалөн 30-öд вояся сьöкыд туйыс.

Лои йöзöдöма некымын водзтi тöдтöм коми гижысьöс, шуам, Ганс Шуктомовöс. Но медыджыд осьтöмыс вöли сыын, мый нималана гижысьяс пондiсны гижны выль ног, веськыда. Медводз, тырвыйö реализма гижöдъяс петавлiсны И. Тороповлөн, Г. Юшковлөн, А. Ульяновлөн, Б. Шаховлөн. Выль ног пондiсны гижны важ история йылысь Г. Юшков да В. Тимин, найö осьтiсны Комиöс Мöскуаса öксыув улö сюян кадколаст тема. Тайö эз туявлыны тырвыйö весиг историкъяс, нинöм та йылысь эз гижлыны гижысьяс И. Куратовысь кындзи. Перымса Степан кад йылысь петiсны Г. Юшковлөн «Бива» роман да В. Тиминлөн «Эжва Перымса зонка».

Тайö кык серпаса гижöдыс торъялö нöшта аслас сöстöм кывнас, сэнi, позьö шуны, босьтöм кывъясыс абуöсь. 90-öд воясö öдйö вынсялiс ва-коми кывлань сöвман нырвизыыс, медводз кывворын. Тайöс öддзöдiс коми кыв комиссия, сийö дасьтiс выль кывъяс паськöдан кык юр гижöд да «Выль коми кыввор» 2 петаса кывчукөр. 70–80-öд воясö кө журналистъясянь да гижысьясянь кывлан вöли, зэв пö этша ас коми кывйыс, уна босьтöм кыв, то öнi лои мöдара сер-

пас: вöзйöм кывворыс зэв ыджыд, сöмын журналистъяс оз тэрмасьны пыртны сійöс аслас уджас. Водзмöстчöны таын Г. Юшков, В. Тимин, И. Торопов, туялысьяс да Библия ву-джöдысьяс. Вель уна выль кыв пасйö политикаыс да йöзкотыр олöмысь юöртанторъяс: *оланнас* «закон», *олан-подув* «конституция», *канму* «государство», *йöзкотыр* «общество», *асэмбуралöн* «приватизация», *кансям* «политика», *сьöм овмöс* «финансьяс». Вуж выйö некымын воён вежсис кыв туялан-велöдан терминология, лои матö ставнас коми нога: *кыввор* «лексика», *эмакыв* «существительной», *ним-вежтас* «местоимение», *кадакыв* «глагол», *ногакыв* «дее-причастие», *кывпод* «инфинитив». Рочысь важöн пырöм вель уна кыв пыдди лои артмöдöма выльясöс, шуам, *орд* «рöд», *мудор* «граница», *айму* «отечество», *аскылöм* «на-строение», *уджтас* «программа», *юрподув* «принцип», *öксы-ув* «княжество», *енпöв* «образ», *оланіннас* «(гортса) адрес». Татшöм кывйыс абу öти-мöд, чукöрмöны сёяс нин. Исто-рия чöж бура тöдчö, мый буретш войтырлөн асвежöртöм содiг, сылы ыджыд тöжд чужтiг сöвмö-паськалö коми кыв-ворыс. Тадзи вöлі Перымса Степан кадö, 20–30-öд воясö, 60-öд воясö да XX-öд нэм помын. Тадзи водзö мунö Перым-са Степанлөн, Иван Куратовлөн, Ёгушлөн, Илля Васьлөн, Тима Веньлөн ва-коми кывлань сöвман нырвизыс.

Ю а л ö м ъ я с да уд ж.

1. Мый вуж выйö вежсис 80-öд вояс помын?
2. Мыйла лои коланлун перйыны республикалы ыджыдджык ашшöрлун?
3. Кутшöм канму пасъяс эмöсь Комилөн? Серпасалöй найöс.
4. Кызди коми войтыр зiлис пырны политикаö? Мый сійö коми войтырлөн öксьöмаыс да сылөн исполкомыс?
5. Кызди вежсис сиктса йöзлөн олöмыс?
6. Кутшöм вежсьöмъяс лоисны индустрияын 90-öд воясö?
7. Мый выльыс чужис коми культураын, чужан кыв да ли-тература велöдöмын?
8. Кутшöм туйöд мунö коми кывворлөн сöвмöмыс?
9. История йылысь кутшöм небöгъяс петiсны коми литера-тураын?



Б ө р к ы в п ы д д и КОЙМӨД СЮРСВОӨ ВУДЖИГӨН

Му вылын став мортвужыскөд өтвылысь коми войтыр вуджө коймөд сюрсвоө. Сылөн нэмыс лои вель кузь, позьö шуны, сюрсвоысь кузьджык нин, өд зырян-комияслөн пöль-пöчныс 1 сюрсво помын овмөдалöмны нин вöли Сыктыв, Луза, Эжва, Вилядь вожъяс. Кузь историяыс вöли вель сьöкыд: ковмывліс перйыны кынöмпöт войвывса вөр-ваа му помысь, вөралöмөн да чери кыйöмөн. Нэмөвöйся олас-ногыс кольліс важ, өттшöтш вочасөн вежсис. XIV–XV-өд нэмъясö коми йöз веськалісны Мöскуаса öксыув улö, торйөн вир кисьтана вöли XV-өд нэм, кор Роч муын öксы-увъяс тышкасьöны вöли öта-мөдныскөд, сэки асыв-войвыв-сянь вöли усъласьöны тшöтш йöграяс. Перымса Степан мода вылас вужйöдіс комияс пöвстö кристиана эскöм да лöсьöдіс коми гижөд, тайö вöли шөр нэмъясын медыджыд коми юра-лысь.

Водзö вылö олöмыс лөнис, но вочасөн сөвмис водзö. XIX-өд нэмö Сарлөн Империя канму ёнджыка пондіс пыр-ны вужвойтыр олөмö, вичко да школаяс пыр зіліс роч-мөдны комиясöс. Такөд өттшöтш быдмис сэки ас коми ин-теллигенция да чужис литература.

XX-өд нэмö коми войтыр пырö Россияса öдйö вежла-сьысь олөмö, а 1917-өд во бöрын коми коммунистъяс зіля босьтчисны котыртны аслыныс автономия. Дас во чöжөн Коми обласьтын олöмыс вуж выйö вежсис, сөвмис выль

профессиональной культура, өдйө кыпаліс вужвойтырлөн асвежөртөмыс. Татшөм «зарни нэмыс» помасис зэв өдйө, 30-өд вояссиянь Коми АССР вөлі социализм да коммунизм кыпөдан ыджыд полигонөн. Водзө лоины 30-өд вояссия дзескөдөмъяс, Айму вөсна Ыджыд тыш, индустрия кыпөдөм да с.в. 80-өд вояс помлань тыдовтчис, мый сөвмөм социализм кыпөдиг коми войтыр веськалөма кризисө, пондөма өдйө рочмыны. 90-өд воясө унатор вөлі вөчөма сійөс ловзөдөм могысь. Коми республикаса оланподувлөн 3-өд статьяын гижөма: «Коми войтыр — Коми республика канмулөн подув. Канмулысь политикасө веськөдөма сы вылө, медым видзны да сөвмөдны войтырлысь кыв, культура да оланног вужвойтырлы инмысь войтыръяскостса нормаяс да юрподувъяс серти». Тайө зэв төдчана документыс ачыссө оз на видз ни дорйы Коми республикалысь вужвойтырсө. Коми йөзлы коймөд сюрсвоө ковмас аслыс видзны да сөвмөдны асьсө. Ковмас видзны став бурсө обичаас, оланногас, культураас. Медым войтырлөн нэмыс нюжаліс на уна сө да сюрс во, медым йөзыс шедөдісны судзсяна да вылыс культураа олөм асланыс му вылын.





ГӨГӨРВОӨДАНА КЫВКУДТОР

айлов — мужичоё
айним — вич
АОШ — Америкаса Өтүвтчөм
Штатъяс
аркирейув — епархия
арта ним — должность
асворсысь — самодеятельной
асдон — себестоимость
аскөйысь — добровольческой,
доброволеч
берд — стен
биару туй — газопровод
видзана кабала — охранной
грамота
витво — пятилетка
вичкоув — церковной приход
вөрпа — звер
вөрпромовмөс — леспромхоз
вөчасянин — масьтерской
вужвойтыр — нэмөвойся
олысь йөз
вужкыв — важөн вөвлөм кыв
вундас — лента
гижтас — чертёж
гижтөм — черчение
гөгөртас — среда

ГФР — Германияса Федерация
Республика
ермөг — шөлк
ёрд — суд
изсир — янтар
инним — места ним
инөд — право
йөзкотыр — общество
каналан — государственной
Канкар — Мөскупа
канкерка — таможня
канму — государство, респуб-
лика
кансям — политика
карвыв — важ карлөн коляс,
городище
Кардор — Архангельск
кар сяма посёлок — посёлок го-
родского типа
керка көлуй — мебель
көрт дөрөм — кольчуга
көртшом — көрт руда
Куима — Троица
кывбуралысь — поэт
кывкуд — словарь
ловби — вдохновение

ловнуодысь — идеолог, философ
месай — кӧзяин
миса — слюда
мудор — граница
мукуа — муӧ перйӧм оланін
мувердас — удобрение
мусерпас — карта
мусир туй — нефтепровод
небӧгкуд — библиотека
ожман — война
оланпас — закон
оланподув — конституция
ӧксай — господин
ӧксань — госпожа
ӧксыув — княжество
ӧксӧма — съезд
пелькыти — исерга
петкӧдлӧм — выставка
пертаскуд — телевизор
пода — скӧт
полтӧса — духовной
сарань — царица
сераку — письмӧ
сёртысь — скульптор
сизимво — семилетка

СКУ — Сыктывкарса канму университет
Совдор — Сольвычегодск
сойнос — браслет
СӖКЮ — Сӧвет Ӧтувлунса Коммунист Ютыр
сюра кӧрт — якӧр
сюраныр — носорог (пемӧс)
сюрско — тысячелетие
туялысь — учӧной
тшӧтшкӧсін — равнина
тышка вын — войско
уджсикас — профессия
уджтас — программа, план
уна ютыра — уна партия
урма — ватага
челядь йӧр — детскӧй сад
чужанвуж — поколение
чужӧмпас — портрет
шӧрин — центр
шылад — музыка
эньлов — нывбаба
Югдін — Великӧй Устюг
юркобув — зонт(ик)
юрподув — принцип
ютыр — партия





Бондаренко Ольга Евтихеевна, история кандидат, доцент. 1972-өд восянь уджалö Сыктывкарса канму университетын, аймулöн история кафедра вылын. Туялö Коми мулысь XIX-өд нэмпомса, XX-өд нэмводзса история (вöр индустрия, йöзöс велöдом, бурвöчöм). Унаысь сёрнитлис конференция вылын Роч муын, Суомиын, гижöдгъясö йöзöдлис «Арт» журналын, «Родники пармы» небöггъясын, «Республика Коми» энциклопедияын. Гижöма «Учебные заведения в Коми крае в конце XIX—начале XX вв.» нима монография.



Хорунжая Татьяна Михайловна, история кандидат, доцент. 1972-өд восянь уджалö Сыктывкарса канму университетын, аймулöн история кафедра вылын. Туялö Коми мулысь XX-өд нэмса история (меставывса власьт органгъяс, республикаöс районгъяс вылö юклöм, история велöданног). Сёрнитö конференцияс вылын, йöзöдöма уна гижöд Комиын, Роч муын, мудор сайын (Суомиын, Францияын).



Цыпанов Евгений Александрович, филология кандидат, 1986-өд восянь уджалö старшöй туялысьöн Кыв, литература да история институтын. Туялö коми кадакывлысь аслыспöлöслунгъяс, выль коми кыввор, сөвмöдö коми кыв велöданног. Сёрнитö конференцияс вылын, йöзöдöма сё сайö туялан удж Россияын да мудор сайын, на лыдын небöггъяс: Коми язык: самоучитель коми языка. С., 1992; Причастие в коми языке. Екатеринбург, 1997; Перым-коми гижöд кыв. С., 1999.

ЮРИНДАЛЫСЬ

В о д з к ы в п ы д д и	3
1 юрпас. Фин-угор войтыръяс	5
2 юрпас. Коми му важ кадö	10
3 юрпас. Коми вужъяс	19
4 юрпас. Эжва Перым (XI–XIV-öд нэмъяс)	24
5 юрпас. Мёскуаса öксыув дорö Коми муöс öтлаöдöм . . .	34
6 юрпас. Коми му XVI-öд нэмсянь XIX-öд нэмöдз	48
7 юрпас. Коми му XIX-öд нэмлөн мöд джынйын	79
8 юрпас. XIX-öд нэмын коми войтырлөн культура	98
9 юрпас. Коми му XX-öд нэм заводитчигөн	113
10 юрпас. Урасьöмсянь йирымöдз, сарсянь большевикъясöдз (1917–1918-öд вояс)	126
11 юрпас. Аскост тыш Комиын	134
12 юрпас. Коми автономия панöм	144
13 юрпас. 20-öд вояс — сöвман вояс	153
14 юрпас. Кыв да культура кыпалöм	158
15 юрпас. Кöдзыд 30-öд вояс	168
16 юрпас. Усть-Сысольскыс лöö Сыктывкар	180
17 юрпас. 1937-öд во — му вежандыр	187
18 юрпас. Айму вöсна Ыджыд тыш	197
19 юрпас. Сталин кадлөн пом (Коми му 1945–1953-öд воясö)	205
20 юрпас. Ульдылöм бöрын дудан кад (Коми АССР 1954–1985-öд воясö)	214
21 юрпас. Виль каръяслөн чужöм, ичöт сиктъяслөн бырöм	228
22 юрпас. Коми культуралөн сöвмöм да падмöм	238
23 юрпас. Вильмöдöм, аспöрлун, вежсьöм (Коми му 1986–1999-öд воясö)	250
Б ö р к ы в п ы д д и. Коймöд сюрсевоö вуджигөн	266
Гөгөрвоодана кывкудтор	268

Учебное издание

**Ольга Евтихеевна Бондаренко
Татьяна Михайловна Хорунжая
Евгений Александрович Цыпанов**

КОМИ ВЕК

**История Коми края с древнейших
времен до наших дней**

*Учебное пособие для средней школы
на коми языке*

Перевод на коми язык А.В. Ульянова

Редактор В.И. Трошева
Художественный редактор Г.Н. Шарипков
Технический редактор З.А. Поздеева
Корректор Н.Ф. Габова
Компьютерная верстка – А.В. Кетова

КР № 0034 от 03.03.1997 г.

Сдано в набор 18.12.1999. Подписано к печати 5.01.2000. Формат 60x84/₁₆. Бумага офсетная. Гарнитура «Школьная». Печать офсетная. Усл. печ. л. 15,81. Уч.-изд. л. 13,6 Тираж 1000. заказ № 10390.

Плр № 040225 от 09.11.1994 г.

Коми книжное издательство. 167982, г. Сыктывкар, ул. К.Маркса, 229.

Отпечатано в АО «Коми республиканская типография». ,
167982, г. Сыктывкар, ул. Первомайская, 70.